

MENTEM ALIT ET EXCOLIT



K.K. HOFBIBLIOTHEK
ÖSTERR. NATIONALBIBLIOTHEK

41. K. 56




~~U.S. 1720-72 =~~

41. K. 56.

LA VIE
DE SAINT
CHARLES
BORROMÉE,
CARDINAL DV TITRE
DE SAINTE PRAEDE,
& Archeuesque de Milan.

*Par Messire ANTOINE GODEAU,
Euesque de Vence.*



MG

A PARIS,
Chez THOMAS IOLLY, au Palais, dans la
petite Salle, aux Armes de Hollande,
& à la Palme.

M. DC. LXIII.

Avec Approbation, & Priuilege du Roy.

THE
LIBRARY
OF THE
MUSEUM OF
COMPARATIVE ZOOLOGY
AND
ANATOMY
OF THE
MUSEUM OF
COMPARATIVE ZOOLOGY
AND
ANATOMY



**SANCTVS CAROLVS
BORROMEVS CARDINALIS ARCIHE-
PISCOPVS MEDIOLANENSIS.**

L.S.





A MESSEIGNEVRS,
MESSEIGNEVRS
LES ILLVSTRISSES,
ET REVERENDISSES,
ARCHEVESQVES,
ET EVESQVES,
de l'Eglise Gallicane.



ESSEIGNEVRS,

*L'Histoire de la Vie de Saint
Charles vous appartient par tant
de titres, que vous la dedier, est
à ij*

EPISTRE.

*payer une dette, plutôt que vou-
 faire un present. Dieu le fit pa-
 roistre dans son Eglise, pour estre
 l'exemple des bons Euesques, en
 un temps où il plût à sa bonté d'y
 rétablir la Discipline qui s'y estoit
 extrêmement relaschée. Il luy don-
 na la plénitude de l'Esprit Episco-
 pal, afin de le répandre dans sa
 Prouince, & ensuite par toute la
 Terre. Il versa dans son esprit tou-
 tes les lumieres de la Science Ec-
 clesiastique; & dans l'Antiquité,
 nous ne voyons aucun Euesque qui
 l'ait iamais possédée avec une aussi
 grande perfection. En réglant son
 Diocese, il a réglé tous les autres;
 & les Actes de l'Eglise de Milan
 sont le Thresor commun de toutes
 les Eglises du Monde. Ainsi, dans
 tous les Siecles, le meilleur Eues-
 que sera celui qui pourra approcher
 le plus près de Saint Charles. Je
 sçay bien, MESSIEIGNEURS,
 qu'il y a beaucoup de choses en sa*

EPISTRE.

vie, & en son gouvernement, qui ne peuvent, ny ne doivent pas estre imitées. Son austerité & ses mortifications sont, dans la regle ordinaire, au dessus de l'imitation; & il faut que le mesme mouvement de l'Esprit de Dieu qui les luy a fait continuer iusques à la mort, y pousse ceux qui voudroient entreprendre de les pratiquer. Les Loix de l'Italie sont bien différentes pour les Euesques, des Loix des autres Royaumes; & la Iurisdiction de leur Tribunal y est aussi estendue qu'elle est resserrée en France, pour ne pas dire, aneantie. Il ne faut donc pas penser à faire cent choses qu'il a faites, ny à establir tous les Reglemens qu'il a établis, parce qu'ils seroient contre les formes de nostre Police. Mais ce n'est pas en ces choses, MESSEIGNEURS, que consiste l'Esprit Episcopal, & la perfection d'un Euesque. C'est

EPISTRE.

en son détachement de tous les biens de la Terre , en son esloignement de tout ce que le Siecle appelle Grandeur , & Fortune , en la mortification de ses passions : En un mot , c'est en l'amour pur & ardent de l'Eglise. Car comme tous les preceptes de l'Euangile , selon Saint Gregoire le Pape, aboutissent à un , qui est celui de la Charité: Ainsi tous les devoirs , & toutes les vertus d'un Euesque , sont comprises dans l'Amour de l'Eglise de IESVS-CHRIST , qu'il a aimée jusqu'à s'aneantir luy-mesme , & à répandre son sang pour elle. C'est de cet Amour que Saint Charles Borromée a esté un si grand & si merueilleux exemple , qu'il n'y a aucune action dans sa vie , où on n'y en reconnoisse l'embrasement, C'est quelque chose sans doute, MESSEIGNEURS , d'avoir soin de bien gouverner son Diocese , & de faire toutes les fonctions de sa

EPISTRE.

charge exactement. Mais ce n'est pas assez pour ceux qui ont l'honneur de continuer le Sacerdoce de IESVS-CHRIST sur la Terre, & de n'estre qu'un Pasteur avecque luy. Il faut que l'amour de leur troupeau soit l'Esprit qui anime ces actions; autrement ils seront des ouvriers inutiles, à qui le Prince des Pasteurs dira un iour, Je ne vous connois point. Cette verité est si claire, MESSIEIGNEURS, qu'elle doit convaincre & persuader tous ceux qu'elle regarde. Mais les exemples ont une force particuliere pour produire cet effet, & il ne manque rien à celuy de Saint Charles, pour estre accompli. C'est un but fort élevé, ie l'avouë; mais son élévation doit servir à faire faire un plus grand effort pour le toucher. Chacun en approchera selon la mesure de sa grace, & pour peu que l'on en ap-

. 2 .

E P I S T R E.

proche , on s'éloignera beaucoup de la terre, où un Euesque ne peut demeurer sans crime. Vous ne trouverez , MESSEIGNEURS , ny eloquence , ny doctrine en cette Histoire que ie vous presente, parce que i'ay songé à faire un miroir, dont la glace fust nette , & que parlant à mes Maistres , i'aurois esté ridicule de pretendre leur pouvoir enseigner quelque chose. Et certes , les actions de Saint Charles sont si riches d'elles-mesmes, qu'il n'est pas besoin d'y ioindre des ornemens estrangers, ou de les faire valoir par de belles paroles. Receuez donc, MESSEIGNEURS, cet ouvrage avec sa naïveté , & comme une marque du respect que ie vous porte , & de la passion avec laquelle ie suis ,

MESSEIGNEURS,

Vostre tres-humble & tres-obeïssant
Seruiteur & Confrere ,
ANTOINE , E. de Vence.



P R E F A C E.



L'Eglise que le Fils de Dieu a fondée sur sa parole, & sur la verité, qui sont deux choses immuables, ne doit pas sans doute estre considérée, comme vn Empire temporel, sujet à la vicissitude des choses humaines, & capable de diminution aussi bien que d'accroissement, ou par les grands Hommes qui y naissent, pour le gouverner, ou par la foiblesse des Princes, ou par la vertu des Peuples, ou par la corruption des mœurs. Toutefois comme cette Eglise est vne assemblée d'hommes, qui pour estre liez ensemble par le nœud sacré de la Religion, ne laissent pas d'estre capables de toutes les foibleses humaines, on ne doit pas trouver étrange, si pour sa police, on y remarque de grands changemens dans tous les Siecles qui se sont écoulés depuis sa naissance; & si quelques-vns sont aussi

P R E F A C E.

illustres par la sainteté des Pasteurs, & par l'innocence des brebis, que d'autres sont infames par l'ignorance des vns, & par la dissolution des autres. Les six premiers se peuvent appeller d'or, en comparaison de ceux qui les ont suivis; & autant que la Pieté Chrestienne estoit alors dans sa pureté, & en son plus beau lustre, autant depuis a-t-elle esté misérablement altérée; de sorte que si les anciens Fideles reuenoient au Monde en ces derniers temps, ils auroient beaucoup de peine à trouver quelque trace de leur Christianisme dans la vie de ceux qui se nomment Chrestiens. Mais celuy qui a pris l'Eglise pour son Espouse, n'a iamais manqué dans les Siecles les plus déreglez, de susciter quelques saints Pasteurs, & quelques saints Laïques, en qui l'Esprit Pastoral & Chrestien, non seulement se conseruoit, mais qui se cōmuniquoit au dehors par des exemples illustres de vertu, & qui reprochoit aux hommes abandonnez à leurs vices, leur pen de Foy, leur lascheté, & les desordres de leur vie toute Payenne. Et certes, si iamais cette prouidence particuliere a paru visiblement, ç'a

P R E F A C E.

esté dans le quinzième & le seizième Siecle, où Dieu a donné plusieurs Saints extraordinaires au Monde , pour le reformer , & pour le convertir. Il en auoit besoin , & il ne pouuoit estre plus corrompu. Le Clergé qui doit estre son flambeau , estoit tombé dans les tenebres d'une ignorance si prodigieuse, qu'à peine trouuoit-on vn Prestre qui fust capable d'enseigner les premiers Élemens de la Religion. L'estude de l'Escriture Sainte estoit tout à fait negligée. Les Liures des Saints Peres demeuroient enseuelis dans la poussiere des Bibliothèques , sans que personne presque songeast à les remuer. La Theologie s'enseignoit dans les Vniuersitez ; mais ce n'estoit que la Scholastique la plus chicaneuse , qui se reduisoit en questions inutiles , & s'éuanoüissoit en distinctions la plupart frivoles , & indignes d'arrester des esprits raisonnables. Pour la Theologie Positive , on n'en auoit pas seulement la moindre idée. Ceux qui auoient étudié les Lettres saintes de cette sorte, enseignoient le Peuple aussi miserablement qu'ils auoient esté instruits eux-mesmes ; & il ne faut que lire les plus

P R E F A C E.

eloquens Predicateurs de ce temps-là pour auoir pitié du mal-heureux estat où l'Eglise se trouuoit reduite par l'ignorance de ses Docteurs. La corruption de leur vie meritoit encore plus d'indignation, & de larmes. Car le sel de la Terre estoit tellement assady, que rien ne paroissoit capable de luy rendre sa saueur, & sa fecondité. La dignité des Prelatures estoit accruë, mais la Pieté des Prelats estoit mal-heureusement diminuée; & on voyoit tant de luxe, de vanité, & de dissolution en leur conduite, que c'estoit vn Prouerbe commun dans le Milanois, si tu veux te damner, fais-toy Prestre. Les Ordres Reguliers qui sont dans l'Eglise comme des azyles où se retirent les Fideles pour se garentir de la corruption du monde, & comme des piscines probatiques où se guerissent les maladies de l'ame, auoient perdu, (si on excepte celuy des Chartreux) cét esprit de pauvreté, & d'humilité, qui les auoit fait fleurir si long-temps. La deuotion y auoit introduit les richesses; & ces mauuaises filles en auoient banny leur mere, pour y laisser entrer l'ignorance, l'auarice, la desobeissance, & l'ambi-

P R E F A C E.

tion. Si tels estoient ceux qui deuoient montrer aux autres le chemin de la Piété ; que pouuoient estre les Peuples qu'ils auoient sous leur conduite ? La profonde ignorance des veritez de la Religion Chrestienne , & des deuoirs où elle oblige ceux qui la professent, cauſoit vn desordre si general , & vne corruption si grande dans les mœurs, que l'on pouuoit sans exaggeration s'écrier avec le Psalmiste. *Tous se sont Psal. 13. fouruoyez, tous sont deuenus abominables, il n'y a personne qui fasse le bien, il n'y en a pas vn seul.*

Le Diable qui ne fait ny trêue , ny paix , avec le Fils de Dieu , lequel l'a desia iugé , ne pouuoit pas souhaiter vn temps plus propre , pour auancer son mal-heureux regne , que celuy que nous venons de représenter. Aussi le fit-il avec vne insolence & vn succès qui n'auoit point encore eu d'exemple , par l'Herésie de Luther , & par celle de Calvin , dans lesquelles il ramassa presque tous les venins qu'il auoit répandus en toutes les Heresies anciennes , dont il auoit combattu l'Eglise. Ce fut vn feu qui en naissant se trou-

P R E F A C E.

ua si fort , qu'il embrasa presque tout le Septentrion , & y fit des ruines irreparables. Ce fut vn poison si subtil, & si violent qu'il corrompit les doctes , & les ignorans , & qu'il eut la force de faire passer pour impieté , vn culte Religieux , & vn culte profane , pour la veritable Pieté. La guerre qui s'estoit allumée entre François premier , & Charles Quint , Empereur , contribua beaucoup à l'auancement de ces deux Sectes , & principalement au progrès de la Lutherienne dans l'Allemagne, où les Princes l'ayant embrassée avec legereté , la defendirent par la force des armes , & se firent suiure de leurs Sujets , qui ont cette detestable coustume d'estre toujourns de la Religion de ceux qui leur commandent.

En ce mal-heureux temps, Dieu donna à son Eglise , Saint Ignace , Sainte Therese , & Saint Charles Borromée, comme trois remparts , pour garentir sa maison de la violence & des fureurs de l'orage qui l'attaquoit. Saint Ignace par l'establissement de sa Compagnie luy donna des ouuriers qui agissant selon son veritable esprit , commence-

P R E F A C E.

tent à réveiller dans les Laïques l'Esprit de la Piété Chrestienne, lequel y estoit tout à fait esteint, & qui allerent porter dans le nouveau Monde, la lumiere de l'Evangile. Sainte Therese brûlant de zele pour la défense de la Foy Catholique, reforma l'ordre des Carmes, & fonda par toute l'Espagne, des Couvents de saintes Filles, dont les austeritez, les veilles, & les prieres, auoient pour principale fin, l'extermination de l'Herésie, & le renouvellement de la deuotion dans l'ame des Chrestiens, par l'exemple de leur vie, plutost Angelique, qu'humaine. Mais Saint Charles Borromée vint au Monde pour reformer l'Eglise, comme vn de ses principaux Ministres, & pour donner aux Euesques, & aux Prestres, l'exemple de toutes les Vertus Episcopales, & Sacerdotales, dont ils doiuent estre ornez, s'ils veulent estre des Pasteurs fideles, & non pas des larrons, & des homicides de leurs troupeaux. C'est de ce Saint Archeuesque, dont i'ay entrepris d'écrire la vie pour ma propre instruction, & pour celle de beaucoup de saints Prestres qui m'ont

P R E F A C E.

pressé depuis long-temps , de la donner au public. Pietro Iussano , Prestre Milanois; vn Général de l'Ordre des Clercs Reguliers de Saint Paul ; & Ripamontius , Prestre du College Ambrosien, ont publié l'Histoire de Saint Charles, celuy-là en Italien , & ceux-cy en Latin fort élégant. Vn Prestre de l'Oratoire de France , a traduit l'Histoire du premier ; mais elle est fort ennuyeuse par sa longueur , & par la negligence du stile. I'ay donc crû que ie ferois vne chose vtile , si sans m'arrester à traduire ces Autheurs , ie me seruois de leurs Ouvrages , comme de memoires pour composer vne Histoire qui n'obmist aucune des actions principales de Saint Charles , & qui ne s'arrestast pas aussi au détail de beaucoup de petites choses assez inutiles pour l'instruction des Euesques , & des Prestres , que ie considerois comme ma fin. I'ay eu dessein que mon stile fust clair, & ie n'ay point meslé de doctrine avec ma narration, qui est toute seule vne leçon plus puissante que tous les passages que j'aurois pû alleguer. Il faut faire difference entre l'Histoire d'un Saint , & son Paneg.

P R E F A C E.

gyptique ; & comme la sècheresse en celuy-cy est blasmable , l'abondance en celle-là merite sans doute d'estre reprise , quand elle degenere en lieux communs. Ils interrompent le fil de la narration , & estouffent les choses qu'elle doit raconter , & que les Lecteurs cherchent dans le Livre qui les leur promet. S'ils sont doctes , ils sçauent tout ce que disent ces Auteurs , qui d'ordinaire est fort commun. Quand mesme l'erudition seroit singuliere , elle n'est pas en sa place , & son meslange à la simplicité du recit , fait vn corps disproportionné & monstrueux. S'ils sont ignorans , il passent cette doctrine qu'ils ne peuvent comprendre , & cherchent les actions du Saint , qu'ils ne peuvent demesler d'avec tous ces passages qui les accablent. Il n'y a rien de si facile que de les entasser sans les auoir leus dans leurs sources , & il ne faut que copier d'autres Livres qui les rapportent. Mais il n'est pas si aisé de narrer les actions avec ordre , & avec vne clarté qui soit lumineuse , sans estre éclarante , & vne grace qui soit parée sans ornemens. De tous les stiles , celuy qui a ce caracte-

P R E F A C E.

re , lequel conuient à l'Histoire , est sans doute le plus difficile, & celuy dont nostre Langue a le moins de modeles. J'ose adjouster , que peu de personnes en sont capables , & que beaucoup d'Autheurs qui enrichissent la France , par leurs Ouurages, ne pourroient pas descendre de la sublimité de leur diction à la naïueté de celle dont ie parle. Peut-estre n'y a-t'il pas plus de bons Iuges de sa beauté ; & pour vn admirateur de Saluste , & de Tite-Liue , on void cent admirateurs de Tacite & de Florus. Le stile de galimathias , & de pointes , a vn éclat qui ébloüit les esprits communs , dont sans doute le nombre sera tousiours le plus grand, & par consequent, le plus fort. La veritable Majesté, ou la pureté de l'elocution , ne iette pas ces brillans ; mais elle a vne lumiere plus douce , & plus naturelle , qui entre agreablement dans l'esprit , & qui fait decouurir la beauté des choses qu'elle veut monstrier. Enfin, il en est comme du feu des pierres contre-faites , qui est plus vif que celuy des bonnes pierres , ce qui n'empesche pas que celles-là ne soient des morceaux

P R E F A C E.

de paste, ou de verre coloré, qui parent vne femme la nuit dans vn bal, mais dont le iour feroit reconnoistre la fausseté.

J'ay distingué cette vie en Chapitres, pour m'accommoder au desir de beaucoup de personnes, à qui cette distinction a paru vtile pour le soulagement de leur memoire. Car ie sçay bien qu'elle est contraire aux exemples des Anciens dans la composition de leurs Histoires. Mais, comme j'ay pris garde à ne pas commencer ces Chapitres par des Lieux communs; ceux qui n'en voudront pas lire les tiltres, trouueront la suite d'une narration continuë. Il est vray que sur la fin du second Liure; il y en a quelques-vns qui sortent de cette exacte rigueur. Je l'ay fait tout exprès, à cause qu'ils sont moins pour raconter les actions de Saint Charles, que pour obliger les Lecteurs de faire vne particuliere attention sur elles, & d'en tirer l'instruction dont ils ont besoin. En quelques autres endroits, ie fais des reflexions; mais elles sont si rares, & si courtes, qu'elles n'interrompent point du tout le recit des actions que

P R E F A C E.

j'ay à rapporter. C'est proprement le fruit de l'Histoire, qui cherchant à instruire les vians par ce que les morts ont fait, doit s'arrester en certains lieux, pour en tirer des preceptes, qui sont comme des principes infaillibles, & des conclusions necessaires pour la conduite de la vie des Lecteurs. Je ne sçay si ie ne parle point quelquefois avec trop de liberté ; mais ie ne croy pas qu'elle doive offenser personne. Il est impossible de mediter long-temps sur les actions de Saint Charles, & de ne pas prendre quelque air de cette liberté Episcopale qui rendoit la verité si puissante en sa bouche, & qui luy a fait faire de si grandes choses. Il n'y a que deux moyens de dire les veritez dont ie parle, ou en preschant, ou en écriuant. Mais n'y auroit-il pas de l'imprudence de donner en Chaire, de certains aduis aux Pasteurs, ou de crier cōtre le desordre de leur vie, ou de découvrir la corruption de la Discipline Ecclesiastique? Cette correction ne changeroit pas les personnes qui en auroiēt besoin, & elle pourroit faire de dangereuses impressions dans l'esprit des

P R E F A C E.

Peuples , qui seroient ravis d'auoir des excuses de leurs déreglemens , en la personne des Pasteurs qui les conduisent. Il ne reste donc que les Liures qui ne tombant pas entre les mains de tout le monde , peuuent vtilement instruire , & qui épargnent la honte & la rougeur à ceux qu'ils aduertissent de leurs fautes. Ie me mets du nombre de ceux contre qui ie parle ; & ie me trouue si esloigné de la plus petite vertu de ce grand Archeuesque, que ie confesse qu'il est moins mon exemple , que mon desespoir. Enfin , ie n'ay considéré en écriuant cette Vie , que le profit de mes Freres , que Dieu a daigné appeller au Sacerdoce Euangelique. Si sa bonté veut rendre mon trauail vtile pour leur instruction ; si les veritez que i'ay écrites peuuent s'imprimer dans nos cœurs , & y allumer quelque estincelle du feu diuin dont ce Saint Cardinal estoit embrasé ; i'auray recueilly toute la recompense que i'ay pretendue. Ie ne defendray point mes fautes , quand on me les fera connoistre : & s'il s'estoit glissé quelque chose dans

P R E F A C E.

cet Ouvrage qui ne fust pas conforme
à la Doctrine de l'Eglise, ie le con-
damne, & ie suis prest de l'effacer avec
que mon sang.



HYMNE



H Y M N E
D E
S. CHARLES
BORROME'E,
Cardinal & Archeuesque de
Milan.

M *V S E, qui d'une sainte
audace,
T'éleues iusques dans les
Cieux,*

*Méprisant le front glorieux
Des deux Montagnes de Parnasse ;
Messagere du Roy des Roys,
Chaste Interprete de ses Loix,
Descends du Globe des Estoiles ;
Et montre à mon cœur transporté,
Mais sans nuages, & sans voiles
Tous les trésors de ta beauté.*

É

Hymne de S. Charles



*Entre dans les jardins celestes
Dont les parterres tousiours verts,
Ne craignent point de nos hyuers
Les rauages les plus funestes ;
Forme des plus brillantes fleurs,
Dont la Gloire y peint les couleurs,
Vne guirlande renommée ;
Et pour le plus Saint des humains,
Pour l'admirable Borromée ,
Vien me la mettre dans les mains.*



*Docte Ouuriere de merueilles,
Il faut d'un art industrieux ,
Joindre en ce chapeau precieux ,
Les Lys blancs , aux Roses vermeilles ;
Des Martyrs, Charles tient le rang,
Quoy qu'il n'ayt pas versé le sang
Qui couloit dans ses chastes veines ;
Il n'eut ny Tyran , ny Bourreau ;
Mais l'Amour, dans de longues peines,
Le fit Martyr de son Troupeau.*





*Vierges , beaux Anges de la terre ,
Qui dans vn corps , viuant sans corps ,
Portez de si riches thresors ,
Dans de fresles vaisseaux de verre ;
Charles a choisi vostre Espoux ,
Il porta des Lys comme vous ,
Il gagna la mesme victoire ;
Et pour conseruer ces beaux Lys ,
Charles renouuella la gloire
De vos Siecles enseuelis.*



*Dans les Ecoles de Pauie ,
L'orgueil du Demon inhumain
Voulut tendre vn doux piege en vain ,
A l'innocence de sa vie.
La sainte lumiere des Cieux ,
Descouurit bien-tost à ses yeux
Le mortel danger de ce piege ;
Et sa flâme , au fond de son cœur ,
De la Volupté qui l'assiége ,
En fit l'admirable vainqueur.*



Hymne de S. Charles



*Vn Ennemy remply de charmes ,
Pour ébranler sa fermeté ,
Employa ce que la beauté
A de plus puissant dans ses armes :
Elle luy lança ses regards ,
Qui luy faisoient de toutes parts
Gagner mille iniustes trophées ;
Mais Charles rompit tous ses traits ,
Ses flâmes furent étouffées ,
Et ses plus doux charmes défaits ,*



*Ainsi dans l'ardente fournaise
Où les Hebreux furent iettez ,
Le feu pour eux , eut les clartez ,
Et n'eut pas l'ardeur de la braise ,
De doux & de plaisans Zephirs
Y firent aux ieunes Martyrs ,
Ressembler leurs fraîches haleines ;
Et de ces embrasez Tombeaux ,
Les flâmes furent inhumaines
Seulement contre leurs Bourreaux ,*





*L'orgueilleux Tyran qui gouverne
Avec vn dur sceptre de fer,
Le Peuple tremblant de l'Enfer,
En pleure au fond de sa caverne.
Il gemit de voir vn Enfant,
Par vn exploit si triomphant,
Commencer sa course innocente,
Renverser desia ses Autels,
Et de sa lumiere naissante,
Ebloüir les yeux des mortels.*



*Quand pour ôter le voile aux choses,
L'Aurore sur le front des Cieux,
Seme d'vn vase precieux,
L'or, parmy l'azur, & les roses;
Toujours le Midy du Soleil,
En lumiere, n'est pas pareil,
A la lumiere de sa source;
Et souuent au bord de Calis,
Avant qu'il finisse sa course,
On voit ses feux enseuelis.*



Hymne de S. Charles



*L'Aurore du grand Borromée ,
Où l'ardeur aux clartez se joint ,
D'un feu que les autres n'ont point ,
Desia se fit voir enflâmée :
Son Midy pour ses ennemis ,
Fut plus chaud que n'auoit promis ,
La Grace naissante en son ame ;
Et quand il vint à l'Occident ,
Ce Midy tout remply de flâme ,
A peine parut-il ardent. .*



*Il est temps que Dieu qui l'éclaire ,
Tire ce lumineux Flambeau ,
De ce domestique Tombeau
Où sa flâme est trop solitaire.
Il faut qu'à Rome il fasse voir ,
Avec un absolu pouuoir ,
Vne innocence toute entiere ;
Et que sur ce grand Horizon ,
Il répande cette lumiere
Que Milan tenoit en prison.*





*Son Oncle au Throsne de S. Pierre
Où Dieu venoit de le placer ,
Voyoit deuant luy s'abaisser ,
Les plus grands Throsnes de la Terre.
D'un vol aussi prompt qu'un éclair,
Parmy les vastes champs de l'air,
A Milan , la nouvelle en vole ;
Tout s'esmeut , & les plus Puissans,
A Charles , comme à leur Idole ,
Offrent leurs vœux & leur encens.*



*Charles seul à cette nouvelle ,
A l'esprit comblé de douleur,
Et pour luy, nomme un grand mal-heur,
Ce que sa fortune on appelle.
Il pleure , & l'on se resioit ,
Où l'œil des autres s'ébloit ,
Il ne voit rien qui l'ébloisse ;
Ce Pontife si glorieux ,
Luy paroist sur le precipice ,
Quand on le croit proche des Cieux.*



Hymne de S. Charles



*Contre le Vaisseau de l'Eglise
Tous les vents soufflent débaisnez,
Les Heretiques mutinez
De le perdre ont fait l'entreprise.
Luther de ses barbares mains,
Contre luy, parmy les Germain,
Excite vn dangereux orage;
Et Caluin, parmy les François,
Veut en vn semblable naufrage,
Enseuelir toutes ses Loix.*



*Il voit au fort de la tempeste,
Qu'eleue l'orgueil du Demon,
Que Pie en a pris le timon,
Et qu'à le conduire il s'apreste.
Il sçait que ce Vaisseau diuin,
Malgré Luther, malgré Caluin,
Ne peut s'abîmer quoy qu'il flote;
Mais voyant la fureur de l'eau,
Son amour craint pour le Pilote,
S'il ne craint pas pour le Vaisseau.*



Borromée.



*En cette sainte inquietude
Dont son esprit est agité,
Il recourt à l'austerité,
Aux veilles, à la solitude.
Durant le calme de la nuit,
Il pleure, il soupire sans bruit,
Deuant Dieu, son cœur il déploie;
Et Pie, en cet heureux moment,
Où des autres il fait la ioye,
Fait & sa crainte, & son tourment.*



*Il faut enfin pour le résoudre
A quitter le natal séjour,
Que Pie oubliant son amour
Menace sa teste du foudre.
Lors il obeit à la voix
Du grand Pasteur de qui les droits
Sont absolus sur les Fideles;
Et dans Rome, il vient recevoir,
Avec des bontez paternelles,
Le partage de son pouuoir.*



Hymne de S. Charles



*Cinq lustres n'auoient pas encore
Fait pour luy leur rapide tour,
Depuis que son œil voit le iour,
Se leuer au riuage More.
Mais son esprit est desia meur,
Le Ciel de son feu le plus pur,
Des ans a purgé la foiblesse;
Il estonne le Champ de Mars,
Et son admirable ieunesse,
Fait bonte aux plus sages vieillars.*



*La Cour en foule l'ennuironne,
Mais il connoist bien que la Cour,
A plus de respect, & d'amour,
Pour son rang, que pour sa personne.
Il sçait que chaque Adorateur,
Est vn vain & lâche flatteur,
Qui de ses hommages se joue,
Et d'un culte aussi diligent,
Sert des Dieux qui sont faits de bouë,
Que des Dieux faits d'or, & d'argent.*





*Mais bien-tost cette Cour flatense
Voit en luy des dons esclatter ,
Qu'il ne luy fallut point flater
Par vne peinture menteuse.
De ses mœurs l'auguste splendeur ,
La simplicité, la candeur ,
Firent bien-tost taire l'enuie ;
Il fut sa vivante leçon ,
Et l'innocence de sa vie ,
N'eut le crime, ny le soupçon.*



*La pourpre à ses yeux paroist teinte
Non pas de la main des mortels ,
Mais du sang dont sur nos Autels ,
On offre la Memoire sainte.
Il voit en ce miroir brillant ,
L'amour pur , le zele brûlant ,
Que son rang illustre desire ;
Et pour les flâmes de son cœur ,
C'est vne leçon de Martyre ,
Plustost qu'une marque d'honneur.*



Hymne de S. Charles



*A le voir du soin de l'Eglise ,
Dans sa jeunesse , se charger ;
Lors qu'un si visible danger
Accompagne son entreprise :
Il semble en audace pareil ,
A ce jeune Fils du Soleil ,
Qui pensa bruser l'Hemisphère ,
Quand d'un dessein audacieux ,
Montant dans le Char de son Pere ,
Il voulut éclairer les Cieux.*



*Ce n'est point une ieune audace
Qui porte Charles vainement
Au suprême gouvernement ,
La voix de Dieu mesme l'y place.
Aussi n'est-il point estonné ,
Lors qu'il se voit environné
D'Ennemis qui luy font la guerre ;
Et durant son penible tour ,
S'il embrase toute la Terre ,
C'est d'un embrasement d'amour.*





*Ainsi le Roy de la lumiere,
Qui nous mesure les saisons,
Voit des Monstres dans ses maisons,
Sans que son Char tourne en arriere.
Devant l'ardeur de son flambeau,
Et le Belier, & le Taureau,
Baissent leurs lumineuses cornes,
Le Lyon ardent s'adoucit,
Et dans de plus estroites bornes,
Le Scorpion se racourcit.*



*Lors que son Eglise l'appelle,
Il rompt aussi-tost ses liens,
Le credit, les charges, les biens,
Cedent à l'ardeur de son zele.
Elle le reçoit à genoux,
Elle attend de ce Saint Esponx
La fin de ses longues miseres;
Et croit paroistre deormais,
Côme aux plus beaux temps de ses Peres,
Brillante de diuins attraits.*



Hymne de S. Charles



*Milan est couuert des tenebres
De l'ignorance & de l'erreur,
Le Demon y regne en fureur,
Sur les Testes les plus celebres.
La fourbe s'y reduit en art,
L'amitié s'y couure de fart,
Le cœur y dement les paroles,
L'interest y donne la Loy,
Et comme d'antiques Idoles,
On conte l'Honneur, & la Foy.*



*En ombre la clarté s'y change,
Le Vice loin de s'y cacher,
S'y montre, y regne, y fait pecher,
De son mal tire la loüange.
La majesté de la Vertu,
Gemit sous son Trofne abbattu,
On la meffrise, on l'abandonne;
Et dans cét abandonnement,
Comme d'un prodige on s'estonne,
De luy voir faire quelque Amant.*





*Ce Monstre qui n'a point d'oreille
Pour les conseils de la raison ,
Qui vit de son propre poison ,
Que la seule rage conseille ;
La haine au cœur rempli de fiel ,
D'horreur y fait fremir le Ciel ,
Par les excès de sa furie ;
Et le Seigneur de tous costez ,
Oyt vne voix de sang , qui crie
Vengeance de ses cruantez.*



*Cette agreable Enchanteresse
Qui trempe dans vn doux venin ,
Ce trait qui semble si benin
Au premier moment qu'il nous blesse ;
La molle , & douce Volupté ,
X brusle avec impunité ,
Mille cœurs de sa flâme impure ;
Et n'y donne dans les plaisirs ,
D'autre Loy , ny d'autre mesure ,
Que le goust , & que les desirs.*



Hymne de S. Charles



*Les sacrez Ministres des Temples
Y deshonorent les Autels,
Et des crimes les plus mortels,
Y donnent de plus noirs exemples.
Les Pasteurs tirent des Brebis,
La nourriture, les habits,
Boient leur lait, tondent leur laine;
Et sans soin d'un Troupeau si doux,
Le laissent errer dans la plaine,
En proie à la rage des Loups.*



*Ceux qu'une sainte solitude,
Par le vœu tenoit attachez,
En ont tous les nœuds relâchez,
En baissent la servitude.
Ils laissent leurs bois innocens,
Ils prennent la Loy de leurs sens,
Leurs fautes ne sont plus secretes;
Et dans ce noir égarement,
On voit se changer en Cometes,
Les Estoiles du Firmament.*



Borromée.



*Les Vierges , ces chastes Epouses
Du chaste Fils du Roy des Rois ,
De son amour , ny de ses Loix ,
Ne sont plus saintement jalouses.
Au lieu de luy donner des pleurs ,
De sentir ses seules douleurs ,
De luy consacrer tous leurs charmes ;
Tous ces sentimens sont bannis ,
Et quand elles versent des larmes ,
C'est pour le trespas d' Adonis .*



*Charles , voulez-vous donc conduire ,
Ce Troupeau grondant de fureur ,
Qui fait gloire de son erreur ,
Et qui bait qui le veut instruire ?
Dans la crainte d'estre conduit ,
Chacun s'allarme , fait du bruit ,
A la défense se prepare ,
Medite des rebellions ,
Et dans cette guerre barbare ,
Les Brebis deviennent Lyons .*



Hymne de S. Charles



*Mais la guerre la plus cruelle ,
A Charles n'oste point le cœur ,
Et pour en demeurer vainqueur ,
Au secours , la Grace il appelle.
Il a tousiours les yeux ouuerts ,
Il suffit à cent soins diuers ,
Dans son zele il se montre sage ;
Et ce zele tousiours nouveau ,
Dort encore moins que la rage
De l' Ennemy de son Troupeau.*



*Son esprit iamaïs ne repose ,
Son esprit n'est iamaïs lassé ,
Et quand vn trauail est passé
Vn plus penible il se propose.
Il prie , il menace , il promet ;
S'il punit c'est avec regret ,
Mais iamaïs la peine n'excede ;
Et contre la corruption ,
Elle est plustost vn doux remede ,
Qu'une rude punition.*



Borromée:



*Avec ceux qui se réjoüissent ,
Ce grand Pasteur se réjoüit ,
Et sans les flatter , il ioüit
De tous les biens dont ils joüissent .
Avec ceux qui versent des pleurs ,
Il pleure, & plaignant leurs mal-heurs ,
Il fait bien-tost cesser leur plainte ;
Avec le brutal , il est doux ,
Enfin , par sa Charité sainte ,
Il est toutes choses à tous .*



*S'il parle , encore qu'il n'employe
Ny sens , ny discours recherchez ;
Il n'est , ny pecheurs , ny pechez ;
Qu'il n'abatte , qu'il ne foudroye .
Son discours n'est pas vn éclair ,
Qui brille vn moment parmy l'air ,
Sans dissiper sa nuit profonde ;
C'est vn Astre tousiours brillant ,
Dont la flâme claire , & feconde ,
A tousiours vn éclat brülant .*



Hymne de S. Charles



*A la parole , il joint l'exemple ,
Son cœur ne se dément jamais ;
On le voit pur dans le Palais ,
Comme on le voit pur dans le Temple ,
La Penitence , l'Oraison ,
Bannissent loin de sa maison ,
L'éclat du luxe magnifique ;
Sa Famille en vertu reluit ,
Et c'est l'Eglise domestique
Où son Diocèse s'instruit.*



*Aux pieds il foule les richesses ,
Et pour secourir son Troupeau ,
Il verse l'or comme de l'eau ,
Dans ses charitables largeesses.
En luy les pauvres ont tousiours ,
Un inépuisable secours ,
Pour leur indigence cruelle ;
Et quand , sans qu'il leur ait rendu
Quelque assistance paternelle ,
Le iour passe , il le croit perdu.*



Borromée.



*Il est le Mary de la Veuve ;
Et le Pere de l'Orphelin ,
Son zele , en leur mauvais destin ,
Par son assistance s'éprenue
Contre l'effort des plus Puissans ,
Il sert aux foibles Innocens
De Protecteur inébranlable ;
Tout cede à son cœur genereux ,
Et pour le trouver favorable ,
Il suffit d'estre mal-heureux.*



*Milan , à la haute puissance ,
Luy voit joindre l'humilité ,
La douceur , l'affabilité ,
La modestie , & l'innocence.
Nuls maux ne le peuvent troubler ,
Nulles fatigues l'accabler ,
Nulles delices le seduire ,
Nulles promesses l'ébloüir ,
Nul propre interest le conduire ,
Et nul faux bien le rejoüir.*



Hymne de S. Charles



*Charles, par cét art admirable
De combattre ses Ennemis,
Voit l'orgueil du Demon soumis
Au ioug de la Croix adorable.
Si par tout le Vice ne fuit,
Au moins ce n'est que dans la Nuit,
Qu'il commet ses œuvres tragiques;
Il cede à l'honneste pudeur,
La Foy regne, & les mœurs antiques
Reprennent leur vieille candeur.*



*Alors la Haine ouvre l'oreille
Aux saints aduis de la raison,
Elle deteste son poison,
Et la Charité la conseille.
Elle perd l'aigreur de son fiel;
Pour venger la gloire du Ciel,
Elle entre contr'elle en furie;
Et ses larmes, de tous costez,
Sont vne voix d'amour, qui crie
Le pardon de ses cruautés.*





*D'une infidelle Enchanteresse ,
On craint l'agréable venin ,
Plus son traict semble estre benin ,
Plus on a de peur qu'il ne blesse.
Les fureurs de la Volupté ,
Ne trouuent plus d'impunité ,
Les ames ayment d'estre pures ,
La Vertu conduit les desirs ,
Et l'Euangile est la mesure
Par qui se reglent les plaisirs.*



*On voit les Ministres des Temples ,
Seruir saintement les Autels ,
Et de l'innocence aux Mortels
Monstrer les plus nobles exemples.
Les Pasteurs donnent leurs habits ,
Pour conuier leurs cheres Brebis ,
Lors qu'elles ont perdu leur laine ;
Et ce Troupeau leur est si doux ,
Qu'ils veillent tousiours dans la plaine ,
De peur de la rage des Loups.*



Hymne de S. Charles



*Les Moines dans leur solitude ,
Ayment à se voir attachez ;
Des nœuds qu'ils auoient relâchez ,
Ils benissent la seruitude .
Ils aiment leurs bois innocens ,
Ils refusent tout à leurs sens ,
Leurs grandes vertus sont secrettes ;
Et par vn heureux changement ,
Ceux qui parurent des Cometes ,
Sont des Astres du Firmament .*



*Du Seigneur les chastes Espouses ,
Le preferent à tous les Rois ;
De son honneur , & de ses Loix ,
Elles sont ardemment jalouses .
Songeant à ses longues douleurs ,
Leurs yeux dans des torrens de pleurs
Se plaisent à noyer leurs charmes ;
Tous autres pensers sont bannis ,
Et la Grace esteint dans leurs larmes ,
Toutes les flâmes d' Adonis .*



D'vne



*D'une confuse Babylone ,
Où regnoit l'impudicité ,
Milan devint vne Cité
Où la Grace est comme en son throsne.
Du grand succès de son travail,
Du changement de son bercail,
Charles à toute heure s'estonne ;
Et dans vne amoureuse foy,
Il en offre à Dieu la couronne,
Et garde le travail pour soy.*



*Ainsi durant le regne sombre
De l'Hyuer aux cheueux mouillez ,
Des bras des arbres despoüillez
Il tombe des feuilles sans nombre.
Les champs , les jardins les plus verds,
De frimats , de neiges couverts,
Monstrent vne effroyable face ;
Et les eaux dans leur lit natal,
Sentent dessous vn frein de glace
Durcir leur liquide crystal.*



Hymne de S. Charles



*Les Moines dans leur solitude ,
Aiment à se voir attachez ;
Des nœuds qu'ils auoient relâchez ,
Ils benissent la seruitude .
Ils aiment leurs bois innocens ,
Ils refusent tout à leurs sens ,
Leurs grandes vertus sont secrettes ;
Et par vn heureux changement ,
Ceux qui parurent des Cometes ,
Sont des Astres du Firmament .*



*Du Seigneur les chastes Espouses ,
Le preferent à tous les Rois ;
De son honneur , & de ses Loix ,
Elles sont ardemment jalouses .
Songeant à ses longues douleurs ,
Leurs yeux dans des torrens de pleurs
Se plaisent à noyer leurs charmes ;
Tous autres penfers sont bannis ,
Et la Grace esteint dans leurs larmes ,
Toutes les flâmes d' Adonis .*



D'une



*D'une confuse Babylone ,
Où regnoit l'impudicité ,
Milan devint vne Cité
Où la Grace est comme en son throsne.
Du grand succès de son travail,
Du changement de son bercail,
Charles à toute heure s'estonne ;
Et dans vne amoureuse foy,
Il en offre à Dieu la couronne,
Et garde le travail pour soy.*



*Ainsi durant le regne sombre
De l'Hyuer aux cheueux mouïllez ,
Des bras des arbres despoiillez
Il tombe des feuilles sans nombre.
Les champs , les jardins les plus verds,
De frimats , de neiges conuerts,
Monstrent vne effroyable face ;
Et les eaux dans leur lit natal,
Sentent deffous vn frein de glace
Durcir leur liquide crystal.*



Hymne de S. Charles



*Mais lors que du froid Capricorne
Le Soleil retire ses feux,
Et que du Belier lumineux,
Il touche la brillante borne;
Les forêts éclatent de vert,
Le sein de la Terre est couvert,
D'un riche esmail de fleurs nouvelles;
Et d'un cours libre, & diligent,
Les sources qui semblent plus belles,
Font rouler leur liquide argent.*



*Ce n'est pas que Charles sans peine,
Sans Rivaux, & sans Ennemis,
Aux Loix de l'Eglise ayt soumis
De Milan la teste hautaine,
Sous des pretextes specieux,
Des Gouverneurs audacieux
Souvent traverserent ses ouvrages;
Mais Dieu fut toujours son appuy,
Et le sifflement des * Couleuvres
Ne fut point venimeux pour luy.*

*Ce sont
les Ar-
mes de
Milan.





*Le Demon qu'il coméila d'outrages,
Sort de ses tenebreux cachots,
Il fait pour troubler son repos,
Souleuer cent tristes orages:
Il vnit contre ses desseins,
Les Pecheurs avecque les Saints,
Il nomme son zele, imprudence,
Ses caresses, desloyauté,
Sa compassion, inconstance,
Et sa constance, cruauté.*



*Quand il voit cét Homme celeste
De tous les orages vainqueur,
La rage à son perfide cœur
Inspire vn dessein plus funeste.
Sous la forme d'un Apostat,
Il veut par un lâche attentat,
Mettre la couronne à ses crimes,
Et ravier d'entre les Martels,
Celuy qui ravier les victimes,
Et l'encens à tous ses Autels.*



Hymne de S. Charles



*Il délasche l'arme enflâmée,
Le feu brille comme vn éclair,
Et d'un son aigu, parmy l'air,
Sifle la bale enuenimée.
Charles reçoit le coup brûlant,
Sans que son effort violent
Imprime qu'une trace noire;
Sainte Merueille de nos yeux,
Clair Monument de sa victoire,
Et de la puissance des Cieux.*



*Du Saint la Famille s'estonne,
Mais il fait ferme dans le lieu
Où son ame aux desseins de Dieu,
Dans la priere, s'abandonne.
Sous le noir manteau de la nuit,
Le lâche criminel s'enfuit,
Charles défend qu'on le poursuive,
Il le voit d'un œil paternel
Comme vne brebis fugitive,
Et non pas comme vn criminel.*



Borromée.



*Ainsi lors que tombe la foudre
Sur la pointe d'un vieux rocher,
Qui dans le Ciel se va cacher,
L'œil trompé croit qu'il est en poudre.
Il fume, il est couvert de feux,
De son sein sort un bruit affreux,
Et l'on diroit qu'il se dépîte;
Mais dans cet assaut véhément,
Il demeure sans qu'il s'agite,
Affermy sur son fondement.*



*Une ardente & maligne Peste,
Commence avec le nouvel an,
Et sur le superbe Milan,
Elle décoche un trait funeste:
Il vole le jour, & la nuit,
La Mort avec sa faux, le suit,
Et moissonne tout ce qu'il blesse;
Rien ne résiste à sa fureur,
Tout est abatu de tristesse,
Et tous les objets font horreur.*



Hymne de S. Charles



*A cette attaque violente ,
Milan aux desordres ouvert ,
Devient un horrible desert ,
Et n'a plus sa foule opulente.
Charles se voit abandonné ,
Mais son cœur , loin d'être estonné ,
S'arme d'une nouvelle force ;
A la fuite on le veut porter ,
Et le peril est une amorce ,
Qui l'oblige de s'arrester.*



*Il voit que pour punir les crimes ,
Des vains , & perfides Mortels ,
La peste , aux pieds des saints Autels ,
Offre ses Brebis pour victimes.
Pour elles il brasse d'amour ;
Pour elles , à Dieu nuit & iour ,
Comme victime il se presente ;
Et son inconsolable ennuy
Est de voir que la peste ardente ,
Pour elles , ne veut point de lay.*





*Il les soulage , il les console,
Par ses soins , & par ses discours ,
Et dans ce paternel secours ,
Les effets passent la parole.
Il les visite , & ne craint pas
L'horreur d'un visible tressas ,
Sous sa face la plus funeste ;
Et pour son Troupeau bien-aimé ,
Le plus ardent trait de la Peste
Moins que son cœur , est enflammé.*



*Quelles vertus , quelles merveilles,
Ne s'offrent encore à mes yeux !
Que leur nombre est prodigieux !
Quel riche sujet de mes veilles !
Mise , qui m'agitois le cœur ,
Je connois que ton feu vainqueur
Hors de mon ame se retire ;
Je te permets de me quitter ,
Et ie veux bien ne pouvoir dire ,
Ce que ie voudrois imiter.*



*VENERABILI FRATRI
Antonio Episcopo Venciensi,
Alexander P.P. VII.*

Venerabilis Frater, salutem, & Apostolicam benedictionem. Ex ex gratulatione fraternitatis tuæ, & ex libris qui nobis ingenij tui, & eruditionis testes sunt redditi, plurimum iucunditatis accepimus. Iis enim studijs te distineri cognouimus, ex quibus non parum dignitatis accedat, & ad personam quam geris, & ad Ecclesiæ procurationem, quæ tibi incumbit, vtilitatis. Licet in moribus & vitæ institutione plurimum sit, attamen in eo qui aliorum salutis præpositus est, qui salutaribus præceptis sibi traditos populos erudire debet, id præsertim requiritur, ut eos in sanâ, multiplicique doctrinâ sit potens exhortari, & qui contradicunt, redarguere. Te id sedulo curare atque uti diligentem patrem familias domus Domini bene præesse gratissimum nobis est, ac fraternitati tuæ de nostrâ beneuolentiâ, patrocinioque abundè pollicemur, & Apostolicam benedictionem amanter impertimur. Datum Romæ apud Sanctum Petrum, sub annulo Piscatoris, die 4. Martij, M. D. C. LVI. Pontificatus nostri anno primo.

NATALIS RONDININVS.

Approbation de Monseigneur l'Euesque de Montauban.

FAire des actions qui meritent d'estre suiuiues, & écrire des Ouurages qui contiennent des choses qu'on doïue imiter, ce sont deux manieres d'accomplir l'obligation d'estre l'exemple des peuples, que S. Paul a imposée à tous les Euesques, dont Monseigneur de Vence s'acquitte si parfaitement tous les iours, que la meilleure approbation qu'on puisse donner à ses trauaux, c'est de luy faire vn remercement public de les auoir faits, & le prier de continuer de donner vn si bel ornement à l'Eglise & à nostre Siecle. La lecture de son Histoire de la vie de S. Charles Borromée, m'a donné ce sentiment, avec la pensée de demander à Dieu, la grace de faire passer dans nos mœurs, comme en nostre langue, les actions d'un si grand Saint. C'est mon aduis que j'ay signé ce iour de sa Feste de l'année 1656.

PIERRE Euesque de Montauban.

*Approbation de Monseigneur l'Euef-
que de Chaalons Comte & Pair
de France.*

IL manquoit sans doute à l'edifica-
tion commune des Ministres de l'E-
glise, & à la gloire mesme de S. Charles
que sa vie admirable fust exposée au
public avec toute sa beauté, & son es-
clat. C'est ce qui est fait en ce Volu-
me, avec tant d'avantage, qu'il n'y
reste rien, ce nous semble, à desirer,
qu'une puissante grace, pour animer
ceux qui le liront à l'imitation du mo-
dele accompli de toutes les vertus
Chrestiennes, & Ecclesiastiques. Fait
à Paris le 29. Novembre 1656.

FELIX E. C. de Chaalons.

*APPROBATION DE MESS-
seigneurs les Euesques d'Amiens
& de Cousserans.*

Nous auons leu avec beaucoup de
soin & avec vne tres-grande sa-
tisfaction la vie de S. Charles Borro-
mée Archeuesque de Milan, & Cardi-
nal de l'Eglise Romaine, composée par
Monseigneur l'Euesque de Vence, non
seulement parce que c'est la vie d'un
grand Saint, pour lequel nous auons
eu de tout temps vne tres-singuliere
veneration, & que nous l'auons regar-
dé comme vn miracle de sainteté que
la Prouidence de Dieu (qui veille tou-
jours à la conduite de son Eglise) a vou-
lu opposer à la malignité de nos der-
niers Siecles, & dans lequel elle a vou-
lu verser avec plenitude l'Esprit de l'A-
postolat, & faire reuiure toutes les lu-
mieres & toutes les vertus des anciens
Euesques, & pour tracer aux nouveaux
le modele & l'exemple qu'ils doiuent
suiure, & pour faire voir iusques à
quel point de perfection peuent aller
les vertus Episcopales quand elles se
trouuent dans vn sujet digne d'elles,

& capable de les employer : mais encore parce qu'elle est depeinte avec tant de pureté, tant d'elegance, & d'une maniere si propre à laisser dans l'ame des Lecteurs, l'idée d'un veritable Pasteur, que nous sommes obligez en conscience de rendre témoignage au Public, que bien loin d'y auoir rien trouué qui soit contraire à la Foy & à la pieté Chrestienne, nous n'y auons rien leu qui ne soit capable d'exciter dans les Fideles les desirs de s'auancer dans la perfection, & dans les Ecclesiastiques, une sainte emulation de se sanctifier dans l'exercice de leurs diuines fonctions, par l'exemple de toutes les vertus Sacerdotales & Pastorales, qui ont esclaté, & mesme regné dans la vie de cet incomparable Archeuesque. Fait à Paris, où nous nous sommes trouuez pour les affaires de nos Eglises, le 7. Decembre 1656.

FRANÇOIS, E. d'Amiens.

BERNARD, E. de Couserans.



TABLE DES CHAPITRES
contenus dans la Vie de S. Charles
Borromée.

LIVRE PREMIER.

CHAPITRE PREMIER.

- D**ES Parens , & de la naissance de saint Charles, page 1
- II. S. Charles reçoit la Tonsure , & son Oncle luy resigne une Abbaye , dont il administre le revenu tres-sainement, n'estant encore âgé que de seize ans , 6
- III. De ses Estudes en Droit à Pavie , & de la maniere dont il s'y comporta. De la mort de son Pere, & de quelques autres actions de sa Vie, 9
- IV. S. Charles est fait Cardinal, & Archevesque de Milan , par le Pape Pie IV. son Oncle , & gouverne l'Eglise sous ce Pontificat , 16
- V. Des autres emplois de S. Charles , qui se fit Prestre apres la mort de son frere, 24
- VI. S. Charles fait conuoquer, & conclure le Concile de Trente qui auoit esté interrompu, 30
- VII. Suite de l'Histoire du Concile de Trente, 43
- VIII. Suite de l'Histoire du Concile de Trente, 51
- IX. Suite de l'Histoire du Concile de Trente , & sa Conclusion , 71
- X. Du soin qu'eût S. Charles de son Eglise de Milan , durant le temps qu'il en fut esloigné. Du voyage qu'il y fit : & de son premier Concile Prouincial. 89
- XI. S. Charles , apres l'élection du Pape Pie V. vient resider à Milan, & regle admirablement sa famille , 94

T A B L E

XII. De l'establissemment que fit S. Charles des Se- minaires dans son Diocese,	108
XIII. De la maniere dont il faisoit sa visite dans son Diocese,	116
XIV. De la visite qu'il fit de son Eglise Metro- politaine,	123
XV. De la visite des autres Eglises de la Ville de Milan; & de plusieurs establissemens de pieté que fait S. Charles.	132
XVI. S. Charles fait diuers establissemens de Religieux, & de Religieuses,	141
XVII. Des autres establissemens de pieté que fit S. Charles dans Milan,	149
XVIII. De la reforme que fit S. Charles de di- uers Monasteres,	158
XIX. De la visite des Chanoines de l'Eglise de la Scala,	164
XX. De la reforme des Humiliez, & de l'assas- sinat que l'on vouloit faire de S. Charles,	175
XXI. Des differends qui eust S. Charles pour la defensa de la Jurisdiction Ecclesiastique, avec les Gouverneurs de Milan, & les autres Magi- strats,	149
XXII. Suite du mesme sujet.	198
XXIII. Suite du mesme sujet,	212
XXIV. Suite du mesme sujet,	228
XXV. Suite du mesme sujet,	240
XXVI. Des choses que fit S. Charles durant les contestations pour la Jurisdiction,	253

L I V R E S E C O N D.

C H A P I T R E P R E M I E R.

DE la peste qui arriva à Milan, & de ce que
fit S. Charles durant cette calamité, 274.

II. Suite du mesme sujet, 280.

III. Suite du mesme sujet, 300.

DES CHAPITRES.

IV. S. Charles reforme plusieurs choses dans son Diocèse,	305
V. Du voyage que fit S. Charles à Thurin, pour visiter le S. Suaire,	316
VI. Des Conciles & des Synodes que tint Saint Charles, & de la façon dont il les célébroit.	325
VII. De la visite que fit S. Charles de quelques Vallées sujettes aux Suisses, & aux Grisons,	332
VIII. Suite du même sujet.	343
IX. De la dévotion de S. Charles pour la Mere de Dieu; & de quelques Translations de Corps Saints qu'il a faites,	355
X. De la manière dont S. Charles traitoit avec les Euesques, & les Prestres,	365
XI. De quelle façon S. Charles traitoit avec les Reguliers,	371
XII. De l'amitié qu'avoit S. Charles pour ses parens,	376
XIII. De la façon dont S. Charles traitoit avec ses domestiques,	382
XIV. De la droiture, & de la prudence de S. Charles dans ses affaires,	387
XV. De l'esprit naturel de S. Charles, de sa Science, & de sa manière de prescher,	394
XVI. De l'Esprit Episcopal de S. Charles,	399
XVII. De la dévotion de S. Charles,	406
XVIII. Des austérités corporelles de S. Charles,	412
XIX. Des occupations journalieres, & réglées de S. Charles,	429
XX. Du dernier voyage que fit Saint Charles à Rome,	427
XXI. De quelques autres actions de S. Charles avant sa mort,	434
XXII. De la maladie, & de la mort de saint Charles,	443
ELOGE. De S. Charles Borromée.	451

Extrait du Priuilege du Roy.

PAr grace & Priuilege du Roy, il est permis au Sieur Godeau Euesque de Venec, de faire imprimer, vendre & debiter, *La vie de S. Charles Borromée, Cardinal du Titre de Sainte Praxede, & Archeuesque de Milan,* & ce pendant le temps & espace de quinze ans consecutifs, à commencer du iour que ledit Liure aura esté acheué d'imprimer pour la premiere fois. Auec defence à toutes personnes, de quelque qualité & condition qu'elles soient, d'imprimer ou faire imprimer, en tout ou en partie, vendre & debiter, contrefaire & alterer ledit Liure, ny en distribuer aucune Edition contrefaite aux païs estrangers, à peine de confiscation des Exemplaires, & de l'amende portée par ledit Priuilege. Donné à Paris le 13. iour de Septembre 1651. Signé, Par le Roy en son Conseil, CONRART.

Et le dit Sieur Euesque a cédé son droit dudit Priuilege, à Augustin Courbé Marchand Libraire à Paris, pour imprimer, vendre & debiter la vie de S. Charles Borromée, durant le temps, & selon les clauses d'iceluy, suiuant l'accord fait entr'eux.

*Acheué d'imprimer pour la premiere fois,
le trentiesme iour de Decembre 1657.*

Les Exemplaires ont esté fournis.



LA. VIE
DE S. CHARLES
BORROME'E
CARDINAL

DV TITRE DE Ste PRAXEDE,
& Archeuesque de Milan.

LIVRE PREMIER.

CHAPITRE PREMIER.

*Des Parens & de la Naissance de
Saint Charles.*

LA Maison des Borromées est vne
des plus illustres de l'Italie, dans
la Duché de Milan, où elle posse-
de de grandes terres. Ripamon-
tius dans le premier Liure de la vie de Saint
Charles, décrit exactement la Genealogie
de cette Famille; Et quoy, dit-il, qu'il la
pût rapporter à Agenor, Fondateur de la
Ville de Pauie, il se contente de la compter
depuis vn Vitallianus qui fut conuertty par
Prodosime, disciple de S. Pierre, & qui

A

commandoit dans cette grande Cité. Pour le nom de Borromée, il auance qu'il vient de celuy de Bonromains, ou de Bonoromeo, qui signifie, *Bon aux Pelerins*, qui fut donné à vn Lazare, fils de Philippe, chassé par les Florentins de la Seigneurie de Santminiato, lequel en l'année du Iubilé, nourrit la pluspart des pauvres Pelerins qui venoient à Rome. Ce Philippe s'enfuit avec ses enfans, & vint s'habiter à Milan, ou les y enuoya, craignant les malheurs qui luy arriuerent. Mais sans m'engager dans l'embarras de cette Genealogie, ie me contenteray de dire, que Gilbert, fils du Comte Federic Borromée, se conduisit avec tant de prudence, durant la guerre qui fut si cruelle entre l'Empereur Charles-Quint, & François I. qu'il se maintint dans les bonnes graces de ces deux Princes, que la jalousie de la Souueraineté, & le desir de la gloire, qui se joignirent à des interêts de Couronnes, rendirent ennemis irreconciliables. Il épousa Marguerite de Medicis, sœur de Iean Iacques de Medicis, qui fut vn des plus renommez Capitaines de son temps, sous l'Empereur Charles, & du Cardinal Ange de Medicis, qui fut esleué au Pontificat, & s'appella Pie IV. La pieté les joignit encore plus étroitement que le lien du mariage; & dans vn temps tres corrompu pour les mœurs, ils conseruerent tousiours vne grande innocence, & menerent vne vie tres-esloignée de la dissolution des personnes de leur qualité. Gilbert gardoit la sainte coustume de

se confesser toutes les semaines, & de s'approcher de l'Eucharistie. Il recitoit tous les iours à genoux, le grand Office de l'Eglise, & ne sortoit jamais de sa maison qu'il n'y eust satisfait, & aux autres prieres qu'il y adjoûtoit encore. Il gardoit exactement les ieunes, & particulièrement celuy du Carême, & le faisoit observer à ses domestiques, du salut desquels il auoit autant de soin que du sien propre, sçachant qu'un pere de famille veritablement Chrestien, est l'Euesque de sa maison, & que celuy qui ne prend point de soin de ses domestiques pour les choses qui regardent le salut, est pire qu'un Infidele, & a déjà renié la Foy, comme dit l'Apostre. Il estoit plutôt le pere de ses Vassaux, que leur Seigneur, tant il auoit pour eux, non seulement de iustice qui l'empêchoit de les fouler tant soit peu, mais de bonté & de charité, qui le portoit à les assister dans toutes leurs necessitez, comme s'ils eussent esté ses enfans. Il ne gardoit presque point de mesure dans ses aumosnes : Et comme un iour on luy remonstroit qu'il deuoit songer à marier ses filles ; Il répondit, Qu'après sa mort, sa maison deuiendroit si grande, qu'elle n'auroit besoin d'aucune chose. Il auoit pris la coutume de ne se mettre jamais à table, qu' auparauant il n'eust fait faire une aumône considerable aux pauvres qui estoient à sa porte, estimant que la meilleure & la plus chrestienne action de grâces à Dieu, pour les biens dont il s'alloit seruir, estoit d'en faire part aux membres de son Fils.

1. à Ti-
moth.
chap. 5.

Marguerite , sa femme , l'imitoit parfaitement en toutes ses vertus : Et comme la vanité de sa condition ne put iamais l'esleuer ; les delices , ny les mauuais exemples des Dames de son siecle , ne purent aussi iamais la corrompre. Elle ne sçauoit dans Milan autre ruë , que celle qui alloit de son Palais à l'Eglise , à l'Hospital , & à quelque Monastere de Religieuses. Pour tout le reste du temps , elle demouroit enfermée chez elle , pour y exercer tous les offices d'une sainte Mere de famille vers son mary , ses enfans , & ses seruiteurs. Il ne faut pas s'étonner si S. Charles Borromée témoigna dès son enfance tant de pieté , estât né dans vne maison où on peut dire qu'elle estoit domestique , & ayant esté esleué dans son sein.

Naissance de S. Charles,
l'an 1538

Il naquit dans le Chasteau d'Arone , le second iour d'Octobre de l'Année 1538. sous le Pontificat de Paul , troisiéme du nom , & sous le regne de Charles V. lequel s'estoit rendu maistre de la Duché de Milan , par la force de ses armes. Auant qu'il vint au monde , la nuit estant fort obscure , les Soldats qui estoient en sentinelle dans cette Place , qui se gardoit fort exactement ; virent paroistre dans le Ciel , vne grande lumiere qui la couurit entierement , & qui dura l'espace de deux heures , iusques au point du jour , où Marguerite de Medicis accoucha de ce saint Enfant , qui deuoit éclairer toute l'Eglise. La naissance des grands Prelats a presque toujourns esté precedée par quelques signes extraordinaires , comme nous apprenons de l'Histoire Ecclesiasti-

DE S. CHARLES BORROME'E, Liu. I. ;
 que , Dieu voulant aduertir les peuples du
 riche present qu'il leur fait , afin de les pre-
 parer à le bien receuoir , & à s'en seruir. A
 peine le petit Charles fut-il capable de par-
 ler , & de l'vſage de la raison , que l'on vid
 en luy des marques de sa ſainteté future.
 Son Pere luy donna de bons Maistres pour
 luy apprendre les Lettres humaines, & pour
 auoir ſoin de la conduite de ſes mœurs.
 Mais il eſtoit ſi modeſte & ſi ſage dans ſon
 enfance meſme , qu'il ne leur donnoit ia-
 mais ſujet de luy faire la moindre repri-
 mande. Apres qu'il auoit quitté les Liures,
 toute ſa recreation eſtoit de baſtir de petits
 Oratoires, & de les parer de toutes les cho-
 ſes qu'il pouuoit auoir. Il ne ſe plaiſoit
 guere à iouer avec les autres enfans , mais
 ſur tout il fuyoit ceux qui eſtoient eſtourdis
 en leurs actions , & diſſolus en leurs paro-
 les. Vn iour il s'eſtoit caché dans vne chā-
 bre retirée du Chasteau où ſon Pere demeu-
 roit : & comme on le cherchoit par tout,
 vn des ſeruiteurs de la maiſon le trouua,
 qui faiſoit des compartimés avec des pom-
 mes , ſur vne table. Il le reprit aſſez bruſ-
 quement de ce qu'il s'eſtoit fait chercher ſi
 long-temps ; mais le petit Charles luy ré-
 pondit d'vn ton aſſeuré , *Pourquoy me cher-
 chiez-vous? ie m'amuſois icy à partager le mon-
 de en diuerſes regions.* Il ne ſçauoit pas , ſans
 doute , ny ce qu'il faiſoit, ny ce qu'il diſoit;
 & ſi ſon humeur euſt eſté moins tranquille,
 on euſt pû prendre cette action & ces paro-
 les , pour vn preſage qu'il deuoit eſtre vn
 iour quelque Conquerant. Mais Dieu qui

Le Comte
 te Gil-
 bert ſon
 perepréd
 vn grand
 ſoin de le
 faire biē
 éleuer.

Admira-
 ble ré-
 ponſe de
 S. Char-
 les.

parloit par sa bouche, voulut témoigner qu'un iour il seroit occupé à gouverner les Prouinces du monde Chrestien, comme il le fut en effet, sous le Pontificat de Pie IV. son Oncle.

CHAPITRE II.

Saint Charles reçoit la Tonsure, & son Oncle luy resigne vne Abbaye, dont il administre le reuenu tres-sainte-ment, n'estât encore âgé que de 16. ans.

S. Charles prend l'habit Ecclesiastique.

Les actions de deuotion qu'il faisoit tous les iours au delà de son âge, & l'inclination qu'il témoignoit à la vie Clericale, obligerent le Comte Gilbert de luy faire receuoir la Tonsure, & de l'habiller de long, ce qui luy donna beaucoup de ioye. Ce fut vne veritable consecration de ce saint Enfant au seruice du Seigneur, qu'il choisit pour le lot de son heritage, & pour sa portion. Encore qu'il ne sceust rien des deuoirs d'un Clerc, il ne laissoit pas toutesfois de s'en acquitter, par la modestie de son habit, par vne contenance graue, & estoignée de toutes les legeretez de l'enfance. Il frequentoit dauantage les Eglises, & estoit plus assidu à ouïr la parole de Dieu, de sorte qu'un bon Prestre de Milan, appelé Bonauenture Castiglione, qui estoit Prestre de l'Eglise Collegiale de S. Ambroise, ne le rencontroit iamais par les ruës, qu'il ne s'arrestât pour le caresser, ne le regardât

avec vn étonnement plein de respect, & ne luy fist des ciuilitéz extraordinaires. Quelques Gentilshommes Milanois qui le remarquerent, en furent étonnez, & luy en demanderent la raison; il leur répondit en Prophete; *Vous ne connoissez pas ce ieune garçon, ce sera vn iour la reformateur de l'Eglise. & il fera des choses tres-grandes.* Son Oncle, Iule Cesar Borromée, voyant en luy de si grandes dispositions à la pieté Ecclesiastique, luy resigna l'Abaye de S. Gratinien, & S. Felin, qui estoit située dans le territoire d'Arone. Son Pere prit le soin d'en gouuerner les rentes qui estoient fort bonnes; mais Charles s'estant instruit des obligations Canoniques des Abbez Commendataires, luy dit vn iour; *Qu'il le prioit tres-humblement de trouver bon, que le reuenu de son Benefice n'antrast point dans la dépense de sa maison; mais que puisque c'estoit le patrimoine des pauvres de IHSVS-CHRIST, il fust employé pour leur entretien.* Ce discours eut de ioye le Comte Gilbert, & il n'eust point de peine à remettre l'administration du temporel de cette Abaye à son fils, encore qu'il fust fort ieune, connoissant déjà sa prudence & sa pieté, qui l'empeschoient de soupçonner qu'il voulust s'en rendre maistre, pour le consumer en débauches comme faisoient les ieunes Abbez de son siecle. L'établissement des Commandes perpetuelles pour les Abayes, est vn des grands abus qui soit dans l'Eglise: & les choses en sont venues à ce point, que l'on n'en fait presque aucune distinction d'avec les fermes, & les

Son Oncle, Iule Cesar Borromée, luy resigne vne Abaye.

Il en veut gouuerner les reuenus.

terres purement seculieres. On en amasse autant que l'on en peut obtenir ; on se sert de toutes sortes de voyes pour les attraper ; & on en use de la mesme façon que l'on les a obtenues ; c'est à dire , que l'on ne songe qu'à faire vne grande dépense , qu'à prendre toutes sortes de plaisirs , ou qu'à enrichir ses parens , sans se mettre en peine bien souuent , ny de la reparation des Eglises qui tombent , ny de la regularité des Moines qui se débauchent , ny des pauvres des lieux où elles sont situées , dont la voix monte dans le Ciel pour crier vengeance contre ces prophanes dissipateurs de leur bien. Saint Charles tout ieune qu'il estoit , auoit bien d'autres pensées. Il se contenteroit de prendre son entretien fort moderé sur son reuenu , & employoit le reste , ou à l'embellissement de son Eglise , ou à la nourriture , & au soulagement des miserables. Quand il arriuoit quelquefois que son Pere auoit besoin de quelque somme d'argent , il la luy prestoit comme à vn étranger , & se la faisoit rendre fort exactement pour la donner aux pauvres , dont il gouuernoit le patrimoine avec plus d'exactitude qu'il n'eust fait le sien propre , s'il en eust esté le maistre. Ainsi il faisoit de bonne heure l'apprentissage de l'administration de ces grands biens Ecclesiastiques , dont vn iour il deuoit estre chargé , & donnoit à son Siecle les premices de ces merueilleux exemples qu'il en deuoit receuoir. Il attri-
roit par ses charitez les benedictions de celui qui veut auoir besoin de toutes cho-

ses en ses pauvres , afin de donner moyen à tous les hommes de le secourir , & à qui on preste à vne grosse vsure quand on fait l'aumosne, comme parle l'Escripture sainte.

CHAPITRE III.

De ses Estudes en Droit à Pauie , & de la maniere dont il s'y comporta. De la mort de son Pere, & de quelques autres actions de sa Vie.

QUand Charles eut acheué ces estudes, que l'on appelle d'Humanité , son Pere l'enuoya aussi-tost à l'Vniuersité de Pauie , pour y étudier en Droit Ciuil , & en Droit Canon , afin de le rendre propre aux charges & aux dignitez Ecclesiastiques, qui demandent en Italie cette sorte de science, & laquelle presque seule s'y trouue en credit. Il y abordoit vn grand nombre d'Escoliers de toutes sortes de Nations: & comme la plupart se trouuoient ieunes , & sans gouuerneurs qui eussent soin de la conduite de leur vie ; il ne faut pas s'étonner, si au sortir de la sujection du College , & de la maison paternelle , ils vsoient fort mal de leur liberté , & s'ils s'en seruoient pour s'abandonner à toutes sortes de débauches. Charles qui connoissoit les dangers où sa chasteté estoit exposée en leur compagnie, s'en retiroit avec soin, encore qu'il fust naturellement tres-ciuil , & tres-sociable. Il

1554.

Il meine vne vie fort retirée, & fort exemplaire dans Pauie.

A v

s'adonna serieusement à l'Estude , & apres estre sorty des Leçons publiques qu'il prenoit sous Alciat, le plus fameux Iuriconsultere de son temps , il l'alloit trouuer dans sa maison pour profiter de ses conferences particulières. Il auoit de la peine à s'expliquer , & plusieurs l'estimoient d'un esprit pesant , & peu propre aux lettres & aux affaires. Mais il a bien fait paroistre qu'ils ne le connoissoient pas , ayant gouuerné l'Eglise sous Pie IV. avec beaucoup de sagesse, rétablly la discipline Ecclesiastique dans la Prouince de Milan , avec vne vigueur admirable , & conduit son Diocese avec vne prudence merueilleuse. Plus il auançoit en âge , & plus il faisoit de progrès en la pieté. Toutes les occasions de corruption qui se presentoient à luy à chaque pas dans Pannie , ne seruoient qu'à luy donner plus d'horreur de la débauche de ses compagnons , & qu'à luy faire auoir recours à la priere avec plus de ferueur, pour obtenir de Dieu la conseruation de sa pureté, & au Sacrement de l'Eucharistie , pour se fortifier parla chair diuine de I. C. contre les tentations de la chair corrompue du vieux adam, qui luy donnoient lieu d'exercer son courage & sa patience. Il ressembloit à S. Basile, & à S. Gregoire de Nazianze, lors qu'ils estudioient dans Athènes, & il ne sçauoit comme eux que deux ruës , l'une qui menoit à l'Eglise , & l'autre qui conduisoit aux Ecoles publiques. Il recherchoit la conuersation des personnes pieuses , & elles se reputoient heureuses de connoistre ce Saint

ieune homme, qui dans les occasions continuelles du peché, dans le feu de la jeunesse, dans la liberté de contenter tous ses mauuais desirs, & parmy les mauuais exemples, viuoit avec vne pureté Angelique, & donnoit des leçons aux plus auancez en la sainte Deuotion. Quand le Comte Gilbert mourut, qui n'estoit âgé que de quarante-sept ans, il suporta cette perte comme vn bon fils, & comme vn vray Chrestien. Car ayant donné aux sentimens de la nature, ce que la tendresse gouuernée par la raison leur peut accorder, il regarda l'ordre du Pere celeste, & s'y soumit avec vne resignation si absolue, qu'on ne luy entendit rien dire, & qu'on ne luy vid rien faire qui pût estre sujet à la censure des plus seueres en ces rencontres. Cette mort le rappella à Milan pour auoir soin de sa famille, que ses parens luy confierét plutôt qu'au Comte Federic son aîné, à cause qu'ils auoient meilleure opinion de sa prudence. Il répondit à leurs esperances, ou plutôt il les surpassa, & par la bonne administration de sa famille, il fit comme vn apprentissage de l'administration de l'Eglise, dont l'Apôstre veut qu'elle soit vne marque. Il fut obligé de s'arrester quelque temps dans la terre d'Arone pour regler ses affaires: & comme il auoit vn soin particulier de celles de ses Benefices, il fut informé de la vie scandaleuse des Moines de son Abbaye. Son zele s'alluma si fort pour les reformer, que tout ieune qu'il estoit, & n'ayant point d'exemple qu'il pût suivre, il entreprit cec

ouvrage qui paroissoit presque impossible. Il eut tant de perséuerance à vaincre les difficultez qui s'y rencontrerent, qu'enfin par amour, & par la séuerité des peines regulieres, il en vint à bout, & remit dans cette maison dereglée, l'observation exacte de la Regle de saint Benoit.

Vn des
mes-
ti-
ques luy
tend vn
piege
pour luy
faire
perdre
sa cha-
steté; &
il resiste
à la ten-
tation.

Vn vieux seruiteur de sa maison qui suivoit des maximes bien differentes des siennes pour la conduite de sa vie, se faisoit de le voir si retiré, & appelloit le soin qu'il prenoit de conseruer sa chasteté, foiblesse d'esprit, & bigoterie. De luy proposer vne débauche, il sçauoit bien que ce seroit l'offencer, & qu'il fermeroit aussitost les oreilles. Il resolut donc de luy dresser vn piege, dont il ne püst se defendre, & de le jeter dans vne occasion où vn ieune homme de son aage vray semblablement se deuoit laisser aller. Ce fut d'introduire dans sa chambre vne Courtisane, qui par sa beauté, & par ses caresses, luy fist perdre vne fleur qu'il estimoit si chere & si precieuse. Quand son mauuais dessein ne reüssiroit pas, il le feroit passer pour vn ieu, & pour vne galanterie, & il estoit bien asseuré que l'autorité qu'il auoit dans la maison, le garentiroit de la colere de son maistre, & qu'il en seroit quitte pour quelques reproches. En effet, la chose se passa ainsi. Charles fut bien surpris de trouuer cette femme, lors qu'il entra dans sa chambre pour se coucher; & ne sçachant comment se deffendre d'elle autrement que par la fuite, il la prit sans

deliberer dauantage, comme s'il eust veu quelque effroyable serpent. Il auoit desia *1. Cor. c.* appris de l'Apostre qu'il falloit fuir, & non *6.* pas combattre la fornication, & qu'une femme du mestier de celle qu'il auoit rencontrée, auoit le venin & le feu dans les yeux, & dans toute sa personne; de sorte que c'estoit s'exposer à un danger manifeste d'estre vaincu, que de la vouloir vaincre en traitant tant soit peu avec elle. Il n'auoit gueres moins de peur de celles que leur vertu mettoient hors de tout soupçon, & qui luy touchoient de parenté. Il ne leur parloit iamais que par necessité, & qu'en presence de témoins, & que les portieres de la chambre ne fussent leuées, lors que par les devoirs de sa charge, il fut obligé de traiter quelquefois avec elles. L'Auteur de la fourbe se mocqua de luy quand il se plaignit de ce mauuais tour, & attribua à stupidité, une action qui estoit un glorieux triomphe de continence. Mais Charles fut bien aise d'en receuoir des reproches, & du blâme, & de pouuoir ioindre à la victoire de sa pureté, la palme de l'humilité qui en est la plus fidele gardienne. Depuis qu'il fut Cardinal, une personne de grande condition chez qui il logea, crut qu'il falloit adiouster à la bonne chere qu'il luy feroit faire, une occasion semblable de debauche. Il s'en defendit avec la mesme force, & il partit de grand matin sans dire à Dieu à son hoste, qu'il reprit seuerement apres de cette embuſche rendue à sa chasteté.

Il reuint
à Paue
cōtinuer
ses estu-
des.

Quand il eut estably l'ordre dans les affaires de sa maison il reuint à Paue, pour continuer ses estudes de Droit qu'il auoit esté contraint d'interrompre. Mais comme il vouloit reparer la perte du temps qu'il auoit faite, il s'appliqua à l'estude avec vne si grande contention d'esprit, & fit de si longues veilles, qu'il tomba dans vne dangereuse maladie. Il fallut pour en guerir, quitter les Liures, & demeurer quelque temps sans rien faire qui occupast son esprit. Les Medecins pour le réjoür, luy conseillèrent de prendre plusieurs diuertissemens, mais il n'en voulut souffrir aucun autre que celui de la Musique. Encore fut-il toujours sur ses gardes, & quand il arriuoit que l'on chantoit deuant luy quelques paroles qui pouuoient tant soit peu blesser l'honnesteté, il faisoit seulement dire l'air, craignant que le poison n'entraist dans son cœur par les oreilles, & qu'une petite estincelle n'y allumast vn feu qui luy donneroit beaucoup de peine à esteindre. Il guerit de son mal, mais non pas si parfaitement que la fluxion du cerueau qui l'auoit mis en danger de sa vie, ne continuast à le tourmenter, iusqu'à ce que par ses longues abstinences, elle se secha entierement, ce qui donna lieu au *Pronerbe*, du *remede de S. Charles*.

Tandis qu'il continuoit ses estudes, le Cardinal de Medicis, son Oncle, luy resigna vne Abbaye, & vn Prieuré, qu'il receut, non pas pour auoir plus de reuenu, mais pour pouoir secourir les pauvres

DE S. CHARLES BORROME'E. Liv. I. 15
plus abondamment. Dès lors il formula le dessein de fonder dans Paue, vn College pour ceux de la Duché de Milan, afin d'y éleuer plusieurs pauvres ieunes hommes qui ayans de l'esprit & de l'apritude aux bonnes lettres, demeuroient inutiles à la Republique, faute de pouuoir estudier dans vne Vniuersité où les despeses sont grandes. Il executa cette pensée, lors qu'estant Cardinal, & Archeuesque de Milan, il eut du bien pour le fonder, comme nous verrons dans la suite de cette Histoire. Enfin ayant repris ses études, & acheué ce qu'on nomme le cours du Droit Ciuil & Canon; il prit le bonnet de Docteur des mains de François Alciat, son Maistre, dont il recompensa les soins & le merite par l'honneur de la Pourpre qu'il luy fit donner dans le Pontificat de Pie IV. son Oncle. Il auoit alors vingt-deux ans; mais il estoit vn vieillard en prudence & en vertu. Toute la ville de Paue assista à cette action, & on remarqua que l'air estant fort obscur, quand Alciat commença le discours qu'il faisoit à sa loüange, le Soleil tout d'un coup dissipa les nuages, & enuoya dans la Salle de l'Assemblée, vn rayon de lumiere qui la rendit si resplendissante, que l'Orateur prit sujet de cette rencontre fortuite, de prédire que le nouveau Docteur éclaireroit vn iour toute l'Eglise par sa doctrine, & par son exemple.

CHAPITRE IV. ●

Saint Charles est fait Cardinal & Archeuesque de Milan par le Pape Pie IV. son Oncle, & gouverne l'Eglise sous ce Pontificat.

Le Cardinal de Medicis, Oncle de S. Charles est élu Pape. **L**A mort de Paul I V. porta le Cardinal de Medicis, Oncle de Charles, sur la Chaire de S. Pierre, & son élection se fit la nuit apres le iour de la Natiuité de nostre Seigneur, l'an 1559. Aussi-tost la nouvelle en fut portée à ses Neueux, Federic, & Charles, qui estoient à Milan. Les Magistrats, & les Principaux de la Ville les allerent feliciter de cette promotion qui les portoit aux premiers honneurs de l'Eglise, & de l'Estat Ecclesiastique. Tous les parens s'estoient rendus dans leurs Palais, & chacun conceuoit de grandes esperances de fortune pour soy, & pour sa maison, sous ce nouveau Pontificat. Charles raisonnablement en deuoit auoir plus de ioye que les autres, se voyant comme asseuré d'estre la seconde personne de l'Eglise, sous vn Oncle dont il estoit cherement aymé, & extrêmement estimé pour sa vertu. Mais on ne put remarquer sur son visage aucun signe d'émotion pour cette grande nouvelle; & son visage en cela monstroit les sentimens de son cœur, qui estoit déjà trop bien fondé en l'estime, & en l'amour des grandeurs du

Ciel, pour estre transporté de l'éclat des grandeurs de la terre qui s'offroient à luy. Au contraire, en connoissant le danger, il songea à se fortifier contre leur poison par des preservatifs indubitables : & apres qu'il se fut debarrassé des complimens ordinaires en cette occasion, il recourut aux Sacremens de la Penitence & de l'Eucharistie, à quoy il porta encore le Comte Federic son frere, pour obtenir de Dieu la grace dont le nouveau Pontife avoit besoin ; & pour eux, celle qui leur estoit necessaire, afin que les honneurs qu'ils se voyoient preparer, & qu'ils ne pouvoient fuyr, ne leur fissent pas perdre l'honneur d'un vray Chrestien, qui consiste à mespriser le monde, & toutes ses pompes. Le Comte Federic partit aussi-tost de Milan, & prit la poste pour se rendre à Rome en diligence auprès de son Oncle, qui le receut avec tous les tesmoignages de bonne volonté qu'il eust pû souhaitter. Mais comme il ne vid point nostre S. Charles, il en fut surpris & affligé. Il sceut qu'il avoit resolu de ne point partir de sa maison, que par le commandement du Pape, qui luy fut bien-tost porté, & auquel il creut estre obligé d'obeïr. Pie luy fit de grandes caresses, & l'ayant créé Protonotaire du nombre des Participans, & Referendaire, il luy donna le Chapeau de Cardinal, & l'Archeuesché de Milan, encore qu'il n'eust que vingt-deux ans & quatre mois. Cette promotion parut d'abord aux yeux des Courtisans, un effet dereglé de l'affection du Pape pour son

S. Charles est fait Cardinal & Archevesque de Milan, le dernier jour de Janvier en l'année 1550.

Il se dé-
charge
sur luy
du gou-
vernem-
ent de
l'Eglise.

Neveu ; mais en effet c'estoit vne conduite de Dieu qui voulant resspandre ses misericordes sur l'Eglise de Milan , la plus desolée de toute l'Italie, la pourueür de si bõne heure d'un Pasteur à qui il auoit resolu de donner la grace Episcopale au plus haut degré que les plus saints Euesques de l'antiquité l'ayent iamais possédée. Pié ayant reconnu sa suffisance , sa diligence , & son zele , le fit encore chef de la Consulte , & le chargea de tout le gouuernement de l'Eglise , luy donnant pouuoir de souscrire les memoriaux , & de signer les dispenses en son nom , & ne se reseruant presque du Pontificat , que l'honneur & le titre. Charles pour reconnoistre l'affectiõ de son Oncle, s'appliquoit aux affaires avec beaucoup de soin ; & connoissant qu'il n'auoit ny assez d'experience, ny assez de forces pour soustenir tout seul vn si grand accablement d'affaires , il choisit des personnes experimentées, sages, & fideles , sans le conseil desquelles il ne faisoit rien d'important , & pour qui il auoit vne grande deference. Cette conduite estoit cause qu'il s'acquittoit de tous ses emplois avec la satisfaction de son Oncle, & du public , qui admiroit en vn Cardinal si ieune, vne sagesse desia si consommée , & vn si genereux éloignement de ses interests. Car outre qu'il n'espargnoit personne quand il s'agissoit du seruice de l'Eglise , ou du bien de l'Estat Ecclesiastique , & que ses mains estoient tres-pures de toutes sortes de presens ; il refusoit mesme souuent beaucoup d'auantages que le Pape luy vouloit faire,

ee qui le mettoit quelquefois en colere contre luy, & ce que les parens, & les Courtisans interessez, estimoient proceder de peu de cœur; encore que ce fust vne action tres-generouse & tres-magnanime. Mais si l'interest est le maistre de toutes les Cours, on peut dire qu'il estoit le Dieu de celle où vivoit S. Charles, & qu'y voir vn Neveu de Pape qui mesprisoit les richesses, estoit vne chose si rare, qu'elle passoit plustost pour folie que pour vn exemole extraordinaire de magnanimité.

La qualité de Neveu du Pape, & les reuenus presque immenses que possedoit S. Charles, de ses Benefices, & de ses Charges, l'obligeoient & luy donnoient moyen d'entretenir vne maison plustost d'un Prince, que d'un Cardinal de la sainte Eglise. Il avoit doncques vn grand Palais; les meubles estoient somptueux, les tableaux rares, les autres ornemens magnifiques, la famille nombreuse, & remplie de beaucoup de gens de qualité, de doctrine, & d'esprit. Toutes les delices y abondoient, & on y prenoit des diuertissemens qui ne s'accordoient pas tousiours avec la severité de la vie Clericale, qui non seulement fuit les plaisirs criminels, mais qui est tres-rigoureuse aux choix des plaisirs licites. Cette vie molle, & voluptueuse eust aisément porté saint Charles à quelque dissolution dangereuse, si Dieu ne l'eust tousiours tenu par la main, & n'eust conserué dans son cœur de grands sentimens de pieté, & des devoirs d'un Cardinal, & d'un Archevesque.

Tous ceux qui l'approchoient , ne songeoient qu'à le corrompre , esperant le trouuer plus facile à leurs pretensions iniustes , moins il seroit fidele à Dieu, & considerant son innocence particuliere comme vn obstacle eternel à l'ambition publique. Il n'y auoit rien qui ne contribuast à leur dessein , & la licence du siècle estoit telle, que ce qui en effet eust esté digne de blasme en luy , n'eust receu que des louanges , & n'eust trouué que trop de Confidens , & de Ministres. Pour s'empescher de deuenir vn homme de delices , il se rendit vn homme de trauail , écriuant beaucoup de sa main, dépeschant les affaires , donnant vne fauorable audiance à tous ceux qui la demandoient , & supportant les promptitudes de ceux avec lesquels il traittoit , sans se laisser emporter ny à la colere , ny à l'impatience, qui sont les deux deffauts les plus ordinaires des personnes establies en vne haute dignité , & dans des emplois laborieux & importants. Car ou la paresse les empêche de trauailler ; ou s'ils trauaillent , ils deuiennent si chagrins & si difficiles , qu'ils sont insupportables & inaccessibles à tout le monde. Il prenoit du temps , ou plustost il le déroboit à son sommeil pour estudier ; & il auoit estably dans sa maison , vne Academie des belles Lettres, qui estoit composée d'hommes choisis , lesquels s'exerçoient toutes les semaines à faire des discours sur diuers sujets d'Eloquence , de Poësie , de Politique , & de Morale. Il parloit à son tour comme les autres, & se rendoit le com-

Il établit
vne Academie
dans sa
maison.

pagnon de ses domestiques , dans les exercices où le plus habile doit estre considéré comme le Maistre , & où les Muses mettent vne parfaite égalité entre ceux qui les seruent, d'une façon plus noble & plus tranquille, que l'amour ne fait entre les Amans. Cette coustume de parler en public ouurit son esprit , & fortifia sa memoire , que naturellement il n'auoit pas fort heureuse ; & la société de tant de personnes doctes luy fit acquerir vne grande solidité de iugemēt, pour connoistre le prix des ouurages des Autheurs Ecclesiastiques , & prophanes. Il fit recueillir les discours qui se recitoient dans son Academie , & les appella , les Nuits Vaticannes , parce qu'estant accablé d'affaires durant le iour, ils ne se pouuoient faire que la nuit dans le Vatican où il estoit logé. Plusieurs de ses Academiciens furent faits Euesques , & quelques-vns obtinrent la Pourpre du Cardinalat , & il y en eut vn qui fut esleué au Pontificat sous le nom de Gregoire XIII. Il faisoit des Recueils des plus belles Sentences des Philosophes , & particulièrement des Stoïciens , qui est la secte la plus rude & la plus austere pour la vertu. Il auoit touiours entre les mains le Manuel d'Epictete , & dans cette lecture, il affermissoit son ame au mépris des choses que tous les hommes adorent , & prenoit les semences de cette austerité de vie qu'il pratiqua depuis avec tant de perseuerance, par la conduite de l'Esprit de Dieu. Sa qualité l'obligeant de traiter avec toute sorte de personnes , & de tenir vn grand rang

Maria-
ge des
sœurs
de S.
Charles.

dans Rome , il s'accommodoit à la façon de viure de la Cour , pour les choses extérieures de son Palais , & de sa suite, pour les visites qu'il rendoit , & qu'il receuoit , & pour certains diuertissemens que les Cardinaux se donnoient les vns aux autres, comme estoient les promenades & les collations dans les vignes qui sont à l'entour de la Ville. Il se trouua à toutes les réjouissances & à toutes les festes qui se firent aux nocces de son frere le Comte Fodemic , avec la Signora Donna Virginia, fille du Duc d'Urbino : & quoy que son cœur fust déjà fort esloigné de ces passe-temps , il ne donna toutefois par sa contenance, aucun sujet de croire qu'il souffrist la moindre contrainte. Il eut soin du mariage de ses autres sœurs, & comme elles se trouuoient Niepces d'un Pape , elles épousèrent des personnes de grande condition , Camille fut mariée à Cesar de Gonzague , Prince de Malfete; Hieronime , à Fabrice Gesualde , fils aîné du Prince de Vinosa ; Anne à Fabrice Colonne , fils de Marc-Antoine , Prince Romain ; Hortensia , que le Comte Gilbert auoit eue d'une autre femme que la mere de S. Charles , au Comte d'Altaemps , qui estoit fils d'une sœur de Pie. Anne fut la plus remarquable pour la pieté , dont elle pratiquoit les plus saints exercices durant son mariage , & dans sa viduité qui arriua lors qu'elle estoit encore fort ieune. Elle vouloit se retirer dans un Monastere, mais Charles l'en détourna , & luy conseilla de mener une vie religieuse dans sa famille,

esleuant ses enfans dās la discipline, & dans la crainte du Seigneur, selon le commandement de l'Apostre. Elle suiuit ce saint conseil; mais sa charité ne pūt pas se renfermer dans sa maison, & elle s'estendit à tous les pauvres de Palerme, (elle y demouroit avec son beau-pere qui en estoit Viceroy) dont elle auoit vn soin tres-particulier dans leur santé & dans leurs maladies. Elle épargnoit sur sa dépense dequoy les assister, & prenoit plaisir de porter des robes presque toutes déchirées, pour auoir moyen de couvrir la nudité des membres de I E S V S - C H R I S T. Elle obtint la permission de faire mettre le S. Sacrement dans l'Eglise du Palais, & comme elle passoit presque le iour & la nuit dans ce lieu qui estoit fort humide, & fort mal sain, elle y contracta de grādes incommoditez qu'elle souffrit avec ioye, comme des effets d'une tres-sainte cause, & comme des marques de l'Amour de son Sauueur. Saint Charles qui estoit plus sensible à la Pieté qu'à la Nature, l'aima par cette raison plus que toutes ses autres sœurs, & eut pour elle beaucoup de respect, connoissant les graces dont Dieu l'auoit comblée. La fièvre qui la mit au cercueil commença de la travailler sur la fin du Carême; mais elle n'en voulut parler à personne, de peur d'estre obligée de rompre l'abstinence de ce temps qui luy estoit tres-precieux. Elle communia dans l'Eglise le iour de Pasques, & quand le mal eust acquis tant de force qu'elle ne pūt plus le dissimuler, elle se mit au lit,

*aux
Eph.
ch. 6.*

*Vertus
extraor-
dinares
d'Anne
mariée à
vn de
Colon-
ne.*

elle mourut de la mort des Iustes. Les habitants de Palerme la pleurerent comme la mere des pauvres , & l'honorèrent presque comme vne Sainte.

CHAPITRE V.

Des autres emplois de S. Charles , qui se fit Prestre apres la mort de son frere.

Charles s'acquittoit avec tant de soin, de diligence , de suffisance , d'integrité , & de reputation , des emplois dont le Souuerain Pontife le chargeoit , que considerant que la Penitencerie auoit besoin d'un homme qui luy ressemblast , il resolut de luy en donner la Charge , & de le faire grand Penitencier. Son pieux Neveu qui auoit refusé le Camerlingat, parce que cette dignité qui répond à celle de Sur-intendant des Finances , ou de Tresorier de l'Espargne en France , luy apportoit beaucoup de reuenu , accepta avec plaisir la Penitencerie , parce qu'elle ne luy pouuoit causer que du trauail & de la peine. Aussi-tost il pensa serieusement à reformer les abus qui s'y estoient glissez par la corruption du Siecle , lequel avec le temps auoit gasté les choses le plus saintement establies , & conuertie ce qui de sa nature est vn remede , en vn dangereux poison. Il consulta les personnes les plus habiles & les plus pieuses de Rome;

Rome ; & sur leur aduis , il proposa au Pape ce qu'il croyoit se deuoir faire pour mettre toutes choses en tel estat que l'Eglise receût autant de profit de la Penitencerie, qu'elle en receuoit iusqu'à lors de mal & de scandale. Le Pape, sur ses memoires, fit dresser le 4. de May de l'année 1562. vne Bulle de Reforme, où il dit qu'il a suiuy les aduis du grand Penitencier dans les ordres qu'il établit sous toutes les peines qui estoient necessaires pour les faire obseruer religieusement.

Ses dignitez ne s'arrestèrent pas à la Penitencerie, car il fut encore créé Legat de Bologne, de la Romagne, & de la Marche-d'Ancone, qui sont des Prouinces de l'Estat Ecclesiastique. Le Roy de Portugal le desira pour Protecteur de son Royaume, & de l'Ordre de Christ, dont il est le grand Maître. La Basse Allemagne, les Cantons Catholiques des Suisses, les Ordres des Carmes, de S. François, des Humiliez, des Chanoines Reguliers de Sainte Croix de Conimbre, & celuy des Cheualiers de Malte, se mirent aussi sous sa protection. Elle leur fut tres-vtile, & quoy qu'une si grande diuersité d'affaires qui luy venoient de tant de Communautez, demandast plusieurs hommes pour les expedier ; toutefois Charles ménagea si bien le temps, qu'il suffit à tous leurs besoins, & qu'il remedia à tous leurs desordres, avec vne diligence incroyable, & vne plus grande charité, qui luy rendoit tout facile quand il y alloit de la gloire de Dieu, & du salut du prochain.

B

Tandis qu'il s'appliquoit avec vn esprit infatigable au gouvernement de l'Eglise, pour soulager la vieillesse de son Oncle; Dieu qui auoit de grands desseins de misericorde sur luy, le frappa d'un coup qui luy fut tres-sensible, par la mort prompte & inopinée du Comte Federic son frere, en la fleur de son âge, & dans les plus hautes esperances, dont vn Neveu de Pape, habile, & bien fait de sa personne, peut estre capable. Charles l'assista durant sa maladie avec vn soin qui répondoit à l'extreme amitié qu'il auoit pour luy; & n'ayant rien oublié pour luy procurer la santé du corps, tandis qu'il y eut esperance de la recouurer, quand il la vid desespérée, il s'employa pour l'ayder à faire vne mort Chrestienne. Le Pape, & les parens furent presque inconsolables de cette perte; & Charles seul témoigna vne fermeté d'ame qui n'estoit pas commune, tandis que toute sa famille se noyoit dans les larmes. Elle pleuroit pour l'interest de sa grandeur qui receuoit vne estrange secousse par cét accident. Mais Charles auoit bien d'autres pensées. Cette mort qui l'auoit surpris, luy ouurit les yeux, & luy fit connoistre si clairement la vanité de ce que le monde appelle fortune, grandeur, & prosperité; qu'appellant son Confesseur, il fit vne reueuë de sa vie, & resolut d'en commencer vne nouuelle, plus pieuse & plus feure que celle que iusqu'alors il auoit menée. Toute la Cour croyoit qu'il laisseroit le Chapeau, & se marieroit. Plusieurs personnes de grande qualité l'en presserent,

L'an
1562.

par ordre du Pape , qui le souhaittoit avec passion, pour l'establissement de sa famille, & qui luy en fit souuent la proposition. Mais Charles que Dieu conduisoit, pour se deliurer d'une tentation tres-forte à vn homme de son âge , se lia à l'Eglise par l'Ordre de Prestre, qu'il receut peu de mois apres la mort de son frere. Le Pape s'en plaignit amoureusement à luy, mais il luy répondit , *Saint Pere , ne vous plaignez point de moy , i'ay pris une Espouse que i'aymois, & que ie souhaittois il y a long-temps.*

S. Charles se fait Prestre apres la mort de son frere.

La grace de la Prestre que Charles auoit receuë abondamment en son ordination, commença bien-tost à produire des effets éclatans dans son ame, & dans ses actions. Il sentit les premieres ardeurs de ce zele qui est cōme l'esprit du Sacerdoce , & pour trauailler vtilement au salut des autres , il resolut de songer au sien avec plus de diligence qu'il n'auoit fait. Il forma le dessein de mener vne vie plus austere pour sa personne, comme i'ay desia dit, de s'addonner à l'Oraison Mentale, qui est l'ame de la Pieté, & à l'exercice de toutes les Vertus Sacerdotales ; & de bannir de sa maison, toutes les superfluitez & tous les diuertissemens qu'il y auoit plûtoſt soufferts, qu'introduits & recherchez. C'estoit vn nouveau chemin qu'il vouloit suiure, & pour ne s'y pas égarer, il crut qu'il auoit besoin d'un Directeur sage, fidele, charitable, & expérimenté. Il le trouua dans le Pere Iean Baptiste Ribera, de la Compagnie de Iesus, qui reconnoissant dans l'ame du Car-

Il com-
mence
une vie
plus re-
tirée.

dinal, les traces des desseins de la grace de Dieu sur luy, s'employa avec vn grand zele pour les seconder, se reputant heureux de pouuoir estre le Cooperateur d'vn si saint ouurage. D'abord il luy donna les Exercices spirituels que S. Ignace auoit dressez, & apres les luy auoir fait pratiquer, il l'esleua peu à peu dans la deuotion, & ietta dans son ame les fondemens de cette haute Pieté qu'il fit paroistre dans le cours de sa vie publique. Le Diable qui par ses commensemens se défia du progres qu'il alloit faire, tascha de les ruiner : & n'oublia aucun artifice pour faire reüssir son dessein. Les parens, & les Courtisans de Charles ne pouuant souffrir cette nouuelle façon de viure qui leur sembloit preiudiciable à sa santé, & contraire à la grandeur temporelle où ils desiroient qu'il songeât, pour en profiter ; firent beaucoup d'affronts au bon Pere Ribera quād il venoit le voir, ce qu'il faisoit tous les iours. Le Cardinal en fut auerry, & il donna ordre qu'on le fist entrer par vn escalier dérobé, afin de le garentir de la persecutiō de ceux qui pensoient qu'en l'esloignant de sa personne, par leurs injures, la deuotiō de Charles se refroidiroit bien-tost, & qu'il reprēdroit sa façon ancienne d'agir. Mais ils furent tous trompez en leurs mauuaises esperances. Le ieune Cardinal augmentoit de iour en iour en pieté, & nō seulement il quitta les recreations qui ne s'accordoient pas avec la seuerité de la vie Clericale ; mais il se priua mesme des exercices du corps qu'il aimoit, ayant ouï dire à l'E-

uesque de Modene, homme d'une éminente vertu, & qu'il estimoit beaucoup, qu'il ne les approuvoit pas en un ieune homme, à cause qu'ils augmentoient la chaleur naturelle, qui n'est déjà que trop grande en cet âge, & qu'ils faisoient perdre beaucoup de temps qu'on pouvoit employer plus utilement & plus saintement à l'Estude, & à l'Oraison. Il changea les exercices de son Academie, & voulut que tous les sujets qui s'y traittoient fussent saints, & spirituels, pour se donner à luy-mesme la facilité de prescher au peuple de Milan, ce qu'il se proposoit de faire. Il paroissoit de iour en iour plus de retenuë en ses actions, & plus de gravité en ses paroles. Enfin, il fut si changé qu'il donna long-temps sujet à la Cour de Rome de s'entretenir de luy. Les uns qui ne suivoient que les maximes corrompues du Siecle, se mocquoient de sa Pieté. Les autres l'accusoient d'hypocrisie, & croyoient qu'il la faisoit servir pour acquérir la reputation de sainteté, & par là s'autoriser davantage dans l'esprit des hommes. Ses parens, comme nous auons dit, ne pouvoient souffrir sa deuotion, & ils cherchoient tous les moyens de la luy faire perdre, sçachant bien qu'estant déjà fort esloigné de seconder leur ambition, & de fauoriser leur auarice, pour leur donner des emplois & des reuenus Ecclesiastiques, il deuiendroit encore plus scrupuleux sur ce poinct, à mesure qu'il s'attacheroit davantage à Dieu. Mais s'il n'auoit pas un grand nombre d'approbateurs de la vie

exemplaire qu'il menoit , il auoit des personnes sages & vertueuses qui luy donnant des loüanges solides, l'exhortoient à continuer. Et alors il eust esté à souhaiter que les autres Cardinaux l'eussent voulu imiter, pour oster le sujet aux Heretiques de crier, comme ils faisoient , contre les abus , & la corruption de la Cour de Rome ; & de se seruir de ce mauuais pretexte pour corrompre la Foy des peuples esloignez , qui n'estant pas capables de iuger de la Doctrine, sont tres disposez à iuger des Docteurs, & à soupçonner la verité de l'vne , par le desordre de la vie des autres.

CHAPITRE VI.

Saint Charles fait conuoquer , & conclurre le Concile de Trente qui auoit esté interrompu.

ENtre les obligations dont l'Eglise Catholique sera à iamais redevable à Saint Charles , il n'y a personne qui ne confesse que la conclusion du Concile de Trente ne soit la principale , puis que c'est par cette Oecumenique Assemblée , que les Heresies de Luther & de Caluin ont esté frappées du foudre d'un Anatheme , dont elles ne se peuuent releuer ; & la Discipline Ecclesiastique si saintement & si sagement rétablie, qu'il n'y auroit qu'à l'observer au pied de la lettre , pour rendre à l'Eglise, l'innocence , le zele , le courage , & la pieté des Mi-

nistres deses premiers Siecles. Mais pour le soulagement des Lecteurs peu instruits de l'Histoire de ce Concile, ie la veux reprendre à son origine, & en faire vn abregé naïf & fidele.

Le Pape Leon X. ayant fait publier des Indulgences plenieres par toute l'Eglise, la Bulle fut portée dans l'Allemagne, & contre la coustume ancienne, qui vouloit que les Religieux Augustins la publiassent, les Dominiquains firent cette fonctiõ. Martin Luther qui estoit de la famille des premiers, crut que les Ministres du Pape auoient fait vn insigne tort à son Ordre, & commença dans ses Sermons à parler contre les Indulgences. Il taxa premierement l'abus de celles qui se debitoient; & comme il se vid contredit, il passa à les condamner en general, & parla de la puissance du souverain Pontife qui les donnoit, d'une façon qui arma contre luy la voix & la plume de plusieurs Docteurs Catholiques, entre lesquels Echius fut le plus considerable. Ces écrits furent cause que Luther qui auoit l'esprit aigre, ardent & superbe, de iour en iour attaquoit quelque nouveau dogme Catholique, & taschoit d'en détruire la creance dans l'esprit du peuple. Leon aduertty du feu qui commençoit de s'allumer en Allemagne, fit citer Luther à Rome, & écriuit vn Bref au Duc de Saxe, pour l'exhorter à ne luy accorder pas sa protection. Il donna encore ordre au Cardinal Cajetan qui estoit son Legat en la Diete d'Ausbourg, de tenter toutes sortes de moyens pour ramener l'es-

Histoire
du Con-
cile de
Trente,

Luther
cõmence
à pre-
cher cõ-
tre les
Indul-
gences,

L'an
1508. au
mois
d'Aoust,

prit de ce Moine, qui menaçoit l'Eglise d'un dangereux embrasement. S'il le trouuoit obstiné, il luy ordonnoit de l'arrester prisonnier, ou si cela ne se pouuoit, de l'excommunier, & tous ceux qui suiuiroient sa mauuaise doctrine, excepté l'Empereur, & d'interdire tous les lieux où on luy donneroit retraite. Luther vint à Ausbourg, avec un saufconduit de Charles-quint. Le Cardinal Caietan le receut fort ciuilement, & d'abord il employa les plus douces paroles dont il put s'auiser, pour l'obliger de retracter ses propositions, de promettre de ne les plus enseigner, & de ne combattre point la doctrine de l'Eglise. Luther nia auoir rien enseigné qui y fust contraire, & voulut entrer en dispute: mais le Legat iugea qu'elle seroit inutile, & qu'elle pouuoit estre dangereuse. Il eut trois conferences avec luy, & ayant meslé quelque menace dās son discours, Luther en craignant l'effet, sortit d'Ausbourg, & se mit en lieu de seureté. Depuis ce tēps-là les choses s'aigrirent de telle façon, que Luther leua tout à fait le masque, & se separa de l'Eglise Catholique, par des Heresies formées qu'il publia, & qu'il deffendit dans ses Sermons, & dans ses écrits. Comme la nouveauté en matiere de Doctrine, a toujours des charmes pour les esprits curieux, ses Liures furent leus auident par tous les hōmes de Lettres, & beaucoup y corrompirent leur creance. Le Peuple fut aisément trompé par la reforme apparente qu'il disoit vouloir faire des abus qui s'estoiēt glissez dans la Religion, & par le retranchement

Le Cardinal
Caietan
confere
avec Luther,
&
ne le
peut
ramener à
l'Eglise.

de la confession auriculaire, des ieufnes, & des mortifications corporelles dont il le deschargeoit, sous pretexte de le faire iouyr de la liberté des enfans de Dieu, que leur auoit apporté l'Euangile. Le Duc de Saxe se declara son Protecteur, plusieurs autres Princes suiuirent ses erreurs, & l'Allemagne se trouua partagée en sa Foy, par la hardiesse d'un petit Moine, qui remua toutes les questions de la Theologie.

Leon X. estoit d'auis de laisser refroidir & esteindre ces disputes d'elles-mesmes, & iugeoit qu'il ne falloit pas mettre les écrits de Luther en reputation, par vne censure Pontificale qui les feroit plus auidentement rechercher, & qui ietteroit l'Autheur dans le precipice de l'Herésie sans aucun remede. Mais Echius luy representa si fortement le rauage que faisoient les opinions erronnées de ce Moine, dans l'Allemagne, qu'il remit cette affaire à vne Congregation celebre de Cardinaux, d'Euesques, de Theologiens, & de Canonistes. Apres auoir long-temps disputé plutôt sur la forme de la Censure, que sur la Censure même, dont ils estoient tous d'accord; enfin ils resolurent que la Doctrine de Luther seroit condamnée comme Heretique, avec vn terme pour faire brûler ses Liures, durant lequel il les pourroit desauouer, & pour luy, qu'il seroit cité sinon en termes formels, au moins en termes équiualeus, & qui se resoudroient enfin à vne citation. Sur cette resolution, le Pape fit sa Bulle dattée du 15. de Iuin de l'année 1520. par laquelle il condamnoit

Le Pape
censure
la Do-
ctrine de
Luther.

quarante-vn articles qui y sont rapportez sur le sujet du peché Originel, de la Penitence, de la Remission des pechez, de la Communion Eucharistique, de la Puissance du Pape, de l'Autorité du Concile, des Indulgences, des bonnes Oeuures, du Franc-Arbitre, du Purgatoire, de l'Excommunication, & de la Mendicité des Religieux; comme heretiques, faux, scandaleux, pernicioeux, & contraires à la verité Catholique. Il adiousta que Luther auoit esté souuent inuité de venir à Rome, avec vn ample sauf-conduit, pour voir de ses propres yeux, que les mœurs n'y estoient pas si corrompues, comme il les dépeignoit: qu'il s'estoit mocqué des admonitions qu'on luy auoit faites, & qu'il auoit eu la hardiesse d'appeller des Censures fulminées contre luy, au Concile futur, ce qui estoit deffendu par les Constitutions de Pie, & de Iule, seconds du nom, sous les peines ordonnées contre les Heretiques: & qu'encore que par cette conduite on pust passer à sa condamnation, sans luy donner aucun temps pour se reconnoistre, toutefois que le Souuerain Pontife oubliant ces iniures, luy donnoit vn delay de soixante iours, dans lequel il reuoqueroit ses erreurs, & brûleroit ses Liures: autrement, ce terme estant passé, il le declaroit, & ceux qui le fauoriseroient, Heretiques notoires, & obstinez. Sur la fin de la Bulle, il ordonnoit à chacun de se saisir de sa personne, ou à tout le moins aux Seigneurs, de le chasser de leurs Terres, & soumettoit à l'inter-

dit tous les lieux où on souffriroit qu'il demeurast. Luther ayant esté aduertty de cette Censure, mit vn écrit au iour, par lequel reïterant son appel au Concile, il se plaignoit de la procedure du Pape, qui auoit condamné vn homme sans l'entendre, & prioit l'Empereur, & tous les Magistrats de s'interesser en la deffense de l'hauthorité du Concile Oecumenique qu'il pretendoit estre seul Iuge suprême des Controuerses de la Religion. Les Vniuersitez de Cologne, & de Louvain, ayant receu la Bulle, firent publiquement brûler les Liures de Luther; & à Vitemberg, on brûla la Bulle de Leon, & les Liures des Decretales. Luther vint à la Diete de Vormes avec le sauf-Conduit de l'Empereur Charles V. & comme il declara qu'il ne pouoit condamner la Doctrine de ses Liures, s'il n'estoit conuaincu de sa fausseté par l'Escripture Ste, & par des raisons auxquelles il pût acquiescer, Charles le laissa retourner chez soy en seureté, pour ne violer pas la foy promise. Mais il le mit au Ban de l'Empire, & le condamna apres cela comme Heretique, ordonnant à tous les Princes, & à tous ses Sujets d'Allemagne, de se saisir de luy, & de tous les Sectateurs de ses dogmes. On tâcha de ramener son esprit par beaucoup de propositions qu'on luy fit; & enfin il promit de se soumettre à la decision d'un Concile, les articles qu'il soustenoit contre la Foy de l'Eglise, & que l'on en iugeroit par l'Escripture sainte.

Zuingle, Chanoine de l'Eglise de Zurich, (d'autres le font Curé dans le Diocèse) auoit

Zuin-
gle pu-
blie vne
Hereſie
nouuelle
dans la
Suiſſe.

commencé à preſcher contre les Indul-
gences, de même façon que Luther : & en-
ſuite il eſtoit paſſé à condamner beaucoup
d'autres articles de la Foy Catholique. Les
Eccleſiaſtiques , & les Religieux auoient
auſſi preſché & écrit contre luy ; ils'eſtoit
deffendu par d'autres écrits, & chacun auoit
ſes Approbateurs ; de ſorte que les choſes
eſtoient dans vne grande confuſion pour la
Religion en cette Ville principale des Can-
tons des Suiſſes. L'Eueſque de Conſtance
écriuit au Senat , & luy enuoya la Bulle de
Leon , & le Ban de l'Empereur , les exhor-
tant à faire executer l'un & l'autre contre
les Predicateurs de nouuelles Doctrines, &
marquant en particulier le Chanoine Zu-
ingle. Sur cette Lettre, il rendit compte de
ce qu'il auoit preſché, & publia ſoixante-fix
Concluſions qui contenoient toutes ſes
opinions erronées. Les Docteurs Catho-
liques y répondirent, & le Senat voyant que
cette diſpute s'échauffoit tous les iours , &
qu'elle troubloit le repos de la Ville, reſolut
de faire vne Aſſemblée de tous les Predica-
teurs & des Docteurs de ſa Iuriſdiction,
pour eſſayer à accorder vn differend de cette
importance. Il écriuit même à l'Eueſque de
Conſtance, qui eſtoit le Diocéſain, pour le
prier d'enuoyer de ſa part quelque perſon-
ne intelligente, pieuſe, & pacifique, afin de
ſe trouuer à ce Colloque. Il manda Iacques
Faber, ſon Vicaire General , homme tres-
capable, & qui fut fait quelque temps apres
Eueſque de Vienne. Zuingle parut dans
l'Aſſemblée, où il propoſa ſes Concluſions,

& s'offrit de les deffendre contre tous ceux qui les voudroient attaquer. Les Domini-
quains, & les autres Docteurs dirent beau-
coup de choses contre Zuingle : & Faber
conclut , que ce n'estoit pas là le lieu, ny le
temps, de terminer ces questions, que c'e-
stoit vne matiere propre pour le Concile
General qui se deuoit bien-tost tenir, & que
les Princes de la Chrestienté estoient demeu-
rez d'accord de sa conuocation avec le Pape.

C'estoit vne adresse pour faire auorter
cette Assemblée , & pour empescher qu'on
n'y prist aucune resolution qu'il iugeoit ne
pouuoir estre que dangereuse pour l'Eglise.
Mais en effet le Concile General, par l'estat
où la Religion se trouua dans la suite du
temps , estoit souhaitté presque de tout le
monde. Les gens de bien le desiroient com-
me l'vnique remede de la corruption des
mœurs des Ecclesiastiques , que l'on ne
pouuoit pas nier estre intolerables à ceux
qui auoient quelque sentiment de pieté; &
encore comme vn Tribunal suprême où se
decideroient les questions de Doctrine qui
troubloient l'Allemagne, & la France. Car
Caluin, Chanoine de Noyon, de son costé y
semoit des erreurs , & suiuoit les pistes de
Luther, particulièrement contre l'autorité
du Pape. En plusieurs autres poincts, & par-
ticulièrement sur l'Eucharistie , ils estoient
différents ; mais ils s'accordoient tous à la
ruïne de l'Eglise Catholique, sous pretexte
d'en reformer les abus. Les Princes Souue-
rains , & particulièrement ceux d'Allema-
gne desiroient cette Assemblée , esperant

qu'on y pourroit prendre des resolutions vigoureuses contre les Ecclesiastiques, dont la iurisdiction diminuoit leur autorité, & que leurs reuenus qu'on y retrâcheroit, retomberoient entre leurs mains. Mais ils pretendoient pour produire cet effet, qu'elle ne fust pas composée seulement d'Euesques, & de Prestres, comme il s'estoit tousiours pratiqué, & qu'o y appelleroit des personnes Seculieres, qui fauoriseroient au euylément leurs mauvais desseins. Les Peuples auoient le même desir, croyant qu'ils seroient soulagez de beaucoup d'exactions qui leur estoient faites par les Officiers des Euesques, dont ils se plaignoient, sans y pouuoir trouuer de remede. Leon qui voyoit son autorité diminuer tous les iours dans le Septentrion, eut bien souhaité de la reestabli par le moyen d'un Concile. Mais en la disposition presente des esprits, & des affaires, il iugeoit qu'il seroit perilleux de l'assembler, & il craignoit qu'il ne voulust passer à reformer des choses dans la Cour Romaine, où il ne desiroit pas que l'on touchast.

Mort du
Pape
Leon le
premier
iour de
Decem-
bre l'an
1522. &
election
d'Adrien
Sixième.

Dans ces inquietudes, *il mourut, & laissa la Chaire à Adrien VI. qui la tint un an, & huit mois. Il estoit Flamand de nation, & né dans la ville d'Utrecht. L'Empereur Maximilien l'auoit donné pour Precepteur à Charles-Quint, que son pere auoit laissé heritier de ses Estats à l'âge de sept ans. Il fut fait Cardinal du titre de S. Iean, & de S. Paul, par Leon X. qui aimoit les hommes de Lettres, & de Pieté. Il auoit enseigné long-temps la Theologie Scholastique,

c'est pourquoy il estoit instruit par luy-même des questiōs qui troubloient alors le repos de l'Eglise. Et comme il auoit beaucoup de zele d'y rappeler ceux qui s'en estoient separez, il resolut aussi-tost qu'il fut arriué à Rome, (car il auoit esté esleu Pape en son absence,) de reformer les abus qui seruoient de pretexte à la diuision. Pour executer ce bon dessein, il fit venir auprès de luy des hommes tres-estimez pour leur Pieté, & pour la connoissance qu'ils auoient des choses Ecclesiastiques, afin de se seruir de leurs sentimens, & de ceux des plus sages, & plus habiles Cardinaux qui seroient auprès de sa personne. Son auis fut de publier vne Constitution, dans laquelle par l'Autorité Apostolique, il declareroit en la matiere des Indulgences, que l'on les gagneroit à proportion de la perfection interieure de Charité, avec laquelle seroient faites les œuvres qu'elles prescriuoient; par où il croyoit suffisamment répondre à l'objection de Luther, qui demandoit, quelle proportion il y auoit entre vn denier d'aumosne, & la remission de plusieurs pechez enormes. Mais le Cardinal Cajetan, dont nous auons parlé, ne luy conseilla pas de publier cette Doctrine, parce qu'il falloit craindre qu'on n'en tirast pour conclusion, que puisque la perfection de l'œuvre produisoit l'effet, l'Indulgence Pontificale n'estoit pas necessaire, ce qui tourneroit à la diminution de son autorité. Il luy conseilla plutôt de remettre en vigueur les Penitences publiques, comme elles auoient esté pratiquées dans

Il tra-
uaille à
la Refor-
mation
de la
Cour de
Rome,

Le Cardinal Ca-
ietan cō-
seille au
Pape de
reftablr
la Peni-
tēce pu-
blique.

l'Eglise durant tant de siècles, avec vn très-
grand succès, parce que de leur reftablisse-
ment, les hommes prendroient sujet de re-
chercher les Indulgences avec plus d'ar-
deur, pour se deliurer des peines Canoni-
ques qui sont, si rudes & si laborieuses; outre
que les Euesques & les Prestres qui les im-
poseroient, en auroient beaucoup plus d'au-
thorité sur les Fideles. Cēt auis plût au Pape,
& toutefois auant que de se déterminer de
le suiure, il le fit proposer aux Penitenciers
de Rome, afin qu'ils songeassent aux moyēs
de reftablr la Penitence publique dans la
Chrestienté. Mais apres plusieurs Confe-
rences qu'ils firent entr'eux, le Cardinal de
Santi-Quatro, qui estoit grand Peniten-
cier, rapporta au Pape, que l'execution de
cette proposition estoit absolument impos-
sible, à cause de la corruption des mœurs
des Chrestiens, & de la dureté des pecheurs,
qui vouloient bien auoir le plaisir du peché,
mais qui n'estoient plus capables de se re-
soudre à l'expier par les douleurs d'une
longue & laborieuse Penitence: & qu'au re-
ste pour la matiere des Indulgēces, il estoit
plus à propos de la laisser en l'estat où elle
se trouuoit entre les Docteurs, que de rien
pronōcer qui decidaft en faueur d'une opi-
nion contre vne autre. Les raisons du Car-
dinal parurent tres-considerables à Adrien;
& il trouua encore plus de difficulté à refor-
mer dans la Chancellerie, & dans la Daterie,
beaucoup d'expeditions qui s'y faisoient, &
qui donnoient sujet aux nouveaux Hereti-
ques, de publier, que tout se vëdoit à Rome,

En cette perplexité, il consulta le Cardinal Francesco Soderino, appelé de Volterre, qui estoit son amy & son confident, & qui auoit manié les affaires du Pôrificat sous les Papes Alexandre VI. Iules II. & Leon X. Il luy proposa ses desseins de reforme, & les raisons qui le portoient à l'entreprendre; mais le Cardinal luy remōstra qu'en l'estat où se trouuoient les affaires de la Religion Catholique, ce qui de foy estoit vn bon remede pour la restablir dans l'Allemagne, & dans les autres Pays où elle estoit attaquée par les nouueaux Heretiques, ne seruiroit qu'à rendre ceux-cy plus insolens, & qu'à leur donner plus de credit dans l'esprit des peuples : qu'ils leur feroient voir par la reforme qu'il auroit entreprise, qu'ils auoient eu raison de crier contre les abus; & qu'au lieu de se contenter de ce qu'il auroit fait pour oster les mauuaises coustumes que le temps a tousiours introduites dans l'Eglise, ils passeroient à demander d'autres changemens essentiels; & enfin que c'estoit vn chemin pour mettre toutes choses sans dessus dessous. Le Pape, quand il fut sorty de sa chambre, enuoya chercher Guillaume Exenvort son Dataire que depuis il crea Cardinal, & Theodoric Hesius, son Secrétaire, qui estoient ses Confidens intimes, & leur fit la relation de ce que le Cardinal Soderino luy auoit représenté sur son dessein de la reforme de la Cour Romaine. Il se plaignit amèrement du malheur de sa condition, qui ne luy permettoit pas de remedier aux abus qu'il iugeoit deuoir estre

retranchez , & qui l'obligeoit de les souffrir , pour'en éviter de plus grands , & ne se mettre point tout le monde sur les bras. Il leur recommanda estroitement d'estre fort reseruez dans les expéditions de leurs charges , & d'y apporter la plus grande rigueur que pourroit souffrir la coustume & la corruption de son malheureux Siecle. Peu de temps apres , il dépescha vn Nonce en Allemagne , à la Diette qui se tenoit à Nuremberg , & escriuit vn Bref aux Princes qui y estoient assemblez , par lequel il les exhortoit à vser des derniers remedes du fer & du feu pour exterminer Luther , & ceux qui suiuoient sa doctrine. Ils luy respondirent avec des termes fort respectueux, mais qui n'alloient pas à le satisfaire en ce qu'il desiroit d'eux contre les nouveaux Heretiques. Sur la fin de leur Lettre, ils luy tesmoignerent que le meilleur remede pour remedier aux desordres qui se multiplioient tous les iours , estoit la celebration d'un Concile libre , dont l'autorité regleroit & termineroit toutes les disputes, & apres lequel les Princes temporels pourroient proceder contre ceux qui ne voudroient pas obeir à ses resolutions , avec plus de Iustice. Dans cette Diette les choses s'aigriront contre le Pape ; & dans sa Cour , on ne trouua pas bon que son Nonce eust confessé de sa part , que l'Herésie d'Allemagne procedoit des pechez des hommes , & particulièrement de ceux des Prestres , & des Prelats ; & que par le passé il s'estoit fait à Rome beaucoup de choses

1522.

dignes de blasme. Les Allemans firent publier vn Escrit intitulé, Cent griefs de la Germanie contre l'Ordre Ecclesiastique, avec des protestations de trauailler à s'en affranchir par les meilleurs moyens qu'ils pourroient. Les choses estant en cette confusion, Adrien qui n'estoit pas capable de porter le poids de tant d'affaires, mourut au bout d'un an & huit mois de Pontificat, avec vne plus grande reputation de bonté en sa vie particuliere, que d'habileté dans le gouuernement Politique.

CHAPITRE VII.

Suite de l'Histoire du Concile de Trente.

A Pres la mort d'Adrien, Iule de Medicis, cousin germain de Leon dixiesme, fut élu Pape, & il prit le nom de Clement VII. Son premier soin fut de remedier aux desordres de la Religion en Allemagne; & comme il estoit plus habile Politique que son predecesseur, il resolut de prendre vne autre voye que celle qu'il auoit ouuerte fort imprudemment à son aduis. Il enuoya à la Diette de Nuremberg, Laurens Campege, Cardinal de sainte Anastasie, avec cette instruction, qu'en traitant d'affaires, il fist semblant de ne rien sçauoir, ny du Bref d'Adrien, ny de la Commission de son Nonce, ny des Griefs de la Nation Germanique; mais que si on luy proposoit ceux, il condescendist à la reforme des abus qui regardoient les Ecclesiastiques d'Alle-

Adrien meurt, & Iule de Medicis est élu, & nommé Clement VII.

1523.

Resolutions de la Diete de Nuremberg pour la conuocation du Concile.

„magne ; & que pour les choses où le Pape
 „& la Cour Romaine estoient interessez , il
 „les éludast , & les renuoyast à sa personne,
 „pour en traiter avec luy, donnant de bon-
 „nes paroles d'auoir toute la satisfaction rai-
 „sonnable que l'on pourroit souhaiter. Le
 „Legat se conduisit selon ces ordres , & fit la
 reformation du Clergé de l'Allemagne :
 mais comme elle parut préiudiciable aux
 libertez du Pais , & à l'autorité des Magi-
 strats , elle ne fut pas receuë par la Diette.
 Auant que de se separer , on y resolut de
 prier le Pape de conuoyer vn Concile en
 Allemagne , & que les Estats de l'Empire
 s'assembleroient à Spire , l'onzième de
 Nouembre suiuant , pour aduiser à ce qui
 se deuoit faire , iusqu'à ce que le Concile
 fust commencé : Que les Princes & les Ma-
 gistrats feroient des Congregations d'hom-
 mes doctes & pieux qui prepareroient les
 matieres , lesquelles se deuoient proposer
 au Concile ; qu'ils donneroient ordre que
 dans le détroit de leurs Iurisdiccions , on
 preschast l'Euangile selon l'explication des
 Autheurs approuuez par l'Eglise : Et que
 toutes sortes de Peintures & de Liures con-
 tre la Cour de Rome seroient deffendus. Le
 Legat ayant respondu à tous les Chefs de ce
 Decret , dit sur le point du Concile , qu'il
 en aduertiroit le Souuerain Pontife. La
 Diette s'estant separée de la sorte, le Cardi-
 nal agist si bien auprès de quelques Prin-
 ces, & de quelques Euesques qui s'y estoient
 trouuez , qu'il les obligea de s'assembler à
 Ratisbone , où il leur fit approuuer sa refor-

mation pour estre gardée dans leurs Estats. Ces Princes estoient Ferdinand, frere de l'Empereur, deux Ducs de Bauiere, l'Archeuesque de Salzebourg, les Euesques de Trente, & de Ratisbone, & les Agents de neuf autres. L'Empereur Charles ayant veu le Decret de la Diete de Nuremberg, s'en plaignit dans les Lettres qu'il escriuit en Allemagne, & particulièrement de la demande d'un Concile faite au Pape sans sa participation. Mais toutefois pour montrer combien il desiroit le repos de l'Empire, il consentoit qu'il se celebrast dans le temps, & au lieu où il pourroit s'y trouuer en personne. Pour l'Assemblée de Spire, il la deffendit absolument, & commanda qu'on obeïst à l'Edict publié à Vormes.

Plusieurs
Princes
& Eues-
ques ap-
prouvè-
rent la refor-
mation
faite par
le Legat.

Les affaires qui survinrent en Allemagne de la guerre des Païsans, & des Anabaptistes, empêcherent qu'on ne pût s'assembler iusqu'à l'année 1526. où les ordres de l'Empereur s'estant trouvez à Spire, on traita des moyens d'appaiser les differends de la Religion. Les Deputez de Charles leurent ses Lettres dans la Diete, par lesquelles il deffendoit de faire aucune decision contre les ceremonies anciennes de l'Eglise, & ordonnoit l'observation de son Edict de Vormes, iusqu'à la tenuë d'un Concile, pour lequel obtenir du Pape, il estoit, disoit-il resolu d'aller dans peu de temps à Rome. Ce delay ne plût pas à beaucoup de personnes infectées du Lutheranisme, qui estoient dans l'Assemblée; & la Diete fut sur le point de se separer dans vne manifeste ru-

1525.

pture, ce qui alloit causer la guerre ciuile dans l'Empire. Ferdinand, frere de Charles, pour empescher ce mal-heur, fit faire vn Decret ambigu où il estoit arresté que l'on escriroit à l'Empereur pour le prier de reuenir en Allemagne, afin de donner ordre aux affaires de la Religion, & qu'estant necessaire pour les bien regler, de celebrer vn Concile, ou National, ou General, iusqu'à ce que l'vn ou l'autre fust conuocé, les Princes, & les Magistrats se gouverneroient de telle façon en ce qui regarderoit la Religion, & l'Edict de Vormes, qu'ils en pussent rendre bon compte à Dieu, & à l'Empereur.

Le Pape de son costé, dans le Consistoire qu'il tint à Rome, le treiziesme de Septembre, fit vn long & excellent discours, dans lequel ayant representé le miserable estat de la Chrestienté, qui venoit de receuoir vne grande secousse en Hongrie, par la perte de la bataille contre Soliman, où le Roy Louys estoit demeuré; & par les Heresies qui la diuisoient en Allemagne; il conclud que ces mal-heurs procedoient des desordres de la vie des Ecclesiastiques; & dit qu'il vouloit trauailler à leur reformation, & qu'il la commenceroit par sa maison: qu'il auoit resolu de s'acheminer en personne vers l'Empereur, & le Roy de France, & les autres qui estoient en guerre, afin de faire vne Paix vniuerselle, apres quoy il celebreroit vn Concile General pour restablir la discipline & l'innocence dans l'Eglise, & pour exterminer les He-

Clement
VII. se
propose
de reformer les
Ecclesiastiques.

retiques. Mais les calamitez qui luy arriuerent bien-toft apres l'empescherent d'executer vn si bon dessein. Car s'estant brouillé avec Charles, vne armée d'Allemands, la pluspart infectez des erreurs de Luther, passa en Italie, assiegea Rome, la prit, pillâ ses Eglises & ses Palais, traita les Cardinaux, les Euesques, les Ecclesiastiques, & les Religieux avec des cruautéz effroyables, & des ignominies estranges; & pour mettre le comble à l'insolence, & à l'impieté, elle arresta Clement prisonnier dans le Chasteau S. Ange. L'Empereur en ayant eu la nouuelle, tesmoigna en apparence vne extreme douleur; il fit cesser les réjouissances publiques qui se faisoient à Vailladolid pour la naissance de son fils Philippe, & ordonna des Processions generales pour la liberté du Pape; pensant bien couvrir par ces actions exterieures, la ioye qu'il sentoît d'auoir Clement en sa puissance. Mais il ne pût pas tromper les plus grossiers, qui iugerent aisément que tout ce qu'il faisoit, n'estoit qu'une grimace ridicule, ayant tenu le Pape six mois en prison, avec beaucoup de duresté. Cependant l'Herésie de Luther faisoit de grands progres dans l'Allemagne, & dans la Boheme, & chaque iour quelque Moine desbauché quittoit le froc, & publioit de nouuelles erreurs. Dans la Diete de Spire, qui auoit commencé le 15. Mars de l'an 1529. on auoit fait vn Decret, qui renoit les choses dans quelque balance iusqu'à la renuë du Concile, & remettoit la Messe dans les lieux où les Lu-

theriens estoient les maistres. Iean , Duc de Saxe , George , Esleeteur de Brandebourg , Philippe , Landgraue de Hesse , le Duc de Lunebourg , & quelques autres Princes s'y opposerent , & quatorze Villes principales de l'Empire s'estans jointes à leur Protestation d'appel au Concile futur , & à l'Empereur , ceux qui se separerent de l'Eglise , furent nommez Protestans. L'Empereur dans la Diette qu'il tint luy-mesme dans Ausbourg , apres son couronnement

1530. fait à Bologne , n'oublia rien ou pour ramener les Princes , & les Deputez des Villes qui auoient embrassé le Lutheranisme , à la Religion Catholique ; ou pour les diuiser les vns des autres ; ou pour obtenir qu'on restablîst la Messe dans les lieux d'où elle estoit bannie. Mais il ne pût rien gagner sur des esprits obstinez , & qui auoient gousté la douceur du libertinage de l'Herésie. Sur la fin de l'Assemblée , il fit publier vn Edict , par lequel il deffendoit que l'on fît aucun changement dans la creance & dans les ceremonies de la Religion , & disoit , que le Pape seroit supplié de conuoyer vn Concile dans six mois en vn lieu commode , & de le commencer dans vn an pour le plus tard. Clement ayant sceu ce qui s'estoit passé dans cette Diette , escriuit vne grande Lettre à tous les Princes de la Chrestienté , par laquelle il leur faisoit sçauoir que les differéds de la Religion n'ayans pû s'accommoder dans la Diette d'Ausbourg , comme il se l'estoit promis , de l'autorité de l'Empereur , & de la negotiation

1531.
Le Pape
Clement
promet
le Con-
cile.

tiation de son Legat, il estoit resolu de con-
 uoquer vn Concile General en Italie, dans
 vne Ville commode pour tous ceux qui de-
 uoient y assister, le plustost qu'il pourroit,
 les exhortant tous à se disposer d'y venir,
 ou d'y enuoyer leurs Deputez. En l'année 1532. &
 1532. Charles luy dépescha vn Ambassadeur, 1533.
 pour luy faire entendre qu'il auoit vaine-
 ment tenté de ramener à l'Eglise ceux que
 l'Herésie en auoit separez; qu'il ne pouuoit
 les y contraindre par la force des armes, à
 cause de la guerre du Turc dont il estoit
 menacé; & qu'il ne restoit qu'un moyen
 efficace pour esteindre ce grand feu, qui
 estoit la conuocation d'un Concile libre,
 où des personnes non interessées seroient
 Iuges. Le Pape accordant cette celebra-
 tion, proposa pour le lieu, Bologne, Par-
 me, & Plaisance, qui estoient de grandes
 Villes capables de receuoir & de nourrir la
 multitude de gens qui viendroient au Con-
 cile. Pour le tenir en Allemagne, il fit con-
 noistre que l'Italie, la France, & l'Espa-
 gne, ne l'endureroient iamais, & qu'il se-
 roit de petite autorité estant célébré dans
 vne Prouince particuliere. Pour la façon d'y
 proceder, il soustenoit avec raison qu'elle
 ne pouuoit estre autre que celle qui auoit
 tousiours esté pratiquée en l'Eglise Catho-
 lique, à sçauoir que les Euesques y seroient
 Iuges des questions de la Foy, par l'autho-
 rité de leur caractère, les Abbez par la cou-
 stume, & quelques autres par priuilege des
 Souuerains Pontifes: Que s'ils'y trouuoit
 en personne, les Decrets se feroient sous

C

Edict de
l'Empe-
reur
Charles,
qui per-
met la li-
berté de
conscié-
ce.

» son nom , avec l'approbation du Synode ;
 » & s'il y assistoit par ses Legats , qu'ils se-
 roient publiez au nom du Concile. L'Amba-
 assadeur de l'Empereur fit sçauoir cette
 responce à son Maistre , lequel ne trouuant
 pas les Lutheriens disposez à accepter vn
 Concile de cette sorte , où ils preuyoient
 bien qu'inafailliblement ils seroient con-
 damnez , & se voyant pressé des armes du
 Turc contre lequel il ne se pouuoit deffen-
 dre sans l'assistance des Protestans , fit pu-
 blier le 23. du mois d'Aoust vn Edict de
 Paix entre sa Majesté Imperiale , & tous
 les Estats de l'Empire, sans que pour raison
 de la Religion , l'vn pust faire la guerre à
 l'autre , iusqu'à la celebration du Concile
 qui seroit intimé dans six mois , & com-
 mencé dans vn an , ce qui ne s'executant
 pas , les Estats s'assembleroient pour pren-
 dre les resolutions de ce qui se deuroit fai-
 re ; & que cependant l'Empereur feroit sus-
 pendre tous les procez criminels commen-
 cez pour le faict de la Religion , contre le
 Duc de Saxe , & ceux qui estoient ioints
 avec luy par vn mesme interest. Ce fut la
 premiere liberté de conscience qu'obtint
 l'Allemagne de Charles , & plusieurs blâ-
 merent sa conduite en cette rencontre ,
 comme preiudiciable aux interests de l'E-
 glise qu'il abandonnoit si facilement , luy
 qui en estoit le principal Protecteur , & qui
 affectoit de paroître si zélé pour sa deffen-
 se. D'autres tascherent d'excuser cette Paix sur
 la guerre du Turc , & sur l'Estat de l'Em-
 pire où la continuation de la seuerité con-

DE S. CHARLES BORROME'E LIV. I. 51
tre les Heretiques eust allumé le feu d'une
guerre civile, qui ne pouvoit estre que tres-
funeste à l'Eglise mesme.

CHAPITRE VIII.

Suite de l'Histoire du Concile de Trente.

L'Empereur s'aboucha l'année suivante 1533.
Lauec le Pape, qui luy fit de grandes
plaintes de cét Edict; & pour tesmoigner
qu'il y auoit esté forcé, il luy proposa d'en-
uoyer vn Nonce en Allemagne, qui traite-
roit avec les Princes, & les Estats Prote-
stans, de la forme & du lieu de la celebra-
tion du Concile; qu'il y ioindroit son Am-
bassadeur, & qu'ils negocieroient conioin-
tement, afin de trouuer quelque moyen
d'accommoder les difficultez qui se trou-
uoient en cette fascheuse affaire. Clement
gousta cette proposition, & choisit Hugues
Rangon, Euesque de Rhegio, pour l'en-
uoyer vers Iean Federic le ieune, Duc de
Saxe, qui estoit le Chef des Protestans,
pour sçauoir ses intentions sur la celebra-
tion du Concile, afin que la conuocation
n'en fust pas inutile. Il luy presenta les arti-
cles suiuaus, dont il falloit conuenir auant
toutes choses.

Le Pape
dépêche
vn Non-
ce en Al-
lemagne,
pour
traiter de
la ceba-
ration
du Con-
cile.

1. Que le Concile fust libre, & gene-
ral, & qu'il se celebrast selon l'usage an-
cien.

2. Que ses Decrets fussent obseruez de tout le monde.

3. Que les Princes , ou les Estats , qui ne pourroient pas s'y trouuer eux-mêmes , y enuoyassent des Ambassadeurs , & des Deputez.

4. Que cependant il ne se fist aucun changement en la Religion.

5. Qu'il se celebrast en vne Ville saine & commode , comme estoient Bologne, Plaisance , ou Mantouë.

6. Que quand quelques Princes ne s'y trouueroient pas , & n'y enuoyeroient personne de leur part , le Pape ne laisseroit pas de continuer le Concile.

7. Que l'Empereur & les Princes feroient executer ses Decrets à ceux qui ne voudroient pas obeïr.

Les Pro-
testans
refusent
le Con-
cile.

Le Nonce promet si les Princes d'Allemagne accorderoient ces conditions , que le Pape ayant fait part d'une si grande affaire aux autres Roys Chrestiens , intimerait le Concile dans six mois , & le commenceroit dans vn an apres la conuocation. L'Electeur respondit qu'il en communiqueroit avec ses alliez. Il les assembla dans Samalcade , où les articles ayant esté examinez , ils respondirent de telle façon que l'on vid clairement qu'ils ne vouloient point de Concile. De cette sorte , la Religion continua à se corrompre en Allemagne , & l'Herésie se respendit dans toutes les Prouinces , & toutes les Villes. L'Angleterre secoüa aussi le joug de l'Eglise sous Henry VIII. que Clement excommunia , parce que de

son autorité priuée, & tandis que le procez de son diuorce se traitoit à Rome, il auoit repudié Catherine, sa femme, qui estoit Tante de l'Empereur Charles, & espousé Anne de Boulen, dont il estoit passionnément amoureux. Cette Sentence fut donnée & publiée vn peu trop promptement. Car six iours apres, Clement receut des Lettres de François premier, par lesquelles il luy mandoit que Henry estoit disposé à prendre quelque accommodement raisonnable. Mais quand il sceut la nouuelle de la Censure prononcée contre luy, il fit publier vn Edict, par lequel il se qualifia Chef de l'Eglise Anglicane, & defendit à ses Sujets, sous peine de mort, de dire, que le Pape eust aucune autorité en Angleterre, & ordonna que l'Archeuesque de Cantorbery pouruoiroit à tous les Eueschez du Royaume, sans aller à Rome pour obtenir des Bulles. En mesme temps il auoit fait de tres-rigoureuses deffenses contre les Heretiques pour leur interdire l'entrée de ses Estats. Mais comme l'vnité d'auec le Chef visible de l'Eglise, est le lien le plus fort de la veritable Religion, il ne faut pas s'estonner si celuy-là estant rompu, l'autre fut bien-tost alterée par les Heresies qui gastoient le Septentrion.

Comme les choses estoient en cét estat, le Pape Clement mourut, & le Cardinal Farnese fut mis sur la Chaire de S. Pierre. Il prit le nom de Paul III. Auant que les Cardinaux procedassent à la nomination d'vn Pape, ils firent quelques articles pour

L'an
1534. le
3. d'O-
tobre.
Mort du
Pape
Clement
VII. &

election
de Paul
III.

regler le gouvernement du Pontife futur ; & vn des Principaux fut la conuocation d'un Concile General dans vn an apres son election. Aussi-tost que Paul fut créé , il fit connoistre aux Cardinaux , qu'encore que les articles n'eussent pas esté iurez ; il vouloit neantmoins observer celuy de la celebration du Concile qu'il iugeoit absolument necessaire pour exterminer les Heresies qui desoloient la Chrestienté , & pour mettre la paix entre les Princes Chrestiens : & comme on y deuoit traiter de la reformation de l'ordre Ecclesiastique , il exhorta les Cardinaux de ne l'attendre pas , mais de la commencer eux-mesmes , d'une façon qui edificast l'Eglise , & qui pust fermer la bouche aux Heretiques. Il ne se trouuoit en aucun Consistoire qu'il ne parlât toujours de la mesme chose , & enfin il en discourut si fortement dans celuy qui se tint le 16. de Ianuier de l'année 1535. qu'il fut resolu que des Nonces seroient enuoyez à tous les Princes Chrestiens pour leur faire sçauoir que la resolution du Pape estoit de celebter vn Concile General , & pour les exhorter à faire la Paix entr'eux , afin que leurs dissensions n'y donnassent point d'empeschement. Apres beaucoup d'agitations , la conuocation si desirée du Concile se fit par vne Bulle dattée du 12. de Iuin de l'année 1536. qui l'intimoit à Mantouë au 26. de May de l'année suiuate. Les Protestans d'Allemagne furent surpris de cette publication , & escriuirent aussi-tost à Matouë, Charles , qu'un Concile libre leur ayant

Le Con-
cile est
conuo-
qué dans
Matouë,

esté promis en Allemagne, ils esperoient & les
 que sa Majesté leur tiendrait sa parole. Au Prote-
 commencement de l'année 1537. il fit stans le
 publier vne grande réponse à leurs Lettres, reiectif.
 par lesquelles il les exhortoit d'accepter le
 Concile qui estoit publié, & auquel ils
 auoient appelé; que s'agissant d'appaiser
 les differends nez dans la Religion non seu-
 lement en Allemagne, mais en France, en
 Angleterre, & dans beaucoup d'autres
 Royaumes, Mantouë estoit vn lieu fort pro-
 pre pour receuoir les Prelats de toutes na-
 tions, & tous ceux qui voudroient s'y trou-
 uer; qu'ils ne deuoient pas se considerer
 tellement eux-mesmes, & se flatter d'vne
 si grande opinion de science & de sainteté,
 qu'ils ne considerassent les Theologiens
 des autres Prouinces; qu'ils trouueroient
 toute sorte de seureté dans vne Ville qui
 estoit vn fief de l'Empire, & qu'il la leur
 donneroit de sa part telle qu'ils la pour-
 roient souhaitter. Mais le Duc de Mantouë
 ayant fait proposer au Pape de luy fournir
 de l'argent pour l'entretien de la garnison
 qu'il iugeoit necessaire durant la tenuë du
 Concile, pour la seureté de Mantouë, vou-
 lant y donner les ordres, & y faire exercer
 la Iustice en son nom; Paul ne voulut pas
 consentir à des demandes qu'il iugeoit pre-
 iudiciables à la dignité du Siege Apostoli-
 que, & à la Majesté du Concile. De cette
 façon les choses n'ayant pû s'accommoder,
 le Pape resolut de le tenir en vne autre Vil-
 le, & pour le faire sçauoir à la Chrestienté,
 il publia vne Bulle par laquelle il le suspen-

doit iusqu'au 1. iour de Nouembre de la mesme année.

1557.

Cependant voulant trauailler à la reformation du Clergé, & particulièrement de la Cour de Rome, il commit les Cardinaux Contarin, Carafe, Sadolet, & Polus, les Archeuesques de Salerne, & de Brunduse, & Matthieu Gilbert, Euesque de Verone, avec l'Abbé de S. George de Venise, & le Maistre du sacré Palais, pour en dresser des memoires, & les luy presenter. Ces personages estoient tous tres-recommandables par leur science, leur pieté, & leur zele pour le reſtabliſſement de la Discipline Ecclesiastique; de sorte qu'ils examinerent à la rigueur tous les abus qui s'estoient glissez dans la Cour Romaine, & en ayant fait des articles où ils descendoient premierement au détail des desordres de la Daterie, de la Chancellerie, & des mœurs, & apres aux remedes pour guerir la corruption, ils donnerent cét écrit à sa Sainteté, l'année ſuiuante. Il le communiqua aux Cardinaux dans le Conſiſtoire qu'il tint pour ce ſujet, & les aduis ayant eſté differents pour la publication, il fut enfin arreſté qu'elle ne ſe feroit pas encore, & que l'on attendroit vne conioncture de temps plus fauorable pour executer ces pieuſes reſolutions. Toutefois le Cardinal de Schomberg ne laiſſa pas d'en enuoyer vne copie en Allemagne, contre laquelle les Heretiques ne manquerent pas d'eſcrire avec leurs anciennes calomnies: que le Pape ſe iouoit de la Chreſtienté, & qu'il la

1558.

vouloit abuser par vne vaine monstre de
 reforme , qui n'estoit qu'en papier , &
 de l'exécution de laquelle on le trouueroit
 toujours tres-esloigné , aussi bien que de
 la conuocation du Concile. Mais le Pape
 leur ferma la bouche par la Bulle qu'il fit
 publier au mois de Nouembre , pour en
 faire l'ouuerture au premier de May de
 l'année 1538. dans la ville de Vicence. Il
 nomma pour ses Legats , les Cardinaux
 Campege , Simoneta , & Alexandre. Tou-
 tefois il fut encore suspendu à la volonté
 du Pape pour le temps , à cause des guer-
 res qui estoient allumées entre les Princes
 Chrestiens. En l'année 1540. il setint vn
 Colloque entre les Catholiques & les Pro-
 testans dans Haguenau. Echius parla pour
 les vns, & Philippe Melancton pour les au-
 tres. Mais cette Conference ne dura que
 trois iours, parce qu'il vint des Lettres de
 l'Empereur qui rappelloient le Cardinal
 Granuelle qu'il y auoit enuoyé , & qui re-
 mettoient les affaires à la Diete de Ratif-
 bonne, où Charles voulut estre present. Il
 auoit prié le Pape d'y enuoyer vn Legat qui
 fust vn homme docte , sage, & pieux, avec
 vne autorité absoluë pour terminer tou-
 tes les affaires , sans qu'il fust besoin d'en-
 uoyer à Rome pour consulter sa Sainteté.
 Elle fit choix du Cardinal Contarin, Prelat
 dont la doctrine & la probité estoient re-
 connues de tout le monde. Mais cette Diete
 fut encore inutile ; & les Catholiques ne
 purent tomber d'accord avec les Protestans
 d'aucun des articles essentiels qui estoient

1538.

 Seconde
 conuo-
 cation
 du Con-
 cile à
 Vicence.

1541.

 Collo-
 que de
 Hague-
 nau qui
 re pro-
 duit rië.

en dispute. L'Empereur voyant tant de difficultez, rompit l'Assemblée, au mois de Iuillet, qui auoit commencé au mois de Mars, & remit la conclusion du Colloque au Concile vniuersel, ou à vn Synode National, ou à vne Diete del'Empire qu'il intimeroit, si dans dix-huict mois il ne pouuoit obtenir ny l'vn ny l'autre du Pape. Il confeta avec luy dans Luques, & ils arresterent que Paul enuoyeroit à la Diete qui deuoit se tenir à Spire, au commencement de l'année 1542. pour prendre les dernieres résolutions. Le Senat de Venise auerty du choix qui auoit esté fait de Vicenze, s'excusa de prester cette Ville, à cause qu'il preuoyoit que dans le Concile, on traiteroit de la guerre contre le Turc, avec lequel l'estat de leurs affaires ne leur permettoit pas de rompre. Cela obligea Paul d'offrir aux Princes d'Allemagne, par l'Euesque de Modene, qu'il dépêcha à la Diete de Spire, ou Parme, ou Plaisance, ou Bologne, ou Trente, qui estoit dans les frontieres de leurs Pais, pour le lieu de ce Synode si désiré. Ils accepterent cette dernière Ville : mais les Protestans s'y opposerent, ne voulant pas consentir que le Pape fist la conuocation, ce qui estoit commencer par le Schisme, vne Assemblée faite tout exprés pour le terminer. La Bulle fut publiée, & le iour de l'ouuerture assigné au premier de Nouembre de l'année 1542. pour donner loisir aux Euesques, & aux autres Prelats qui deuoient y auoir voix,

Le Concile est conuocé à Trente.

d'y arriuer. Sur la fin l'Empereur, & le Roy Tres-Chrestien, estoient conjurez, & les autres Princes de s'y trouuer, ou bien d'enuoyer des Ambassadeurs qui fussent des personnes capables des matieres qui s'y deuoient traiter. Charles ayant receu vne copie de cette Bulle, se plaignit au Pape, de ce que dans les termes, elle l'égaloit au Roy de France, qui auoit fait toutes choses, disoit-il, pour l'empescher. François luy auoit déclaré la guerre en ce mesme temps dans le Brabant, le Luxembourg, l'Artois, le Roussillon, & le Piémont; de sorte que la saison n'estoit nullement commode pour tenir le Concile, où il falloit que ces deux Princes conspirassent au repos de la Chrestienté. Le Roy estant auerty des pratiques qu'il faisoit pour le mettre mal avec le Pape, & des bruits qu'il semoit adroitement dans l'Europe contre luy, comme s'il eust fauorisé le party des Lutheriens, fit publier des Edicts tres-seueres contre eux, pour les faire punir; & n'oublia rien de ce qui dépendoit de son autorité pour empescher que l'Herésie ne fust progrez dans son Royaume, où malgré toute la rigueur des supplices, elle commençoit à pulluler bien fort. Le Pape leur enuoya des Cardinaux Legats pour tascher de les reconcilier; Le Cardinal Sadolet, homme d'une grande vertu, & d'une eminente doctrine, à François; & celuy-cy estant mort auant que d'entreprendre son voyage, il nomma à sa place, le Car-

dinal Viseo, Portugais, pour tascher de les reconcilier. Si la negociation de ce Legat eust esté aussi heureuse auprès de l'Empereur, que celle de Sadoler le fut auprès du Roy de France, la Paix se fust aisément conclüe entre ces grands Princes. Mais cette Ambassade demeura infructueuse par la dureté de Charles, qui ne voulut iamais consentir à aucun accommodement raisonnable. Cependant le Pape dépescha trois autres Legats à Trente pour assister au Concile en son nom, qui furent les Cardinaux Pietro Parisio, Consentin, Iean Moron, Milanois, & Regnaud Polus, Anglois, de la Maison Royale. Le premier estoit vn tres-celebre Canoniste; le second, vn grand homme de bien, & tres-experimenté dans la negociation des affaires de consequence. Le troisieme honoroit sa Legation par sa vertu éminente, & par la grandeur de sa naissance. Il tenoit comme le lieu de l'Eglise Anglicane, qui pour lors estoit dans le Schisme. L'Empereur enuoya à Trente, pour Ambassadeurs, Dom Diego de Mendoza son Resident à Venise, Nicolas Granuelle, & l'Euesque d'Arras, son fils, & quelques Prelats du Royaume de Naples. Ils arriuerent à Trente en mesme temps que les Legats, & aussi-tost ils les presserent d'ouurir le Concile, ce qu'ils ne iugerent pas à propos de faire encore, à cause du petit nombre d'Euesques qui se trouuoient assemblez. Sur la fin de l'année, Mendoza re-

ceur ordre d'aller à la Diète de Nuremberg, & peu de temps après son départ, les Euesques qu'il auoit amenez partirent de Trente, sous diuers pretextes. Enfin au bout de six mois, les Legats qui estoient demeurez presque seuls, furent rappelés du Pape. L'année 1543. se passa en guerre entre Charles & François; mais dans la suiuite, au mois de Septembre, la Paix se conclud entr'eux, & dans les articles, il fut particulièrement conuenu que les deux Princes s'vniroient pour la conseruation de la Religion Catholique, pour la reformation de la Cour Romaine, & pour la conuocation du Concile. Paul ayant receu des nouuelles de leur reconciliation, publia aussi-tost vne Bulle, par laquelle remettant le Concile à Trente, il l'indiqua au quinzième iour de Mars. Il y enuoya pour ses Legats Iean Marie du Mont, Cardinal, & Euesque de Palestrine, Marcel Ceruin, Cardinal du titre de Sainte Croix, & le Cardinal Polus, & les fit partir en grande diligence, afin qu'ils y fussent des premiers avec quelques Euesques d'Italie en qui il se fioit particulièrement, pour faire l'ouverture du Concile. Ils arriuerent à Trente le treizième iour de Mars de l'année 1545. qui sera à iamais remarquable pour le commencement d'une si grande action. L'Empereur renuoya Dom Diego de Mendoza. Ferdinand, Roy des Romains, dépescha aussi des Ambassadeurs : & l'Electeur de Mayen-

1544.

1545.

ce qui estoit Cardinal , y fit comparoistre les Deputez. Beaucoup de choses arriuerent qui furent cause que le Concile ne s'ouurit que le treiziesme Decembre , qui estoit vn iour de Dimanche. Il n'y eut pour lors que vingt-cinq Euesques presens. La premiere Session se passa en ceremonies Ecclesiastiques , & la seconde fut indiquée pour le premier iour de l'année 1546. Il n'y fut traité que de la façon de viure que les Prelats deuoient garder durant la tenuë du Concile , afin que le bon exemple qu'ils donneroient au peuple , seruist autant que la decision des poincts controuersez , à la conuersion des Heretiques. En la troisieme Session, qui se tint le quatriesme Fevrier , on publia le Symbole de la Foy , dont l'Eglise Catholique a coustume de se seruir , comme le fondement de toutes les deliberations qui se deuoient prendre. En la Session du huietieme d'Avril , on leut le Canon des Liures de l'Esriture Sainte ; & la Version ancienne appellée la Vulgate , fut declarée authentique , pour euitter la confusion , que la diuersité des versions eust infailliblement causée. En la Session cinquiesme , du sixiesme de Juin , on determina cinq Anathemes sur le sujet du peché originel , contre les Heretiques modernes , & on fit deux Chapitres pour la reformation de la Discipline , comme il auoit esté arresté , que ces deux choses se traiteroient en mesme temps. En la Session sixiesme , du treiziesme de Jan-

DE S. CHARLES BORROME'E. Liu. I. 83
uier de l'année 1547. la matiere de la iustification fut resoluë en seize Chapitres & en trente-trois Canons. La Doctrine y est excellemment traitée dans les premiers, & toute prise presque des Liures de Saint Augustin contre les Pelagiens. Les anciens Decrets des Conciles pour la residence des Euesques furent renouuellez, & d'abondant on ordonna, que ceux qui seroient absens plus de six mois, sans legitime empeschement, seroient priuez de la quatriesme portion de leurs reuenus; que s'ils continuoient leur absence durant six autres mois, ils perdroyent vn autre quart de leurs fruits, applicables à la nourriture des pauvres de leurs Dioceses. La contumace croissant, on soufmet les absens à la plus rigoureuse Censure des Canons; & le Metropolitain est obligé de dénoncer au Pape ses Suffragans absens, & les Suffragans de faire la mesme chose du Metropolitain, afin qu'il les chastie selon qu'exigera la desobeissance, & qu'il pouruoye leurs Eglises d'autres Pasteurs qui y fassent leurs Charges. Vne des plus grandes disputes, qui fit plus de bruit, & qui pensa causer vne plus grande rupture entre les Peres du Concile, fut celle de cette residence, pour sçauoir si elle estoit de Droit Diuin, ou Ecclesiastique. Les Euesques François, dont le Cardinal de Lorraine estoit le Chef, & les Espagnols, s'estoient liez pour soutenir la premiere opinion, qu'ils prouuoient par la nature de l'Episco-

pat institué par I E S V S - C H R I S T , pour paistre ses brebis , ce qui ne se peut faire sans la presence du Pasteur ; & par l'autorité des anciens Peres. Les Euefques Italiens accoustumez à demeurer à la Cour de Rome , deffendoient opiniastrement la seconde , & menaçoient de se diuiser si on vouloit resoudre la chose contre leur sentiment. Enfin , pour ne causer pas vn Schisme dans le Concile , on demeura d'accord de terminer cette question avec des termes qui ne prononçassent rien de clair , ny pour l'une , ny pour l'autre opinion ; mais qui establisserent la residence des Pasteurs sous des peines lesquelles les obligeassent à la garder estroitement , & qui renouellant les anciens Canons faits sur ce sujet , laissent à iuger que l'esprit & la pensée du Concile estoient , que le Droit Diuin establissoit la residence de ceux qui auoient la conduite des ames. On accusa le Cardinal de Lorraine , de s'estre relasché en cette occasion , pour ses interests particuliers , & pour complaire à la Cour de Rome , qui craignoit de se voir deserte , si la decision à la quelle il s'estoit opiniastreté eust esté faite. Nostre Saint Charles comme nous verrons dans la suite de cette Histoire , monstra bien qu'il estoit de cette opinion par la violence qu'il fit au Pape Pie , son Oncle , pour obtenir permission de venir resider en son Archeuefché de Milan. Le Cardinal Bellarmin qui

estend assez loin l'autorité des Souverains Pontifes, dit franchement à Clement VIII. qu'il ne croyoit pas que sa Sainteté le pût dispenser de la residence : & pour cette raison il quitta son Diocese, afin de servir l'Eglise Vniuerselle dans Rome sans manquer à ce qu'il deuoit à celle de Capouë.

En la septième Session, on publia les Canons qui regardoient les Sacremens en general & en particulier contre les erreurs des Heretiques, qui en retranchoient le nombre, en diminuoient l'efficace, & en ruinoient la necessité. Entre les choses qui furent ordonnées pour la reformation, la defense de la pluralité des Benefices fut la plus considerable, comme elle estoit la plus necessaire. Mais par l'avarice des hommes, c'est aujourd'huy la moins obseruée, & celle dont on fait le moins de scrupule. On se sert de toutes sortes de moyens pour en amasser, & on se flatte de les pouuoir tenir en conscience sur les dispenses obtenues d'ordinaire ou par surprise, ou par importunité, ou par faueur; & qui n'ont autre fondement que la vanité & la conuoitise dereglée de ceux qui les demandent. Car sous pretexte de s'entretenir selon sa qualité, on lasche la bride à l'ambition & au luxé, qui n'ont point de bornes; ou à qui la corruption du Siecle en a donné de si estendus, que ny l'Euangile, ny les Loix Ecclesiastiques ne les peuuent souffrir.

Cependant le bruit de la maladie contagieuse qui se répandit dans Trente effraya tellement plusieurs Prelats, que sans de-

Le Con-
cile est
transfe-
ré à Bo-
logne.

Mort de
Paul III
& éle-
ction de
Iule III
*L'an

mander congé aux Legats de s'en aller, ils partirent avec vne grande precipitation. Cela fut cause de la translation du Concile à Bologne. Les Ambassadeurs de l'Empereur, par l'ordre de leur Maistre, s'y opposerent. On ne laissa pas neantmoins d'y faire trois Sessions, l'onzième de Mars, le vingt-deuxième d'Avril, & le deuxième de Iuin, qui ne furent que pour prolonger le Synode iusqu'à l'arriuée des Euesques que l'on attendoit de iour à autre. On ne passa pas outre, à cause de l'opposition de l'Empereur qui s'obstinoit tousiours à remettre le Concile à Trente, & de la guerre qu'il fit en Allemagne, où apres la victoire qu'il gagna contre l'Electeur de Saxe, & les Protestans, il fit publier cette declaration, ou formule si celebre pour la Religion, que l'on appelle *Interim*, qui offensa avec raison les Catholiques, & dont les Heretiques ne furent pas satisfaits. Comme la verité Chrestienne a vn Dieu pour son Auteur, elle tient aussi cette perfection de la Nature diuine, qu'elle ne peut estre diuisée, & que tout partage qui s'en fait, la ruine entierement. Le Pape Paul ayant leu vne Lettre du Duc Ostaue son Neveu, écrite au Cardinal Farneze, par laquelle il le menaçoit de s'accommoder avec le Gouverneur de Milan, si on le vouloit obliger à quitter Parme, comme c'estoit le dessein du Pape, qui la vouloit rejoindre à l'Estat Ecclesiastique; fut saisi d'une telle colere qu'il s'éuanoüit, & vne fièvre violente l'ayant saisi, au bout de trois iours il mourut *à

l'âge de quatre-vingt vn an , huit mois , & dix iours , & en la feizième année de son Pontificat , commencée depuis vingt-huit iours. La nouuelle de cette mort estant apportée à Bologne , le Cardinal Iean Marie du Mont en partit aussi-tost , & vint à Rome en diligence pour se trouuer au Conclaué , où enfin il fut porté sur la Chaire de S. Pierre , le huitième de Février de l'année mil cinq cent cinquante. Il prit le nom de Iule III. L'Empereur renouella incontinent apres l'eslection , ses anciennes instances pour remettre le Concile dans la Ville de Trente , & apres diuerses negociations , enfin il l'y rétablit par vne Bulle, du dix-huictième des Galendes de Decembre, & en indiqua l'ouuerture au mois de May de l'année suivante. Il choisit pour y presider de sa part , le Cardinal de S. Marcel, Sebastien Pighin , Archeuesque de Siponte , & Aloisius Lipomanus , Euesque de Verone. En l'onzième Session, on fit l'ouuerture avec les ceremonies ordinaires. En la douzième on assigna la treizième , qui se celebra l'onzième d'Octobre , & la Doctrine de la tres-sainte Eucharistie y fut établie en huit Chapitres , & en onze Canons opposez aux erreurs des Heretiques. La Discipline Ecclesiastique fut réglée en huit Chapitres. La quatorzième Session qui se tint le vingt-cinquième de Nouembre, comprend toute la matiere de la Penitence en neuf Chapitres , & celle de l'Extreme-Onction en trois , & vingt-neuf Canons. Les Heresies du temps furent Anathema-

1549. &
le 10. de
Nouem-
bre.

1551.

1552.

Le Con-
cile est
suspendu
pour
deux ans

1555.

Mort du
Pape su-
le III. &
élection
de Mar-
cel Cer-
uin.

tifiées. Le quatorzième Chapitre de la re-
formation regarde la collation des Ordres
sacrez, la punition des Clercs, & la col-
lation des Benefices. En la quinzième Ses-
sion, on resolut de donner vn sauf-con-
duit aux Protestans d'Allemagne en la for-
me qu'ils le souhaittoient pour leur asseu-
rance, & on assigna la seizième seance au
dix-neufième de Mars de l'année suiuan-
te. Mais auant que ce terme arriuaist, la
guerre qui s'alluma en Allemagne par les
Protestans, avec lesquels Henry II. s'e-
stoit ligué contre l'Empereur, le Siege
& la prise d'Ausbourg, la retraite des
Protestans, des Electeurs, & des Eues-
ques de Germanie, & des Italiens, sur
le bruit qui vint à Trente, que la Com-
té de Tyrol estoit toute en armes, furent
cause de la suspension du Concile pour
deux ans. Dix se passerent auant qu'il
pust estre rassemblé. Durant ce temps,
Iule mourut le vingtième iour du mois
de Mars en la soixante-&-septième année
de son âge, & en la cinquième de son
Pontificat. Le Cardinal Marcel Ceruin fut
mis à sa place, & il ne changea point de
nom. Sa doctrine, l'innocence de sa vie
passée, sa modestie, sa grauité, sa con-
stance, & son zele, le rendoient tres-di-
gne de la Chaire de S. Pierre, & l'Eglise
deuoit attendre de luy de fort grandes
choses pour sa paix, & pour sa reforma-
tion. Il auoit resolu de trauailler serieu-
sement à celle de la Cour de Rome, & de
commencer par luy-mesme, ayant cette

creance que tant s'en faut qu'elle preiudiciaſt à l'autorité Pontificale , qu'au contraire elle eſtoit tres-vtile pour la fonder ſolidement. Il fut ſi eſloigné d'auoir vn amour deſordonné pour ſes parens, qu'il ne voulut iamais permettre qu'aucun , non pas ſon frere meſme vint à Rome. Comme on luy demanda s'il vouloit qu'on logeaſt au Palais deux petits Neueux qui eſtoient nourris dans la Ville , il répondit , *Qu'y ont-ils affaire ? le Palais eſt-il leur patrimoine ?* Mais par vn iugement adorable de Dieu , qu'il ne nous eſt pas permis de ſonder , ce bon Pape qui ne ſongeoit qu'aux moyens de reformer ſa Cour , & de remedier aux autres deſordres de l'Egliſe , mourut vingt-deux iours apres ſon eſlection , laiſſant les gens de bien auſſi inconſolables de ſa mort, qu'elle donna de ioye à ceux qui apprehendoient l'integrité de ſes mœurs , & la ſeuérité de ſa Diſcipline. L'on ſoupçonna ſon Chirurgien d'auoir empoisonné vn vlcere dont il le penſoit , & on crut que les ennemis de ſa vertu l'auoient porté à cét effroyable crime contre le Chef de l'Egliſe , qui alloit apparemment y faire reſſeurir la Sainteté de ſes premiers Siecles. Iean Pierre Carafe luy fut donné pour ſucceſſeur à l'âge de ſeptante-neuf ans. C'eſtoit vn homme ſçauant dans les Langues Hebraïque , Grecque , & Latine , & dans toutes les ſciences , mais il eſtoit plus recommandable par ſa pieté,

Il meurt
au bout
de 22.
iours.

Election
de Paul
IV.

Il chasse
ses pa-
rens de
Rome.

que par sa doctrine. Iule second l'ayant fait Euesque de la petite ville de Chieti, il établit la Congregation des Clercs Reguliers, qu'on appelle Theatins; avec le Bien-heureux Caëtan qui en est le veritable fondateur. Paul III. l'auoit creë Cardinal, & pour luy en témoigner sa reconnoissance, il prit le nom de Paul IV. La Cour de Rome apprehendoit extrêmement la seuerité de son esprit, & elle auoit raison, car il fit plusieurs Bulles pour reformer la corruption des mœurs de la Ville, & les Offices de la Daterie, de la Chancellerie, & de la Penitencerie. Mais ce qu'il fit contre ses Neveux, le Cardinal Carafe, le Duc de Palliano, & le Marquis de Montisbel, à qui il osta leurs Charges. & qu'il chassa de Rome, avec leurs femmes, & leurs enfans, est vne action si heroïque & si extraordinaire, que ie ne puis m'empêcher de la remarquer. Apres que ses Neveux furent sortis de Rome, il dit avec beaucoup d'esprit & de force, *maintenant ie puis compter du premier an de mon Pontificat*. Certes il est bien plus aisé de les tenir esloignez de la Cour, que de garder, quand ils y sont établis, quelque moderation en leur auancement. La tendresse naturelle qui est sollicitée à toute heure par leur presence, & par les occasions, succombe enfin à la tentation. Paul enuoya les Euesques à leur residence, qui fut vne chose assez dure aux Prelats que leurs esperances retenoient

DE S. CHARLES BORROME'E. LIU. I. 71
en la Cour. Il mourut le dix-huitième iour
du mois d'Aoust de l'année 1559. qui estoit
la cinquième de son Pontificat. Le Cardinal
Jean Ange de Medicis, comme nous
auons dit, fut esleu à sa place pour gou-
uerner l'Eglise.

CHAPITRE IX.

Suite de l'Histoire du Concile de Trente, & sa Conclusion.

ENfin apres vne fort longue digression
que ie croy ne deuoir estre ny inutile, ny
desagreable aux Lecteurs, me voila arriué 1560.
au Pontificat de l'Oncle de S. Charles, &
à la conclusion du Concile de Trente qui
fut l'ouurage de sa pieté, de son zele, &
de sa diligence. L'Eglise n'auoit plus que
ce remede pour empêcher que l'Herésie
de Luther, & de Caluin ne se rendist tout
à fait maistresse de l'Allemagne, & de la
France, où de iour en iour elle faisoit des
progrez que les supplices ne pouuoient ar-
rester, & qui seruoit encore de pretexte
aux mescontens pour troubler la paix du
Royaume. Pie doncques, pressé par son
saint Neveu, & par son propre zele, indi-
qua la continuation du Concile à Trente,
au iour de Pasques de l'année 1561. Il choi-
sit pour Legats, les Cardinaux Hereule
Gonzague, du titre de Sainte Marie la
neufue; Hierosme Seripand, du titre de

Le Pape
Pie IV.
indique
le Con-
cile de
Trente.

Sainte Susanne ; & Stanislaus Hosius , du titre de S. Laurens , & Euesque de Varmie en Pologne ; Louys Simonete , du titre de S. Ciriaque , & Marc d'Altaemps , son Neveu , du titre de la Basilique des douze Apostres. L'ouuerture s'en fit le dix-huictième jour de Ianuier de l'année 1562. La dix-huictième Session qui estoit la seconde sous le Pontificat de Pie , se tint le vingt-sixième de Février , où les Protestans furent inuitez de venir au Concile ; & dans la Congregation du quatrième de Mars , il fut expédié vn sauf-conduit pour ceux d'Allemagne , & des autres Nations. Mais il fut inutile pour ceux qui ne craignoient rien tant que de paroistre dans vne Assemblée où ils sçauoient bien que leurs nouveautez seroient rejettées. Dans les Sessions du dix-neufième de May , & du quatrième de Iuin , on prolongea la seance pour diuerses raisons qui regardoient l'examen , & la resolution des dogmes ; & enfin dans la vingtunième qui se celebra le seizième de Iuillet , on publia la Doctrine de l'Administration de l'Eucharistie en quatre Chapitres , & quatre Canons , ou Anathemes. La reformation de plusieurs abus qui s'estoient glissez en la Collation des Ordres sacrez , & dans les expéditions des Lettres , fut aussi établie , & de tres-saints Reglemens faits pour l'erection des nouvelles Parroisses , & la deposition des Curez ignorans , la substitution de Vicaires capables en leur place , & à la visite des Monasteres dereglez , par les Euesques ; & la suppression des Questeurs

steurs & des Questes qui se faisoient avec concession d'indulgences pour ceux qui feroient des aumosnes.

Dans la vingt-deuxième Session, on arresta la Doctrine du Sacrifice de la Messe en huit Chapitres, & neuf Canons. Ces derniers contiennent des Anathemes contre les Heresies opposées en ce sujet à la creance de l'Eglise. Dans la reformation, entre beaucoup d'autres choses, on renouella tous les anciens Decrets des Conciles qui regloient la vie des Clercs; & on ordonna quelles qualitez devoient avoir ceux qui seroient choisis pour les Eueschez. Il y eut aussi vn Decret fait sur la demande du Calice, en l'administration de l'Eucharistie, par lequel elle est renuoyée au Pape, pour en ordonner selon qu'il iugeroit estre plus vtile à la Republique Chrestienne, & au salut de ceux qui souhaittoient la Communion sous les deux especes.

Dans la Session vingt-troisième, la Doctrine du Sacrement de l'Ordre, & de la Hierarchie de l'Eglise, fut determinée en quatre Chapitres, & en huit Canons; & dans la reformation on establit de tres-saintes Loix pour la collation des Ordres sacrez.

Dans la vingt-quatrième Session tenuë l'onzième Novembre, on prononça douze Canons sur la creance orthodoxe du Sacrement de Mariage: & dans les Chapitres de la reformation, le saint Concile declara nuls les mariages qui doresnavant se feroient sans la presence du Curé des Con-

1563.

D

tractans , ou d'un autre Prestre qui auroit permission de luy , ou de l'Ordinaire , d'assister à la celebration , & sans l'assistance de deux ou trois témoins. Les empêchemens qui rompoient le mariage apres qu'il estoit contracté , furent aussi restraints , soit pour l'affinité spirituelle , soit pour celle qui vient de la fornication , laquelle est limitée au second degré. Dans la reformation , on fit plusieurs Reglemens pour l'administration de l'autorité du Tribunal des Euesques.

Dans la vingt-cinquième , qui se tint le troisième & quatrième iour de Decembre , & qui fut la dernière , on publia deux Decrets , l'un pour ce qu'il falloit croire du Purgatoire , & l'autre pour ce qui regardoit l'inuocation des Saints , & le culte de leurs Images , & de leurs Reliques , le pouuoir de donner des Indulgences , & leur legitime usage , l'observation des Festes , la distinction des viandes , & le ieusne. Dans la Reformation , plusieurs Ordonnances furent faites pour les Reguliers , la conduite des Monasteres , & la closture des Religieuses ; les meubles , la table , & la façon de viure des Cardinaux , & des Euesques , où le saint Synode desire tant de modestie , de frugalité , & de sainteté , que leur exemple soit vne Predication muette pour les peuples qu'ils gouvernent. L'amour dereglé des Freres , des Neueux , & des autres proches parens , qui porte à les enrichir des reuenus Ecclesiastiques , y est seuerement deffendu , comme la source de plu-

fleurs grands maux qui affligeoient l'Eglise. Sur la fin de la Session, les Legats proposerent de demander au Pape, la confirmation des Decrets faits sous Paul III. Iulien III. & Pie IV. Tous les Euesques s'y accorderent, & répondirent par le mot, *Placet, il nous plaist*; & il n'y en eut qu'un seul qui ne fut pas de cet avis. Les Decrets furent signez par les quatre Legats, Hosius, & Simoneta, Moron, & Nauagero, ces deux derniers ayant esté substituez aux Cardinaux de Mantouë, & Seripand, qui estoient morts durant le Concile, & par les Cardinaux de Lorraine, & Madruce, Euesque de Trente, par deux autres Cardinaux, par trois Patriarches, par vingt-cinq Archeuesques, par cent soixante-huit Euesques, par sept Abbez, par trente-neuf Procureurs des Prelats absens, & par sept Generaux d'Ordres Monastiques. Il y eut de l'Eglise de France vingt-six Euesques, trente-un de celle d'Espagne, trois de Portugal, un d'Angleterre, un d'Irlande, trois de Croatie, & de Moravie, un pour chacune des Prouinces de l'Illyrie; trois de la Hongrie; deux de Pologne, & de l'Allemagne autant. Mais de l'Italie, il y en assista iusqu'au nombre de cent quatre-vingt-sept, depuis sa premiere conuocation, iusqu'à sa conclusion. Le Cardinal de Lorraine composa & prononça les acclamations qui se firent à la fin. Il auoit desiré de s'y trouuer pour y acquiescer de la reputation; mais il ne satisfit ny le Concile, ny le Pape, ny la France. Quand il y fut reuenu, on l'accusa d'auoir

laissé passer beaucoup de choses qui choquoient les droicts du Roy , & les Libertez de l'Eglise Gallicane , & de s'estre laissé tromper par des esperances qui flatterent son ambition avec vn peu trop de credulité. Il se deffendoit par le petit nombre d'Euesques qui se trouuerent avec luy au Concile, lesquels estoient emportez par le plus grand nombre de ceux à qui ces droicts & ces libertez estoient desagreables. Les Parlemens crierent le plus contre le Concile , & iusqu'à maintenant , ils ont empêché qu'il n'ait esté receu pour la Discipline Ecclesiastique. Mais les Ordonnances des Estats d'Orleans , & de Blois , ont presque établi les mesmes Reglemens pour les poincts les plus importans , de la residence des Euesques , de leurs visites , & pour les mariages clandestins. Il faut auoüer que ce Concile est le plus docte , le plus éloquent , & le mieux ordonné qu'aucun autre qui se soit tenu dans l'Eglise. Il n'a rien laissé à regler dans la Discipline ; & si on l'obseruoit à la lettre , l'Eglise seroit fleurissante , & la vie des Ecclesiastiques tout à fait exemplaire. Les Heretiques n'auroient pas sujet de dire , que ceux qui ont fait les Loix, les violent les premiers , & que l'on trouue mille moyens de les éluder par des dispenses qui n'ont ordinairement d'autres causes que l'ambition , ou l'auarice de ceux qui les demandent. Il y a eu des brigues , des adresses , & des passions humaines, ie le confesse ; mais y a t-il iamais eu de Concile où ces choses ne se soient trou-

uées ? Il ne faut que lire l'Histoire qui nous reste des Conciles tenus dans les Siecles les plus purs, pour connoître que les hommes portent par tout les sentimens de l'Humanité, & que les affaires les plus saintes & les plus religieuses ne s'en peuvent exempter. Mais le Saint Esprit qui ne reforme pas tous les cœurs, vnit tous les esprits pour la decision des questions controuersées, & les remplit de sa lumiere. Enfin, il faut acquiescer aux resolutions de ces Assemblées, où il n'y a plus de moyen d'exterminer les erreurs que les Heretiques publient, & d'appaiser les Schismes qui se forment dans l'Eglise. Ainsi donc se termina le Concile de Trente, que l'on auoit eu tant de peine à conuoquer, qui auoit esté interrompu par deux fois, & où les Princes auoient tasché de faire entrer leurs interests; où tant de contestations importantes estoient arriuées; qui tenoit la Cour de Rome en de si grandes allarmes; que le Pape mesme apprehendoit tant pour son autorité; & que les Protestans auoient tesmoigné desirer, mais dont ils auoient combattu les Decrets à mesure qu'ils se publioient, par des Liures pleins d'injures & de calomnies. Pie proposa dans le Consistoire, la confirmation qui luy estoit demandée, & il y eut diuersité d'opinions entre les Cardinaux sur ce sujet. Quelques-uns trouuoient que l'on auoit donné trop d'autorité aux Euesques, pour agir en beaucoup de rencontres, & qu'en plusieurs des articles de la reformation,

Pie con-
firme le
Concile
de Tren-
te.

il s'estoit fait des changemens fort preiudiciables aux interests des Officiers de la Daterie , & de la Chancellerie. Ceux-cy presentoyent de grands memoriaux , où ils exposoyent le sujet de leurs plaintes , & demandoient d'estre desinteressés des sommes qu'ils auoyent payées pour leurs Charges , si les ordres du Concile deuoient estre executez. Saint Charles qui auoit tant trauaillé pour le faire conclurre , ingea fort bien que si le Pape ne le confirmoit, ou le confirmoit avec quelques exceptions, on alloit retomber dans les premieres confusions dont on estoit si heureusement fortý , & que ce seroit donner la victoire aux Heretiques , & aux Princes, l'occasion d'assembler des Synodes Nationaux pour mettre ordre à la Discipline Ecclesiastique dans leurs Estats. Ces considerations furent si fortes , qu'enfin Pie au Consistoire qu'il tint le vingt-sixième de Ianuier , confirma absolument le Concile celebré à Trente , & en expédia vne Bulle qui fut signée de tous les Cardinaux , & publiée dans l'Italie.

Autant que ceux qui craignoient la reformation des abus en eurent de déplaisir , autant S. Charles en eut-il de ioye. Mais comme il n'auoit pas procuré la conclusion de cette grande Assemblée pour des fins Politiques ; & pour la vanité d'auoir achemé vne si difficile affaire ; la plus grande passion fut d'apprendre parfaitement tous les Decrets qui auoyent esté faits , afin qu'apres les auoir bien impri-

mez dans la memoire , il les pût plus facilement observer. Pour ce dessein , il les rangea en trois lieux qu'il fit accommoder dans son Oratoire. Au premier qu'il appelloit le Saint des Saints , il mit les Decrets qui regardoient les dogmes de la Foy Catholique ; au second, ceux qui touchoient la reformation de la Discipline Ecclesiastique ; & au troisiéme , ceux qui concernoient les Laïques. Cette disposition luy servant de memoire locale, l'ayda beaucoup pour retenir toute la Doctrine du Concile. Quand les Legats qui avoient presidé au nom du Pape , furent reuenus à Rome , il fit établir vne Congregation de huit Cardinaux , du nombre desquels il voulut estre , pour decider les difficultez qui pouvoient naistre de l'explication des Decrets. Il retint encore quelques excellens Theologiens qui reuenoient de Trente ; & les fit assembler avec d'autres qui se trouuerent à Rome , pour reformer le Missel , & le Breuiare , & purger le dernier de beaucoup de narrations peu certaines qui s'y estoient glissées dans les Homelies en la Feste des Saints. Mais le Catechisme qu'il fit composer est vne piece si vtile & si admirable , qu'on ne peut iamais reconnoistre l'obligation dont l'Eglise luy est redeuable pour ce sujet. Il se seruit particulièrement de la Doctrine du Pere François Forieri Dominiquain , & Portugais de nation , pour acheuer cette œuvre qui est la plus accomplie en son espece qu'aucune qui se soit faite depuis les

S. Char.
le les ap-
prend
avec soin

S. Char-
les fait
compo-
ser le
Cate-
chisme.

écrits des Saints Peres. Le stile en est élégant, l'ordre beau, la clarté merueilleuse, la solidité admirable, les passages choisis, & la pieté tres-sage, & tres-spirituelle; de sorte qu'on peut nommer cet ouvrage, vn Abregé parfait de la Theologie Chrestienne. Les Curez des Villages, & mesme des meilleures Villes n'ont presque besoin que de ce Liure pour instruire leurs Parroissiens; & pour moy, ie confesse qu'il me sert utilement dans mes visites, & que plus ie le lis, plus ie le trouue beau, & excellent. Charles trouuailla encore à l'Edition des Saints Peres, afin que leurs œuvres fussent correctement & fidelement imprimées, & purgées des fautes que l'ignorance du Siecle passé, & la malice des Heretiques y auoient fait glisser en beaucoup d'impressions qui s'en estoient faites. Mais comme il scauoit que la voye d'enseigner par l'exemple est beaucoup plus courte, & plus assurée que par celle des preceptes; il resolut de commencer par luy-mesme, & par sa famille, la reformation ordonnée dans le Concile. Il esperoit avec raison, que la Cour Romaine voyant vn Neveu de Pape pratiquer ces saints Reglemens, prendroit enuie de l'imiter, sinon en toutes choses, au moins en quelque partie; & que l'observation de la Discipline Ecclesiastique se répandroit apres fort aisément dans le reste du monde, comme du lieu de sa source. Il quitta les diuertissemens, quoy qu'innocens, qu'il auoit

S. Char-
les com-
mence à
prati-
quer les
Ordon-
nances
du Con-
cile.

pris iufqu'alors pour relafcher fon efprit de l'accablement des affaires publiques. Il laiffa la foye en fes habits ; il commença à pratiquer l'Oraifon Mentale , à ieufner plus fouvent, à mortifier fon corps par les haïres , & par les difciplines , à vifiter les Eglifes de la Ville , & à faire de plus grandes aumofnes publiques , & fecrettes. Mais elles furent plus abondantes dans l'Archeuefché de Milan qu'en aucun autre de fes Benefices : & comme il n'y refidoit pas , il n'en voulut plus tirer aucun reuenue , fçachant bien qu'il n'eft pas permis de fe nourrir du lait des brebis , que l'on ne prenne le foin de les paifire foy mefme. De la reformation de fa perfonne , il paffa à celle de fa famille , & tout d'un coup il congedia quatre-vingt domestiques de fa fuite. Ils eftoient prefque tous Gentils-hommes de naiffance , & doïez de beaucoup de belles qualitez pour le monde ; mais il ne iugea pas qu'eftans tous Laïques , & capables feulemeut des exercices de Cavaliers ; il pûst en confcience les retenir dans fa maifon qu'il vouloit rendre tout à fait Ecclefiaftique. Il fe monftra neantmoins tres-liberal dans les prefens qu'il fit à tous en les congédiant ; de forte qu'ils laiffèrent un fi bon Maïstre avec beaucoup de regret , d'eftime , & de reconnoiffance. Il retint les perfonnes Ecclefiaftiques auprès de luy , & des Laïques pour les bas Offices de la maifon ; mais il leur donna des regles Chreftiennes pour leur façon de viure , & leur deffendit à tous l'vfage de la foye , dans

Il ne retire rien d'aucun reuenue de l'Archeuefché de Milan , tandis qu'il n'y fait pas de refidence.

Il reforme le nombre de fes domestiques.

leurs habits , pour n'offencer point la modestie Clericale. Les premieres douceurs qu'il esprouua en l'Oraison , commençant à la pratiquer , furent si grandes , qu'elles luy firent prendre le dessein de quitter les affaires publiques , pour s'y addonner avec plus de liberté. Mais quand il le proposa à l'Euesque de Bracara , qui estoit son intime amy , & en la pieté de qui il auoit vne grande confiance ; il en fut détourné par ce

» sage Prelat qui luy fit voir , que sa pensée
» estoit tres-dommageable au bien de l'Eglise
» se qu'il pouuoit seruir si vtilement ; & que
» laissant la place qu'il tenoit , elle pourroit
» estre remplie de quelqu'un qui n'auroit ny
» son zele , ny sa prudence , ny son desintere-
» ressement , ny ses bonnes intentions ; qu'il
» seroit coupable deuant Dieu de tous les des-
» sordres qui arriueront de leur mauuaise
» administration ; & que les graces que Dieu
» luy faisoit alors , estoient pour detremper
» les amertumes , & pour adoucir les trauaux
» des affaires dont il estoit accablé ; que la
» pieté d'un vray Cardinal deuoit estre agis-
» sante & couragense : qu'enfin la vieillesse
» de son Oncle , & les besoins de l'Eglise ne
» luy permettoient pas de disposer de soy-
» mesme , & qu'il falloit faire voir au monde
» l'exemple d'un Neveu de Pape qui estoit
» plus interessé pour la gloire de l'Esponse du
» Fils de Dieu , que pour la grandeur de sa
» maison. Charles se rendit à ces raisons , &
» continua à son ordinaire à conduire les af-
» faires du Pontificat. Il auoit fort soigneuse-
ment remarqué dans le Concile , que la

fonction de la Predication est le propre Office del'Euesque, qui est obligé de paistre son troupeau, ce qu'il ne peut faire que par la parole Diuine qu'il luy annonce; de sorte qu'il resolut de s'appliquer tout de bon à ce Ministère. Il commença à parler en public dans les Chappelles escartées de quelques Religieuses, & peu de temps apres, il prescha dans l'Eglise de sainte Marie Majeure, de laquelle il estoit Archi-Prestre, & de sainte Praxede, qui estoit son tiltre. Ce fut vne grande nouueauté pour Rome, de voir vn Cardinal, & vn Cardinal Neveu, en Chaire. Et comme il n'auoit pas les qualitez exterieures de la voix, de l'action, & de l'éloquence, les gens du monde firent des railleries d'une chose qu'ils denoient extrêmement louer. Ils blasmerent plus hardiment la feuerité nouuelle de sa façon de viure, & plusieurs l'accuserent d'hypocrisie. Mais le Diable ne vint pas à bout du dessein qu'il auoit de la luy faire quitter, par ces mauuais iugemens que le monde en faisoit, selon son esprit, & sa malice. Au contraire, il auançoit de iour en iour dans la pieté; & son exemple fut si puissant dans la Cour de son Onele, que quelques-vns le suivirent, & que d'autres prirent garde de plus près à ne faire aucune chose mauuaise qui pust venir à sa connoissance: tant il est vray que la vertu de ceux qui gouvernent, a le pouuoir de se faire respecter, si elle ne se peut faire imiter; & tant leur exemple a de force pour obliger le vice à se cacher deuant eux. Le Pape mesme profita beaucoup.

S. Charles s'exerce à la Predication.

de la deuotion de son Neveu ; & corrigea certaines choses dans sa famille qui n'estoient pas absolument mauuaises ; mais dont le retranchement estoit à souhaiter pour l'edification des peuples. Il prit vn soin particulier de reparer les Eglises de ses Benefices , & de son tiltre. Il fit faire la voute feinte de l'Eglise de S. Martin du Mont. Il bastit presque toute entiere celle de sainte Praxede , & repara le Monastere des Moines qui la touche. Il embellit le Chœur de sainte Marie dont il estoit Archiprestre ; & du reuenu des Chappelles inutiles pour le seruice Diuin , qui y estoient fondées , il institua des Prebendes pour des Beneficiers qui seruiroient au Chœur. Il fit encore beaucoup de despense en l'Eglise de sainte Marthe , qui estoit vn Monastere de filles , dont il se trouuoit Protecteur. Mais vne de ses plus éclatantes œures , fut le bastiment de sainte Marie des Anges , & du Conuent des Chartreux , qu'il conseilla au Pape d'entreprendre , & qu'il fit acheuer dans les Thermes , ou les Bains de Dioclerien. Le lieu estoit tres-propre à des personnes dont la vie estoit vne estude continuelle de la mort , car il se trouuoit mal sain , presque durant toute l'année. Mais Dom du Puy , qui a esté fort longtemps Prieur de ce Monastere , l'a mis en si bon estat , que la demeure est saine & agreable. La doctrine , & la pieté de ce bon Superieur l'ont rendu tres-celebre , & il est mort en reputation d'un veritable Chartreux , c'est à dire d'un Saint. Plusieurs Car-

DE S. CHARLES BORROME'E. Liu.I. 85
dinaux, & plusieurs Euesques, conceurent
vne sainte ialousie de voir faire à Charles
des reparations si magnifiques, & com-
mencerent à prendre le mesme soin de
leurs Eglises; de sorte que Rome est pres-
que obligée à ce saint Cardinal, de tant de
magnifiques Temples que l'on y admire
aujourd'huy, & de tant de precieux orne-
mens dont ils sont enrichis.

CHAPITRE X.

*Du soin qu'eut saint Charles de son
Eglise de Milan, durant le temps
qu'il en fut éloigné, du voyage qu'il
y fit & de son premier Concile
Prouincial.*

COMME la lumiere de Dieu conduisoit
S. Charles en toutes ses actions, elle
luy fit connoistre l'obligation precise & in-
dispensable qu'il auoit de prendre vn soin
tout particulier de l'Eglise de Milan dont il
estoit le Pasteur. A mesure qu'il auançoit
dans le chemin de la Pieté, cette connois-
sance deuenoit plus claire dans son esprit,
& luy faisoit sentir de plus cuisantes inquie-
tudes de se voir absent de son Espouse; de
sorte que songeant nuit & iour à ses neces-
sitez qui estoient tres-pessantes, il ne pou-
uoit auoir aucun repos, tandis qu'il s'en
voyoit esloigné. Ce n'est pas qu'il ne don-
nast tous les ordres necessaires pour la bon-

3. Charles presse le Pape pour avoir permission d'aller dans son Diocèse, & ne la peut obtenir.

ne conduite de son Diocèse, & de sa Province, qu'il ne fust tres-particulierement informé de l'estat de toutes choses, & qu'il ne fust tout ce qu'un bon Euesque absent peut faire. Mais il voyoit par experience, que la presence du Pasteur a toute vne autre force, & qu'elle seule peut empescher de tres-grands maux, parmy les Ecclesiastiques principalement, qui commettent aisément des fautes, quand ils pensent que leur Iuge ne les sçaura pas, ou qu'ils les pourront déguiser par quelques Relations fauorables. C'est ce qui le portoit à presser fort souuent le Pape de luy donner congé d'aller visiter ses brebis. Mais il ne le pût jamais obtenir, sa Sainteté ne se pouuant passer de son assistance dans les affaires du Pontificat; & croyant qu'il falloit preferer en cette occasion, l'utilité de l'Eglise Vniuerselle, à celle de l'Eglise de Milan.

Charles obeît à la volonté de son Oncle, qui y ioignoit encore les prieres, & les plaintes amoureuses du dessein qu'il auoit fait de l'abandonner, & remit son voyage en vn autre temps. Mais ne se contentant pas de sçauoir par les Relations que le Vicaire General luy enuoyoit ponctuellement par tous les Couriers, l'estat de son Diocèse; ny de renuoyer vn Euesque Suffragant pour les fonctions Episcopales; il ietta les yeux sur vn saint Prestre nommé Nicolas Ormanete, qui auoit esté Vicaire General de Iean Matthieu Gilbert, Euesque de Verone, Prelat d'une éminente vertu, & qui auoit commencé le premier dans l'Italie,

à reſtabliſſer la Diſcipline Eccleſiaſtique. Il auoit ſous vn ſi bon Maïſtre appris à gouverner vn Dioceſe , & outre cét employ , il auoit encore ſuiu le Cardinal Polus en Angleterre , où dans l'adminiſtration des affaires qui regardoient la Religion , il s'eſtoit monſtré digne de la confiance que Charles auoit en ſon habilité. Il auoit eſté preſent au Concile de Trente qui venoit de ſe conclure ; & apres tous ces emplois , il gouvernoit vne petite Cure dans le Dioceſe de Verone , avec vne merueilleuſe pieté , & vn eſprit eſſoigné de toute ambition. Mais tandis que ce bon Preſtre ne penſoit qu'à viure dans l'innocence de la ſolitude , Charles qui connoiſſoit ſon merite par reputation , le pria de le venir trouuer à Rome. Il le receut comme vn grand ſeruiteur de Dieu dont il deſiroit ſe ſeruir , & eut de fort longues conferences avec luy , ſur le gouvernement de ſon Dioceſe , qu'il vouloit eſtablir d'vne façon tout à fait conforme aux Decrets du Concile de Trente. Apres ces conferences , il l'envoya à Milan avec toute l'autorité Epiſcopale pour y eſtablir la Diſcipline qui s'y eſtoit eſtrangement alterée.

Il fait venir à Rome le Preſtre Ormaneto , & l'envoie dans ſon Dioceſe pour le gouverner.

Les Clercs qui deuoient eſtre le flambeau de la Vertu pour les Laiques , en eſtoient , par leurs mauvais exemples , la pierre d'achoppement , le ſcandale , & les corrupteurs. Ils ne ſe contentoient pas que leurs mœurs fuſſent prophanes ; leurs perſonnes l'eſtoient auffi en leurs habillemens , en leur ſuite , en leurs meubles , & en toutes leurs façons

Deplorable eſtat du Dioceſe de Milan.

de faire. Les riches Beneficiers desdai-
gnoient les Ministeres Ecclesiastiques ,
comme s'ils eussent esté au dessous de leur
condition. Ils laissoient leurs Eglises dé-
pourueuës des ornemens necessaires pour
celebrer les diuins Offices avec quelque
bien-seance ; mais ils negligeoient le soin
des Temples viuans , avec vne cruauté en-
core plus criminelle. Ils ne songeoient qu'à
faire amas de Benefices sur Benefices , dont
le reuenu estoit employé dans leurs famil-
les , & dans leurs débauches. Les pauvres
Prestres estoient sordides , & si ignorans ,
que beaucoup ne croyoient pas estre obli-
gez de se confesser , parce qu'ils enten-
doient la Confession des Laïques. Les Pre-
dicateurs, bien loin de crier contre les abus,
s'amusoient à prescher des choses curieuses
& inutiles, La Discipline Reguliere s'estoit
fort relaschée dans les Maisons Religieuses ;
& les Conuents des hommes & des filles ,
par la frequentation des gens du monde ,
estoit deuenus des lieux de desbauche ,
ou de diuertissement. Il ne faut pas s'eston-
ner si le peuple estoit tel que le Prestre , &
si la maison du Seigneur ayant tant d'ordur-
es, les maisons des Seculiers estoient rem-
plies de corruption. Ormanete iugea bien
que la guerison de ces maux surpassoit ses
forces ; toutefois pour y donner quelques
commencemens , & se confiant en l'assi-
stance de celuy qui sçait défaire les Geans
par la main des petits Bergers , la premie-
re chose qu'il fit arriuant à Milan , fut d'as-
sembler le Synode Diocesain , où il conuo-

qua tous les Ecclesiastiques obligez d'y assister. Ils se trouuerent enuiron douze cent. En cette grande Assemblée, il fit publier les Decrets du Concile de Trente, & faire à chaque Ecclesiastique la Profession de Foy, selon la Formule, laquelle y auoit esté dresée. Le Pere Palmius de la Compagnie de Iesvs, que S. Charles auoit enuoyé auant Ormanete, y fit vne Predication puissante pour porter ses Auditeurs à vne veritable reformation de leur vie. Ormanete parla aussi avec tant de zele, que ces deux discours ietterent dans les cœurs des assistans, de fort bonnes semences qui produisirent leurs fruicts en vn autre temps. Il visita toutes les Eglises de la Ville, & la plus grande partie de celles du Diocese, où il corrigea vn nombre infiny d'abus, & de mauuaises coustumes qui s'y estoient introduites par l'absence des Archeuesques, lesquels depuis quatre-vingt ans, n'auoient fait aucune residence dans ce grand Diocese. Il donna quelque commencement à vn Seminaire, assemblant des ieunes hommes qu'il mit dans vne maison, pour les esleuer saintement au seruice de la sainte Eglise. Il reforma beaucoup de desordres dans les Monasteres des Religieuses; Enfin il fit tout ce que pouoit faire le meilleur Vicaire General du monde. Mais le Diocese estoit comme l'estable d'Augée, dont S. Charles que l'on peut bien nommer l'Hercule des Euesques, pouoit tout seul oster les ordures.

Ormanete assemble le Synode de Milā.

Il luy en escriuit en ces termes, & cette

S. Char-
les ob-
tient cō-
gé de ve-
nir à Mi-
lan.

nouvelle r'alluma si fort en luy le desir qu'il auoit de venir à son Eglise, qu'il pressa le Pape avec tant d'ardeur pour obtenir son congé, qu'enfin il le luy accorda; mais à la charge, que ce ne seroit que pour celebrer son Concile Prouincial, & reuenir aussi-tost apres qu'il auroit esté tenu. Pour luy donner plus d'autorité, il le crea Legat à *Latere*, dans toute l'Italie, afin d'oster beaucoup de sujets de dispute pour la presceance, avec d'autres Cardinaux, & pour luy mettre en main des moyens plus prompts & plus faciles d'exercer ses Ordonnances. Auant que de partir de Rome, il assembla beaucoup d'habiles Theologiens & de sçauans Canonistes, avec lesquels il consulta les Decrets qu'il vouloit faire dans son Concile Prouincial, & les moyens de le rendre vtile à son peuple. Il escriuit par auance à Ormanete la resolution de son voyage, & luy donna ordre de faire accommoder le Palais Archiepiscopal avec tant de modestie, qu'il n'y eust rien qui pust contenter les yeux par vne superfluité curieuse, ny les offenser par vne saleté affectée. Il auoit resolu de loger tous les Euesques Suffragans, & il vouloit demeurer dans les termes de l'Hospitalité sainte que l'Apostre ordonne à l'Euesque d'exercer, & non pas les traiter en Cardinal, Neveu du Pape, c'est à dire, en grand Prince. Il partit de Rome le premier de Septembre de l'année 1565. & mena avec luy Siluio Antonio, Iean Baptiste Amalthée, & Iule Poge, personnages d'éminente connois-

sance dans les belles Lettres , & dans la Langue Latine , comme le témoignent les ouvrages qu'ils ont donnez au Public. Pour les affaires Ecclesiastiques , il auoit auprès de luy, Scipion Lancelot, Michel Thomas, & Iean Baptiste Castel, qui estoient des hommes veritablement extraordinaires en ces matieres. En passant, il visita son Abbaye de la Nonantola, où il assembla les Chanoines qui la seruoient, & reforma les choses qui en auoient besoin. Il laissa en tous les lieux où il s'arresta, vne grande odeur de pieté, aux Princes, & aux personnes de qualité qui le receurent avec tous les honneurs que l'on a coustume de rendre aux Legats à Latere, & encore au Neveu du Pape seant. Mais les bonnes actions qu'il fit en ce voyage n'estoient que des fleurs encore grossieres en comparaison des fruits que nous luy verrons bien-tost produire.

Enfin, il fit son entrée dans Milan, vn iour de Dimanche, qui tomboit au 23. de Septembre. Sa reception fut tres-magnifique, & les Milanois voulurent témoigner par les Arcs triomphaux, les Peintures, & les emblèmes, la ioye qu'ils auoient de voir leur Prelat, apres en auoir esté priuez durât quatre-vingts ans, comme nous auons déjà dit. Le Dimanche suiuant il prescha, & prit pour texte ces paroles du Fils de Dieu, *J'ay* *Luc. c. desiré d'un grand desir de manger cette Pasque* 22. *avec vous.* Il n'estoit pas fort éloquent, mais l'éloquence d'un Euesque preschant dans la Chaire est bien differente de celle des autres Predicateurs. Là il parle comme ayant

1565.
Il pres-
che

puissance, son caractère donne vne énergie particuliere à ses paroles ; & l'esprit Pastoral les fait entrer dans les cœurs des enfans à qui cette nourriture est naturelle, au lieu que celle des autres est estrangere, & que d'ordinaire c'est plustost vn ragoust qu'un aliment.

Les complimens qu'il receuoit de tous costez ne l'empeschoient pas de songer à son Concile. Les Euesques de la Prouince se rendirent à Milan, qui furent ceux que ie vais nommer ; Bernardino Scotto, Cardinal de Trani, Euesque de Plaisance ; Guido Fererio, Euesque de Verceil ; Gierolamo Vida, Euesque d'Albe ; Mauricio Pietra, Euesque de Vigeanne ; Cesare Gambarà, Euesque de Tortonne ; Scipione d'Esti, Euesque de Casal ; Pietro Costachiaro, Euesque d'Acqui ; Domenico Bolano, Euesque de Bresse ; Nicolo Sfondrato, (il fut depuis porté au Pontificat, & se nomma Gregoire XIV.) Euesque de Cremone ; Girolamo Gallarato, Euesque d'Alexâdrie de la Paille ; & Federigo Cornaro, Euesque de Bergame. Les quatre autres Euesques de Lodi, de Noarre, d'Ast, & de Sauone, ne pouuât s'y rendre, à cause de diuers empeschemens Canoniques, y enuoyerent leurs Procureurs. Le Clergé de l'Eglise de Ventimille, qui estoit vacante, y deputa aussi le sien. Les Cardinaux Bobba, & Castiglione, voulurent auoir la consolation d'y assister. Ils n'estoient pas de la Prouince, mais ils auoient tant de veneration pour S. Charles, qu'ils desiroiét de profiter de ses exemples,

& de voir la celebration du premier Concile Prouincial qui se tenoit dans l'Eglise, après celuy de Trente, par vn Euesque si pieux & si bien instruit en la discipline Ecclesiastique. Le Concile se celebra comme ils l'auoient esperé avec vn grand succès, & on y publia des Decrets tres-sages, & tres-rigoureux tout ensemble pour la reformation des mœurs des Ecclesiastiques, & des Laïques, & pour l'administration des Sacremens, la recitation des diuins Offices, le gouvernement des Hospitaux, la visite des Paroisses, & l'exercice des Ordres que l'on appelle moindres, qui estoit entierement negligé. La table des Euesques y fut réglée iusqu'au nombre des plats qu'on y deuoit seruir; & la lecture de l'Escriture Sainte, ou de quelqu'autre Liure de pieté, introduite, afin de repaistre l'ame au mesme temps que le corps prendroit sa nourriture, & pour en bannir les entretiens seculiers, & les plaifans qui en font le deshonneur. Les habillemens de leurs domestiques y furent reduits à vne grande simplicité, qui en bannissoit l'or, l'argent, la soye, les couleurs voyantes, les souliers mignons, & découpez, & ne leur laissoit que des estoffes de laine noire, ou brune, afin que la famille Episcopale fût differente de la famille des Gouverneurs, & des Seigneurs des Prouinces, où il seroit aussi mal-seant de ne voir que des hommes vestus de long, comme c'est vne chose ridicule de ne voir dans les maisons des Euesques, que des

gens d'épée. On fit aussi des Reglemens pour les Moniales, & on pourueut exactement à la closture, & à toutes les autres choses qui regardoient la Discipline Monastique dans leurs Conuents. Enfin, tout ce qui appartient à la bonne conduire d'un Diocèse, depuis les plus hautes fonctions de l'Euesque, iusqu'aux plus basses de ceux qui sonnent les cloches, fut si admirablement ordonné dans cette Assemblée; que l'on ne peut assez admirer la vaste estendue de l'Esprit Ecclesiastique de Saint Charles, qui eut la meilleure part en ce travail. La celebration d'un Concile Prouincial estoit vne chose si nouvelle dans Milan, que l'on y accourut pour la voir de tous les endroits de la Prouince. Chacun ne pouuoit assez s'estonner de voir un Cardinal aagé de vingt-six ans, & Neveu du Pape, prescher si souuent, administrer les Sacremens, travailler avec ses Confreres, & se priuer de toutes sortes de plaisirs, pour faire les fonctions Episcopales. Le bruit s'en respendit dans toute l'Italie, & vint iusqu'aux oreilles de Pie qui en eut vne ioye si sensible, qu'il en escriuit un Bref à saint Charles, par lequel il luy resmoignoit la singuliere satisfaction qu'il auoit de sa conduite.

Comme il estoit à Verone, pour recevoir de sa part les Sœurs de Maximilien qui venoient en Italie, trouver les Princes de Florence, & le Duc de Ferrare, à qui elles estoient mariées, il receut un Courier qui l'auertissoit de la maladie

dangereuse du Pape. Aussi-tost il prit la poste, & vint à Rome, où la premiere chose qu'il fit, estant descendu de cheual, fut de s'informer des Medecins, de l'estat où estoit son Oncle. Ils luy dirent nettement, qu'ils auoient perdu toute esperance de sa santé, & qu'il ne pouuoit eschapper sans vn miracle. Charles à l'heure mesme entra dans la chambre de Pie, & luy fit comprendre adroitement, qu'il falloit songer à la mort, & laisser toutes autres affaires pour penser à celles de sa conscience. Pie receut vne grande consolation de le voir auprès de luy, en ce terrible passage, & escouta fort volontiers toutes les choses qu'il luy dit, pour l'y bien preparer. Charles auoit le cœur pressé d'une douleur bien amere, perdant vn Oncle à qui il auoit de si grandes obligations, & qui l'aimoit si tendrement. Car il ne consideroit point du tout la perte de sa grandeur, & de ce que l'on appelle fortune, qu'il alloit faire, se sentant si fort chargé de ses emplois, & de ses biens, qu'il en souhaittoit plus ardemment la deliurance, que les autres n'ont accoustumé d'en desirer la possession. Mais la Grace diuine fortifia si bien son cœur en cette occasion, qu'il parut tousiours auprès du Pape avec vn visage tranquille, & qu'il fut capable de l'assister iusqu'au dernier soupir. Il luy donna le Saint Viatique, & l'Extreme-Onction; & luy ayant fait produire tous les actes necessaires pour faire vne bonne mort, il

rendit l'ame entre ses bras , le dixiesme iour de Decembre de l'année 1565. en la soixante-fixiesme année de sa vie , & en la fixiesme de son Pontificat.

CHAPITRE VI.

Saint Charles apres l'eslection du Pape Pie cinquiesme , vient resider à Milan , & regle admirablement sa famille.

LE principal soin des Neueux d'un Pape mort , est de luy donner vn Successeur qui soit ou vne de leurs creatures , (comme on parle à Rome) ou s'ils ne peuuent obtenir cela , quelqu'un dont ils n'ayent pas suiet de se défier , & qui ne soit pas ennemy de leur famille. Les Princes prennent part en ces eslections , & selon leurs interets differents , donnent des exclusions formelles aux vns , & en portent d'autres au Pontificat. Les diuers pretendans n'oublient rien pour faire reüssir leur dessein ; chaque Cardinal a ses pretentions ; de sorte qu'on ne peut nier que l'esprit du monde n'entre au Conclau pour y faire faire le Pape , & bien souuent on dit qu'il est fait auant qu'il soit esleu. Mais on doit aussi auoüer , qu'apres y auoir employé ses plus subtiles intrigues , il faut qu'il cede au S. Esprit, qui réuerse toutes brigues, & d'ordinaire fait tomber le sort sur celuy auquel
on

on pensoit le moins , se seruant de moyens humains pour faire vne eslection diuine. Saint Charles estoit bien esloigné d'agir en cette occasion importante où il falloit donner vn Chef à l'Eglise , par les interests domestiques ou par ceux d'aucun Prince que ce fust , & il entra au Conclaue avec la resolution constante de porter au Pontificat, vn des Cardinaux sur lesquels il auoit ietté les yeux , qui estoient Morone, lequel auoit assisté au Concile de Trente , homme de grande capacité pour les affaires , & Sirlet, personnage que pour sa doctrine il auoit porté au Cardinalat. Ces deux nominations furent trauersées par les Cardinaux de la faction opposée à la sienne, & ne reüssirent pas, à cause que S. Charles ne voulut point employer les adresses dont on a coutume de se seruir en de semblables affaires. Enfin voyant ces difficultez , il se resolut de faire créer Pape, le Cardinal Alexandrin, Religieux de l'Ordre de S. Dominique, qui luy parut tres-digne de cette grande Charge. Il en connoissoit la suffisance pour l'auoir souuent employé dans des affaires importantes , durant le Siege de Pie. Il faisoit encore plus d'estat de l'innocence de ses mœurs , & de sa piété qui estoit singuliere ; de sorte qu'il se détermina à son exaltation au Pontificat. Toutes les raisons de l'interest de sa famille le deuoient empêcher de le choisir , estant obligé de sa promotion au Cardinalat , à Paul IV. de la maison des Carafes , ennemie de la sienne ; & n'ayant pas esté fort bien traité de son

S. Charles ne songe qu'à faire élire vn bon Pape.

E

Le Cardinal A-
lexâdrin
est élu
Pape, le
7. iour
de Jan-
vier de
l'an
1566.

Oncle. Mais il fit ceder ces considerations au bien de l'Eglise, qu'il crût ne pouuoir estre mieux gouuernée que par ce vertueux Cardinal. Il desira seulement de luy qu'il prist le nom de Pie V. pour l'honneur de la memoire de son Predecesseur. Les Politiques le blasmerent de n'auoir pas assez bien consideré ses interets dans cette election. Mais il estoit au dessus de leurs iugemens, & il se conduisit en cette grande affaire, par vne lumiere bien plus haute que celle de la Politique de la Cour de Rome, qui a l'interest particulier pour sa maistresse rouë, & tient pour hommes de peu, ceux qui ne suiuent pas ses maximes. Ce qui arriua de fort particulier en ce Conclau, fut que ny l'Empereur, ny le Roy de France, ny le Roy d'Espagne, n'y eurent aucune part; & que toute la diuersité des opinions se reduisit au Cardinal Borromée, & au Cardinal Farnese, qui se trouuerent les Chefs des deux plus puissantes factions.

Il obtiēt
congé de
reuenir
à sa resi-
dence.

Quand le Pape fut élu, apres luy auoir donné quelques aduis qu'il iugeoit importants pour bien gouuerner l'Eglise, & pour l'exécution du Concile de Trente, il luy demanda congé de retourner à sa residence. Pie ne voulut pas le luy accorder au commencement de son Pontificat, où il auoit besoin de son assistance, pour apprendre de luy le fil des affaires. Mais apres quelques mois de sejour, il fut si fort pressé par ce bon Pasteur, qui n'auoit aucun repos hors de la présence de son troupeau; qu'enfin il fut contraint de luy permettre de le venir

seruir, comme il desiroit. Il confirma son Concile Prouincial, & luy donna beaucoup d'autorité par des Brefs particuliers, pour en faire executer les Ordonnances. Charles auant que de partir de Rome, congedia encore plusieurs de ses domestiques qu'il iugea luy estre inutiles pour ses fonctions Episcopales. Mais il les traita tous fort liberalement dans les recompenses qu'il leur donna selon leurs seruices & leur qualité. Ainsi il reuint à sa chere Ville de Milan, 1566. commencer cette merueilleuse residence qui changea bien-tost la face de son Eglise. Aussi-tost qu'il fut arriué, il mit la main à l'œuure pour faire executer les Decrets de son Concile Prouincial, & connut incontinent par experience, combien la presence d'un Euesque est necessaire dans son Diocese, pour y corriger les pecheurs, y porter les gens de bien à vne plus grande perfection, & maintenir l'ordre apres qu'il a esté estably. Il remit la splendeur dans la celebration de l'Office diuin, en l'Eglise Metropolitaine, où par l'absence des Archeuesques, il estoit fort mal fait. Il establit des Predicateurs les iours de Dimanche & des Festes, dans les autres Eglises de la Ville. Il introduisit peu à peu la frequentation du Sacrement de l'Eucharistie, dont à peine les Milanois s'approchoient vne fois l'année. Il faisoit faire le soir dans la Chapelle de son Palais, des exhortations pieuses, & des concerts de Musique, pour y attirer les personnes de condition, & leur faire entrer la pieté agreablement dans le cœur, par les oreilles. E ij

Il s'ap-
plique à
l'Orai-
son Men-
tale.

L'entreprise de reformer son Diocese, & sa Prouince, estoit tres-grande; l'un & l'autre se trouuant au mal-heureux estat que nous auons representé. Mais plus de sujets de trauail se presentent à S. Charles, plus son zele deuenoit ardent, & plus sa confiance en l'assistance de Dieu estoit augmentée. Il resolut pour la receuoir dans ses besoins, d'y recourir tous les iours par l'Oraison mentale, & vocale, à laquelle il ne manqua iamais aux heures qu'il auoit destinées pour cét exercice. Dans la premiere, son esprit receuoit les lumieres dont il auoit besoin pour la conduite de son Diocese, & pour l'execution de beaucoup de desseins importans au salut des ames, qui paroissoient impossibles à la prudence humaine. Il y prenoit encore cette courageuse magnanimité qui luy faisoit mespriser toutes les oppositions que le Monde, & le Diable dont il auoit entrepris de ruiner l'Empire, luy faisoient naistre, pour le diuertir de ses entreprises; & on connoissoit tousiours par leur éuenement conforme à ses esperances, qu'il voyoit les choses d'un autre œil que celui de la Sageffe charnelle, qui se fait bien souuent vne grosse montagne de ce qui n'est qu'un atome, & qui metamorphose les Nains en Geans. Il recitoit son Breuiare à genoux, & prioit beaucoup plus du cœur que de la bouche. Il adioustoit à ces prieres d'obligation, le Rosaire de la Sainte Vierge, qu'il honoroit comme sa bonne Mere, & sa Protectrice, & beaucoup d'autres Oraisons à diuers

[illegible]

**S. Charles les quatre
ses Bene-
fices , &
ses pen-
sions.**

Ecclef.
6. 31.

Il quitta
soixante
mille es-
cus de
rente,

la fois , & d'autant plus dignes d'admiration , qu'il ne pouuoient partir que d'un homme qui n'alloit point apres l'or , comme parle l'Ecriture ; qui ne mettoit aucunement sa confiance sur les thresors de la terre , & qui n'acquiesçoit ny à la chair , ny au sang , mais qui suiuiot à la lettre les Ordres les plus rigoureux de l'Eglise. Il vendit vne Principauté au Royaume de Naples , qui valoit dix mille ducats de rente , & les trois Galeres qu'il auoit heritées de son frere , & donna liberalement aux pauvres , ou employa en vsages Ecclesiastiques , le prix qu'il en retira. Il fit la mesme chose de tant de riches meubles qu'il auoit assemblez durant le Pontificat de son Oncle , à la reserue des tapisseries , & des vases d'argent dont il fit present à son Eglise Cathedrale , ne pouuant assez parer son Espouse ; de sorte que de quatre-vingt mille escus de rente qu'il possedoit , il en quitta soixante mille , & ne s'en reserua que vingt mille qui procedoient de son Archeuesché , & de deux pensions sur celuy de Toledé , & sur son patrimoine qu'il abandonna à ses heritiers. Encore eust-il souhaité de pouuoir viure comme les anciens Euesques , des oblations des Fideles , si telle eust esté la coustume de son Siecle ; & si le reuena qu'il gardoit ne luy eust esté absolument necessaire , pour fournir aux despenes de ses fonctions Episcopales dans son Diocese , & dans sa Prouince.

Il n'y auoit rien dans son Palais en ce commencement de sa residence , qui ne fût

fort modeste pour les meubles ; encore en retrancha-t-il beaucoup de choses dans la suite du temps. Il prit vn grand soin de sa famille domestique, sçachant bien que c'est d'elle que le peuple tire la preuue de la sagesse , & de la vertu d'un Euesque : n'estant pas possible que celuy qui ne prend point garde à ses seruiteurs , & qui en souffre de vicieux dans sa maison , ayt la prudence , la pieté , & la charité, qui luy sont necessaires pour bien gouverner la maison de Dieu. Il ne prenoit (si on excepte ceux qui estoient destinez aux plus bas Offices) que des personnes propres apparemment pour estre Ecclesiastiques, & dont il pust se seruir pour diuerses fonctions dans son Diocese. Il s'informoit diligemment de leur humeur , de leur esprit , & de leur vie passée ; & encore qu'il eust vne grande lumiere pour connoistre les hommes , toutefois il vouloit auoir des tesmoignages de personnes pieuses auant que d'admettre qui que ce fust dans sa famille. Il les mettoit luy-mesme à diuerses espreuues. Il leur faisoit faire les exercices spirituels dans ses Seminaires ; leur donnoit des Liures spirituels à copier , ou à extraire ; les employoit à des Offices bas & humbles , sur tout quand leur condition leur pouuoit donner quelque vanité ; & quelquefois il les tenoit sans les occuper à rien , pour essayer leur patience. S'il connoissoit que l'esperance des Benefices eust porté quelqu'un à desirer d'estre receu dans sa famille, il l'en excluoit pour cette seule raison ; sçachant que comme il luy

Il estoit
tres-
exa^u au
choix de
ses do-
mesti-
ques.

Il en auoit grand
soin,

estoit deffendu de recompenser ses seruiteurs aux despens de l'Eglise, il ne leur estoit pas permis de s'engager à son seruice sous vne pretention qui sent vn trafic fordidé d'auaricieux, & est bien esloignée de la pureté de la vocation à l'Estat Ecclesiastique. Il s'informoit avec vn grand soin de ce qu'ils faisoient, & aucune de leurs actions n'échappoit à sa diligence. Il les tenoit tousiours occupez en des fonctions qui regardoient son Diocese, selon la capacité de chacun; & il ne pouuoit souffrir qu'ils témoignassent aucune repugnance aux emplois qu'il leur donnoit. Il prit vn Prestre d'éminente vertu, pour auoir soin de toute sa famille, & le nomma du nom Latin, qui signifioit, *Prenost de la maison*, pour fuyr les tiltres seculiers de Majordome, ou de Maître d'Hostel. Il luy donna vn Vicaire pour le soulager dans les petites choses. Il choisit vn Oeconome qui auoit soin de son temporel; & celuy-cy auoit des gens sous luy pour vacquer aux affaires. Il establit vn Prefet spirituel dont l'Office estoit de pouruoir aux besoins spirituels, & de veiller sur les mœurs de chacun. Il commit à vn autre la charge de receuoir les Hostes qui le venoient visiter. Vn Infirmier auoit soin des malades; & deux Aumosniers faisoient ses aumosnes, l'vn la publique, & l'autre la secreete. Il auoit douze Cameriers qui estoient comme ses Anges Gardiens, & des tesmoins continuels, de toutes ses actions, du iour & de la nuict. En cela non seulement il suiuoit l'ordre des Saints Canons,

qui veulent que l'Euesque ayt toujours des Clercs auprès de sa personne , pour pou-
voir rendre compte de sa vie : mais il s'im-
posoit à luy-mesme vne sainte & agreable
necessité de ne faire iamais rien qui ne fust
exemplaire. Il choisit encore deux Pre-
stres habiles , pieux , & sincerés , pour
estre ses Censeurs , & leur enioignit de
l'auertir franchement des fautes qu'il fe-
roit, pour petites qu'elles fussent , soit dans
la conduite de sa vie particuliere , soit dans
le gouvernement de son Diocese. Ayant
esprouué de quelle vtilité estoient ces per-
sonnes auprès des Euesques , il ordonna
dans le sixième Concile Prouincial , que
chacun de ses Suffragans en tint auprès de
luy, à son exemple , pour s'auancer de iour
en iour dans la vertu , par leurs auis fideles,
& desinteresséz.

Il auoit
deux
Prestres
qui l'a-
uertis-
soient de
ses fau-
tes.

Tous ses domestiques estoient vestus fort
modestement, & aucun n'eust osé se seruir
d'estoffes de soye , ny de couleurs voyantes,
des broderies , des chamarures , & autres
semblables parures seculieres. Ils ne por-
toient point d'armes : ils ne tenoient aucun
instrument de musique dans leurs cham-
bres , & ils n'y pouuoient receuoir con-
uersation des personnes , ny de dehors, ny
de la maison. Ils mangeoient tous en-
semble dans vn grand Refectoir , que saint
Charles auoit fait bastir tout exprés ; & du-
rant le repas , on lisoit quelque Liure spi-
rituel, ou quelqu'un des Seminaristes fai-
soit vne exhortation. Les Ecclesiastiques
s'y trouuoient comme les autres , & luy-

meſme y mangeoit auant qu'il euſt commencé ce ieune extraordinaire au pain & à l'eau qu'il continua le reſte de ſa vie. Les viandes eſtoient bonnes , mais ſimples , & en telle quantité, qu'il y en auoit aſſez pour la neceſſité de la nature , mais la delicateſſe du gouſt n'y eſtoit point contentée. Apres le repas , on alloit rendre graces à Dieu dans la Chapelle , où on recitoit les Litanies. On ne mangeoit point de chair le Mercredy , & chacun ieunoit tous les Vendredis de l'année , outre les Vigiles des Saints du Diocèſe qui montoient à trente-fix. Ils gardoient encore l'abſtinance de la viande , des œufs , & du laitage durant l'Aduent , qu'ils commençoient ſelon l'Ordre Ambroſien , le premier Dimanche apres la S. Martin , comme ils ouuroient le Careſme au Dimanche de la Quinquageſime. Le Cardinal les traitoit plutotſt comme ſes freres que comme ſes ſeruiteurs. Il parloit meſme fort ſouuent aux plus bas Officiers de la cuiſine , & de l'eſcurie , pour ſçauoir s'ils auoient beſoin de quelque choſe , & en quel eſtat ſe trouuoit leur conſcience. Il ſ'informoit avec ſoin des petites querelles qui pouuoient arriuer entr'eux , & auſſi-toſt il y mettoit ordre avec vne charité veritablement paternelle. Dans leurs maladies il les viſitoit pour les conſoler , & pour ſçauoir s'ils eſtoient aſſiſtez comme il auoit ordonné , ſoit pour le corps , ſoit pour l'ame. Vne fois le mois il tenoit vne Congregation pour examiner le gouuernement de ſa fa-

mille, & pouruoir à ce qui estoit necessaire d'aiouster, ou de retrancher. Souuent lors que ses domestiques y pensoient le moins, il alloit visiter leurs chambres pour voir s'ils y tenoient quelque chose qui fust contre ses regles. Les Prestres disoient la Messe tous les iours, s'ils n'estoient pas malades, & se confessoient vne fois la semaine. Les Seculiers communioient vne fois le mois, & estoient obligez d'apporter le billet de leurs Confesseurs au Prefet spirituel. Ils s'assembloient le matin au second coup de Matines du Dome, dans la Chappelle Archiepiscopale, où apres auoir fait l'Oraison Mentale, ils recitoient l'Office de la Vierge iusqu'à Vespres, qu'ils disoient avec les Complies dans le mesme lieu, à l'heure conuenable. Ceux qui estoient obligez à reciter le grand Office, se trouuoient au mesme temps dans l'anti-chambre du Cardinal, où il disoit avec eux, Matines, Laudes, & Prime, apres auoir fait Oraison Mentale l'espace d'un quart d'heure pour le moins. De cette façon on pouuoit bien nommer sa famille, vne Eglise domestique; & il n'y auoit point de maisons Religieuses où on vist paroistre plus de modestie, de piete, & de charité, sans que pour y entretenir l'Ordre, Saint Charles employast autre chose que son soin, sa douceur, & son exemple. Aussi fut-elle vn Seminaire de bons Religieux, de Saints Prestres, d'excellens Ministres de l'Eglise, de Nonces Apostoliques, & de grands Euesques, qui firent fructifier en

diuers lieux les semences de vertu qu'ils auoient prises sous la discipline de cét admirable Maistre de la perfection Clericale.

CHAPITRE XI.

De l'establissement que fit Saint Charles des Seminaires dans son Diocese.

ENTRE les moyens les plus efficaces pour la reformation des Dioceses, le sacré Concile de Trente a recommandé l'érection des Seminaires aux Euesques, & en regle la conduite, & la subsistance. En effet, puisque la santé du troupeau spirituel dépend de la sagesse, & de la pieté, & de la suffisance des Pasteurs : que ce n'est pas assez d'en auoir vne fois estably de bons ; mais qu'il faut trouuer l'inuention de les perpetuer, & qu'on ne peut oster maintenant les Benefices à tous ceux qui n'en sont pas capables par leur ignorance, sans de longues & ennuyeuses formalitez de Iustice ; ce n'est que par vn Seminaire que l'on peut produire tous ces bons effets. Car on y esleue de ieunes Clercs à la pieté, & à la science Ecclesiastique. On leur fait prendre de bonne heure des habitudes vertueuses ; on les preserue des occasions de corrompre leur pureté ; on les separe de la veüe des vanitez, & des folies du Siecle ; Enfin, on les plie comme

les ieunes branches encore flexibles; de sorte qu'on les met en estat de servir dans les fonctions où on les applique. Au contraire, quand les Clercs se presentent auancez en âge, ils ont fort souuent de mauuaises inclinations desia enuieillies, des habitudes au peché toutes formées, de la presumption pour leur doctrine, s'ils ont estudié, de l'attachement à leurs opinions, des façons de faire toutes seculieres, & beaucoup de pretentions, soit pour les Benefices, soit pour les grands emplois, soit pour la reputation des hommes. Et certes l'experience m'a fait connoistre que fort peu de Prestres qui n'ont pas esté esleuez dans ces Congregations saintes dont nous parlons, réussissent dans l'administration des Cures, où estant sans iuges de leurs actions, & bien souuent sans tesmoins; il est presque impossible qu'ils ne se relâchent, & qu'ils obseruent vne façon de viure sainte, & constante; comme font plus aisément ceux qui l'ont apprise dès leurs plus ieunes années, & à qui elle est deuenue comme naturelle. Ce que fait le Sacrement de mariage pour donner des enfans à l'Eglise, le Seminaire le fait pour luy fournir des Ministres capables de la servir; & c'est le moyen de sa fecondité virginale pour la production de ses Peres. C'est aussi où l'on remet comme à la fonte, ceux qui sont de bas or, ie veux dire les Curez ignorans, ou vitieux; afin que par l'estude, la Penitence, & les bons exemples, ils apprennent les choses qu'ils

doient sçauoir , ils expient leurs fautes , & deuiennent des hommes nouveaux , reue-
stus de Iustice & de sainteté.

Saint Charles qui sçauoit toutes ces ve-
ritez , & par connoissance , & par expe-
rience , commença la reformation de son
Diocese par l'establissement des Semi-
naires , qu'il disposa selon les necessitez de
son Eglise. Car comme il auoit beaucoup
de Parroisses à gouverner , dont les vnes
estoit en de bonnes Villes, ou en de gros
Bourgs , & d'autres en de petits Villages; il
considera qu'il auoit besoin d'hommes ha-
biles pour le soulager en la conduite gene-
rale de son troupeau , & de Curez diuerse-
ment capables pour les Lettres. Il les auoit
trouuez tous presque ignorans, & fort scan-
daleux; c'est pourquoy il luy falloit vn lieu
pour les instruire , & les rendre meilleurs
avec vn peu de temps, & de patience. Pour
fournir à toutes ces necessitez , il fonda vn
grand Seminaire dans la Ville de Milan,
appellé de S. Iean Baptiste, qui pouoit re-
cevoir cent cinquante ieunes Clercs , à qui
on enseignoit la Philosophie , & la Theo-
logie , & de qui on pouoit concevoir es-
perance, qu'vn iour ils deuiendroient capa-
bles des premiers emplois dans le Diocese.
Son second Seminaire surnommé , la Ca-
nonica , estoit destiné pour ceux que l'on
iugeoit propres à seruir les Parroisses des
Villages, & des bourgs, ausquels on appre-
noit les Cas de conscience, & on expliquoit
le Catechisme des Curez. Il contenoit
soixante personnes. Dans vn troisieme

Seminaire qu'il mit en vne ancienne Eglise Collegiale, il faisoit entrer ceux lesquels estant pourueus de Benefices chargez du soin des ames, se trouuoient ignorans, ou scandaleux en leur vie; & il les entretenoit iusqu'à ce qu'ils sceussent ce qui estoit necessaire pour bien faire leur charge, & qu'ils eussent donné des marques assurees de leur changement de vie. Apres cela, il les renuoyoit à leurs Benefices, où ils reuenoient avec vn esprit nouveau, & de nouvelles maximes, donnant autant de bons exemples à leurs peuples, qu'auparauant ils en auoient donné de mauuais, & benissant mille fois le iour auquel leur charitable Euesque les auoit mis dans ce Seminaire, qui les auoit engendrez de nouveau en IESVS-CHRIST, par ses soins, par & sa charité. Ces trois Seminaires ne pouuant suffire au grand nombre de Clercs dont il auoit besoin, & qui se presentoient tous les iours, il en fonda trois autres en diuers lieux de son Diocese, où les faisant estudier en Grammaire, il les transportoit au grand Seminaire de Milan, ou au second, selon l'aptitude qu'il reconnoissoit en eux, pour les emplois Ecclesiastiques. En tous ces lieux, il entretenoit volontiers les enfans de ceux qui habitoient dans les montagnes où ils n'auoient aucune instruction, & plusieurs ont reüssi, & sont deuenus de fort bons ouuriers. De chaque Vicariat de son Diocese, il y auoit vn certain nombre de Clercs qui le remplissoient toujours, & les pauvres estoient preferez aux

riches. Du commencement il entretenoit ces maisons de son reuenu ; mais ne pouuant suffire au grand nombre des personnes , il fit vne taxe sur tous les Benefices de son Diocese , comme le Saint Concile de Trente l'auoit ordonné , & monstra l'exemple le premier , se taxant bien fort au delà de ce qu'en Iustice il estoit obligé de contribuer. Il prit vn grand soin de leur conduite spirituelle , & pour cela , il fit les Reglemens que nous lisons avec admiration dans les actes de son Eglise. Du commencement il en confia la direction spirituelle aux Prestres de la Compagnie de Iesvs , qu'il auoit appellez à Milan , comme des ouuriers dont il connoissoit parfaitement la sagesse , la science , le zele , & la pitié. Mais apres s'estre seruy d'eux assez long-temps en cét employ , il le donna , de leur consentement , aux Clercs Oblats qu'il fonda dans sa Ville , comme à des personnes qui estoient plus dépendantes de luy , & auoient vn parfait rapport en leur maniere de viure , avec la vie Clericale en laquelle il vouloit esleuer les ieunes Clercs. Auant que d'en receuoir aucun , il luy faisoit faire les exercices spirituels durant quelques iours , dans vn lieu qu'il auoit basti expressement pour cette retraite ; & tous les ans au commencement de leurs lectures , ou lors qu'il deuoient receuoir les Ordres sacrez , ils entroient dans cette maison , qu'il auoit appellée du mot que les Grecs donnent à leurs Mona-

steres, qui signifie, *Lieu d'Exercice*. Il établit vne Congregation composée d'hommes doctes & pieux, qu'il nomma Deputés spirituels, pour auoir soin du gouvernement de ces Seminaires. Ils s'assembloient en sa presence vne fois toutes les semaines, pour regler les affaires qui se presentoient, & prendre garde que les Loix qu'il auoit faites, fussent fidelement gardées, soit pour l'estude, soit pour les mœurs des particuliers. Il en prenoit tant de soin, qu'il connoissoit tous les Seminaristes, & de visage, & de nom, bien qu'ils fussent en si grand nombre, & il n'y en auoit pas vn à qui il ne parlât pour connoistre son esprit, & sonder de quel employ il seroit capable. Tous les ans il faisoit deux fois la visite generale, apres Pasques, & dans le mois de Septembre; & elle estoit si exacte, qu'il marquoit luy-mesme l'âge, les parens, la patrie, le patrimoine, les qualitez du corps, & de l'esprit, & le progres dans les Sciences, afin de faire passer les Seminaristes d'une Classe plus basse à vne plus haute, pour apres les appliquer dans le Diocese selon leur capacité. Mais dequoy il s'informoit dauantage, c'estoit de leur auancement en la pieté, en l'oraison Mentale, & dans les Exercices des Vertus Clericales, de leurs tentations, & de leurs peines interieures; afin d'encourager ceux qui marchotent trop lentement, à auancer tousiours dauantage; de retenir ceux qu'un zele peu discret emportoit trop viste; & de fortifier

les autres qui estoient comme ébranlez par les mouuemens de la concupiscence, ou par les suggestions du Diable. S'il trouuoit quelqu'un peu obeïssant, & peu mortifié, il le reprenoit avec tant de douceur, qu'enfin il le gaignoit, & luy faisoit changer de façons de faire. Si sa douceur ne le changeoit pas, il se seruoit des Penitences, ou il le mettoit dans vn autre Seminaire, ou il le donnoit en charge à quelque bon Prestre qui le retiroit dans sa maison, & qui l'y entretenoit iusqu'à ce qu'il se fust remis dans son deuoir. Il employoit à chacune de ces visites generales, quinze iours entiers, durant lesquels il ne s'appliquoit point à d'autres affaires. Il y venoit souuent durant le cours de l'année, & c'estoit le lieu de sa recreation & de ses delices. Il y menoit les Cardinaux, les Euesques, & les autres personnes Ecclesiastiques de condition qui le venoient visiter. Il y prioit de prescher ceux qui en estoient capables. Il y faisoit faire des disputes publiques : Enfin il n'oublioit aucune chose pour instruire, & pour diuertir saintement ses ieunes Clercs, qu'il consideroit comme les Restaurateurs de son Diocese. D'abord le Diable qui preuoyoit les fruits merueilleux que ces Seminaraires alloient produire, fit courir le bruit que c'estoient des prisons où Saint Charles tenoit les ieunes hommes enfermez, & qu'on les y faisoit deuenir étiques, à force de veilles, de ieusnes, & d'exercices d'esprit. Cette crainte empêchoit beau-

coup de personnes d'y entrer : mais la fausseté de cette creance fut bien-tost reconnüe , & les enfans des Gentilshommes aussi bien que ceux des personnes pauvres , se presserent pour y estre receus , & demandoient cette entrée comme vne tres grande faueur. Apres y auoir demeuré quelque temps , plusieurs en ces commencemens , furent si bien détrompez de la vanité du monde , qu'ils entrèrent en différentes Religions tres reformées, pour s'y enseuelir tout en vie , & y mourir tous les iours de cette bien-heureuse mort de la Penitence , qui produit la vie de l'Eternité. Charles voyant que par là son Diocese perdoit les meilleurs sujets qu'il auoit esleuez avec beaucoup de dépense, & de soin , obtint vn Bref du Pape Gregoire XIII. par lequel il estoit deffendu aux Superieurs des Ordres , de receuoir aucun Seminariste , s'il n'auoit demeuré trois ans pour le moins hors du Seminaire. Le Saint Cardinal aimoit sans doute l'honneur & l'accroissement des Ordres Religieux ; mais il estoit obligé d'aimer encore plus tendrement son Diocese ; & puis qu'il faisoit de si grandes dépenses pour esleuer de bons Prestres , il estoit bien iuste qu'il recueillist avec ioye ce qu'il semoit avec larmes , & qu'il fournist des soldats à la milice Ecclesiastique, & non pas des solitaires à la vie Monachale. Il ne fut pas trompé en son esperance : car en peu de temps il eut vn grand nombre de personnes pour tous les Mini-

steres où il les voulut employer dans ses Parroisses , qui changerent aussi-tost de face , & qui d'incultes & arides qu'elles estoient , receurent la beauté du Liban, & la fertilité d'Hermon.

CHAPITRE XIII.

De la maniere dont il faisoit sa visite dans son Diocese.

L'Euesque est vn Soleil dans son Diocese , qui doit continuellement courir par ses Parroisses , pour y porter la lumiere & la chaleur de la doctrine , & de la pieté ; Et Saint Charles ne trouua point de moyen plus propre pour reformer les abus de son Diocese que la visite exacte qu'il en fit. Il estoit tres-grand , & remply de beaucoup de Parroisses nombreuses , & situées en des lieux tres-difficiles & tres-sauuages. Mais nul trauail ne l'espouuenta iamais , & il ne se fia qu'à ses propres yeux, pour connoistre la face de son troupeau. Il alloit de hameau en hameau , & y faisoit ses fonctions avec autant de soin, d'attention , & de ceremonies , que dans les plus grandes Villes. Il y parloit aux plus grossiers avec autant de douceur ; il s'informoit de leurs besoins & corporels, & spirituels , avec autant de bonté ; & il y pouruoyoit avec autant de charité & de

Travaux
que souff
re Saint
Charles
dans sa
visite.

magnificence , que s'il eût eut les yeux de tous les hommes pour témoins. Il y auoit beaucoup de lieux où on ne pouuoit conduire les cheuaux , ny pour les personnes, ny pour les hardes. Charles y marchoit à pied , le baston à la main , & bien souuent avec des crampons sous ses souliers , pour ne pas tomber dans les precipices qui bordoyent les chemins par où il falloit passer. Quelquesfois il alloit sur les pieds & sur les mains par des endroits raboteux , & tout à fait inaccessibles. Son zele luy donnoit des aisles pour voler sur les plus hautes montagnes. Il l'échauffoit parmy les neiges qu'il trauersoit , & luy seruoit d'ombrage dans le chaud excessif que quelquefois il souffroit , non seulement avec patience , mais encore avecque ioye. Il portoit mesme souuent sa part du bagage pour soulager ses seruiteurs, & donnoit vn exemple admirable de charité , & d'humilité à ceux qui voyoient en cét estat vn Cardinal , Neveu d'vn Pape , de naissance illustre , & esleué avec tant de delicateffe. Plusieurs personnes de pitié mesme luy conseilloient de se soulager , & de commettre ces visites à des personnes du pais, ou à d'autres plus robustes , sur le rapport de qui il pourroit ordonner toutes les choses necessaires au bien de ces Parroisses. Mais il leur répondoit comme Iesus - CHRIST fit autrefois à S. Pierre: *Math.*
Retirez-vous de moy Sathan , tentateurs *c. 16.*
que vous estes , vos sentimens sont d'hom- "
mes terrestres , & non pas de personnes "

” qui ayent iamais bien consideré le prix des
” ames rachetées par le Fils de Dieu. Il est
” venu sautant sur les montagnes , & bon-
” dissant sur les collines ; & apres le voyage
” de la terre qu’il a fait avec tant de trauail,
” de souffrance , & d’humiliations, quel che-
” min doit paroistre rude à vn Pasteur qui
” est chargé de ces brebis qu’il est venu cher-
” cher ? Quand Saint Charles arriuoit à vne
Parroisse , encore qu’il fust si las du che-
min , qu’à peine se pouuoit-il soustenir,
il alloit tout droit à l’Eglise , où apres
auoir fait Oraison , il montoit en Chai-
re sans s’essuyer , ny prendre le moindre
rafraichissement. Il gardoit inuiolablement
la resolution qu’il auoit faite de loger chez
les Curez ; encore que d’ordinaire leurs
maisons fussent tres - incommodes , & il
s’excusoit touiours de prendre sa retraite
dans les logis des Gentil-hommes , ou
d’autres Habitans chez qui il eust esté avec
plus de commodité. La raison principa-
le qui le portoit à en vser de la sorte,
estoit pour se conseruer plus libre , & pour
donner accès à tous ceux qui auoient à
parler à luy , sans que la consideration du
lieu où il se retiroit pust empêcher per-
sonne d’y entrer. Il vouloit encore n’a-
uoir aucun engagement de rien faire à la
recommandation de ses Hostes , qui pust
tant soit peu blesser la delicatesse de sa con-
science ; ou d’agir plus mollement quand
il seroit obligé de les reprendre eux-mes-
mes , & de retirer de leurs mains les biens
vsurpez de l’Eglise , ou de certains droicts

qu'ils s'estoient attribuez par la negligence de ses predecesseurs, & par la foiblesse de leurs Pasteurs ordinaires. Outre ces considerations, il vouloit encore leur faire voir l'estime qu'il faisoit des Prestres, & par son exemple, les porter à les honorer davantage qu'ils ne faisoient pas. Cela estoit cause que souuent il ne trouuoit pour matelats, que de la paille, ou des fueilles d'arbres, & pour viandes delicates, que des noix, des chataignes, & du fromage. Alors on voyoit paroistre sur son visage, la ioye que son cœur sentoit de mener vne vie pauvre, & de souffrir quelque chose pour l'amour de Dieu. Ses seruiteurs n'eussent osé porter aucunes prouisions, ny pour sa personne, ny pour eux-mesmes; & quand quelqu'un d'eux estoit incommodé, il luy faisoit le lit, s'il s'en trouuoit vn, ou les meilleures viandes. Vn iour ayant sceu qu'un de ses Gentilshommes portoit vne cueilliére de cuiure, il l'en reprit assez aigrement, comme d'une delicatesses qui l'offensoit, voulant que ses domestiques aussi bien que luy-mesme s'accommodassent pour le manger, & pour le coucher, à la pauvreté des montagnars qu'il visitoit. Il choissoit pour faire cette fonction, les mois les plus chauds de l'année, & marchoit durant les heures du iour où chacun a coustume de dormir en Italie. Cela luy faisoit gagner beaucoup de temps, & ce gain luy paroissoit plus pretieux mille fois que sa santé,

qu'il hazardoit si notablement. Il ne menoit iamais que si cheueux, qui seruoient à des personnes absolument necessaires dans sa visite. Il auoit prescrit aux Curez qui estoient obligez de le défrayer, les viandes qu'il entendoit qu'on luy seruist, lesquelles estoient de fort petite despense, pour empescher que les riches ne se piquassent à l'enuy, de luy faire bonne chere, & pour oster ce sujet de luxe & de vanité, & leur donner l'exemple de la frugalité que doiuent garder les Ecclesiastiques. Quand il en visitoit qui estoient fort pauvres, il ne souffroit pas qu'ils le nourrissent; mais il faisoit porter ce qui estoit necessaire pour son entretien, & celuy des personnes de sa suite.

Auant que d'arriuer à vne Parroisse, il y enuoyoit des Confesseurs pour y preparer le peuple à receuoir la sainte Communion, de sa main. Il l'administroit souuent, depuis la pointe du iour iusqu'à midy, apres auoir dit la sainte Messe, & fait vne assez longue Predication. Car comme la reputation de sa pieté estoit tres-grande, chacun desiroit d'estre nourry par ses mains, du pain de vie, & on venoit de bien loin pour auoir cette consolation. Il administroit tousiours le Sacrement de la Confirmation, auant que de prendre son repas, & vouloit que ceux qui le receuoient fussent à ieun, comme luy. La foule des Villageois, principalement dans les montagnes, estoit souuent tres-grande, ce qui causoit dans les Eglises, vne senteur insupportable à tout

à tout autre qu'à S. Charles , qui estimoit alors estre parmy les parfums les plus delicieux de l'Arabie heureuse. Ses Officiers estoient contrains de sortir de temps en temps , pour prendre vn peu d'air; mais luy demouroit tousiours ferme , au milieu de ses brebis qui estoient puantes comme des boucs , & ne connoissoit d'autre mauuaise odeur que celle du peché. Il visitoit exactement les Sacristies , leurs Ornemens , les Fons Baptismaux , le pavé , le toit , les Chappelles , & les Autels des Eglises , ne se voulant rapporter qu'à ses propres yeux des choses dont il sçauoit bien que luy seul deuoit rendre compte. Ce soin si exact a produit tous ces Reglemens que nous lisons dans ses Actes, où il descend iusqu'aux plus petites particularitez , tant il estoit ialoux de la beauté , & de la bien-seance de la maison de son Maistre. Sa plus grande fatigue dans sa visite estoit la Consécration des Eglises & des Autels , & la Benediction des Cimetieres. Car pour celle-là , il ieusnoit tousiours la veille & passoit la nuict deuant les Reliques. Il chantoit tout ce qui est dans la ceremonie ; disoit la grande Messe , preschoit & communioit le peuple qui s'y rencontroit : de sorte que souuent il estoit vingt-quatre heures sans manger. On a remarqué qu'en dix-huict iours , il a fait quatorze ou quinze de ces actions si laborieuses , qu'une seule met vn autre Euesque au liét , pour se reposer. Il assembloit les Curez & les Prestres voisins ; faisoit tenir deuant luy les Congregations qu'il auoit esta-

blies tous les mois , s'informoit avec adresse des déportemens de chacun , & leur parloit avec tant de douceur , de sagesse , & de fermeté ; que comme il enflammoit les bons en l'amour de la vertu , il détournoit les meschans de leurs pechez , & les remettoit dans leur deuoir. Il prenoit le mesme soin des brebis , que des Pasteurs , & il n'y en auoit point d'esgarée qu'il n'allast rechercher ; de sale , qu'il ne raschast de nettoyer ; & de malade , à la guerison de laquelle il ne trouuast. Il escoutoit les plaintes des personnes les plus pauvres , & leur faisoit faire raison par ceux qui les oppressoient. Il chastioit les pecheurs publics par les Censures Ecclesiastiques , quand il les trouuoit impenitens , & ne regardoit point la qualité des criminels , mais l'énormité du crime. Il accommodoit les procez & les querelles , & ne se tenoit iamais importuné , quoy qu'il rencontraist souuent des personnes fort brutales , qui eussent fait perdre la patience à tout autre qu'à luy , qui possedoit en vn haut degré de perfection , cette charité Pastorale qui souffre toutes choses pour gagner le prochain. A cét effet , il tenoit vn Liure où il escriuoit de sa main tous les besoins du corps & de l'ame des habitans de ses Parroisses , quand ils estoient tels qu'il ne les pouuoit secourir sur le champ , & qu'ils auoient besoin d'une assistance continuë , soit pour les deliurer de la pauvreté , soit pour les retirer de quelque peché d'habitude , soit pour les consoler dans quelque calamité domestique. Sou,

uent il a fait ses visites à pied ; mais vne incommodité qui luy suruint à vne iambe l'empescha de continuer. Enfin , il imitoit parfaitement le Fils de Dieu qui alloit de Ville en Ville , & de Bourgade en Bourgade , faisant du bien à tout le monde , & laissant par tout vne admirable odeur de sa pieté. Les Habitans d'une Parroisse le suivoient à vne autre , & auoient beaucoup de peine à le quitter , estans pendus à sa langue qui leur disoit les paroles de la vie éternelle , & ne pouuant se rassasier de le voir agir avec tant de sainteté en toutes choses. Le Diable s'opposoit en vain à ses bons desseins : il luy falloit ceder le champ de bataille ; & comme il ne pouuoit rien inuenter qui ostast le credit au Predicateur , il ne pouuoit aussi empescher le fruit de sa Predication, que ses bons exemples imprimoient dans les cœurs bien mieux encore que ses paroles.

CHAPITRE XIV.

De la visite qu'il fit de son Eglise Metropolitaine.

L'Eglise Cathedrale dans vn Diocese est la Mere de toutes les autres Eglises , & c'est à elle à leur donner l'exemple de l'Ordre , & de la Discipline. C'est pourquoy saint Charles commença sa Visite par celle de l'Eglise Archiepiscopale de Mi-

lan , qui se sentoît extrêmement de l'absence de les Archeuesques , & qui auoit besoin du zele , de la prudence , de la liberalité , & de la magnanimité d'un Chef fait comme ce grand Cardinal. Il y auoit plusieurs Chanoines , & plusieurs Beneficiers , ou Chappelains , distinguez en diuers Ordres , & appelez de noms differents ; mais l'Office Diuin n'en estoit pas mieux célébré , à cause que la pluspart des Chanoines ne résidoient point , & que les distributions quotidiennes estoient fort petites ; de sorte qu'il ne s'y chantoit des Heures Canoniales , que Tierce , & Vespres ; & que l'on n'y célébroit qu'une seule Messe haute , encore dans les iours Fériaux la faisoit-on dire à un Chapelain mercenaire. Quelques particuliers possédoient deux Benefices dans la mesme Eglise , & leur vie caufoit beaucoup de scandale. Charles entreprit de remédier à tous ces desordres , & de mettre l'Eglise de son Siege dans un tel lustre pour toutes choses , qu'elle fut une Loy viuante pour les autres de son Diocèse. Comme il auoit reconnu que la modicité des distributions estoit cause de l'absence des Chanoines , il trouua à les rendre bonnes , par quelques pensions qu'il obtint sur des Abbayes , du temps de Pie I V. son Oncle ; par l'union de plusieurs Benefices simples , & par la suppression de quelques-uns qui estoient superflus dans son Eglise mesme , dont il mit le reuenue en une masse ; de sorte que par ce moyen les Chanoines furent inuitez à se trouver

aux Offices Diuins , lesquels il ordonna estre celebrez entierement , & aux heures ordinaires. Il les obligea au petit Office de la Vierge , qui ne se disoit point. Il diuisa les Prebendes en trois Ordres , en Presbiterales , Diaconales , & Sousdiaconales ; & institua vn Theologal , qui preschoit les Dimanches , & les Festes , & faisoit deux iours de la semaine , des Leçons de Theologie , dans la Chapelle de l'Archeuesché , comme l'ordonne le Concile de Trente. Il fit encore vn grand Penitencier , & luy donna quatre Coadiuteurs , qu'il nomma petits Penitenciers , avec obligation de se trouuer à l'Eglise , pour entendre les Penitens qui demandoient l'absolution des cas qu'il se reseruoit. Ils s'assembloient vne fois la semaine avec d'autres Theologiens , pour decider les cas difficiles qui s'estoient presentez à eux , ou que l'on leur rapportoit des autres Parroisses du Diocese , & il appella cette Assemblée la Congregation de la Penitencerie. Elle fut d'une tres-grande vtilité , & pour les Confesseurs , qui par ce moyen deuinrent en peu de temps tres habiles ; & pour les Penitens qui eurent des resolutions sçauantes & saintes sur les difficultez arriuées en leurs Confessions , auxquelles les plus obstinez estoient contrains d'acquiescer ; ne pouuant rien alleguer qui n'eust esté examiné , & ayant honte d'opposer leurs sentimens particuliers à celuy de tant d'habiles hommes. Il establit encore vne troisieme Prebende qu'il nomma Doctorale , & celuy qui

en estoit pourueu , lisoit deux fois la Semaine les Canons aux Clercs de la Ville, dans la Chapelle de son Palais. Outre celuy que son Chapitre auoit nommé pour marquer les absens du Chœur , & les fautes qui se faisoient à l'Office ; il en mit vn autre qui auoit la mesme charge , afin qu'il ne se commist point de faute dans vne fonction de laquelle dépendoit l'ordre & la bien-seance de l'Office Diuin , soit par negligence , soit par crainte , soit par amitié , soit par faueur. Les ceremonies que l'Eglise a eu soin de regler par tant de Rubriques , sont aussi vtiles pour porter les Spectateurs à la pieté quand elles sont faites avec attention , & avec grauité , qu'elles dégoustent , & sont ridicules , quand on les fait de mauuaise grace. Charles pour les faire garder religieusement , institua vn Maistre de ceremonies , & vn Prestre sous luy , comme son Coadiuteur , auxquels il donna de grosses distributions ; afin qu'ils assistassent à tous les Offices qui se disoient dans la Cathedrale , & y fissent garder toutes les choses marquées par les Rubriques dont cette Eglise se seruoit , qui estoient differentes de celles du Missel , & du Pontifical Romain. Il fonda douze autres Clercs inferieurs pour exercer les Ministeres les plus bas , comme de fermer les portes , les garder , separer les hommes d'avec les femmes , & sonner les cloches ; ne voulant pas qu'aucune personne Laique se meslast de rien que ce fust dans l'Eglise. Il fit deux Sacri-

stains ; l'un qui avoit soin du grand Autel, & des ornemens qui y seruoient ; & l'autre, dont la charge estoit de tenir les autres Autels nets & parez , selon la distinction des iours , & de faire celebrer les Messes aux heures ordonnées par celuy qui s'appelloit le Prefet du Chœur.

On avoit fort disputé , dans le Concile de Trente , sur le sujet de la Musique dans les Offices Divins. La plupart des Euesques alloient à la supprimer , comme fascheuse quand elle est mauuaise , & plus propre , quand elle est excellente , à chatoüiller les oreilles , qu'à esleuer l'esprit à Dieu ; & comme encore ne pouuant estre faite que par des hommes qui n'ont d'ordinaire guere d'harmonie dans les mœurs ; mais qui sont des yurogues & des libertins. Elle fut neantmoins retenue , & cette sainte Assemblée ordonna qu'elle fust accommodée à la sainteté du lieu , & que l'on prist garde à ne chanter sur les Orgues aucuns airs voluptueux , & prophanes.

Saint Charles pour faire observer cet ordre, augmenta le nombre des Musiciens de son Eglise ; les choisit tous Ecclesiastiques, & de bonne vie ; osta la façon trop gaye de chanter qui s'estoit glissée ; & en fit prendre vne graue & serieuse , qui portast le peuple à la deuotion , & luy laissast entendre les paroles qui se disoient. Cet ordre nouveau , cette deuotion extérieure des Chanoines , & des autres Beneficiers qui chantoient au Chœur , cette

magnificence d'ornemens , cette splendeur des ceremonies , attirerent tout le monde à la Cathedrale les iours de Dimanche, & des Fêtes : & comme on y preschoit deux fois le iour , & que les plus excellens hommes de l'Italie remplissoient cette Chaire , outre les Litanies qui se chantoient en Musique , & les Processions qui se faisoient avec beaucoup d'éclat ; on quittoit les ieux , & les diuertissemens ordinaires , pour passer toute la journée dans le Dôme , & il falloit aller de bonne heure pour retenir place. La présence du Pasteur en tous ces Exercices attiroit les brebis ; & c'estoit vn obiet plein de consolation pour elles , de le voir sur sa Chaire en cette contenance graue , & presque extatique , où l'Histoire Ecclesiastique nous represente le grand saint Basile , quand l'Empereur Valens entra dans l'Eglise de Césarée. Il fit faire vn passage sous terre , pour aller de son Palais dans le Dôme , afin d'assister à Matines, sans passer par la ruë , & il nommoit le Chœur , le lieu de ses delices. Enfin, il dressa de tres-saints Reglemens pour la vie des Chanoines , & pour la direction de leurs affaires communes , que nous lisons dans ses Actes , & qui seront des monumens éternels de son zele , de sa prudence , & de sa profonde connoissance des choses Ecclesiastiques.

Après auoir réglé ce qui regardoit le spirituel dans son Eglise, il s'appliqua à ce qui estoit de la fabrique materielle. Avant sa

venueëlle estoit en vn estat déplorable. On n'y voyoit point de Chœur, & fort peu d'Autels, encore estoient-ils mal entretenus de toutes choses. Les tombeaux des Ducs de Milan, & des principales familles de la Ville, en occupoient la meilleure partie; & il s'y trouuoit tant d'armes, de lances, d'enseignes, & d'autres ornemens mortuaires, qu'elle paroissoit plutôt vn lieu prophane qu'un Temple consacré à Dieu. Il y auoit deux portes aux deux costez, lesquelles respondoient sur deux grandes places, d'où il arriuoit qu'il seruoit comme d'une rue publique, pour passer de l'un à l'autre, non seulement aux Habitans, mais aux Crocheteurs mesme, qui pour abreger leur chemin, ne faisoient point de difficulté de trauerser le Dôme. Charles ne pouuant souffrir cette profanation, fit premierement oster tous les ornemens mortuaires, & les tombeaux qui la remplissoient, comme le Concile de Trente l'auoit ordonné: Et pour donner l'exemple aux autres, il commanda que l'on transportast celui de son Oncle, le Marquis de Melegnano, frere du Pape, Pie quatriesme, encore qu'il l'y eust pû laisser avec raison. Apres cela, il fit trauailler au Chœur, dont il donna vn dessein fort magnifique; car il s'entendoit aux bastimens, & à l'Architecture. Il releua le Maistre-Autel, qui estoit trop bas, & le fit faire en façon que de la Nef, le Peuple le pouuoit voir à son aise. Il rangea tout à l'entour les sieges des

Chanoines , selon la distinction de leurs ordres. D'excellens Sculpteurs y grauerent la vie de Saint Ambroise , avec vn artifice admirable. La Chaire Archiepiscopale paroissoit à sa place , & les ornemens en estoient tres-magnifiques. Dans cét enclos fermé d'une tres-riche balustrade , il deffendit , sous peine d'excommunication , à toutes sortes de personnes Laïques , de quelque condition qu'elles fussent , de prendre seance. Mais pour oster au Gouverneur , & aux autres Magistrats , le sujet de se plaindre; il fit bastir vn lieu plus bas de quelques degrez , où ils auoient leurs chaires esleuées : de sorte qu'en vsant ainsi, il conserua la Majesté du Saint Autel, qui ne doit estre approché que des Ministres Ecclesiastiques , & rendit à la puissance seculiere du Prince, l'honneur qui luy estoit deu en la personne de ceux qui l'exerçoient pour luy. Il fit faire deux Chaires soutenues sur de riches colonnes , & d'un tres-rare artifice , pour y faire les Predications ; & elles estoient disposées de telle sorte , que les Chanoines , & le peuple pouuoient aisément ouïr la parole de Dieu , sans sortir de leurs places. L'une estoit pour l'Archeuesque quand il la voudroit annoncer , & l'autre pour les Predicateurs ordinaires. Ayant ainsi embelly la partie haute du Chœur, il orna la plus basse , où il erigea vn Autel au milieu , & y mit beaucoup de Reliques tres-approuuées. Il obtint du Pape le mesme priuilege qu'à celuy de Saint

Gregoire de Rome, pour retirer vne ame du Purgatoire à chaque Messe qui s'y celebrent : & cela le fit bien-tost frequenter du peuple, qui y estoit attiré par ce secours qu'il y trouuoit pour soulager les ames de ses parens, & par la deuotion qu'il auoit d'ouïr la Messe de son Archeuesque, laquelle il y disoit fort souuent. Il prit soin d'accommoder les Chapelles qui furent fermées de balustres de fer, artificieusement trauaillé, & d'orner les Autels de soubassemens, de dais, & d'étoffes pretieuses. Il ferma les deux portes qui estoient aux deux costez, & y mit deux Autels; l'un dedié à la Sainte Vierge; & l'autre à Saint Iean, le Bon, Archeuesque de Milan, où la deuotion fut bien-tost fort grande. Il fit bastir à l'entrée de l'Eglise, vn Baptistere magnifique, composé d'une grande coupole soustenuë de quatre colonnes de Marbre, & d'un bassin de Porphire; & luy-mesme tous les ans y administroit le Baptisme à quelques enfans, la veille du iour de Pasques, & à celle de la Pentecoste, remettant cet ancien vsage de l'Eglise qui auoit esté interrompu. Il fit diuiser la Nef en deux, afin de loger les hommes d'un costé, & les femmes de l'autre; ordrefi necessaire dans les maisons de Dieu; que c'est par luy seulement qu'elles peuvent estre des maisons d'Oraison, & de sainteté; au lieu que par la confusion des deux sexes, comme il se pra-

Fvj

rique en France , elles sont d'ordinaire des lieux d'assignation , de dissolution , & de scandale. Pour entretenir la splendeur de cette Eglise , le Saint Cardinal establit vne Congregation particuliere , qu'il appella la Congregation de la Fabrique du Dôme , laquelle a soin d'entretenir les bastimens , & d'administrer les reuenus qui luy sont attribuez pour cét effet. Il fit encore d'autres Reglemens pour maintenir les choses en bon ordre ; & enfin il n'oublia rien de ce qui estoit necessaire pour en faire vn des plus superbes Temples de l'Europe.

CHAPITRE XV.

De la visite des autres Eglises de la Ville de Milan , & de plusieurs establissemens de pieté que fit Saint Charles.

AVec le mesme zele , le mesme soin , la mesme prudence , & la mesme liberalité que Saint Charles auoit visité son Eglise Cathedrale , il visita les autres Eglises de la Ville de Milan , qui n'en auoient pas moins de besoin. Il commença par les Collegiales , où trouuant que les Chanoines ne residient point , parce que les distributions quotidiennes estoient fort petites , & que l'Office diuin ne se celebrait pas avec la bien-seance & la deuotion :

qu'une action si sainte demandé; il pour-
 nût à tous ces desordres, ou par la suppression de quelques petits Benefices qui chargeoient les Eglises de personnes inutiles; ou par l'union de leurs reuenus aux menſes Capitulaires; ou par l'institution de nouveaux tiltres, & par de tres-salutaires Reglemens, où on vit paroistre que l'Esprit de Dieu le conduisoit, tant ils estoient propres à oster les abus, & à establir vne bonne Discipline. Il visita apres cela les Parroisses où il reconnut si exactement toutes choses que rien n'échapa à sa diligence.

Il prit vn soin particulier de s'informer du gouvernement des confraternitez des Disciplinans, que nous appellons en Provence, & en Languedoc, Penitens. Leur institution est tres-sainte, & tres-vtile à la Republique Chrestienne, si on considere leur fin, & les moyens que ceux qui les ont establies se sont proposez pour y arriuer. Car comme le deuoir d'un vray Chrestien ne regarde que Dieu, le prochain, & soy-mesme; les Reglemens de ces Compagnies embrassent toutes ces obligations, & prescriuent vne vie si pieuse, si charitable, si exemplaire, & si sage; que si ceux qui y sont enrolez les obseruoient fidelement, ils rameneroient la façon de viure des premiers Chrestiens, dont Saint Luc nous fait la peinture dans les Actes. Mais il est arriué à ces Societez particulieres, le mesme relaschement qu'aux premiers

Fideles. Le commencement a esté tout de feu ; il n'y auoit rien de si modeste , & mesme de si mortifié ; rien de si doux , de si charitable , de si patient , de si religieux que ces Penitens , qui edifioient le lieu de leur demeure par toutes sortes de bons exemples , & qu'il falloit plustost retenir dans les exercices de la Penitence , que les pousser , & les échauffer. Peu à peu cette ardeur se r'alentit ; & quand on commença à songer au bastiment , & à l'enrichissement des Chapelles , les mœurs se ruïnerent , & l'édifice spirituel de la pieté s'ouurit de toutes parts. Les Charges ne se donnerent plus à ceux qui en estoient capables ; & les Superieurs laisserent violer les Reglemens , soit par faute de zele , soit pour n'auoir pas assez de courage , soit pour auoir trop de consideration pour leurs parens , & pour leurs amis. On quitta l'exercice des mortifications corporelles ; on se dispensa des ieusnes , on ne se trouua plus aux Offices , les amendes ne se payerent plus par les absens , les visites des malades & des affliges discontinuerent : Enfin l'esprit de la fraternité s'éuanouit ; & ces Compagnies ne retinrent rien de leur premiere institution , que leur habit. Toute leur deuotion se reduisit à faire certaines Processions dans l'année ; encore donnerent-elles en quelques lieux des sujets de tres-grand scandale , & de querelles qui allerent iusqu'à l'effusion du sang. En France, le Parlement de Paris

voyant ces desordres , supprima les Compagnies des Penitens dans son ressort , que Henry troisieme auoit introduits à Paris , & où il s'estoit enrollé , pour acquérir la reputation de deuot parmy le peuple , à qui la Ligue le figuroit comme vn Protecteur d'Heretiques. Mais elles n'ont pas laissé de continuer dans Lyon , dans la Prouence , & dans le Languedoc. Je fais cette petite digression à propos des confraternitez des Penitens de Milan , que Saint Charles trouua dans vne grande confusion , & qu'il reestablit dans leur premier esprit par ses exhortations , & par les regles saintes qu'il leur donna. Le respect qu'on luy portoit , & la grande opinion que l'on auoit conceuë de sa pieté , les fit receuoir avec ioye , & garder avec ferueur ; de sorte que cét establisement qui estoit auparauant pour le moins inutile dans Milan , y seruit beaucoup depuis cette reformation. Il s'appliqua avec le mesme soin à mettre en bon ordre la Confraternité appelée de Saint Iean Decolé , establie pour accompagner les criminels au supplice. Elle s'estoit remplie de personnes de basse condition qui negligeoient fort cét Office de Charité. Mais par la vigilance , & par les exhortations du Saint Cardinal , toutes les personnes de condition dans Milan s'y firent enroler , & le Gouverneur mesme en voulut estre. Les anciens Euesques , comme nous apprenons de Saint Augustin , en vne Epistre qu'il escript à Macedonius , deman-

doient aux Magistrats la grace des criminels , avec beaucoup d'instance ; non pas pour fauoriser le vice par l'impunité, ou par vne fausse misericorde ; mais parce qu'ils craignoient pour leur salut , sortant de ce monde , sans auoir expié leurs pechez. En effet , quand ils les auoient retirez du supplice , ils les mettoient au rang des Penitens publics , où ils les laissoient souuent iusqu'à la mort , afin que par des satisfactions en quelque façon proportionnées à leurs crimes , ils appaisassent la colere de Dieu, & guerissent les blessures de leurs consciences. Mais auourd'huy que cét vsage est aboly dans l'Eglise, ce que les Euesques peuuent faire pour les criminels , est de procurer qu'ils fassent vne mort veritablement penitente , & non pas stupide , ou orgueilleuse , & philosophique , comme elle est le plus souuent. Car la pluspart de ceux qui perissent par la main d'un bourreau , ou n'enuisagent pas la mort qu'ils vont souffrir, soit par insensibilité, soit par le trouble de leur esprit effrayé de l'horreur de leur supplice ; ou ils affectent vne constance superbe ; ou ils repetent ce que leurs Confesseurs leur font dire côme des Echos, sans aucun sentiment de deuotion. Saint Charles qui connoissoit ces veritez , prenoit vn grand soin de ces miserables ; & comme il ne pouuoit, ny ne deuoit leur rendre luy-mesme les assistances dont ils auoient besoin , en ce terrible passage ; il procura que les Confreres de

cette sainte Societé, dont ie parle, les leur rendissent avec charité. De cette institution, les condamnez receurent beaucoup de soulagement. Car c'estoit le Prieur de la Compagnie, ou quelque autre Officier qui leur annonçoit la nouvelle de leur supplice, & qui en mesme temps les exhortoit à se conformer à l'ordre de la Iustice de Dieu, & de recevoir cette mort ignominieuse en esprit de Penitence. Cela se faisoit deux iours auant l'exécution, suivant l'institution de Saint Charles, durant lesquels le Prestre de la Confraternité les confessoit, & les communioit. Car en Italie, on donne la sainte Eucharistie à ceux qui doivent estre exécutez, ce qui ne se pratique pas en France, & à mon aduis sans raison. Car celle du respect que l'on croit porter, par ce refus, au tres-saint Sacrement, n'estant nullement considerable, au prix de la force que receuroient de la Communion, ceux qui ont à soustenir yn combat aussi difficile qu'est celuy d'une mort ignominieuse, dans la fleur de l'âge, & dans vne vigoureuse santé.

Il prend
soin des
crimi-
nels que
l'on cō-
duisoit à
la mort.

Le saint Cardinal trouua vn grand abus dans l'observation du ieusne des iours que nous appellons en France, les Rogations, où l'Eglise fait des Processions, & chante les grandes Litanies, pour demander à Dieu qu'il conserue les fruits de la terre. S. Mammert, Euesque de Vienne en fut l'Instituteur. Elles se celebroident dans Milan, apres la feste de l'Ascension, à cause que

Il réta-
blit les
ieusnes
commā-
dez.

l'Eglise ne ieufne pas dans le temps qui precede cette solemnité. Côme les choses qui vont à mortifier le corps se relaschent aisément , le ieufne de ce saint temps n'estoit presque plus gardé par personne ; & il y auoit vn si grand desordre dans les Processions, qu'elles estoient plus propres pour irriter la Iustice Diuine, que pour l'appaiser. Charles les remit en leur ancien lustre , en bannit la confusion , reestablit le ieufne , & ordonna à tout le Clergé de la Ville , de se trouuer dès le matin , aux iours où elles se faisoient , à l'Eglise Metropolitaine, d'où, apres auoir pris les Cendres de sa main , ils partoient pour aller aux Stations où il celebrait la Messe , & faisoit vn Sermon de la Penitence. Son peuple se conforma aisément en cela à ses ordres , & on le vit marcher apres luy , en ces Processions autrefois si déreglées, & si abandonnées, en foule , & avec vne contenance modeste , & humiliée deuant Dieu: de sorte qu'il sembloit qu'il se fust formé vne pieuse contestation entre le Clergé, & les Laïques, à qui paroistroit plus deuot & plus penitent en cette occasion.

Toutes les Villes en Italie sont remplies de femmes , qui font vn commerce infame de leurs corps ; & le Magistrat les tolere pour empêcher que les desbauchez ne s'attaquent aux honnestes femmes , ou ne se portent à des desordres encore plus criminels. La corruption des mœurs estoit si grande dans Milan , que le commerce avec ces mal-heureuses creatures n'estoit point réputé honteux, & qu'elles croyoient exer-

cer vn métier licite. Saint Charles estoit viuement touché de ce dereglement, & cherchoit toutes les occasions d'y remedier. Vne Dame Espagnole aussi pieuse que riche, dans la mesme pensée, assembla quelques-vnes d'ces femmes, que Dieu auoit touchées de l'esprit de Penitence, & en fit vne sorte de Congregation, dont elle-mesme prenoit le soin; enquoy elle estoit aydée par d'autres personnes également zelées pour le salut de ces femmes perduës. Elle vint à mourir, & le Saint Cardinal, non seulement empêcha qu'une institution si loüable, & si necessaire, ne perist en sa naissance; mais il l'appuya de son autorité, la fortifia par des regles qu'il fit pour sa Discipline, & l'establit dans vne Cure de la Ville qu'il supprima, à cause du petit nombre des Parroissiens, l'unissant à vne autre voisine. Il nomma cette maison, *le Secours*, à cause que celles qui vouloient laisser la vie infame qu'elles auoient menée, y estoient secouruës, & pour ne perir pas de misere, & pour receuoir toutes les aydes spirituelles dont elles auoient besoin; afin de se dégager du peché, & de l'expier par vne veritable Penitence. Cette Maison s'en remplit bien-tost; & le Diable se vid arracher tous les iours quelqu'une de ces infames victimes de l'impureté publique. Leur salut estoit celuy de plusieurs autres qui auoient de mauuais engagements avec elles; & si on ne gaignoit autre chose, au moins ostoit-on à l'Enfer ces hameçons dangereux où

Il reme-
die aux
desor-
dres des
Courti-
sanes.

se prenoient toutes sortes de personnes. S. Charles donnoit tous les mois vne aumosne réglée, qui estoit grande, outre les charitez extraordinaires qu'il leur faisoit dans les rencontres. Il leur bailla pour Directrices douze femmes qui s'appellerent Tierceroles de S. François, parce qu'elles viuoient sous la troisieme regle de ce Saint, chacune en sa maison particuliere. Elles s'assembloient tous les Dimanches dans vne petite Eglise dediée à S. Louys, pour y faire leurs Exercices Spirituels : & le reste de la semaine, elles estoient occupées à la conduite de ces pauvres femmes, qui trouuoient beaucoup de consolation dans leur douceur & dās leur charité. Elles y estoient entretenues iusqu'à ce qu'elles fussent en estat d'entrer dans vn Monastere formé de Repenties, ou de mener vne vie Chrestienne en quelque lieu assuré. On receuoit encore en cette maison les femmes mariées avec des hommes desbauchez, & incompatibles ; & on les y tenoit iusqu'à ce que leurs maris fussent changez, & en estat de bien viure avec elles. La troisieme sorte de personnes qu'on y admettoit, estoient des filles, qui n'ayant point de parens couroient fortune, à cause de leur ieunesse, ou de leur beauté, de perdre leur honneur, dans vne Ville où il n'y auoit que trop de ieunes gens qui ne cherchoient que ces occasions malheureuses de corruption.

CHAPITRE XVI.

*S. Charles fait diuers establissemens
de Religieux & de Religieuses.*

Comme les dignitez de l'Eglise & de la Republique sont ordinairement possédées par les personnes notables, il est tres-important qu'elles se rendent dignes de les posséder, autant par les bonnes qualitez de leur ame, que par l'auantage de leur naissance. Toutefois au temps de Saint Charles, les Nobles de Milan ne faisant cas que de l'auantage de la naissance, ne se soucioient guere de faire esleuer leurs enfans dans les sciences, & dans la vertu; soit pour estimer, par vne erreur ridicule, que les Lettres ne conuenoient pas à des Gentils-hommes; soit pour auoir vne mauuaise tendresse qui les empêchoit de les nourrir avec cette seuerité, qui chasse la folie de leurs esprits, & qui est l'effet d'une veritable affection. Delà venoient les defordres de leur vie, & leurs fautes dans les emplois où ils estoient occupez en vn âge plus auancé. S. Charles pour empêcher vn si grand mal-heur, fonda vn College pour les Nobles, où il fit voir sa magnificence dans les bastimens, & sa sagesse dans les regles qu'il composa pour sa bonne conduite. Il en donna d'abord la direction aux Peres Iesuites, & depuis il la commit aux

Il bastit
vn Col-
lege pour
les Nob-
les.

Oblats de Saint Ambroise. Il establit par dessus cela, vne Congregation de personnes Ecclesiastiques, & Seculieres, qui outre la pieté & la doctrine, auoient l'auantage d'estre Gentils-hommes, pour auoir soin du temporel de cette maison. On y receuoit des enfans de tous les Dioceses, & on y en vid bien-tost accourir des Prouinces les plus esloignées de l'Italie, & des pais de delà les Monts, où la reputation de ce College se répandit incontinent. Les Pensionnaires y estoient si commodément logez, & traitez avec tant de politesse, que des Princes y eussent peu demeurer agreablement. Le Saint Cardinal, qui ne parloit gueres de ses œuvres, se réjouissoit de celle-cy, & y auoit vne pieuse complaisance. Il visitoit souuent cette maison, s'informoit exactement du progres que chacun faisoit en la science, & en la pieté, & les exhortoit à s'auancer tousiours, par des discours accommodez à leur capacité & à leurs inclinations. Quand des Prelats, ou d'autres personnes de grande condition, le venoient visiter, il les menoit à ce College; afin que les estudians eussent occasion de composer des Epigrammes à leur louange, & d'exercer leur esprit. Tous les ans, à la fin des Classes, il se faisoit des disputes où luy-mesme assistoit avec toutes les personnes de condition de la Ville: & il donnoit de sa main des prix de Liures magnifiquement reliez, à ceux qui les auoient gagnez. Il ne pouuoit cacher la ioye qu'il sentoit de voir ces plantes tendres & deli-

cates s'esleuer si heureusement pour le service de l'Eglise, & de l'Estat; & il chargea son Secretaire nommé Syluius Antonianus, de composer vn Traité de la maniere d'instruire les ieunes Gentilshommes à la pieté; & aux bonnes Lettres. Apres l'auoir leu, il trouua qu'il n'auoit pas assez bien à son gré touché les choses qui regardoient la pieté, & il pria le Cardinal de Verone, Augustin Valere de le reuoir, & d'y adiouter sur ce point, ce qu'il croyoit manquer. Cét excellent Prelat le leur exactement, & ne crût pas qu'il eust besoin d'aucune addition. Il fut donc imprimé comme il auoit esté composé par son Autheur, que son merite esleua quelque temps apres à la dignité de Cardinal, sous Clement

1567.

VIII.

Saint Charles durant le Pontificat de son Oncle, auoit connu fort particulièrement les Peres Theatins, qui font profession d'une pauureté si rigoureuse, que non seulement ils ne possèdent rien, ny en corps, ny en particulier; mais qu'ils ne demandent pas mesme l'aumosne, & qu'ils attendent de la pure Prouidence de Dieu, le secours dont ils ont besoin. Il alloit souuent dans leur maison de Saint Syluestre du Mont Cauai, pour se delasser, dans la conuersation de Guillaume Sirlet, qui estoit vn homme d'une tres-rare doctrine, & d'une plus grande vertu. Aussi le fit-il honorer de la Pourpre par Pie IV. & il le tint tousiours au rang de ses principaux amis. Comme il cherchoit par tout des

Il établit les
Peres
Theatins.

1569.

1570. ouuriers pour l'ayder à soustenir le poids de la charge Pastorale, il se souuint de ces bons Religieux, & les appella à Milan, où il les mit dans vne maison commode pour eux, & pour les Habitans, qui receurent beaucoup de seruice & de consolation de ces Prestres degagez de tout autre interest que de celui de la gloire de Dieu.

Et les
Peres de
la Com-
pagnie
de Iesus.

Les Religieux de la Compagnie de Iesus auoient esté establis auant eux, dans cette Ville populeuse, & ils y auoient fait vn grand fruiet, par leurs Predications, leur bon exemple, leur zele, leur prudence, leur charité, & leur trauail infatigable dans tous les exercices qui peuuent ayder le prochain pour sortir du peché, & s'auancer en la pieté Chrestienne. La premiere Eglise qu'il leur auoit donnée, se trouuant trop petite pour contenir le peuple qui y accouroit en foule; il fit faire le dessein d'une autre tres-magnifique, par le Peregrino qui estoit vn excellent Architecte, & il y mit la premiere pierre le cinquième du mois de Iuillet de l'année 1569. avec vne pompe qui monstroir combien ces bons ouuriers luy estoient chers. Car il partit du Dôme avec son Clergé, le Gouverneur, les Senateurs, les Magistrats de la Ville, les principaux Gentilshommes, & vne multitude innombrable de peuple, pour venir au lieu de cette benediction. Il y celebra la Messe, & il prescha pour faire entendre l'importance de ce bastiment, & pour exhorter ceux qui pouuoient y contribuer de leurs biens, de le faire avec liberalité. Il en monstra l'exemple.

Car

Car il donna vne grande somme d'argent ; & les Milanois firent aussi de grosses aumônes ; de sorte que l'Eglise fut bien-tost bastie ; & elle est aujourd'huy vne des plus magnifiques qui soit en Italie. Enfin , il se démit en leur faueur , de son Abbaye de Rome , & obtint du Pape qu'elle fut vnée à leur maison.

L'experience des choses qu'il acquit dans le gouvernement de son Eglise , luy fit connoistre qu'encore que les Reguliers fussent des ouriers tres-habiles , & tres-fideles pour l'assister dans la conduite de son Diocese , que neantmoins le bien de l'Ordre , l'obligation des Constitutions particulieres , l'esprit dans lequel ils se nourrissoient , & la dépendance des Superieurs , estoient cause qu'il ne pouuoit pas se seruir touïours des mesmes hommes , que bien souuent on enuoyoit en d'autres maisons quand ils auoient commencé avec luy quelque œuure d'importance. Il ne les auoit pas touïours à la main pour les mettre où le besoin de son peuple les demandoit ; & faute de connoistre le monde , ils auoient quelquefois vn zele plus chaud que prudent , ce qui apportoit de grands obstacles à ses entreprises. Mais sur tout pour le gouvernement de ses Seminaires , il luy falloit des gens qui eussent l'esprit Ecclesiastique , fort different de l'esprit Monastique , qui va à retirer les personnes du Siecle , & non pas à les y sanctifier , & qui conduit les ames par vne voye rigoureuse & esloignée de la vie commune , qui est propre aux Clercs.

G

Il établit
les Pre-
stres
Oblats.

1568.

Ces considérations l'obligerent de fonder une Congregation de Prestres dégagés de toutes sortes de vœux, & dépendans de luy seul, comme de leur Chef; afin qu'il s'en pût servir, soit pour la conduite de ses Seminaires, & de beaucoup de Confraternitez qu'il auoit établies; soit pour les enuoyer dans les Cures dont les titulaires n'estoient pas capables de leurs charges; soit pour les employer aux Missions dans les Villes, & dans les Villages; Enfin, pour les appliquer à toutes les fonctions Pastorales dans son Diocèse. Il fit choix de quelques Prestres pieux dont il connoissoit la doctrine, & la piété; & plusieurs autres qui sceurent son dessein, vinrent s'offrir volontairement à luy, d'où il prit occasion de les nommer, *les Oblats de saint Ambroise*, les ayant mis sous la protection de la sainte Vierge, & de ce grand Docteur de l'Eglise. Il en fit l'establissement le iour de la feste de S. Simplicien, l'un de ses predecesseurs, qui tomboit au seiziesme du mois d'Aoust de l'année 1568. Il fut approuvé par le Pape Grégoire XIII. & il obtint de sa Sainteté, plusieurs graces spirituelles, de grandes Indulgences, & quelques reuenus qui auoient appartenu à l'Ordre des Humiliez; aboly pour la raison que nous rapporterons dans la suite de cette Histoire. Il leur assigna pour faire leurs fonctions, l'Eglise du saint Sepulchre, qui estoit en grande veneration dans Milan, & presque au milieu de la Ville; de sorte que le peuple receut beaucoup de seruice du nouuel établisse-

ment de ces saints Prestres. Mais l'utilité qui en reuint au Diocese, ne fut pas moins considerable; & le saint Pasteur eut en eux des membres souples, & animez de son esprit, qui dépendoient de luy comme de leur Chef, & des seruiteurs qui auoient les yeux tousiours attachez sur ses mains, afin de partir au premier signe qu'il leur feroit, & aller servir les ames sous sa benediction. Il ne les lia à sa personne, & à celle de ses Successeurs, que par vn vœu simple d'obeissance: mais la charité du prochain estoit le principal nœud qui les ioignoit ensemble pour toutes les fonctions Pastorales. Il les distingua en deux Ordres, l'un de ceux qui demeuroient dans la maison du S. Sepulchre, sans aucune obligation de residence, & l'autre de ceux qui estoient respendus dans les Cures de la Ville, & du Diocese. Ils s'assembloient vne fois le mois en diuers endroits, selon la distance de leurs demeures, pour conferer des regles de la Congregation; pour voir comment elles estoient obseruées; pour resoudre les difficultez qui pouuoient leur estre arriuées dans le tribunal de la Penitence; & pour s'exhorter les vns les autres, à faire tous les iours de nouveaux progres dans la piété Ecclesiastique. Il visitoit souuent leur maison de Milan, où il auoit fait bastir vne petite chambre pour luy; & durant tout le temps qu'il y demeuroit, il suiuoit tres-exactement les exercices de la Communauté, & se conduisoit avec auant d'humilité que s'il eust esté le dernier venu en la Congregation. Il vi-

sitoit les malades , & leur rendoit tous les Offices d'un bon & charitable Infirmier. Un bon Prestre nommé Pietro Stoppano, apres auoir esté assisté de luy durant tout le cours de sa maladie , avec des soins extraordinaires , entra dans l'agonie , & on n'attendoit plus que de le voir expirer. Mais Saint Charles pria pour sa guerison avec tant d'ardeur , qu'il l'obtint de Dieu, d'une façon miraculeuse. Quelques personnes s'estonnerent de luy auoir veu rendre tant de seruices à ce particulier , & il leur respondit, *vous ne sçavez pas , de quel prix est la vie d'un bon Prestre.* Il ordonna que l'on fist dans l'Eglise du saint Sepulchre , les mesmes exercices d'Oraison , & de Predication , que l'on fait dans celles des Prestres de l'Oratoire de Rome , à la Valicelle, ce qui attira beaucoup de personnes à y venir passer toute la iournée en des diuertissemens pieux & agreables. Il y institua encore vne Compagnie de femmes deuotes, qu'il nomma la Compagnie des Dames de l'Oratoire , & leur prescriuit des Reglemens pour leur conduite ; afin de les retirer de l'oyssieté , & de les separer des diuertissemens mondains qui engagent à tant de pechez. Leur principal exercice estoit de frequenter l'Eglise des Oblats , & d'assister aux Predications qui s'y faisoient. Les premieres Dames de la Ville s'y firent enroler, qui par pieté , qui par ialousie des autres ; & cette sainte inuention fut tres à propos pour introduire la deuotion parmy celles qui n'en auoient guere auparauant , & qui

passoient leur temps ou à mal faire, ou à ne rien faire; ou à faire tout autre chose que ce que deuoient pratiquer de bonnes meres de famille, pour viure selon les preceptes de l'Apostre. Cette Congregation d'Oblats estoit proprement l'œuvre de saint Charles, & celle dont il auoit plus de raison de se glorifier. Car elle fut incontinent remplie d'hommes tres-habiles, lesquels estans respandus par son Diocese, y firent des fruiçts que l'on n'eust osé esperer. C'estoit ses yeux par lesquels il voyoit le besoin de ses Parroisses, ses mains par lesquelles il les secouroit, sa langue qui les instruisoit, son cœur qui y respandoit la vie de la deuotion, & comme les rouës principales du mouuement de son zele paternel dans son Diocese.

CHAPITRE XVII.

Des autres establissemens de pieté que fit saint Charles dans Milan.

DVrant que la peste, dont nous allons bien-tost parler, affligeoit la ville de Milan, on auoit basti des Autels en beaucoup d'endroits, afin que les malades qui estoient enfermez dans leurs maisons, pussent entendre la Messe sans s'infecter les vns les autres. Le Peuple auoit accoustumé d'y faire ses deuotions, & saint Charles resolut d'entretenir ces marques de la

G iiij

Il érige
des Cō-
pagnies
de la
Croix,
dans la
ville de
Milan.

calamité publique des Habitans ; afin de
conferuer dans l'esprit , la memoire de cet-
te terrible punition dont Dieu les auoit
chastiez. Pour cét effet , il érigea des Com-
pagnies qu'il nomma de la Croix , dans
tous les quartiers où estoient ces Autels ,
& y fit dresser ces signes salutaires de nostre
salut , & les enfermer avec des grilles de fer,
pour empescher qu'on ne les prophanaſt
en les approchant de trop près. L'exerci-
ce de ces Confreres estoit d'y faire quel-
ques prieres , tous les soirs , & d'aller en
Proceſſion tous les Vendredis à l'Eglise
Cathedrale , pour viſiter le ſaint Clou , que
l'on y monſtroit avec grande deuotion , &
pour y entendre vn Sermon qui ſe faiſoit
ſur la Paſſion de Noſtre-Seigneur. Le Dia-
ble s'efforça d'empescher ce ſaint eſtabliſ-
ſement , par vn artifice aſſez ſubtil , qui fut
de mettre dans l'eſprit des Magiſtrats , que
le Cardinal pretendoit eſtendre l'immu-
nité Eccleſiaſtique ſur les places où estoient
ces Autels , & en dépouüiller le Prince.
Mais on reconnut bien-toſt que l'Arche-
ueſque n'auoit pas cette penſée ; de ſorte
que l'inſtitution demeura en ſon entier , &
alluma le feu de la deuotion par toute la
Ville. Car tous les ſoirs , en diuers quar-
tiers , on entendoit chanter les Litanies ,
& on voyoit des hommes & des femmes à
genoux , qui faiſoient des prieres publiques
auant que de ſ'aller coucher. Tous les
Vendredis on rencontroit des Proceſſions
nombreuſes par les ruës qui alloient au Dôme ,
chantant des Pſeaumes , & des Hym-

nes , avec tant de modestie , & de pieté , que les plus indeuots en estoient touchez. Depuis la mort de saint Charles , les Compagnies s'accrurent iusqu'au nombre de trente-six.

La pauvreté qui suit d'ordinaire la peste , auoit obligé saint Charles de ramasser beaucoup de ieunes filles que leur âge , & leur beauté exposoit au danger de se perdre , & de les mettre dans vne maison particuliere où elles estoient entretenues. Quand le mal fut cessé , il ne les voulut pas abandonner ; mais il resolut de leur fonder vn College. Il les mit dans le Cœnvent de sainte Marie des Anges , qui auoit appartenu aux Freres Humiliez , & il le meubla de toutes les choses qui estoient necessaires pour leur faire passer la vie commodement. Il en confia la conduire spirituelle aux Filles de sainte Vrsule ; & pour le temporel de leur reuenu , il nomma quelques personnes Nobles , Ecclesiastiques , & Seculieres ; qui en prenoient le soin. Il leur donna des regles accommodées à leur condition ; & cette maison fut du depuis vn asyle pour receuoir beaucoup de Filles , qui n'ayant point de bien couroient danger de se perdre dans vne Ville , où il n'y auoit que trop de marchands de leur honnesteté. On en tiroit quelques-vnes pour les marier à des personnes pieuses , & à leur aise , & beaucoup entroient en diuers Monasteres , où elles produisoient des fruiçts de la bonne nourriture que l'on leur auoit donnée dans leur College de sainte Sophie. Car c'est ain-

Il assemble dans vne maison des Filles abandonnées de leurs parens.

si que saint Charles l'auoit nommé , parce qu'il estoit sous la Protection de cette Sainte.

Il assem-
ble les
pauvres
vaga-
bonds.

Il eut encore tant de pitié des pauvres vagabonds qu'il auoit nourris durant la contagion , qu'il resolut de les entretenir dans vne maison commune , apres qu'elle fut cessée. Il consideroit que sortant d'entre ses mains , ils ne pouuoient courir que de grands perils pour leur salut. Car aujourd'huy les Mendiants , sont vne sorte de personnes dans la Republique , que l'on en peut appeller , la bouë , & la lie , plutôt pour leurs vices , que pour leur misere. Ils viuent dans vne entiere ignorance des premiers élemens de la Religion Chrestienne. Ils sont tousiours dans les Eglises , & ils n'y prient iamais Dieu ; mais ils empeschent les autres de le prier en repos. Le blaspheme est ordinaire dans leur bouche ; toutes leurs paroles sont sales ; il n'y a presque point de mariages entr'eux ; mais tous se messent d'une façon abominable. Le larcin leur est familier ; ils ne frequentent point les Sacremens durant leur vie , & ordinairement ils meurent sans les recevoir. On ne peut mieux remedier à ces desordres déplorables de leur vie , qu'en les tenant dans vn Hospital , où on prend soin de les instruire , & de leur faire pratiquer les exercices de la Religion. Ce fut pour cette raison que saint Charles mit ceux qu'il auoit entretenus durant la peste dans vne maison qui auoit appartenu à des Religieuses , lesquelles il en auoit ostées pour

les loger en vn lieu plus commode. Il fit la fondation de ce lieu, vn Dimanche de la Sainte Trinité, & obtint vne Indulgence Pleniere, pour tous ceux qui le visiteroient ce iour là. Les Milanois qui sont affamez de ces thresors spirituels, y accoururent; & l'exemple de leur Pasteur, ioint à ses exhortations, les porta à faire de grandes aumosnes; de sorte qu'il fut bien-tost en estat de receuoir tous les Mendians de la Ville, & de la Campagne qui y estoient entretenus fort charitablement. On y faisoit trauailler ceux qui le pouuoient faire, & le profit de leurs ouurages seruoit à entretenir la maison. Vn bon Prestre auoit le soin de les catechiser, de leur dire la Messe, & de leur administrer les Sacremens. Il y auoit des personnes de condition de la Ville, députées pour les choses temporelles. Milan se vid soulagé, par ce moyen, des pauvres qui alloient de porte en porte, & d'Eglise en Eglise, avec vne grande incommodité pour tout le monde, qu'ils accabloient de leurs cris, & qu'ils infectoient de leur puanteur.

Puisque nous sommes dans le discours des establissemens de pieté que fit S. Charles, ie veux parler d'un qui luy donna beaucoup de consolation. Ce fut celuy des Religieuses Capucines qui font Profession de suivre exactement, & dans toute la rigueur, la Regle de Sainte Claire. Vne grande Dame de pieté auoit dès l'année 1575. assemblé plusieurs saintes Filles qui viuoient avec elle dans vne espeece de Commu-

Il establit les Capucines.

nauté Religieuse. Elles firent toutes resolution de se faire Capucines , & la proposerent à l'Archeuesque. Il la receut avec ioye , & ne tarda guere à la mettre en execution. Il leur achepta vne place commode pour le bastiment de leur Monastere , & en fit la principale dépense. Pour exciter son peuple à aimer ces saintes Religieuses , & à les secourir de leurs aumosnes , dont elles vivent iour à iour , il fit la ceremonie de cette Fondation le Dimanche de l'Octaue de Pasques , qui tomboit au vingt-sixiesme d'Avril. Il conuoqua le Clergé Seculier & Regulier dans l'Eglise Cathedrale , où apres auoir dit la Messe , il donna l'habit à dix-huict Filles , & leur ayant mis vne grande Croix de bois sur les espales , & des Couronnes d'espines sur la teste , il les conduisit à leur Monastere. Il en mit la direction sous l'Archeuesque , encore qu'ailleurs les Religieux Capucins les gouernent avec beaucoup de profit pour elles , & d'édification pour le Public. L'odeur de la sainteté de leur vie se respendit bien-tost par la Ville de Milan , encore qu'elles n'allassent presque iamais au Parloir ; & beaucoup de Dames qui auoient esté nourries tres-delicatement , embrasserent ce genre de vie , qui est encore plus rigoureux que celuy des Religieux dont elles ont pris le nom. Car elles ieusnent toute leur vie , & font d'autres penitences particulieres , estant aussi affamées du fiel & des espines de la Croix , que les personnes du monde le

sont des diuertissemens & des delices. Leur Institut a esté receu en France, où elles ont peu de maisons à la verité; mais la sainteté recompense bien auantageusement la multitude; & sans offenser les autres Religieuses de l'Eglise, on peut dire qu'estant simples, pauvres, & retirées du commerce des gens du monde, comme elles sont, il n'y en a pas de plus saintes, & de plus exemplaires.

S. Charles, outre ces fondations principales érigea encore beaucoup d'autres Compagnies, comme furent celle des personnes qui gardoient le Celibat sous la protection de S. Maurice; celle des veuves sous le nom de Sainte Anne; celle des peres de famille, & celle des ouuriers qui trauailloient à enseigner la Doctrine Chrestienne. Il s'appliqua particulièrement à bien establir cette derniere; qu'il composa de personnes Laïques, qui estoient zelées pour vne œuvre si sainte, de laquelle dépendoit l'instruction de son Peuple. En peu de temps ces Escoles furent introduites dans toutes ses Paroisses, & elles y firent vn fruit inestimable. Car les hommes, les femmes, & les enfans, les frequentoient avec assiduité, y estant attirés par les exhortations continuelles de leurs Pasteurs, & par les Indulgences que les Souuerains Pontifes y donnerent; de sorte que l'ignorance des choses de la Religion, qui estoit tres-grande dans le Diocèse, & dans la Prouince de Milan, en fut heureusement bannie. Les regles

Il établit les Compagnies de la Doctrine Chrestienne,

pour la conduite de ces Escoliers ont esté imprimées dans les actes de ce Saint Cardinal; & elles sont si sages, si iudicieuses, & si exactes, que l'on ne peut assez admirer la vaste capacité de ce grand esprit pour les choses Ecclesiastiques. Quand il faisoit sa visite dans vne Parroisse, il s'informoit luy-mesme tres-exactement de l'estat de ces Compagnies. Il parloit aux Confreres, leur donnoit courage par des paroles enflammées, afin de continuer dans leurs exercices, les communioit de sa main, & leur accordoit toutes les graces qui estoient en son pouuoir. Enfin, il les regardoit comme ses principaux Coadjuteurs en l'œuvre du salut des ames, & les traitoit comme ses Freres. Quand il mourut, il laissa six cens quarante Escoles de la Doctrine Chrestienne, establies dans Milarr, ou dans son Diocese. Les Escoliers qu'il frequentoient, montoient à quarante mille; les ouriers qui y trauailloient, à trois mille; les Officiers Generaux, à deux cens soixante & trois; & les particuliers, à mille six cens vingt. Ce nombre presque incroyable fait voir avec combien de soin le Cardinal s'appliquoit à cette œuvre, qui est proprement l'œuvre des Euesques, & celle dont Dieu leur demandera vn compte plus exact. Car comment les Chrestiens peuvent-ils esperer la vie eternelle, qui consiste, dit Saint Iean, à connoistre le seul vray Dieu; & son Fils I E S V S-CHRIST qu'il a enuoyé au monde;

Epist. I.
ch. I.

c'est à dire, qui s'acquiert par cette connoissance ; s'ils ne connoissent ny le Pere, ny le Fils, ny le Saint Esprit, ny l'Incarnation, ny la Passion du Redempteur, ny les Commandement qui ordonnent de faire certaines choses, & de s'abstenir d'autres ? Mais comment connoistront-ils ces Mysteres, si on ne les leur enseigne ? Comment leur seront-ils plus utilement enseignez, que par le moyen de ces Escoles, qui n'ont autre but que cette particuliere instruction. Les Curez ne sont pas assez zelez pour en prendre le soin, ou ont trop d'affaires dans leurs Parroisses, pour y vacquer comme il faut ; & ces Coadjuteurs de leur Ministère, les soulagent en cette partie importante de leur deuoir. Il y a eu depuis la mort de Saint Charles des Religieux establis en France, qui ont pris le nom de Peres de la Doctrine Chrestienne, dont Cesar de Bus fut le Fondateur en la Ville d'Auignon. Leur exercice est expliqué par leur tiltre : car il consiste à enseigner dans les Villes, & dans les Villages, la Doctrine Chrestienne aux ignorans, & aux pauvres. Ils s'en acquittent avec beaucoup de zele & de diligence dans les lieux où on les employe ; & les Euesques reçoivent toute sorte de satisfaction de ces ouuriers qui sont simples, humbles, obeïssans, & esloignez de toutes intrigues, & du desir de gouverner les familles, & de se mesler de toute sorte d'affaires. Nous auons dans ce Chapitre ioint beaucoup d'esta-

blissemens faits en diuers temps par Saint Charles , afin que les Lecteurs trouuassent toute cette matiere de suite , ce que nous auons iugé estre le plus commode pour le soulagement de leur memoire.

C H A P I T R E X V I I I .

De la reforme que fit Saint Charles de diuers Monasteres.

Saint Charles sçauoit bien que les Moines ont esté appelez par les Saints Peres , la plus pure portion des Laïques , & les Vierges consacrées à I E S V S - C H R I S T , les fleurs du Iardin , les amours , & les delices du diuin Espoux. Mais il sçauoit aussi que pour meriter ces tiltres , il faut mener vne vie qui ne tienne rien de la vie humaine ; & qui garde inuiolablement les regles dont elle fait profession. Autrement, comme la corruption des meilleures choses est la plus grande & la plus insupportable en sa puanteur ; il est certain qu'il n'y a rien de si depraué , & de si abominable qu'un mauuais Moine , & qu'une mauuaïse Religieuse. Le Siecle où vivoit le S. Cardinal , par son ignorance , & par son déreglement de mœurs , en auoit fait plusieurs de ce nombre ; & apres qu'il eut traouillé à reformer son Clergé , il s'appliqua à remettre dans les Monasteres de son Diocese , la Discipline qui s'y estoit presque

abolie. Il y en auoit beaucoup dans la Ville de Milan, où la pluspart des Filles viuoient sans closture, sans obeïssance, sans pau-
 ureté, & quelquesfois sans chasteté. Ce de-
 sordre luy estoit extrêmement sensible, & il
 commença à le vouloir corriger. Mais il
 eut besoin de sçauoir posséder son ame en
 patience, & d'estre fortifié par vn Esprit
 principal. Car d'abord il trouua vne tres-
 grande resistance dans les Religieuses qui
 apprehendoient la reforme; dans leurs
 parens qui prirent leur deffense fort mal à
 propos; & dans les Reguliers qui en
 auoient la conduite, sous pretexte de def-
 fendre leurs exemptions de la Iurisdiction
 Episcopale. La Ville mesme s'interessâ en
 cette affaire, & dans le Conseil public, on
 resolut d'enuoyer à Rome, vn Ambassadeur
 pour s'opposer à ce changement. Mais
 Saint Charles laissa prudemment passer
 l'emotion de la tempeste, & prit si bien
 son temps, fit voir si clairement aux pa-
 rens de ces filles déreglées, qu'en les sou-
 stenant dans leur façon de viure si licen-
 tieuse, ils deshonorioient leurs familles,
 outre l'iniure qu'ils faisoient à l'Eglise,
 protegeant celles qui la chargeoient d'in-
 famie; il opposa vne si iudicieuse fermeté à
 la resistance de leurs Superieurs, & em-
 ploya si bien l'authorité du Pape qu'il eut
 fauorable pour executer son dessein: qu'en-
 fin il vint à bout d'un ouurage où la pru-
 dence humaine iugeoit qu'il deuoit
 échoüer avec beaucoup de confusion. Il
 établit donc la closture par tous les Mo-

nafteres , comme le fondement de la vie Religieufe pour les Filles. Il mit la Communauté en la meilleure forme qui luy fut poffible. Il bannit des Parloirs , les Seculiers , & les Religieux. Il y introduifit l'exercice de l'Oraifon , & la frequentation des Sacremens. Il les pouruût de bons , & fages Confefseurs , & de Vifiteurs également doctes , & pieux ; enfin il changea des deferts fanguages en des plaines fertiles , & en des parterres émaillez de fleurs. Il ofta de la campagne , des Monafteres qui n'y eftoient pas en feureté ; & les transféra dans des Villes fermées , où les Filles pouuoient receuoir l'affiftance , & la confolation fpirituelle dont elles auoient befoin , & où eftant exposées à la veuë du monde , il n'y auoit pas fujet de craindre beaucoup de libertez qui fe gliffent aisément dans la folitude des champs. Il en retira mefme plufieurs de la Superiorité des Reguliers de leur Ordre , qui n'en vfoient pas avec toute la douceur & la fageffe qui eust efté à defirer , & qui donnoient par ce moyen beaucoup de fujet de plainte aux Religieufes , lesquelles ayant l'efprit tendre & delicat, doiuent eftre conduites avec vne grande condefcendance à leur infirmité. Il fe gournernoit avec elles d'une facon fort feuerë à fon égard. Car il n'entroit iamais dans leurs maifons , que pour quelque neceffité dont il ne fe pouuoit difpenfer , & qu'en la compagnie de quelques Prestres d'aage ; & de probité tres-connuë. Il reprit vn iour fort

Il n'entroit point dans les Monasteres des Filles , que par neceffité.

aigrement quelqu'un de ses domestiques, ayant veu que dans le Journal qu'il faisoit de ses actions, il auoit mis qu'il estoit entré dans un Monastere, sans adjouster pour quelle raison. Il ne leur parloit iamais estât seules, & c'estoit tousiours de choses qui regardoient leur salut particulier, ou le bon reglement de leur Monastere, si elles estoient Superieures. Par cette conduite il fermoit la bouche à la medisance, aussi-bien qu'aux Prestres & aux Reguliers, qui eussent pû trouuer à redire à la rigueur qu'il gardoit à leur refuser la permission d'aller aux Parloirs, sous pretexte de s'entretenir de discours de pieté avec des seruantes de Dieu. En Italie ils sont fort sagement interdits à toutes sortes de personnes, sans un biller de l'Euesque, ou du Superieur; & pleût à Dieu que nous puissions introduire cet usage en France, où le desordre de beaucoup de maisons Religieuses ne vient que de la liberté des conuersations qu'ont les gens du Siecle avec les Filles. L'esprit du Monde est un venin si subtil qu'il passe aisément au trauers des grilles les mieux fermées, & fait des degats horribles, dans les Communautés les plus saintes. A plus forte raison est-il à craindre pour celles où la vertu n'est pas si solide. Certes on voit fort peu de pecheurs qui se conuertissent par ces entretiens; & on ne voit que trop de bonnes Religieuses qui perdent la ferueur de la sainte deuotion, laquelle ne se conserue que par la separation des creatures, en celles qui ont l'honneur

de porter le nom d'Espouses de I E S V S
C H R I S T.

Il reform-
mel'Or-
dre de S.
Frâçois. Saint Charles estoit Protecteur de l'Or-
dre de Saint François, & comme il l'ai-
moit tendrement, il ne pouuoit voir les
desordres qui s'y estoient glissez, sans estre
touché de douleur, & du desir d'y apporter
tous les remedes qui seroient en sa puissan-
ce. Il le trouua diuisé en deux Congrega-
tions principales, l'une appelée des Fre-
res Conuentuels, & parmy nous, de la
grand'Manche; & l'autre des Freres Obser-
uantins qui vont nuds pieds. Parmy les
premiers, il ne restoit presque plus aucun
vestige de la pauvreté que Saint François
a mise pour le fondement de son Ordre.
Les Religieux qui estoient tant soit peu
considerables, logeoient dans des maisons
particulieres, & ne gardoient point de Côm-
munauté. Il entreprit de corriger cét abus,
& il s'y gouuerna avec tant de prudence &
de charité, qu'il reüssit assez heureusement
en vn si bon dessein. Le Cardinal Alexan-
dre Crinelli, qu'il auoit estably Vice-Pro-
tecteur, l'ayda beaucoup en cette entre-
prise, ayant choisi pour Visiteurs les Reli-
gieux les plus zelez de l'Ordre, qui par
leur exemple, & par leurs exhortations,
bannirent de beaucoup de Conuents, la
propriété qui les corrompoit comme vne
peste domestique. Parmy les Obseruan-
tins, le mesme poison s'estoit aussi répan-
du, & par le moyen de l'argent que pos-
sèdoient certains Religieux, ils faisoient
des cabales puissantes dans l'Ordre, & en

occupoient les charges. Nostre Saint Cardinal osta cette corruption , & changea quelques Superieurs qui estoient paruenus à leurs Offices par ce moyen , les releguant en des Conuents esloignez , & par leur absence remettant en effet l'Obseruance dans les Monasteres qui en portoient le nom. Vn Religieux natif de Lisbonne , longtemps auparauant auoit fait vne reforme particuliere ; mais l'esprit d'austerité & de Penitence qui l'auoit poussé à establir vne nouvelle Congregation , s'estant bien-tost refroidy apres sa mort , ce membre separé de son corps estoit encore plus gâté que les autres. Il y auoit encore d'autres Freres appelez Chiareni , qui faisoient bande à part , & qui ne donnoient pas moins de scandale. Saint Charles pour empêcher ces desordres , obtint du Pape, vn Bref qui luy donnoit la puissance de réunir ces deux Congregations au corps de l'Ordre. Il fit donc signifier aux Religieux qui les composoient , de s'assembler dans le Conuent de la Paix , qui estoit à Milan. Mais comme ils estoient aduertis qu'il vouloit leur signifier le Bref de l'union, de laquelle ils estoient extrêmement esloignez , ils firent de si grands bruits de cloches, comme s'ils eussent sonné le tocin, & se preparerent si insolemment à vne resistance violente , que le Cardinal iugea qu'il ne falloit pas presser pour lors cette affaire , estant capables de se porter à quelque violence contre sa personne mesme, en la mauuaise humeur où ils se trouuoient.

Il laissa donc passer cette tempeste , & il sçeut si bien prendre son temps , qu'enfin il reünit ces deux Compagnies au corps dont elles s'estoient separées , s'estant tousiours deffendu contre les prieres de plusieurs Princes , & d'autres personnes de qualité qui le presserent extrêmement de laisser ces Religieux dans leur diuision.

C H A P I T R E X I X .

De la visite des Chanoines de l'Eglise de la Scala.

1569. **I**L y auoit dans Milan vne Eglise Collegiale nommée Sancta Maria de la Scala , fondée par vne Dame de ce nom , qui estoit femme de Barnabé Vicomte , Seigneur de la Ville. Le Iuspatronat des Canoncats appartenoit au Roy d'Espagne , comme Duc du Païs , & il presentoit à l'Archeuesque , lequel sur sa nomination conferoit le Benefice. François Sforce , second du nom , auoit obtenu plusieurs priuileges du Pape , pour ces Chanoines , & le principal estoit l'exemption de la Iurisdiction de l'Ordinaire. Mais Clement VII. dans sa Bulle de l'an 1531. auoit mis cette clause , si nostre venerable frere l'Archeuesque de Milan y donne vn exprés consentement ; de sorte que cōme aucun n'auoit iamaïs consenty , le priuilege par soy-mesme estoit nul , & ne pouuoit auoir aucune vigueur.

Du temps de Saint Charles ces Chanoines viuoient avec vne licence qui l'obligea de songer à les reformer. Il leur fit donc sçauoir qu'il desiroit de les visiter, & leur assigna le iour où il feroit cette fonction. Eux luy firent entendre qu'ils estoient exempts, & qu'ils ne souffriroient pas sa visite. Cette réponse arresta Saint Charles; & pour ne rien faire legerement, il assembla des Docteurs pour consulter le droit de l'Archeuesque sur cette Eglise. Tous reconnurent qu'il estoit indubitable. Il voulut pour marcher encore plus seurement en donner aduis au Pape, qui fit tenir vne Congregation tout exprés, où ses raisons ayant esté examinées, il luy fit respondre par Monseigneur Ormanete, qu'il auoit appellé à Rome pour les affaires Ecclesiastiques, *que son droit estoit indisputable, & qu'il procedast à la visite des Chanoines de la Scala.* Apres cette réponse, son zele ne l'emporta pas legerement, & il leur donna encore deux mois pour mieux reconnoistre l'inualidité de leur priuilege pretendu, & se resoudre d'obeir sans faire de scandale. Le delay ne produisit pas l'effet qu'il pretendoit dans des esprits mal affectionnez à sa personne, & qui craignoient de viure sous sa Discipline. Ils resolurent donc de luy refuser l'entrée de leur Eglise, & vn accident qui arriua en ce temps-là, les porta à vne entreprise plus insolente. Car le Vicair criminel de l'Archeuesque ayant fait quelques procedures contre vn Prestre de leur Chapitre, ils esleurent pour

Insolence des Chanoines de la Scala contre S. Charles.

Conseruateur de leurs priuileges , (suiuant
 la forme d'Italie) vn Pierre Barbesta, hom-
 me sans iugement & sans aucune connois-
 sance des matieres de Iurisdiction. Com-
 me il ne sçauoit ce qu'il faisoit , il excom-
 munia le Vicaire , & le Procureur Fiscal
 de l'Archeuesque , à cause , disoit-il , qu'ils
 auoient violé le priuilege Apostolique du
 Chapitre de la Scala. Les rebelles se por-
 terent à cette insolence dans l'esperance
 d'estre protegez par le Gouverneur , qui
 auoit fait publier vn Edit pour la conser-
 uation de la Iurisdiction Royale ; & encore
 comme estant sous la protection du Roy,
 Iuspatron de leurs Benefices. Le Cardinal
 considerant l'importance de leur entrepri-
 se , resolut de faire sa visite , & leur enuoya
 1569. Monseigneur Moneta le trentième d'Aoust,
 pour la leur indiquer. Aussi-tost ils laissent
 l'Office , & font fermer toutes les portes
 de l'Eglise , & se retirent dans le Cimetiere
 avec leurs habits de Chœur. Vn d'en-
 tr'eux , Calabrois de Nation , & qui por-
 toit la qualité d'Oeconome du Roy, répon-
 dit à Moneta , que le Chapitre de la Scala
 estoit exempt de la Iurisdiction de l'Ar-
 cheuesque , & qu'il rapportast à son Mai-
 stre de prendre garde à ce qu'il entrepren-
 droit , pour ne s'attirer pas vne mauuaise
 affaire , des Edits fulminans venant d'es-
 tre publiez contre les rebelles à sa Ma-
 jesté Catholique. Moneta ne luy fit point
 de réponse ; mais il s'adressa à d'autres
 Chanoines qu'il iugeoit moins seditieux,
 & voulut sçauoir d'eux , quelle estoit leur

intention. Le Calabrois , qui auoit formé vn party de quelques étourdis comme luy, ne leur permit pas de parler. Il commença à dire des injures infames à ce bon Prestre, & mettant ses compagnons en fureur par ses crieries , ils le chasserent avec violence, sans aucun respect , ny de son caractère , ny de sa qualité , ny de celuy qui le leur auoit enuoyé. A peine cela fut-il fait , que Saint Charles arriua , monté sur sa mule , & en habit de visite. Les Chanoines accompagnez d'un grand nombre de gens armez qu'ils auoient amassez pour ce sujet , vinrent à la rencontre de celuy qui portoit la Croix Archiepiscopale , prirent les resnes de son cheual , le heurterent violemment, & l'empescherent de passer outre. Le Cardinal qui vid ce desordre , descendit de sa mule , & prenant luy-mesme la Croix, vint droit à eux , estimant qu'ils porteroient quelque respect au signe de nostre Redemption , & peut-estre encore à sa personne. Mais la rage les auoit tellement aveuglez, qu'ils mirent la main aux armes, & que criant , *Espagne , Espagne* , ils fondirent sur luy , le heurterent , & luy fermerent la porte de l'Eglise au nez. Il courut vn grand hazard d'estre tué en cette meslée des coups d'arquebuse qui furent tirez à la Croix qu'il tenoit. Cette insolence si brutale ne le troubla point , & ne luy fit dire aucune parole qui témoignast que son cœur en eust du ressentiment. Aussi n'en fut-il touché que pour la consideration de ces misérables , qui en cette action of-

fencerent Dieu , & l'honneur de son Eglise , d'une façon si outrageuse. Son Vicaire General fit sur le champ attacher vne Sentence d'excommunication contre les Chanoines. Ils l'arracherent incontinent , & le chasserent dehors avec violence le chargeant d'injures. Leur impieté alla plus auant. Car Barbesta declara le Saint Cardinal tombé dans les censures Ecclesiastiques , & suspendu de ses fonctions , pour auoir violé le priuilege Apostolique , & fit afficher cette declaration scandaleuse par toutes les places publiques de la Ville. Vne si estrange entreprise offensa non seulement ceux qui aimoient l'Eglise , mais encore ceux qui ne luy estant gueres affectionnez , auoient quelque sentimēt d'honneur , & quelque lumiere de raison. S. Charles en se retirant , alla dans son Eglise , où il demeura long-temps en Oraison deuant le S. Sacrement , demandant au Fils de Dieu l'assistance de son Esprit pour se gouverner de telle sorte en cette affaire d'importance , qu'en vengeance la dignité de Cardinal , & d'Archeuesque , offensée en sa personne , & l'autorité de sa charge si insolemment mesprisée , il ne se laissast emporter à quelque ressentiment particulier de l'injure faite à sa personne. Ce qui l'affligeoit encore le plus , estoit le peché qu'auoient commis les Chanoines , dans lequel il y auoit apparence qu'ils demeureroient obstinez. Le mesme iour il confirma la Sentence que son Vicaire General auoit prononcée ; & le lendemain , il declara les Chanoines de la

Scala

Scala excommuniez, & nomma particulièrement le Calabrois qui estoit le Chef des reuoltez, & leur Eglise tombée dans l'Interdit Ecclesiastique, suivant la Bulle de Boniface VIII. Il aduertit le Gouverneur, & les Magistrats de ce qui estoit arriué, & leur manda que s'ils y auoient eu quelque part, ils auoient encouru les Censures. Il depescha à l'heure mesme vn de ses domestiques au Pape, pour l'informer de cette affaire, & luy demander sa protection. Pie apprit ces nouuelles avec autant d'indignation que de douleur; & aussi-tost il fit tenir vne Congregation pour resoudre ce qui se deuoit faire. La procedure de S. Charles ayant esté examinée, fut trouuée iuridique, & l'attentat des Chanoines insoutenable. Le Pape donc prononça tout ce qu'auoit fait le Barbesta nul, le cita à Rome, & quelques Chanoines, qui pour n'auoir pas obey, furent du depuis excommuniez. Le Calabrois se mit en chemin pour aller deffendre sa cause; mais il mourut subitement, & d'vne façon qui ne pouuoit estre prise que pour vne punition manifeste de la Iustice de Dieu, qui vouloit venger l'iniure de son Seruiteur. Ceux des Ministres du Roy d'Espagne qui ne l'aimoient pas, escriuirent à sa Majesté, que le Cardinal estoit vn homme d'vne ambition cachée, & qui couuroit de fort mauuais desseins contre son seruice sous des pretextes de pieté, & de reforme de son Diocèse; & que si on ne le chassoit de l'Estat, il estoit à craindre qu'on ne vist s'allumer vn feu qui seroit peut-estre mal-

Il écrit
au Pape
ce qui
luy estoit
arriué.

Mort
soudaine
de Bar-
besta.

Ses en-
nemis
escriuent
contre
luy au
Roy
d'Espa-
gne.

H

aisé à esteindre. S. Charles estant aduertý de ces mauuais offices, en fut viuement touché, comme celuy qui auoit vne affection tres-ardente pour la gloire de son Prince, & dont la maison luy estoit redeuable de tant de graces. Il y auoit pour lors vn Nonce à la Cour, qui estoit de ses intimes amis, appellé Monseigneur Castagne, Archeuesque de Rossane, & qui fut esleué sur la Chaire de saint Pierre, & se nomma Urbain VII. Il luy escriuit l'Histoire de la visite des Chanoines de la Scala, & le pria de trauailler avec adresse, à oster de l'esprit du Roy, les soupçons qu'on pourroit y auoir fait glisser contre sa fidelité qui ne pouuoit estre raisonnablement soupçonnée par ceux qui voudroient considerer les choses comme elles estoient en effet. Le Nonce eut vne Audience du Roy pour ce sujet, où il luy exposa si clairement la conduite de S. Charles, sa maniere de vie retirée, sa vertu hors de tout soupçon de feintise, son dégagement de toutes pretentions dans le Siecle, la renonciation qu'il auoit faite à tant de Charges & de Benefices qu'il deuoit retenir s'il eust eu des pensées de broüiller l'Estat de Milan; afin de corrompre le peuple par argent, la dépendance que sa famille auoit de l'autorité Royale; & l'impuissance de rien attenter contr'elle; que Philippe qui estoit vn Prince tres-habile & tres-sage, fut tout à fait persuadé que ce que l'on luy auoit escrit estoit vne pure calomnie. Il fit bien paroistre qu'il auoit cette opinion de luy dans les ordres qu'il donna en sa faueur quelque temps apres.

Le Nonce
ce defa-
buse le
Roy.

„ les, sa maniere de vie retirée, sa vertu hors
„ de tout soupçon de feintise, son dégage-
„ ment de toutes pretentions dans le Siecle,
„ la renonciation qu'il auoit faite à tant de
„ Charges & de Benefices qu'il deuoit retenir
„ s'il eust eu des pensées de broüiller l'Estat
„ de Milan; afin de corrompre le peuple par
„ argent, la dépendance que sa famille auoit
„ de l'autorité Royale; & l'impuissance de
„ rien attenter contr'elle; que Philippe qui
„ estoit vn Prince tres-habile & tres-sage,
„ fut tout à fait persuadé que ce que l'on luy
„ auoit escrit estoit vne pure calomnie. Il fit
„ bien paroistre qu'il auoit cette opinion de
luy dans les ordres qu'il donna en sa faueur
quelque temps apres.

Les Chanoines de la Scala voyant que leurs affaires prenoient vn mauuais train à Rome , s'aduiferent d'interesser le Gouverneur de Milan en leur deffenſe , parce que leur Eglise eſtoit ſous la protection du Roy. Ils ſceurent ſi bien le cajoler , qu'il eſcriuit au Pape , vne Lettre en leur faueur , dans laquelle il accuſoit S. Charles d'eſtre vn homme de boutade , & de caprice , qui ſui-
 uoit les mouuemens imperueux de ſon ze-
 le ; & qui excitoit tant de bruits dans Milan
 par les nouveautez qu'il y vouloit introdui-
 re , que ſ'il n'agiſſoit avec plus de prudence
 & de retenuë , il ſeroit contraint de le ban-
 nir de l'Eſtat. C'eſt pourquoy il ſupplioit ſa
 Sainteté de le moderer , & de luy donner
 aduis de proceder avec plus de circonſpec-
 tion. Il luy demandoit encore qu'il com-
 miſt la connoiſſance de l'affaire des Cha-
 noines de la Scala , à des Iuges dans la Du-
 ché de Milan , & non pas à Rome , alleguant
 vne Bulle de Leon X. pour iuſtifier ſa pre-
 tention. Le Pape reconnut dans cette Let-
 tre , que les ennemis du S. Cardinal auoient
 preoccupé ſon eſprit , & que le Diable luy
 ſuſcitoit cette tempeſte pour arreſter le
 cours de la reforme de ſon Diocèſe , ſi heu-
 reuſement commencée. C'eſt ce qui le fit
 reſoudre d'embraffer ſa protection avec
 chaleur : & pour témoigner au Gouverneur
 qu'elle ne luy manqueroit pas , il luy eſcri-
 uit deux Lettres vigoureuses & dignes d'un
 grand Pape comme il eſtoit. Elles conte-
 noient qu'il auoit connu le Cardinal Bor-
 romée durant le Pontificat de ſon Oncle ,

«
 «
 « Le
 « Gou-
 « uer-
 « neur
 « de
 « Milan
 « eſcrit
 « cõtre
 « luy au
 Pape.

» Pie IV. si éloigné des humeurs , & des des-
 » seins qu'il luy attribuoit , & qu'à present il
 « estoit si bien informé de ses bonnes inten-
 » tions , & de la regularité de sa conduite ,
 » qu'il s'estoit affligé que sa Noblesse eust
 » conceu vne si mauuaise opinion d'un si
 » saint Prelat. Que l'action des Chanoines
 » ne se pouuoit soutenir , & qu'au reste , il
 » prist bien garde à ne rien faire par violence
 » contre le Cardinal , de peur d'encourir les
 » Censures Ecclesiastiques. Qu'il seroit glo-
 » rieux à l'Archeuesque de souffrir l'exil pour
 » la deffense de son Eglise ; mais que l'Au-
 » theur de cette peine honorable deuoit
 » craindre l'infamie de son nom , qui ne luy
 » pouuoit manquer , & les effets de la Iustice
 » de Dieu , qui ne souffre pas que l'on offen-
 » se ses Oings impunément.

Le Pre-
 uost de
 l'Eglise
 de la Scala, dema-
 de l'Ab-
 solution.

Tandis que cette affaire se poursuioit à Rome , le Preuost de l'Eglise de la Scala , qui auoit eu moins de part que les autres en la violence faite au Cardinal , fut des premiers à se reconnoistre , & à demander l'Absolution à S. Charles. Il la luy donna en public , & receut de luy la reconnoissance d'estre soumis à la Iurisdiction Archiepiscopale. Les Chanoines qui auoient le Calabrois pour leur Chef , demurerent plus long-temps dans les Censures , & n'en tenant compte , celebrerent tousiours l'Office Diuin dans leur Eglise, quoy qu'elle fust interdite. Ils affecterent mesme de le faire avec plus de solemnité qu'auparuant , pour triompher , ce leur sembloit , de l'autorité de l'Archeuesque. Mais

quand ils sceurent que leur Oeconome estoit mort miserablement, & que le Pape auoit resolu de les chastier avec toutes les rigueurs portées dans les Bulles faites en faueur des Cardinaux, ils rentrerent en eux-mesmes, & commencerent à reconnoistre leur peché. Pie V. vouloit en faire vne punition qui seruist d'exemple aux autres; mais le Cardinal le pressa avec de si fortes instances de leur pardonner, qu'il obtint de sa Sainteté, que l'affaire luy fust remise. Ainsi comme il ne cherchoit que la correction de ces pecheurs, & la conseruation de ses droicts, quand il vid ces deux choses au point qu'il desiroit, il fut aussi-tost adoucy, & disposé à leur donner l'Absolution. La ceremonie s'en fit à la porte du Dôme; où estant entrez, apres la deliurance des Censures, ils reconnurent à genoux l'Archeuesque de Milan pour leur Supérieur. Il leua en suite l'Interdit de leur Eglise, & rebenit luy-mesme le Cimetiere où l'excez s'estoit commis, contre la personne, & celle de ses Ecclesiastiques. La fin de cette fascheuse affaire fut tres-glorieuse pour luy, & donna vne ioye indicible à toute la Ville, qui s'interessoit avec raison dans l'offense d'un si bon, & si vigilant Pasteur. Elle seruit à faire paroistre la moderation de son esprit, & l'humilité de son cœur. Car on ne l'ouyt iamais proferer vne seule parole qui pust témoigner la moindre alteration contre ceux, qui le déchiroient, & de viue voix dans les Compagnies, & par des Lettres escrites au Pape,

S. Charles intercede apres du Pape, pour les Chanoines de la Scala,

1570.

& au Roy d'Espagne. Dans celle qu'il fut obligé d'escrire pour sa deffense, il se contente de parler du faict, & ne dit rien contre ses accusateurs qui les pust blesser tant soit peu. Pie auoit exempté de l'Absolution, ceux qui auoient assemblé les soldats, & fait violence à la personne du Cardinal, voulant qu'ils fussent seuerement chastiez. Charles l'importuna tant encore, que leur cause luy fut remise; & il se contenta de les condamner à quelque somme d'argent pour le bastiment de la Coupole qu'il faisoit faire dans l'Eglise de S. Ambroise. Le Barbesta qui s'estoit porté à de grandes insolences contre luy, auoit esté mis en prison par ordre du Pape, & personne ne vouloit se charger de sa cause, pour l'horreur que l'on auoit de son action, & le respect que l'on portoit au saint Archeuesque. Mais luy, sçachant qu'il estoit abandonné de la sorte, declara par vn escrit public, qu'on luy feroit plaisir de le deffendre dans les voyes de la Iustice. Voyant que cela ne seruoit de rien, il pria le Pape de le traiter avec douceur. En effet, ses prieres furent considerées, & il se contenta de la peine du bannissement dont quelque temps apres S. Charles le fit deliurer.

Il inter-
cede
pour le
Barbesta.



CHAPITRE XX.

*De la reforme de l'Ordre des Humiliez,
& de l'assassinat que l'on voulut
faire de S. Charles.*

Quelques Gentilshommes Milanois 1569.
ayant esté emmenez prisonniers en Allemagne, par l'Empereur Conrard, ou de l'Or-
selon l'opinion des autres, par Federic sur- dre des
nommé Barberousse; les vns furent con- Freres
damnez à la mort, & ceux à qui on fit gra- Humi-
ce, mis en vne prison fort rigoureuse. Ces liez,
derniers sortirent de cette captiuité sous
l'Empereur Henry, apres y auoir enduré
de grandes incommoditez. Et comme
dans le temps qu'ils y auoient esté retenus,
l'Esprit de Dieu les auoit puissamment tou-
chez, ils resolurent à leur retour en Italie,
de le seruir dans l'estat Monastique. Pour
l'executer, ils mirent leurs biens en com-
mun, & choisirent la Regle de S. Benoist,
sous le nom de Freres Humiliez. Les ri-
chesses & le temps produisirent dans cét
Ordre leur effet ordinaire, qui est le relas-
chement de la pieté, la propriété, l'ignorance,
& la desbauche: de sorte que S. Charles
voyoit avec douleur des reuenus que la
deuotion auoit amassez, estre seulement
employez à entretenir le luxe, la vanité, les
plaisirs, ou les parens de ceux qui estoient
les Superieurs des maisons, sous le nom de

H iiii

Preuosts. Ceux-là ne songeant qu'à tirer tous les reuenus , n'entretenoient que le moins de Religieux qu'ils pouuoient , & auoient pour maxime, de n'en receuoir que d'ignorans , & de basse condition ; afin de les gourmander plus facilement , & de les faire contenter d'une plus petite contribution pour leur subsistance. Ils leur souffroient toutes les desbauches qu'ils vouloient faire , parce que leur en donnant l'exemple , ils n'auoient pas assez d'autorité pour leur en faire la correction : & que par cela mesme, ils les empeschoient de prendre garde aux interets de la Communauté. S. Charles estoit le Protecteur de cét Ordre ; de sorte que , soit par cette qualité , soit par celle d'Archeuesque de Milan, il se crût obligé de trauailler puissamment à le reformer. L'entreprise n'estoit pas aisée ; car ces Preuosts estoient presque tous des personnes de condition , qui vsoient de leurs Benefices , quoy que Reguliers , comme s'ils eussent esté des Benefices simples , les resignant à leurs parens , & employant leurs reuenus à l'entretien de leurs familles. Ils estoient accoustumez à vne vie tout à fait seculiere , aussi-bien que les Religieux qui se trouuoient dans leurs maisons ; & il n'y auoit aucune apparence de trouuer la moindre disposition dans leur esprit à embrasser le genre de vie , qu'en effet ils auoient voüé , qui estoit pauvre , & penitent. Il falloit se refoudre d'auoir sur les bras beaucoup de personnes de condition qui estoient interessées en la

Empeschemens
à la re-
forme de
l'Ordre
des Hu-
miliez.

continuation de ce desordre , & qui n'oublieroient rien pour empescher qu'on leur enleuast des Benefices considerables qu'ils auoient dans leurs Maisons. D'autant moins que les particuliers qui estoient à reformer , se trouuoient raisonnables , d'autant estoient - ils plus à craindre , à cause de leur brutalité. Les autres Religieux mesme qui apprehendoient qu'après la reforme de cét Ordre , le Saint Cardinal ne pensast à la correction des leurs , ne manquerent pas sous main de luy susciter tous les obstacles qu'ils estoient capables de former. Mais Charles n'auoit pas accoustumé de regarder en ces occasions , ce qui estoit difficile. Il ne consideroit que ce qu'il estoit obligé de faire ; de sorte que voyant que son honneur , & l'edification publique l'obligeoient de remettre la Discipline Religieuse dans la Congregation des Humiliez , il resolut de ne desister point qu'il ne fust venu à bout d'un si grand ouurage. Il auoit commencé auant qu'il partist de Rome pour venir resider dans son Diocese , d'y faire mettre quelque ordre par Monseigneur Ormanete ; & dans vn Chapitre General tenu à Milan , on auoit fait plusieurs Reglemens assez salutaires , pour corriger beaucoup d'abus fort importans. Mais le principal demeuroid tousiours , qui estoit la disposition absoluë qu'auoient les Preuosts de leurs Benefices , & le mauvais vsage qu'ils en faisoient pour l'ordinaire. Saint Charles pour l'exterminer,

H v

en conféra avec le Pape Pie V. qui luy donna toutel'autorité Apostolique dont il auoit besoin pour faire tous les changemens qu'il trouueroit necessaires , & pour leuer vne Decime sur les Prepositures , afin d'entretenir le Nouitiat qu'il iugeoit à propos d'establir pour peupler l'Ordre de nouveaux Religieux qui eussent l'esprit de leur Ordre.

S Char-
les re
forme
l'Ordre
des Hu-
miliez.

Pour l'exécution de ces Brefs il conuoqua le Chapitre General à Cremone, & il y agit avec tant de prudence, de zele, & de charité, que contre toute apparence, il establir vne parfaite reforme. Il ordonna que les Prepositures seroient changées de trois en trois ans, & les reuenus mis en commun, & administrez , non plus par les Preuosts, mais par des Religieux choisis à la pluralité des suffrages. Il nomma vn General qui se deuoit aussi changer comme les autres Superieurs ; & enfin il bannit la propriété de ces maisons où elle entretenoit le desordre de la vie. Cette reforme fut aisément receuë de la pluspart des Religieux, mais elle fut insupportable aux Preuosts, qui se voyoient reduits à viure dans le train d'une Communauté reguliere , & qui perdoient la disposition de leurs Benefices. Ils firent tout ce qu'ils purent pour en empêcher l'exécution ; ils y employerent des Princes, & des personnes de grande autorité , pour tâcher de fléchir le Pape sur ce sujet ; les parens interessez firent de grands vacarmes; enfin on n'oublia rien pour s'opposer à ces Reglemens si auantageux au

Public, & si contraires aux interets particuliers. Mais toute leur resistance fut inutile; & S. Charles apporta vne si grande diligence pour empescher qu'ils ne pussent surprendre le Souuerain Pontife; vne si inébranlable fermeté à resister à toutes les recommandations qui luy furent faites; & vn si genereux mépris de tous les effets du desespoir de ces Moines qu'on luy voulut faire apprehender, qu'il ne changea rien en ce qu'il auoit ordonné. Trois Preuosts de cet Ordre voyant leurs affaires en cester mes, se porterent à vn dessein qui ne pouuoit partir que d'ames tres-noires & entierement abandonnées de Dieu. Ce fut de faire tuer le S. Cardinal, ne doutant point que par sa mort, leur reforme qui estoit si nouuelle, ne vint à se destruire de soy-mesme dans la vacance du Siege de Milan. Ils communiquerent cette detestable entreprise à quelques particuliers qu'ils attirerent dans leurs sentimens; & choisirent pour executeur, vn Hierosme Donat, surnommé Farina, qui s'y offrit de luy-même, & qui se contenta de quarante écus dor, pour le prix d'vne teste si pretieuse. Pour auoir cette petite partie, il fit vn sacrilege. Car il déroba l'argenterie de l'Eglise de Briera, laquelle il vendit vne assez bonne somme d'argent. Apres cette action, il s'enfuit du Monastere, & laissant l'habit de Moine, il alla durant quelque temps se promener de Ville en Ville, & despenfa en diuerses débauches tout ce qu'il auoit retiré de son larcin. Comme il se vid dans la pau-

Dessein
de faire
assassi-
ner Saint
Charles.

ureté, il fit vn autre vol; & achepta deux harquebuses pour s'en seruir à commettre le meurtre qu'il auoit promis de faire. Il crût que le temps luy estoit fauorable, parce qu'alors le Cardinal estant en vne grande contestation avec les Magistrats Royaux, pour sa Iurisdiction, on pourroit s'imaginer aisément que quelqu'un du party de ses aduersaires auroit fait commettre cét assassinat, pour se défaire de luy, & finir par sa mort le procès qui estoit entr'eux. Il auoit vne fois resolu de le tuer dans l'Eglise de S. Barnabé, comme il y diroit la Messe. Mais cela n'ayant pû reüssir, il se détermina d'exercuter son mauuais dessein dans son Palais même. Le Cardinal auoit accoustumé de faire Oraison tous les soirs dans vne salle de l'Archeuesché avec sa famille, & quelques autres personnes deuotes qui se trouuoient à cét exercice de deuotion. L'assassin se mit sur la porte, & de quatre pas, comme les Musiciens chantoient ces paroles d'un motet, *Non turbetur cor vestrum, neque formidet, que vostre cœur ne se trouble, & ne craigne point* il tira à S. Charles qui estoit à genoux deuant l'Autel, vn coup d'harquebuse chargée d'une grosse bale, & de plusieurs carreaux. Le bruit fit cesser la Musique, & leuer tout le monde, avec vn estonnement qui se peut mieux imaginer qu'exprimer. Mais le Cardinal sans se bouger, ny estre tant soit peu émeu, fit remettre tout le monde à sa place, & acheua l'Oraison avec autant de tranquillité d'esprit, & de serenité sur

S. Iean,
ch. 14.

On luy
tire vn
coup
d'harque
buse.

Admira-
ble fer-
meré de
S. Char-
les.

le visage, que si rien ne luy fust arriué. C'est ce qui donna loisir à l'assassin de sortir de la sale, sans que personne courust apres luy pour l'arrester. Quand Saint Charles receut le coup, il crut à la douleur qu'il luy fit, auoir esté blessé à mort; & à l'instant il esleva les yeux aux Ciel, & offrant sa vie à Dieu, il luy rendit graces de la faueur qu'il receuoit de sa bonté, la perdant pour la deffense de la Iustice. Mais Dieu auoit tesmoigné en cette occasion vne protection toute miraculeuse pour son seruice. La bale qui le deuoit percer d'outre en outre, auoit seulement percé son rochet, sa soutane, & ses autres habillemens, & estoit tombée à ses pieds. Vn des carreaux estoit venu iusqu'à la chair; mais quand on le deshabilla, on ne trouua qu'une marque noire, & vn peu d'enfleure, ce qui estoit plustost vne marque du peril dont il venoit d'estre preserué, qu'une blessure. On ramassa la bale, & les carreaux, que des personnes pieuses garderent par deuotion. Le rochet que celle-là auoit percé fut donné par le Cardinal Sfondrat au Cardinal de Sourdis, qui l'a mis dans l'Eglise des Chartreux de Bourdeaux, où i'ay eu la consolation de le voir. Il est d'une toile assez grossiere, ce qui monstre la modestie de ce grand Saint; mais ayant seruy à cét admirable Euesque en vne occasion si extraordinaire, il n'y a rien qui soit si riche & si precieux.

Aussi-tost que le bruit de cét accident fut répandu parmy la Ville, on vid vne

consternation generale dans tous les esprits de ses Habitans, pour le peril que leur saint Archeuesque auoit couru, vne indignation effroyable contre les Autheurs de cet attētat, & vne ioye extrême de la protection miraculeuse qu'il auoit receuē de Dieu. Le Duc d'Albulquerque qui estoit pour lors Gouverneur de Milan, dès qu'il sceut ce qui luy estoit arriué, vint au Palais du Cardinal, & luy offrit toute l'assistance dont il auoit besoin pour faire punir les coupables d'un si noir assassinat, & pour la seureté de sa personne. Il voulut visiter le lieu où le coup auoit esté tiré, la bale, le rocher, & les habillemens qu'elle auoit percez, & pria S. Charles de souffrir qu'il fist interroger ceux de sa famille qui pourroient luy donner quelque connoissance d'une actiō si detestable. Il luy offrit encore de laisser quelques-vns de ses Gardes, dans son Palais, pour obseruer ceux qui entroiēt, & oster tout moyen aux meschans d'attenter rien à sa personne sacrée. Le saint Euesque le remercia fort ciuilement de sa visite, & de ses offres, & le pria de trouuer bon qu'il les refusast, ayant desia pardonné dans son cœur à ceux qui auoient voulu luy oster la vie, & croyant estre obligé d'en user ainsi enuers eux, pour reconnoistre la merueille que Dieu auoit faite en sa faueur, le preseruant de la mort qui sembloit deuoir estre infaillible. Il aiousta qu'il luy seroit plus obligé, s'il vouloit employer son autorité pour faire cesser le trouble que les Magistrats luy donnoient

dans l'exercice de sa Jurisdiction, ce qui
 causoit tant de scandale, & outrageoit
 l'honneur de l'Eglise si sensiblement. Il luy
 marqua particulièrement l'affaire des Cha-
 noines de la Scala, qui estoit arriüée auant
 cét accident, & qui donnoit lieu aux mé-
 chans de tout entreprendre contre luy, däs
 l'esperance de trouuer ou la protection, ou
 l'impunité. Le Gouverneur luy respondit,
 que pour les affaires contentieuses de Ju-
 risdiction où il s'agissoit des droüts de l'E-
 glise, & de ceux du Roy, il n'estoit pas le
 Maistre; que le Conseil secret & le Senat
 y estoient appelez, & que les choses s'y
 passoient à la pluralité des voix: mais qu'en
 ce qui regardoit la seureté de sa personne,
 il luy offroit d'employer toute son autho-
 rité pour la mettre en tel estat qu'elle
 n'eust rien à craindre, & que sa vie luy estoit
 incomparablement plus chere que la sien-
 ne propre. En effet, dés la nuit mesme
 il publia vne Ordonnance, par laquelle il
 commandoit sous peine de la vie à ceux
 qui auroient quelque connoissance de l'as-
 sassinat que l'on auoit voulu commettre,
 & de ses Autheurs, de le venir reueler au
 Magistrat dans deux iours au plus tard.
 Cette declaration fut renouuëe & pu-
 bliée par trois fois. On tint les portes de
 la Ville fermées durant deux iours, pour
 rascher d'attraper les criminels; & le Gou-
 verneur fit emprisonner quelques per-
 sonnes qui logeoient dans les maisons
 voisines du Palais Archiepiscopal. En-
 fin, il n'oublia aucune diligence possi-

Diligence
 du Gou-
 verneur
 de Milä,
 pour
 auoir re-
 uelation
 des Au-
 theurs de
 l'assas-
 sinat.

ble pour auoir connoissance des coupables d'un si grand crime. Il ne laissa pas d'envoyer chez luy quelques Gardes à l'heure de l'Oraison , qui demeuroident iusqu'à ce que l'on fermast les portes. Il y retourna le lendemain , & s'arresta à dîner avecque luy , sans retenir aucun de ses domestiques , pour luy témoigner plus de franchise & plus d'amitié. Le Senat en Corps , les Magistrats de la Ville, toutes les Communautéz Ecclesiastiques & Regulieres, le visiterent incontinent, & luy offrirent tout ce qui dépendoit d'eux pour la punition de l'offense qu'il auoit receüe. Il les receut tous avec beaucoup de ciuilité , & de marques de reconnoissance ; mais il leur témoigna qu'il ne demandoit point de vengeance , & qu'il n'estoit touché que du mauuais estat où se trouuoit l'ame de ses assassins.

Il voulut aussi-tost rendre graces à Dieu de la singuliere protection qu'il auoit receüe de sa bonté , en vne auanture si extraordinaire ; & pour les rendre plus solennelles , il fit vne Procession generale où tout le Clergé de Milan assista. Il y eut vne multitude infinie de peuple qui ne pouuoit assez remercier le Pasteur des Pasteurs de ce qu'il leur auoit conserué leur Pasteur d'une façon si miraculeuse. Peu de temps apres , il s'alla enfermer dans vne Chartreuse pour y considerer avec plus d'attention, ce que Dieu demandoit de luy , apres cette insigne protection de sa personne. Et comme s'il n'eust encore rien fait pour sa

Fruits
que tire
S. Char-
les de cét
accidét.

gloire, il resolut dans cette retraite, d'employer sa vie pour son honneur, & pour le salut des ames avec plus de zele & de courage, afin de luy rendre ce qu'il confessoit tenir vne seconde fois de sa misericorde paternelle. Il escriuit à Pie V. pour luy donner auis de ce qui luy estoit arriué; & ce S. Pape luy fit vne réponse tendre, & paternelle, où il le consoloit de cette persecution par l'exemple de tous les Saints Euesques qui auoient toujourns esté insupportables aux méchans, & l'exhortoit à prendre vn peu plus de soin de sa personne, à prier, & faire prier pour ceux qui le tourmentoient. Il assembla le Consistoire, & donna part aux Cardinaux du^r peril qu'auoit couru Saint Charles. Comme sa vertu le rendoit venerable à tous; il n'y en eut pas vn qui ne fust saisi d'indignation contre les coupables d'vn si grand crime, & qui ne remerciaist Dieu avec des paroles ar dentes de ce qu'il auoit conserué vn si bon Prelat à son Eglise. Le bruit en courut dans Rome, où le peuple qui aimoit Saint Charles, fut touché de douleur & de ioye tout ensemble, pour le danger de sa vie, & pour son salut. Toute l'Italie sceut cét accident, & il n'y eut pas vne personne de qualité qui n'escriuist à Saint Charles, pour luy témoigner la ioye que la conseruation d'vne vie si precieuse luy donnoit. Mais le Diable qui vid auorter le dessein qu'il auoit fait, d'oster du monde vn ennemy si redoutable, ne manqua pas de faire dire à des hommes aussi meschans

Il en escriuit au Pape.

“
“
“
“
“
“
“

que luy; que Charles pour acquérir la reputation de Saint, s'estoit fait tirer le coup, calomnie aussi grossiere, que noire & impudente. Les Princes, ses parens, & ses amis particuliers, l'importunoient à toute heure, afin qu'il se fist garder dans sa maison, & sortant dehors; mais il n'y voulut iamais consentir, & il dit; *que les prieres que l'on faisoit dans la Ville pour luy, valoiene mieux qu'un Regiment de Soldats dont il seroit environné.* Cét évenement accrût l'opinion que chacun auoit de sa Sainteté, & changea le cœur de plusieurs personnes qui ne l'aimoient pas. Il vint des Ordres du Roy d'Espagne, à qui le Pape fit donner aduis du coup qu'on luy auoit tiré, qui obligerent aussi-tost le Gouverneur de Milan, de supprimer l'Ordonnance qu'il auoit faite contre la Iurisdiction Ecclesiastique, comme nous allons bien-tost raconter. Les Chanoines de la Scala demanderent aussi pardon de l'injure qu'ils luy auoient faite, & s'humilierent ainsi que nous auons dit. Enfin nostre Seigneur qui n'enuoye iamais à ses Seruiteurs, des afflictions toutes pures, & dont il ne les cōsole bien-tost apres, adoucit l'offense faite au Saint Cardinal, par beaucoup d'euenemēs fauorables à l'autorité Archiepiscopale. Charles n'estoit sensible qu'aux injures qui regardoient sa dignité; de sorte qu'il eust consenty volontiers à la destruction de sa personne, pour affermir vne puissance qu'il croyoit deuoir laisser à ses Successeurs, aussi entiere qu'il l'auoit receuë, s'il ne la pouuoit augmēter.

Le Pape étant tout à fait resolu de découvrir les Autheurs de cet assassinat, luy commanda fort expressement de declarer ceux qu'il en soupçonnoit. Le Cardinal répondit à sa Sainteté, qu'ayant entrepris de corriger beaucoup de mauuaises coustumes parmy les Prestres, les Reguliers, & les Laïques, il ne doutoit pas que beaucoup de personnes ne s'en fussent offensées; mais qu'il n'auoit aucun soupçon en particulier sur qui que ce fust, & qu'il sçauoit seulement que les Iuges tourmentoient beaucoup d'innocens pour ce sujet. Quand il apprit que le Pape ne se satisfaisant pas de cette réponse, auoit nommé vn Deputé Apostolique, qui estoit Antonio Scarampa, Euesque de Lodi, pour faire des informatiōs exactes d'un crime si execrable, il en eut vne extrême affliction, & il fit faire beaucoup d'offices auprès de sa Sainteté pour empescher ce dessein, protestant tousiours, & par vn écrit public mesme, qu'il ne vouloit point que l'on fist aucune poursuite, à son occasion, des criminels pour lesquels il demandoit tous les iours pardon à Dieu. Le Deputé vint à Milan, & fit afficher vne Ordōnance, par laquelle il enjoignoit sous peine d'encourir les peines & les censures Ecclesiastiques tres-rigoureuses, à tous ceux qui sçauoient quelque chose de l'attentat commis contre le S. Cardinal, de le venir declarer. Deux Preuosts de l'Ordre des Humiliez, dont l'un estoit complice de l'assassinat, & l'autre en auoit ouï parler seulement, yinrent trouuer le Deputé Apostolique,

S. Charles ne veut point agir contre les coupables de l'assassinat commis en sa personne.

“

“

Il s'oppose aux diligences que faisoit le Pape pour découvrir les coupables.

Il solli-
cite pour
ses affai-
res.

& luy découvrirent quelque chose. Il les examina , & trouuant qu'ils s'embarraffoient en leurs réponses , il les fit mettre en prison avec de violens soupçons qu'ils estoient coupables. En effet, ils confesserent l'action qu'ils auoient voulu faire, & nommerent le Farina, & les autres complices. On le prit dans les Estats du Duc de Sauoye , où il s'estoit retiré. Saint Charles eut vne douleur qui ne se peut exprimer, de la perte de ces mal-heureux, & il fit faire de grandes instances auprès du Pape, par Monseigneur Ormanete, pour obtenir leur grace. Mais nulles prieres , & nulles raisons ne pûrent iamais le fléchir : & ainsi trois de ces mauuais Religieux expierent par vne mort publique & honteuse, l'injure irreparable qu'ils auoient voulu faire au peuple de Milan , luy ostant vn si bon & si saint Pasteur. Vn des prisonniers n'auoit esté condamné qu'aux galeres perpetuelles , & Saint Charles pressa le Pape si ardamment, qu'il fit changer cette peine en la prison dans vn Monastere, pour vn certain temps, où il pût faire Penitence d'une façon conuenable à vn homme de sa profession. Vn des Preuosts qui fut executé , luy recommanda vne de ses Niepces qu'il laissoit fort pauvre , & le Saint Cardinal luy promit d'en prendre vn soin particulier, ce qu'il fit avec beaucoup de charité.

Le Pape
abolit
l'Ordre
des Hu-
miliez.

Le Pape ne se contenta pas d'auoir fait chastier les coupables d'un attentat si noir contre vn Cardinal , & vn Archeuesque d'une si éminente vertu ; il abolit l'Ordre

des Humiliez, quelques prieres que luy fissent & Saint Charles, & la Ville de Milan; & quoy que le General offrist de prendre telle reforme qu'on leur vouloit donner. Il assigna des pensions aux Religieux qui n'estoient pas plus de 164. en 94. Monasteres, & se reserua la disposition des Prepositures, & des autres Benefices. Saint Charles ayant appris que la Bulle de cette suppression avoit esté faite, dépescha à Rome vn de ses principaux domestiques, pour demander au Pape quelques maisons, avec leurs reuenus, pour l'entretien de ses Collèges, & de ses Seminaires. Il obtint tout ce qu'il fit demander; & de cette sorte, vn bien qui auparavant estoit dépensé avec beaucoup de scandale, seruit à faire subsister plusieurs Compagnies establies pour le bien du Diocese de Milan. Tel fut le succès de cette execrable conjuration contre le Saint Cardinal, & Dieu tira de la mauuaise volonté des hommes, plusieurs choses utiles pour la gloire de son Nom, & pour la reputation de son Seruiteur, qui parut veritablement Saint en cette rencontre; & pour le profit de l'Eglise de Milan, que l'on auoit voulu priuer d'vn Pasteur qui la gouernoit d'vne façon si admirable. Il se soucioit si peu de sa vie, que comme en vn autre temps, on luy apporta vne Lettre, par laquelle on luy donnoit aduis d'vn dessein fait pour le tuer, il la brusta, & ne témoigna iamais aucune curiosité d'éclaircir cette conspiration.

CHAPITRE XXI.

Des differends qu'eut Saint Charles pour la deffense de la Jurisdiction Ecclesiastique, avec les Gouverneurs de Milan, & les autres Magistrats.

LA Jurisdiction des Euesques en Italie, à l'égard des Laïques mesme, estant aussi estendue, qu'elle est resserrée en France, dans le Siecle où nous sommes ; ie prie ceux qui liront ce Chapitre, d'oublier qu'ils sont François, & de passer les Monts en esprit, pour entrer dans des sentimens opposez à ceux de leur Nation, & iuger équitablement des differends que ie vais raconter entre Saint Charles, & les Gouverneurs de Milan : l'en ay reserué le recit pour ce Chapitre, quoy qu'ils soient arriuez en diuers temps, afin de ioindre toute cette matiere, & de soulager la memoire des Lecteurs.

Charles arriuant à Milan, trouua son peuple extremement corrompu, & entre autres vices qui y regnoient à découuert, le concubinage, & l'adultere luy donnerent de grands sentimens de pitié pour ceux qui menoient vne vie si indigne de vrais Chrestiens, sans en auoir ny honte, ny scrupule. Il se seruit d'abord des moyens ordinaires pour leur faire connoistre le mal-heureux estat de leur conscience, qui

furent les Predications publiques, & les ad-
 uis en particulier. Mais comme le mal
 estoit inueteré, ces remedes benins n'eue-
 rent pas la force de le guerir, & il conti-
 nuoit tousiours avec vn débordemēt étrange.
 Le Saint Pasteur voyant qu'il ne pou-
 uoit plus esperer de sa douceur, & de sa pa-
 tience, la conuersion de ces pecheurs pu-
 blics, fut contraint d'en venir aux peines
 temporelles, dont les Euesques en Italie
 ont autorité de se seruir en des occasions
 pareilles. Il fit donc mettre en prison quel-
 ques Concubinaires, & quelques Adulte-
 res publics, qui n'auoient pas voulu defe-
 rer à ses remonstrances. Le bruit s'en ré-
 pandit aussi-tost dans la Ville: & comme
 il y auoit beaucoup de personnes de qua-
 lité qui se trouuoient interessées, parce
 qu'ils menoient la mesme vie, elles com-
 mencerent à se plaindre de l'entreprise
 que faisoit l'Archeuesque sur la Iustice
 Royale, à qui seule appartenoit, disoient-
 ils, de chastier les Laïques. Les Magi-
 strats n'oserent pas, toutefois s'opposer
 encore ouuertement à l'exercice de la Ju-
 risdiction Archiepiscopale; mais ils firent
 entendre au Barigel de l'Archeuesque, &
 à ses Sergens, qu'ils ne fussent pas si har-
 dis que de prendre aucunes personnes
 Laïques pour les mettre en prison, sur
 les Decrets émanez du Iuge Ecclesiastique,
 & de porter des armes à feu qui estoient
 deffendues par les Ordonnances du Gou-
 uerneur, s'ils ne vouloient estre rigou-
 reusement punis. En mesme temps ils

Com-
 mence-
 ment
 des dif-
 ferends
 entre S.
 Charles
 & le
 Gou-
 uerneur
 de Milâ.

dirent tout haut en plusieurs lieux, qu'ils n'endureroient pas que l'on usurpast la moindre chose sur la Justice du Roy.

Saint Charles ayant esté auerty de ce commencement de trouble en l'exercice de sa Jurisdiction, eut premierement recours à son refuge ordinaire, qui fut la priere, & le ieusne, ne voulant en vne affaire si delicate, rien faire que par la conduite de celuy dont il desiroit soustenir la cause, conseruant l'autorité qu'il luy auoit commise. En suite, il écriuit au Pape, & luy rendit compte de ce qui se passoit, coniuant sa Sainteté de luy prescrire de quelle façon il deuoit se conduire en vne affaire si importante, & se remettant absolument à ce qu'il luy plairoit d'en decider. Comme il fut auerty que les Officiers du Roy Catholique à Milan, luy auoient écrit, il iugea qu'il deuoit aussi l'informer au vray de sa conduite, & de ses intentions, afin d'effacer les mauuaises impressions qu'on pouuoit luy auoir données. Le Roy d'Espagne receut agreablement sa Lettre, & répondit fort ciuilement, *Que c'estoit vne*
 » affaire dont le Pape estoit le Iuge, & qu'il
 » s'en tiendroît pour les interets de sa Juris-
 » diction à tout ce que sa Sainteté en ordon-
 » neroit. Il écriuit aussi aux Magistrats de
 Milan, qu'il vouloit que l'on conseruast
 ses droicts, mais que ce fust sans oster à
 l'Eglise ceux qui luy appartiennent legiti-
 mement. Pour terminer bien-tost cette af-
 faire, le Senateur Paolo Chiefa fut de-
 puré de son Corps à Rome, & il estoit tout
 propre

propre pour cette negociation, ayant beaucoup d'esprit, de science, & de sagesse. Le Pape establit vne Congregation de Cardinaux, & de Docteurs, pour examiner ce differend, & luy en faire le rapport; & cependant fit escrire à saint Charles, qu'il tâchast de se maintenir en possession de ses droicts. L'affaire traissant en longueur, le Deputé demanda congé au Pape, de reuenir à Milan, & à son départ, sa Sainteté le chargea de deux Brefs, dont l'un estoit pour le Gouverneur, & l'autre pour le Senat, par lesquels il les exhortoit d'aider de leur autorité leur Archeuesque, & les Euesques de la Prouince, bien loin de leur oster celle qui leur appartenoit, leur remettant deuant les yeux, l'exemple de leurs predecesseurs qui auoient en ces occasions, témoigné vn grand respect pour l'Eglise. Ces Brefs furent receus avec beaucoup de respect par ceux à qui ils estoient enuoyez; mais ils ne produisirent pas l'effet que le Pape en attendoit. Car ceux qui entre les Magistrats Politiques auoient le plus de chaleur pour la conseruation de la Iurisdiction Royale, l'emportant sur les plus moderez, firent mettre en prison le Barigel de l'Archeuesque, c'est à dire, le Capitaine des Sergens de l'Officialité, sous pretexte qu'on l'auoit trouué avec des armes deffendues. Ils ne se contenterent pas de cette violence; car ils y en adiousterent deux autres qui furent plus grandes, luy faisant donner trois traits de corde en place publique, & le bannissant de la Ville, sous peine d'estre

On emprisonne vn des Officiers de saint Charles.

enuoyé en Galere, s'il y reuenoit. Cette action toucha S. Charles tres-sensiblement, & il en vid toutes les fascheuses consequences pour l'exercice de la Iurisdiction Archiepiscopale contre les pecheurs publics, & pour la reforme qu'il cōmençoit d'établir dans son Diocese. Il eut aussi vne extrême douleur du mépris que les Senateurs auoient fait du Pape, lequel trauailloit à accommoder le differend de leur Iurisdiction, au mesme temps qu'ils se porterent à vn si outrageux attentat. Il assembla aussi-tost les plus habiles hommes qui fussent à Milan, en qui il se pouuoit fier, & par leur conseil, il declara excommuniez le Capitaine de la Iustice qui auoit saisi son Barigel, vn Fiscal Royal, vn Notaire, & le Geolier, qui auoient tous eu part en cette entreprise. Cette declaration fut affichée aux places publiques, & il fit encore mettre à la porte du Senat, vne citation contre le President, & les Senateurs, afin qu'ils eussent à venir declarer quelles raisons il auoient eues de proceder de la sorte. Ce sont les formes d'Italie.

Il exco-
munie
les An-
theurs de
cēt em-
prison-
nement,

Le Duc d'Albuquerque Gouverneur de Milan, fut tres-affligé de cēt emprisonnement qui s'estoit fait sans sa participation, parce qu'il estoit pieux, & qu'il sçauoit bien que cette action déplairoit au Roy son Maistre, à qui la prudence faisoit craindre cette sorte de contestation avec les Ecclesiastiques. Il témoigna son déplaisir par beaucoup d'actions qu'il fit en mesme temps. Car il fit emprisonner quelques

Sergens qui auoient arraché de la porte du Palais Archiepiscopal, & des Eglises, les Lettres d'excommunication fulminée par saint Charles; & il ne voulut pas donner Audience à vn Iuge qui auoit fait mettre en prison vn Clerc qui portoit des citations du Cardinal.

Le Senat fit respondre par vn Procureur, que le Barigel n'auoit point esté puny comme Officier de l'Archeuesque, ny reconnu pour tel; mais comme vn homme qui contreuenoit aux Ordonnances du Gouverneur, portant des armes deffenduës. Il escriuit en suite vne Lettre au Pape, dans laquelle il accusoit le Cardinal, d'estre auteur de ce trouble, par son imprudence. Leur Lettre offensa Pie, qui ne leur fit point de response. Mais il respondit au Duc d'Albuquerque, & l'exhorta de procurer que l'Eglise, qui auoit esté tres-offencée en cét emprisonnement, en receust satisfaction. Pour ne la pas attendre des Auteurs de l'iniure, il cita le President, & deux Senateurs, par l'ordre desquels la chose s'estoit faite, pour comparoistre à Rome, trente iours apres la signification de la citation. Il l'ordonna encore contre ceux qui auoient esté excommuniés. Pour executer ces Decrets, il enuoya vn Courier Apostolique à Milan, qui arriva au mois de Septembre de l'année 1567. Il presenta le Bref au Gouverneur qui le receut avec beaucoup de marques de respect pour celuy de la part duquel il venoit, & il l'assista de

Le Pape cite le President, & deux Senateurs de Milan, à Rome.

son autorité pour l'exécution de sa commission.

La citation du President, & des Senateurs, fit vn grand bruit dans Milan, & ils ne manquerent pas de respendre parmy le peuple des bruits extrauagans contre le Cardinal, comme s'il eust eu dessein de se rendre Maistre de Milan, & que le Pape fust d'intelligence avec luy pour cette entreprise. Plusieurs Gentilshommes qui le visitoient auparauant se retirerent de sa conuersation, pour n'estre point suspects en cette rencontre où il s'agissoit des droits du Roy. Cela fut sensible à saint Charles, qui vid que par cette retraite il perdoit le moyen de seruir à leur conuersion, ou à leur auancement en la pieté. Mais il ne relascha iamais rien de ses soins, & de son zele pour la reforme de son Diocese, & pour l'exécution des Ordres qu'il auoit establis. Comme on attendoit le Marquis de Serauai, que le Roy d'Espagne enuoyoit à Milan, pour essayer de terminer ces differends, le terme de la citation du President, & des Senateurs, fut prolongé. Ce negociateur arriua au commencement de l'année 1568. & aussi-tost alla visiter le Cardinal. Il se plaignit à luy de ce qu'au lieu d'eschauffer l'esprit du Pape par sa plainte, il ne s'estoit pas adressé au Roy, de qui il auoit tout sujet d'esperer toute sorte de satisfaction, & à qui sa famille estoit obligée en tant de façons. Apres ces plaintes, il luy dit d'un ton qui sentoit quelque menace, que sa Majesté Catholique deffendroît son

autorité, quoy qu'il en pust arriuer. Enfin,
 il le pria avec des termes respectueux de se
 gouverner en cette affaire comme vn Pere,
 afin qu'elle se pust terminer sans bruit, &
 sans desordre; & s'il ne vouloit pas la finir
 luy-mesme, d'escrire au Pape, & de prier
 sa Sainteté de leuer cette citation qui cau-
 soit tant de murmure, & qui pouuoit ap-
 porter de grands desordres, si on la vouloit
 executer. Saint Charles respondit au Mar-
 quis de Seraual, qu'ayant inutilement ne-
 gotié avec les Senateurs, pour trouuer vn
 aiustement entr'eux, & luy, afin que l'Egli-
 se fust maintenüe en la Iurisdiction qu'il
 croyoit luy appartenir, il auoit esté obligé
 d'aduertir le Pape de ce qui se passoit, com-
 me le Chef de l'Eglise, & le iuge Souuerain
 de ces matieres: Que l'iniure estoit si gran-
 de, qu'il n'auoit pû faire moins que de ci-
 rer le President, & les Senateurs par l'ordre
 desquels elle s'estoit faite: Que pour le
 Roy, il se sentoit tres-obligé à sa bonté, &
 qu'il ne manqueroit iamais de reconnois-
 sance, & de fidelité pour son seruice; mais
 qu'il croyoit sa Majesté trop pieuse, & trop
 ialouse de l'honneur de l'Eglise, pour pen-
 ser qu'elle desirast de luy, qu'il abandonnast
 les droicts de sa Charge de peur de paroistre
 ingrat des bien-faits que sa famille en auoit
 receus; & que bien loin de craindre le moin-
 dre effet de sa colere, il en attendoit vne
 particuliere protection; & que pour de-
 mander à sa Sainteté la reuocation de la ci-
 tation qu'elle auoit enuoyée, il ne le pou-
 uoit faire sans blesser sa conscience; mais

» qu'il luy escriroit la proposition qu'il luy
 » auoit faite. En effet, il chargea le Marquis
 de Seraual qui s'en alloit à Rome pour cer-
 te affaire, d'une Lettre pour le Pape, laquel-
 le estoit conceüe en des termes qui mon-
 troient bien qu'en cette dispute il ne cher-
 choit autre chose que l'honneur de l'Eglise,
 & l'acquit de son deuoir.

CHAPITRE XXII.

Suite du mesme suiet.

1569. **L'**Ordonnance que fit le Gouverneur de
 Milan, donna vn déplaisir tres-sensi-
 ble à saint Charles, encore qu'en apparen-
 ce elle ne blessast pas l'autorité Ecclesia-
 stique. Elle portoit seulement des deffen-
 ses sous des peines tres-rigoureuses à tou-
 tes sortes de personnes, de rien faire con-
 tre la Iurisdiction Royale. Ces termes am-
 bigus tenant en suspens les Aduocats, &
 les Procureurs, qui ne pouuoient distin-
 guer quelles causes le Gouverneur enten-
 doit qui appartenissent au Tribunal Laïque,
 & quelles estoient du Tribunal de l'Arche-
 uesque; & ne voulant pas s'embarasser
 mal à propos, ny se commettre entre ces
 deux puissances; ils refuserent toutes les
 affaires qu'on leur presentoit pour plaider
 deuant le Iuge Ecclesiastique. De cette fa-
 çon la Cour Archiepiscopale se vid tout à
 fait deserte, & sa Iurisdiction fut empec-

chée sans qu'il parust que les Magistrats Politiques la voulussent empêcher. Le Cardinal qui vid la playe presque incurable que cette façon cauteleuse de proceder faisoit à l'autorité de sa charge, en fit faire des plaintes au Roy Catholique, par le Nonce du Pape, qui estoit vn Dominiquain, de la Maison des Iustiniens, que son merite esleua depuis à la dignité de Cardinal. Tandis qu'il negocioit en Espagne, l'affaire des Chanoines de la Scala, & l'assassinat de saint Charles arriuerent; & ces deux accidens où le Cardinal fit paroistre tant de fermeté d'esprit, tant de douceur, & de charité pour ses ennemis, adoucirent vn peu la violence de ceux qui auparavant luy estoient tres contraires. Le Roy en ayant esté informé, & craignant que durant que les contestations entre l'Archeuesque & ses Officiers dureroient, plusieurs ne prissent la hardiesse d'entreprendre contre la vie d'un Prelat qu'il estimoit beaucoup, enuoya au Gouverneur, ordre exprés de reuoker l'Edit qu'il auoit publié, & luy témoigna qu'il auoit eu tres-agreable sa diligence & ses soins, pour auoir connoissance des coupables de l'assassinat que l'on auoit voulu faire à saint Charles. Il luy commanda en suite de l'assister en toutes ses affaires, de son autorité, & de le garentir de toute sorte de violences. Aussi-tost que le Gouverneur eust receu son paquet, il reuoka l'Edit qui auoit causé tant d'affliction au Cardinal; & il le fit d'autant plus volontiers, qu'il se gou-

Le Roy d'Espagne ordonna la reuocation de l'Edit publié par le Gouverneur de Milan.

uernoit comme vn homme tombé dans les censures , pour auoir violé la Iurisdiction Ecclesiastique.

Le Pape luy en auoit escrit en ces termes , & il s'estoit aussi-toit luy-mesme traité en excommunié , s'abstenant de toutes les actions que les Canons defendent à ceux qui ont encouru l'excommunication. Cette reuocation neantmoins ne rendit pas au Tribunal de l'Archeuesque , l'autorité qui luy estoit deuë. Le Pape s'en plaignit à luy , & pour satisfaire sa Sainteté , il enuoya au President du Senat , vn ordre de faire venir tous les Officiers de la Iustice Ecclesiastique , & de les asseurer en son nom , qu'ils pouuoient exercer leur Iurisdiction de la mesme sorte qu'ils faisoient auant la publication de l'Edict. Il ordonna la mesme chose aux Magistrats des Villes de l'Estat de Milan , afin qu'ils ne donnassent aucun empeschement aux Iuges Ecclesiastiques de leur ressort. Le Gouverneur fit toutes ces diligences dans les Festes de Noël , afin de ne retomber pas dans l'excommunication dont il auoit eu l'absolution du

” Pape, sous cette clause ; que dans la Feste de
 ” l'Epiphanie, le Tribunal Ecclesiastique fust
 ” remis dans l'Estat de Milan, en son ancienne
 ” autorité. Ainsi se passa ce premier orage , & le Tribunal Archiepiscopal recouura
 sa premiere splendeur , par la pieté du Roy
 d'Espagne , & par la prompte obeïssance du
 Gouverneur à ses Ordres.

Cependant on examina à Rome l'affaire du Barigel emprisonné. Ceux qui auoient

esté excommuniez pour ce sujet, demanderent l'absolution au Pape, & le Cardinal les y seruit si puissamment, que le Saint Pere luy enuoya vn Bref, par lequel il luy donnoit l'autorité de les absoudre, pourueu qu'ils fissent à l'Eglise la satisfaction qui luy estoit deuë. Comme ils apprirent cette condition, ils ne parlerent plus de l'absolution qu'ils auoient desirée, & firent courir le bruit que cè qu'ils faisoient estoit par les ordres du Roy d'Espagne. Le Cardinal luy en donna aussi-tost auis, estimant que sa pieté estoit offensée par ce discours, & sçachant bien que son intention s'en trouuoit fort esloignée. Il ne se trompa pas en sa pensée. Car le Roy écriuit incontinent d'une maniere qui fit connoistre que sa volonté estoit que les choses se passassent comme le Pape les auoit ordonnées. Saint Charles donc pour faire cette action avec vne ceremonie qui donnast quelque terreur au peuple, fit dresser vn theatre deuant la porte de l'Eglise Metropolitaine. Ce fut là que la veille de la Natiuité de Nostre-Seigneur, il donna l'absolution au Fiscal du Roy, & au Notaire, apres qu'ils eurent accepté la Penitence, qui leur fut imposée, & que l'on eust restably le Barigel en son Office, & rendu les armes qui luy auoient esté ostées par l'ordre des Magistrats. Le bon Archesuesque accompagna cette action d'un discours vehement qu'il fit au peuple, pour luy monstrier la force des Censures Ecclesiastiques, & combien elles estoient redou-

tables. Mais la mort du Capitaine de la Justice qui auoit arresté le Barigel, & que depuis on auoit créé Sénateur, leur donna plus de crainte que ses paroles, encore qu'elles fussent accompagnées de toute la force qu'elles deuoient auoir pour persuader les Auditeurs. Car cet homme ne se souciant point de se faire absoudre, auoit demandé permission à Saint Charles, d'aller aux nopces de quelqu'un de ses parens; & ne l'ayant pû obtenir, comme étant vne chose deffendue aux excommuniés declarez, il ne laissa pas d'y aller. La nuit apres la ceremonie de ce mariage, il fut attaqué subitement d'une maladie extraordinaire, qui dans bien peu de temps le porta au tombeau; & chacun attribua cette mort si prompte au mépris qu'il auoit fait de l'excommunication. Vn de ceux qui auoient esté citez à Rome, & qui faisoit vanité d'estre plus opposé au saint Archeuesque, fut de mesme surpris d'un mal où les Medecins ne connoissoient rien. Les accidens en furent si terribles, que l'on crût qu'il estoit possédé: & en effet, on employa le pouuoir des exorcismes pour le soulager. Mais les remedes du Ciel furent aussi inutiles que ceux de la Terre, & il mourut miserablement dans des douleurs extraordinaires.

Mort du Pape Pie V. Durant que ces choses se passaient, le Pape Pie fut enléué de la Terre pour aller recevoir dans le Ciel, la recompense des trauaux qu'il auoit soufferts, & de tant de vertus heroïques qu'il auoit exercées du-

tant son Pontificat. Il y auoit apporté la mortification de ses passions, qu'il auoit apprise dans l'Ordre de saint Dominique; & qu'il auoit conseruée sur le premier thrône de l'Eglise, où pouuant faire tout ce qu'il vouloit, il ne fit iamais que ce que les plus austeres regles de la pieté Sacerdotale luy permirent de faire. Il donna vn exemple heroïque de l'amour desinteressé de ses parens, qui est le grand écueil où les meilleurs Papes d'ordinaire ont fait naufrage. Car il refusa l'alliance d'un Prince, & maria ses parentes à des hommes de condition fort mediocre, ne voulant mettre dans sa maison aucuns tiltres de dignitez releuées. Le reste de sa vie respondit à cette moderation, & il sceut accorder la Majesté Pontificale avec la Penitence & l'Humilité religieuse. Vn an auant sa mort, les Chrestiens donnerent la fameuse bataille de Lepante, contre le Turc, & la gagnerent autant par les prieres de ce saint Pape, que par la valeur de leurs troupes. Aussi Dieu qu'il auoit si ardamment sollicité de fauoriser les armes des fideles, luy reuela dans le Sacrifice de la Messe, la victoire qui se remportoit en vn lieu bien esloigné de Rome. Saint Charles sentit la perte que l'Eglise faisoit en sa personne, avec vne douleur qui ne se peut expliquer. Il y auoit desia long-temps que luy-mesme estoit malade, & que pour guerir de beaucoup de maux importuns & dangereux, il faisoit les remedes que les Medecins luy ordonnoient. Le plus necessaire estoit le repos

Le premier
jour de
May de
l'année 1560.

de l'esprit & du corps, sans lequel il di-
soient, qu'il estoit impossible de luy ren-
drela santé. Mais quoy qu'en cette con-
joncture vn voyage long & penible com-
me estoit celuy de Rome, exposast sa vie à
vn danger manifeste, toutes les remon-
strances qu'on luy pût faire ne l'empesche-
rent pas de s'y resoudre, pour se trouuer à
l'ellection d'un nouveau Pape. Il se mit
donc en chemin, & se seruit de la voye de
la litiere, dont on changeoit les mulets de
temps en temps, afin de marcher plus
viste. L'air de la campagne, & l'agita-
tion de cette sorte de voiture, le forti-
fierent au lieu de l'incommoder; & il se
sentit beaucoup mieux durant ce voyage
qu'il n'estoit à Milan. En effet, il celebra
tous les iours la sainte Messe, ce qu'il n'a-
uoit pû faire dans la Ville. Il arriua mes-
me vne chose assez plaisante pour le deli-
urer de la tyrannie des remedes. Car le
mulet qui portoit les drogues dont ses Me-
decins auoient resolu qu'il vseroit, estant
tombé dans vne riuere, toutes les boëtes
se casserent, ou se répandirent. Quand
saint Charles eut sceu cette auanture: il s'en
réjouit, & dit en riant; C'est signe que nous
n'aurons plus besoin de tous ces remedes.
En effet, il arriua à Rome en assez bonne
santé, auant que le Conclaue fust fermé.

Les Cardinaux y entrerent le douzième
iour du mois de May, de l'année 1562. &
le lendemain ils créèrent Pape, le Cardinal
Boncompagne, Boulonnois, qui prit le
nom de Gregoire XIII. S. Charles con-

courut à son eslection avec toutes ses creatures, comme on parle dans Rome, connoissant dès le temps de son Oncle, les excellentes qualitez de ce personnage, & s'en estant tres-vtilement seruy pour conclure le Concile de Trente. Il demeura auprès deluy iusqu'au mois d'Octobre, ne pouvant, & ne voulant pas refuser au nouveau Pape, son assistance & ses auis au commencement de son Pontificat. Il les luy donna avec autant de zele, que de prudence; & il ietta, durant ce seiour, les proiets de beaucoup d'establissements que fit Gregoire peu de temps apres. L'exemple de sa sainte vie seruit aussi beaucoup pour reformer les desordres de la Cour Romaine, ou du moins pour faire confusion à ceux qui s'abandonnoient aux vices effrontement; & donna vn genereux courage de s'auancer dans la pieté Chrestienne & Ecclesiastique, à ceux qui en faisoient desia profession. Il n'entretenoit iamais les Cardinaux que de l'obligation qu'ils auoient d'estre aussi esleuez par l'innocence de leur vie, & par l'eminence de leurs vertus, qu'ils l'estoient par leurs dignitez. Il essayoit de bannir de leur esprit, cet esprit de pompe & de vanité qui leur faisoit mettre toute la fonction de leur charge en vne magnificence exterieure, & en vne grandeur qui sentoit bien plus les Princes seculiers, que les Princes de l'Eglise. Il leur faisoit voir avec des paroles routes de feu, que leur Pourpre n'estoit pas tant vn ornement pour les faire re-

Il fait vn
grand
fruit à
Rome
par son
exéple,
& par
ses paro-
les,

garder du peuple avec respect , qu'une leçon domestique & continuelle de se disposer sans cesse à ressembler leur sang pour la gloire de l'Espouse du Fils de Dieu. Enfin , il n'oublioit rien pour les guerir des passions dont il les voyoit trauaillez , & pour en faire de vrais Conseillers du Vicaire de IESVS-CHRIST. Plusieurs profiterent de ses remontrances ; & ceux qui ne changerent pas de vie , ne laisserent pas de les écouter avec respect , & furent conuaincus des veritez , qu'il leur disoit, s'ils n'en furent pas persuadez. Durant qu'il seiournoit en cette Cour , il fit celebrer son Synode annuel , & adressa vne Lettre Pastorale à son peuple , pour s'excuser s'il n'y estoit pas present. Auant que d'y reuenir, il visita la Chapelle de Nostre-Dame de Lorette , & passa la nuit qui precedoit la feste de tous les Saints , en Oraison dans vn lieu si saint.

1563.
Mauuais
se intel-
ligence
entre S.
Charles
& le
Gouver-
neur de
Milan ,

Le Duc d'Albuquerque estoit mort , & par prouision , le Gouverneur du Chasteau de Milan , nommé Dom Aluarez fut substitué à sa place. Il voulut signaler l'entrée de son Gouvernement par vne chasse de diuers animaux , & pour la faire , il choisit la place qui est deuant l'Eglise Cathedrale. Saint Charles en estant auerty, la defendit sous peine d'excommunication. Dom Aluarez obeït , & transféra ce spectacle deuant le Chasteau ; mais il garda dans son cœur vn tres-vif ressentiment de l'iniure qu'il croyoit luy estre faite par l'Archeuesque. Plusieurs personnes qui

ne l'aimoient pas , & qui ne pouuoient ^{apres la mort du Duc d'Albuquerque} souffrir la reforme qu'il faisoit des mauvaises mœurs de la Ville , l'échauffoient continuellement contre luy , & essayoient de le porter à quelque rupture violente. En effet , pour faire dépit au Cardinal qui avoit châtié exemplairement quelques Violateurs des Festes , il tâcha de porter des personnes de qualité à faire des danses , & à donner des spectacles en des iours consacrez par l'Eglise à la pieté. Mais ny ses promesses , ny ses menaces ne purent leur faire trahir leur conscience pour luy complaire , & pour fascher leur saint Pasteur , qu'ils sçauoient estre porté d'un zeile desintereffé dans toutes les Ordonnances faites sur ce sujet. La mort de d'Alvarez qui vint bien-tost apres ces tentatives de broüilleries , empescha qu'il ne se portast à rien de plus violent.

Le Gouverneur qui vint avec le tiltre de cette charge si importante fut le grand Commandeur de Castille , appelé de Richemens , homme tres-propre au gouvernement des Peuples par sa prudence, & par sa douceur. Il estoit des amis de Saint Charles , & il l'auoit connu à Rome durant le Pontificat de Pie I V. auprès de qui il exerçoit la Charge d'Ambassadeur pour le Roy d'Espagne. Cela luy fit esperer qu'il viendroit avec luy de meilleure intelligence qu'avec un autre , & que les contestations pour le fait de la Jurisdiction, seroient tout à fait terminées. Mais il fut trompé en son esperance , quoy qu'elle

parust fort raisonnable. Car ce nouveau Gouverneur se laissa persuader à ceux qui n'aimoient pas le Cardinal, qu'il ne pouvoit trouuer de moyen plus court & plus aisé pour témoigner au Roy le zele qu'il auoit à son seruice, & pour gagner les bonnes graces des Milanois, que de maintenir fermement les droicts de la Iurisdiction Laïque, & de garantir le peuple de celle de l'Archeuesque, laquelle ils nommoient vne tyrannie insupportable. Ils luy dépeignirent son Predecesseur comme vn homme lasche qui luy auoit laissé vsurper vne autorité qui ne luy appartenoit pas : & ce Seigneur dont l'esprit estoit ardent, n'examinant pas bien ces auis interessez, se laissa emporrer à beaucoup de violences fascheuses, comme nous allons raconter.

Rupture
entre S.
Charles,
& le nou-
veau
Gouver-
neur de
Milan.

La premiere occasion de rupture fut pour vn certain Bref Apostolique dont vn Gentilhomme Milanois se voulut ayder en vne affaire purement seculiere. Le Gouverneur en ayant esté informé par les ennemis de l'Archeuesque, fit deffendre au Gentilhomme, par le Capitaine de la Iustice, de se seruir de ses Lettres, ne les ayant pû obtenir, disoit-il, sans la licence des Iuges Royaux. Le Pape fut incontinent auerty de ce procedé ; & comme il estoit contraire à son autorité, il auertit le Gouverneur qu'il auoit encouru les Censures Ecclesiastiques, & l'exhorta de s'en faire absoudre. Il obeît, & receut l'Absolutio par le Cardinal Chiefa qui se trouua

en cẽ temps-là à Milan. Saint Charles estoit occupé à la visite de son Diocese , & quand il fut de retour , il deliura le Capitaine de la Iustice de l'excommunication où il estoit tombé , & en fit la ceremonie deuant la porte de la Chapelle Archiepiscopale. Ce petit orage aussi-tost appaisé qu'il auoit esté émeu , fut l'auant-coureur d'un plus grand , & plus dangereux en ses suites.

Deux ans auant le temps où nous sommes , les Ministres du Roy Catholique auoient sur de fausses relations , obtenu de luy des Lettres fort préjudiciables à l'autorité Ecclesiastique , & comme il y auoit de la surprise , on n'auoit osé les faire paroistre au iour. Ceux qui ne songeoient qu'à broüiller le Cardinal avec le Gouverneur , le cajolerent si bien , qu'ils le porterent à les faire intimer au grand Vicaire de Saint Charles , qui visitoit quelques Paroisses de son Diocese. Aussi-tost qu'il en eut l'aduis , il reuint à Milan , où trouuant encore le Cardinal Chiesa , qui auoit esté vn des Senateurs de cette Ville , il le pria d'employer l'autorité qu'il auoit auprès du Gouverneur , pour l'empescher de se seruir de ces Lettres , & de troubler l'exercice de la Iurisdiction Ecclesiastique. Mais les remonstrances de ce Cardinal ne purent rien obtenir de luy. Celles de Charles qu'il accompagna de toute la douceur possible , n'eurent pas plus de force , parce que ce Gouverneur estoit entre les mains des personnes habiles , & qui cachoient leurs mauuais intentions sous

S. Charles signifie vne Monitiō au Gouverneur.

des pretextes plausibles du seruice du Roy leur Maistre , où il faisoit profession d'estre delicat iusqu'au scrupule. Comme il vid donc que la raison toute seule ne le pouuoit vaincre , il luy fit encore donner des aduis de desister de ses entreprises , qui furent accompagnées de quelque menace de Censures , voulant par la peur des foudres de l'Eglise , s'exempter luy-mesme de la necessité de les lancer sur vne personne si considerable dans l'Estat. Mais ayant reconnu que tous les moyens de douceur , dont il se seruoit , estoient inutiles , il luy fit signifier vne Monition , qui estoit conceuë en des termes si tendres & si charitables , qu'il faisoit bien paroistre que le seul deuoir de sa charge le portoit à tenir cette conduite. Il auoit enuoyé vn de ses Vicaires Generaux avec le Prestre qui deuoit faire cette signification , pour rendre plus de respect au Gouverneur , & pour tascher de le fléchir. D'abord il refusa de receuoir la Monition ; mais le Vicaire luy ayant representé que s'il la refusoit , le Cardinal la feroit afficher aux places publiques de la Ville , il la prit , & aussi-tost la déchira. Quelques iours apres Charles qui ne vouloit rien oublier de tout ce qui pouuoit seruir à ramener l'esprit de cét homme si emporté , luy depescha encore vne personne de condition , & de vertu , pour luy faire la signification d'vne autre Monition , & le conjura de ne le forcer point par sa desobeïssance , de venir à vne declaration qu'il auoit si fort à contre-cœur. Mais cét office fut en-

core inutile. Le Gouverneur fit publier des réponses en Latin, & en Italien, aux Monitions du Cardinal, par lesquelles, avec des termes piquans, il effayoit de iustifier sa conduite, & blasmoit les procédures de Charles comme violentes & insoustenables. Ce bon Pasteur ne pouvant plus dissimuler l'injure faite à son Eglise, après avoir pris plusieurs fois les avis de beaucoup de personnes tres-habiles, & tres-pieuses, & receu des réponses du Pape, auquel il rendoit compte de tout ce qu'il faisoit; déclara le Gouverneur, le Grand Chancelier; & quelques autres Senateurs avoir encouru l'excommunication fulminée par les Bulles des Souverains Pontifes, contre ceux qui vsurpoient la Jurisdiction Ecclesiastique. Avant qu'il vint à ietter ce foudre, ses plus proches parens, & ses amis particuliers l'auoient tres-instamment conjuré de considérer que s'il venoit à déclarer le Gouverneur excommunié, il exposoit toute sa famille à sa persecution, & à la colere du Roy, qui tiendrait l'injure faite à son Ministre, estre faite à sa propre personne. Il leur répondit avec vne vigueur veritablement Episcopale; qu'ils ne pouuoient douter de son amitié, & de sa tendresse pour eux, qu'il seroit tousiours tres-soigneux de leurs interets, & de leur satisfaction; mais qu'où il s'agiroid de balancer entre la conseruation de sa propre vie, & celle de l'autorité de sa charge, il ne seroit pas vn moment à se resoudre, & qu'il se tiendrait tres-heureux d'endurer la mort

Il exco-
munie le
Gouver-
neur, le
Grand
Chance-
lier &
quelques
Sena-
teurs.

Belle re-
ponse de
S. Char-
les à ses
parens.

«

«

«

«

pour la soustenir. Le Conseil de la Ville députa aussi vers luy, le Comte Tatio Mandello, & quelques Decurions des plus considerables, pour le conjurer de ne venir pas à cette extremité, qui pourroit auoir des suites fascheuses pour Milan, & attirer peut-estre en suite quelque Interdit general, ce qui seroit la ruïne de tous ses tra-uaux, pour la reformation des mœurs, & le reestablissement de la Discipline Ecclesiastique. Il répondit à cette deputation,

» qu'il leur sçauoit bon gré de l'inquietude
 » laquelle la Ville luy témoignoît en cette
 » rencontre; qu'il aimoit les Milanois com-
 » m: ses enfans, & que ce ne seroit qu'à la
 » derniere extremité, qu'il se porteroit à ti-
 » rer le glauiue de l'excommunication contre
 » le Gouverneur: Que si l'honneur de l'Egli-
 » se, & l'acquit de son deuoir l'obligeoient
 » malgré luy d'en venir là, que nulle confi-
 » deration ne l'en pourroit empêcher, & qu'il
 » estimerait sa vie tres-heureusement em-
 » ployée, s'il la perdoit en vne querelle si
 » iuste.

CHAPITRE XXIII.

Suite du mesme sujet.

1573. **A**Vssi-tost que Charles eut publié l'ex-communication contre le Gouverneur, & le Grand Chancelier, il en donna aduis au Pape, & luy fit entendre exactement les

raisons qui l'auoient forcé d'en venir à cette declaration. Mais celuy sur qui le foudre estoit tombé en fût si sensiblement touché, qu'il publia incontinent vn Manifeste fort long, dans lequel déguisant sa conduite sous des pretextes specieux, plustost que la iustificiant par des raisons solides, il essayoit de monstrier que l'excommunication declarée par le Cardinal estoit nulle, & de mettre sur luy le blasme de cette action comme temeraire, & capable de troubler la tranquillité publique. Ceux qui l'auoient ietté dans ce precipice, ne cessoient de l'échauffer contre l'Archeuesque, qui de son costé ne se deffendoit que par les prieres qu'il faisoit, & par les larmes qu'il repandoit deuant Dieu, pour le salut du Gouverneur, & pour l'accommodement de cette querelle. Comme celuy-cy estoit continuellement poussé à chercher tous les moyens possibles de fascher le Cardinal, il s'aduisa de deffendre les assemblées de deuotion que le saint Prelat auoit establies dans Milan, s'il n'y assistoit quelque Magistrat de sa part, pour empêcher, disoit-il, qu'il ne s'y passast rien de contraire au seruice du Roy Catholique. Il n'y auoit pas lieu de craindre aucune faction de la part des personnes qui composoient ces Confraternitez, qui estoient tous des Artisans, & des gens de trauail, lesquels s'assembloient les iours de Feste en des Oratoires, pour y entendre des exhortations, & y vaquer à des exercices de pieté. Aussi le Gouverneur n'en auoit-il conceu aucun

Le Gouverneur deffend toutes les assemblées de pieté dans Milan,

soupçon ; mais il faisoit cette deffense pour faire dépit , & pour donner du chagrin au Cardinal , qui estoit l'Autheur de ces establissements. Ils faisoient aussi des Processions par la Ville , reuestus de sacs , comme les portent les Penitens : & il ordonna qu'ils marcheroient doresnauant le visage découuert. Ces deffenses interrompirent tout à fait ces sortes d'assemblées , les personnes qui les frequentoient ne voulant pas s'exposer à estre mal-traitées par le Gouverneur , & ne pouuant obtenir que tres-mal aisément des Magistrats pour y assister de sa part.

Le Gouverneur se saisit du Chasteau d'Arone , qui appartient au Cardinal

Le Cardinal iouyssoit du Chasteau d'Arone, comme d'une place de son patrimoine , & c'est une des plus fortes de l'Estat de Milan. Le Gouverneur donna ordre au Comte Anguisciola qui commandoit dans Cosme , d'y aller avec des gens de guerre, & de s'en saisir par violence. Son pretexte fut , que cette forteresse se trouuant sur une frontiere , il ne la pouuoit laisser entre les mains des personnes à qui il ne se fioit pas. Le Capitaine qui s'y trouuoit estably de la main du Cardinal , luy donna aussitost aduis de la sommation qu'on luy auoit faite : & à l'heure mesme il luy enuoya le contre-signé , & ordre exprés de la remettre entre les mains de celui qui la demandoit. Cela estant fait , il pria le Comte Borromée , son Oncle , d'aller trouuer le Gouverneur , & de luy dire ; qu'il n'estoit pas besoin d'en user comme il auoit fait que non seulement le Chasteau d'Arone,

mais que toutes les Places que possédoient
 ceux de sa maison , estoient au Roy ; &
 qu'il offroit de les luy configner , pour fai-
 re voir à tout le monde sa fidelité , & son
 zele pour le service de sa Majesté. Mais en
 mesme temps il l'assura que quand il s'a-
 giroit de défendre l'autorité de l'Eglise,
 il seroit toujours prest à exposer la vie , &
 que rien n'estoit capable de le faire relas-
 cher. L'affaire du Chasteau d'Arone ne fas-
 cha le Cardinal , que parce qu'il craignoit
 que l'on n'eust donné au Roy d'Espagne,
 quelque mauuaise impression de sa fidelité;
 & de ce costé-là il estoit extrêmement sen-
 sible. En effet , le Gouverneur , & d'autres
 personnes mal-affectionnées , n'auoient
 rien oublié pour le rendre suspect à sa Ma-
 jesté Catholique. Mais outre que ce Prin-
 ce connoissoit fort bien l'esprit du Cardi-
 nal , il sçauoit quelle estoit sa pieté. Le
 Nonce du Pape qui estoit Monseigneur
 Ormanete, Euesque de Padoue, son ancien
 Grand Vicaire, & son cher amy , le seruit si
 puissamment auprès de Philippe , qu'il le
 confirma dans la bonne opinion qu'il auoit
 conceuë de sa vertu , & qu'il n'adjousta au-
 cune foy aux relations qu'on luy escriuoit
 contre luy.

Il courut mille bruits extrauagans dans
 l'Italie , & à Milan , de son action , & de ce
 qui luy estoit arriué. On dit à Rome que
 l'on auoit bruslé son Palais ; & dans la Ville
 de sa residence , qu'on deuoit le mettre
 prisonnier dans le Chasteau. Ses parens &
 ses amis ne pouuoient s'empescher de luy

témoigner leur apprehension, & ils le conjuroient de demeurer quelque temps chez luy, de peur que le Gouverneur, ou quelques insolens qui croiroient luy faire plaisir, ne se portassent à quelque violence contre sa personne. Mais il se monstra intrepide à tous ces perils qui n'estoient pas sans apparence, & il dit avec vne fermeté admirable à ceux qui luy parloient de la sorte, qu'il ne s'estoit point porté à faire
 » cette declaration contre le Gouverneur, par
 » aucun mouvement de passion, ou d'inté-
 » rest, mais par la seule obligation de défendre l'autorité de l'Eglise; & que cette
 » cause n'estant pas sienne, il esperoit que
 » Dieu pour l'honneur duquel il agissoit, seroit son Protecteur, & qu'il ne s'abstien-
 » droit pas vn moment de sortir, & d'aller par la Ville à son accoustumée. Le Gouverneur auoit logé deux Compagnies de gens à pied, & de cheual, aux environs de son Palais, qui y demurerent durant quatre iours; & cela donna vne telle épouuente à ses domestiques, qu'ils n'osoient sortir, & qu'il eut peine à trouuer quelqu'un qui voulust porter sa Croix deuant luy. Mais le Cardinal se mocquoit de l'épouuante qu'ils auoient prises, & ne laissoit passer vn seul iour qu'il n'allast visiter diuerses Eglises, & particulièrement celles de Saint Ambroise, & des Martyrs Saint Geruais, & Saint Prothais. Comme il se voyoit embarrassé dans vne affaire fort perilleuse, & qu'il ne se vouloit seruir d'autre deffense contre les violences qu'on luy pouoit faire,
 que

que de celles qu'ont accoustumé d'employer les bons Euesques, qui n'est autre que la priere; il alloit souuent faire la sienne deuant le corps de S. Ambroise, qui s'estoit veu autrefois aux mains avec l'Imperatrice Iustine, mere de l'Empeteur Valentinien, & qui luy auoit resisté avec vn courage qui l'a rendu la merueille & l'exemple des Prelats de l'Eglise. Il passoit mesme tous les iours allant & reuenant deuant le Palais où logeoit le Gouverneur, parce qu'il se trouuoit sur son chemin; & on ne vid iamais paroistre sur son visage aucune marque de crainte des Soldats de la garde d'un homme qui le haïssoit si cruellement. Et certes, bien loin de luy faire aucun outrage, eux, & les Cavaliers qui auoient comme bloqué son Palais, se mettoient à genoux deuant luy; & demandoient sa benediction, qu'ils receuoient avec autant d'humilité, que s'il n'eust eu rien à demesler avec leur Maistre. La constance du Cardinal durant ces tempestes estoit d'autant plus digne de loüange, qu'il n'estoit soustenu que par les forces de son cœur, ou pour mieux parler, par celles de la Grace Episcopale. Car tous ceux qui l'approchoient, sembloient auoir conspiré pour l'intimider, par mille aduis qu'ils luy donnoient; leur amitié les rendant trop credules aux faux bruits qui couroient des mauuais desseins du Gouverneur contre sa personne. Il les escoutoit avec vne tranquillité qui les surprenoit, & les en remercioit. Mais il alloit tousiours son chemin, & de iour en iour il deuenoit plus ge

K

nerieux & plus ferme. Il falloit pour perfectionner la vertu, vne esprouue aussi rude qu'estoit celle-cy; & ie trouue cét endroit de sa vie beaucoup plus admirable qu'aucun autre. Car ou en ses fonctions Ecclesiastiques, ou en l'austerité de sa Penitence, il n'auoit à combattre que des difficultez assez foibles, & il trouuoit presque toutes les choses disposées à seconder ses desseins. Au lieu qu'en cette conioncture il auoit à combattre ses parens, ses amis, les raisons politiques, & domestiques, & beaucoup de personnes pieuses & sçauantes, qui condamnoient sa conduite, ou qui le pressoient de faire des choses pour la seureté qu'il croyoit estre honteuses pour sa Charge.

Mort subite du
Deputé
du Gouverneur,
contre S.
Charles

Le Gouverneur dépescha à Rome aussitost que la declaration de son excommunication fut publiée, vn Sénateur de ses amis, pour en faire voir au Pape la nullité, & pour poursuire l'affaire de la Jurisdiction, laquelle y estoit encore pendante. En chemin ce Deputé fut blessé d'un coup de pied de cheual qui le mit en vn fort mauvais estat; & quand il eut audience du Pape, à peine auoit-il dit quelques paroles, qu'il tomba en apoplexie. Il fallut l'emporter en sa maison, où, quelques remedes qu'on luy sceust faire, il mourut en peu de temps, sans auoir sceu proferer aucune parole pour demander pardon à Dieu, & à son Archeuesque. Cette mort si subite & si extraordinaire n'empescha pas que beaucoup de personnes de qualité ne s'employassent auprès de la Sainteté pour obtenir l'Absolu-

tion , au moins à cautele , pour le Gouverneur ; & on appuyoit cette demande sur son départ pour aller en Flandres faire la guerre aux Heretiques , qui s'y estoient souleuez contre le Roy d'Espagne. On assura mesme le Pape qu'il estoit desia en chemin. Cette raison le persuada d'accorder vn Bref par lequel tout Prestre pouuoit absoudre le Gouverneur. Mais au lieu de le receuoir en voyage , il le recut dans Milan , & s'en seruit de mauuaise foy. Car il se fit absoudre par vn Moine ignorant , sans en faire aduertir le Cardinal ; & en suite il assista publiquement à l'Office diuin. Le Pape qui en fut aduertty , s'en plaignit , & luy escriuit , afin qu'il donnast quelque satisfaction à son Archeuesque ; mais il negligea vn si saint aduis. Il partit pour la Flandre , & son voyage ne fut pas heureux. Car ayant fait incontinent apres son arriuee , deux Armées Nauales pour ietter du secours dans Middelbourg que les Rebelles assiegeoient ; l'vne fut defaite deuant ses yeux , & l'autre eut bien de la peine à se sauuer dans Anuers ; de sorte que cette Ville tres-importante au Roy d'Espagne , fut prise. Le siege de Leyden fut aussi malheureux , & l'Armée Royale y perit presque toute , par l'inondation du camp que firent les ennemis , en coupant les digues de la Meuse , & de l'Isel. Il est vray qu'il gagna vne Bataille ; mais la mutinerie des troupes Espagnoles luy fit perdre le fruit qu'elle deuoit produire pour les affaires de son Maistre. Le Cardinal Bentiuole qui a escrit la

1574.

K ij

Guerre de Flandres avec autant de politesse
 „ que de iugement, dit de luy, qu'il mourut
 „ en l'estime d'un homme qui estoit plus
 „ pieux que vaillant, & plus propre au Gou-
 „ uernement paisible, qu'aux affaires de la
 „ guerre. Il mourut en cinq iours, apres vne
 Mort du maladie douloureuse & languissante, du
 Commandeur de rant laquelle il demanda à saint Charles,
 Riche- sa benediction, & parla de luy comme
 sens, en d'un Euesque de grande sainteté. Son fre-
 E. andres. re qui estoit Ambassadeur auprès du Pape,
 donna au Cardinal l'aduis de sa mort, &
 le recommanda à ses Sacrifices, & à ses
 prieres. Mais l'ayant déjà apprise, il auoit
 satisfait à ce deuoir de charité, & il témoi-
 gna estre affligé de sa perte. Le Grand
 Chancelier, qui du commencement n'auoit
 pas tenu grand compte de l'excommuni-
 cation, tomba incontinent apres qu'elle
 eut esté fulminée, en vne maladie qui
 estoit plustost dans l'esprit que dans le
 corps. Car il se sentoit saisi de frayeurs se-
 crettes, & d'inquietudes si terribles, que
 son corps alloit se desseichant peu à peu,
 sans que les Medecins en pussent trouuer la
 cause, ny que tous leurs remedes luy ap-
 portassent le moindre soulagement. Com-
 me il se vid aux portes de la mort, il crut
 que le mépris qu'il auoit fait des Censures
 de l'Eglise, l'y auoit conduit; de sorte que
 touché d'un remords salutaire, il pria S.
 Charles de prendre la peine de le venir
 voir, & luy demanda pardon de sa faute. Ce
 fut un remede prompt & merueilleux pour
 luy que cette action de Penitence. Car au

Et du
 grand
 Chancel-
 lier de
 Milan.

Qui se re-
 concilie
 avec S.
 Charles.

mesme instant il se porta mieux, & dans peu de iours il guerit parfaitement. Quelque temps apres il retomba malade, & son charitable Pasteur l'aida à faire vne mort veritablement Chrestienne.

Saint Charles auoit témoigné durant la peste qui s'alluma dans Milan, (comme nous le rapporterons plus exactemēt en vn Chapitre separé) vn si grand amour pour son Peuple, & fait des choses si merueilleuses pour le salut de cette grande Ville, qu'il y auoit sujet de croire que l'on le laisseroit en paix, & que les disputes de la Iurisdiction Ecclesiastique & Royale demeure-

roient assoupies. C'estoit sans doute la moindre recompense qui luy estoit deuë, pour auoir exposé sa personne plus d'vne fois au peril de la mort. Mais Dieu permit que les méchans qui ne pouuoient faire de trêue avecque luy, à cause qu'il n'en faisoit point avec eux, ne cessant de solliciter, & de presser leur conuersion, prissent sujet de le calomnier des actions dont il meritoit d'estre loué. Car comme il n'y en a point de si sainte, à laquelle la calomnie ne donne vn mauuais visage quand il luy plaist; elle eut l'insolence de publier que ces grandes aumosnes du Cardinal, le soin si exact de visiter les malades, cette profusion de son bien pour leur secours, ce travail infatigable pour les secourir, ne procedoit que d'vne ambition cachée, & que par là il se vouloit rendre maistre du cœur des Peuples, afin d'en deuenir plus aisément le Tyran. Ces gens. n'estoient pas de

On tourmente derechef S. Charles pour la Iurisdiction Ecclesiastique.

Calomnies contre luy.

la lie de la populace, qui est toujours sujette à son Euesque, parce qu'elle est plus simple; mais c'estoient les principaux de la Ville, & les Magistrats; qui ne pouuant souffrir les ordres que le Cardinal auoit establis pour bannir le peché de Milan, ou du moins pour empescher qu'il n'y parust en public, & en triomphe, taichoient de le decrier, & de luy susciter des affaires. Ils s'emparerent de l'esprit du Gouverneur qui succeda au Commandeur de Richesens, & commencerent à l'aigrir contre le saint Euesque par l'excommunication dont il l'auoit frapé, luy faisant aisément conceuoir, qu'en cette conduite il auoit fort peu respecté sa dignité, & que si au commencement de son administration, il ne se monstroir ferme, il tomberoit indubitablement dans le mesme mal-heur. La Monition qu'il luy auoit fait signifier durant son absence de Milan, lors que la peste y estoit plus violente, par laquelle il l'aduertissoit de faire sa charge, & de preferer le salut de la Ville à son salut particulier, l'auoit encore fort choqué; de sorte qu'il ne faut pas s'estonner s'il se laissa conduire si facilement par les ennemis de Charles, qui sembloient n'estre poussez dans les conseils qu'ils luy donnoient, que du zele pour le seruice du Roy d'Espagne, & pour l'honneur de sa charge. Il renouuella doncques toutes les contestations pour la Iurisdiction qui sembloient estre assoupies; & enuoya à Rome vn Docteur Milanois, pour poursuire la decision du procez qui estoit

pardenant le Pape pour ce sujet. Ce Deputé estoit dépendant des principaux ennemis du Cardinal, & en son particulier il estoit fort opposé à l'autorité du Tribunal Ecclesiastique; de sorte que le Gouverneur se promit aisément que par sa diligence, son habilité, & son zele pour l'affaire qu'il auoit entre les mains, il remporteroit vne décision fauorable des poincts qui estoient en contestation. Il le chargea encore de beaucoup de memoires secrets pour faire des plaintes au Souuerain Pontife, de la conduite de l'Archeuesque, & le mettre mal dans son esprit. Il fit ioindre la ville de Milan en cette deputation; ayant corrompu quelques particuliers du Conseil public, qui pour luy complaire parlerent au nom de tous les Habirans, qui non seulement ne scauoient rien de ce procedé, mais qui en furent fort affliges quand cela vint à leur connoissance: Les plaintes se reduisoient à ces Chefs.

La Ville de Milan depute à Rome contre S. Charles.

1. Que le Cardinal aubit voulu durant la peste, que les personnes Ecclesiastiques prissent les ordres, & les billets pour la santé, de ses Officiers, & non pas de ceux que le Gouverneur, ou la Ville auoit establis.

Articles contre le Cardinal

2. Qu'il auoit deffendu toutes sortes de ieuX & de recreations publiques, les iours de Dimanches, & des Festes.

3. Qu'il se reseruoit beaucoup de pechez que ses Predecesseurs ne se reseruoient pas.

4. Qu'il auoit osté l'usage de la chair, les premiers iours de Carême, & le Dimanche

K iij

suivant, contre la coustume obseruée de tout temps à Milan.

5. Qu'il auoit fait boucher les portes qui estoient aux costez des Eglises.

6. Qu'il auoit fait faire vne separation dans les Eglises avec des aix, afin que les femmes ne fussent point veües des hommes.

7. Qu'il auoit ordonné que l'on celebrast la feste de S. Gernais & S. Prothais, ce qui ne se pratiquoit pas auant luy.

Voila quelles furent les accusations presentées au Vicaire de IESVS-CHRIST contre S. Charles. Le Gouverneur ne se contentant pas de cela, fit vne tres-exacte enqueste de la vie du Cardinal: mais il ne put pas trouuer l'ombre du moindre defaut, bien loin d'y trouuer des crimes comme il souhaitoit. Il fit aussi vne diligente recherche de la conduite de ses Vicaires forains, & tascha de faire dire quelque chose contre eux aux Procureurs Fiscaux qu'il enuoya chercher pour cet effet, & auprès de qui il employa les promesses, & les menaces, afin de tirer de leur bouche quelque accusation. Ils furent fidelles en cette rencontre, & rendirent tous vn mesme témoignage de la sainteté de leur vie, & de leur soin à faire obseruer les Reglemens du Cardinal pour la conduite de ses Eglises.

Le Gouverneur ne trouuant pas son compte de ce costé-là, fut cōseillé de s'adresser aux Communautéz Religieuses du Diocèse pour tascher de les mettre dans ses interets contre leur Archeuesque. Il fit donc scauoir

par tous les Monasteres , que si les Supérieurs , ou les particuliers auoient quelques plaintes à faire contre Charles , pour des griefs receus , ou de ses Ordonnances , ou de ses Officiers , qu'ils luy en donnaissent connoissance , & qu'il les appuyeroit de son autorité à Rome , pour en auoir raison. Ce conseil aussi fin que malicieux , luy réussit. Car la pluspart des Religieux estoient degoustez du Cardinal , qui les faisoit viure dans la Discipline reguliere avec plus de seuerité qu'ils n'eussent voulu , qui veilloit sur leurs actions & les empeschoit vigoureusement de rien entreprendre contre l'autorité Episcopale. Ce n'est pas qu'il les troublast dans la iouissance de leurs priuileges legitimes ; mais comme il en connoissoit fort bien les bornes , il les y faisoit demeurer estroitement , & ne se relaschoit iamais en cette occasion. Ils dresserent donc de grands memoriaux contre S: Charles , & se mirent avec de grandes esperances , sous la protection du Gouverneur , qui la leur offroit non pas par amour qu'il leur portast , ou à leurs Ordres , mais pour faire vn gros d'accusateurs contre le Saint Archeuesque , & pour tâcher d'aigrir l'esprit du Pape , afin d'en arracher par surprise , quelque Decret qui le mortifiast , & luy ostast le credit parmy le Peuple.

Les Religieux se liguèrent avec le Gouverneur, contre Saint Charles.

Gregoire écouta le Deputé , qui employa toutes les forces de son esprit & de son eloquence , pour exagerer les plaintes dont il estoit porteur , & pour faire passer le Car-

K v

dinal pour vn homme, ou ambitieux, ou du moins tres-imprudent en sa conduite. Mais le Pape bien loin de pouuoir estre mené dans ce sentiment, eut horreur de l'ingratitude & de l'iniustice des Milanois, qu'il croyoit tous coupables de cette poursuite contre leur Pasteur; ne sçachant pas que le Gouverneur se seruoit du nom du peuple, qui ne sçauoit rien de ce qui se passoit à Rome. Car il voyoit des gens pour qui Charles venoit de s'exposer à la mort, luy faire vne querelle sur des Ordonnances toutes iustes & toutes saintes, & pour lesquelles ils deuoient luy rendre des actions publiques de graces & reconnaissance. En ce procedé il reconnut la rage du Diable qui ne pouuant souffrir que le Cardinal luy enleuast tant d'ames tous les iours, par les Reglemens salutaires qu'il establissoit dans son Diocèse, luy suscitoit cette tempeste, & échauffoit de fureur les malades contre leur Medecin qui se consumoit nuit & iour, pour leur rendre la santé. Il ne fit aucune réponse aux Docteurs; mais il enuoya ses memoriaux à Saint Charles, afin qu'il connust à quelles gens il auoit affaire, & qu'il prist ses mesures à l'auenir sur leur ingratitude. Le bon Archeuesque ayant leu cette dépesche, en sentit vne affliction qu'il ne put dissimuler, non pas pour l'interest de sa reputation qu'il voyoit si malicieusement calomniée; mais pour le salut de ses calomnieux, & pour le danger du renuersement où il voyoit exposée toute la reforme.

qu'il auoit establie avec tant de soin & de travail. Il communiqua cette nouvelle à quelques principaux Seigneur de Milan, qui auoient esté témoins oculaires de sa conduite durant la peste, & ils l'assurerent que le Gouverneur auoit employé à faux le nom de la Ville, & que iamais il ne s'estoit fait dans aucune assemblée publique, la moindre deliberation contre luy. Mais quoy qu'ils fussent fort touchez d'un procédé si iniurieux à l'honneur de Milan, ils le prierent neantmoins de ne s'en plaindre point, de peur que le Peuple venant à le sçauoir, ne se portast à quelque violence contre les Autheurs de cette fourbe. Charles n'eut pas beaucoup de peine à se résoudre de suivre ce conseil qui estoit si conforme à la douceur de son naturel, & à ses maximes. Il ne parla donc point de la supposition que faisoit le Gouverneur, mais il en avertit le Pape, & le remercia humblement des bontez qu'il auoit eues pour luy en cette rencontre. La femme du Gouverneur qui estoit fort pieuse, ne cessoit d'exhorter son mary, & ses enfans, d'honorer le saint Archeuesque, & d'obeir à ses Ordonnances, principalement à celles qui deffendoient les jeux & les spectacles publics aux iours de Festes. Mais les remonstrances ne seruoient de rien sur l'esprit de cet homme que des flatteurs aigrissoient incessamment, & qui par mépris de l'autorité Episcopale, faisoit faire aux iours deffendus, toutes sortes de recreations publiques, afin de détourner le peuple des

1578.

K vj

exercices de deuotion, & de donner du chagrin au Cardinal.

CHAPITRE XXIV.

Suite du mesme sujet.

LE temps du Carnauai approchoit, & Charles sçachant que l'on se preparoit a le passer avec toute sorte de dissolution, de masques, de bals, & de tournois, fit publier vne Lettre Pastorale, par laquelle il representoit à son Peuple, que ces débauches publiques non seulement offensoient la pieté Chrestienne, mais qu'elles offensoient encore la Majesté du Roy Catholique, qui portoit le dueil de son fils, & qui auoit commandé si expressement de recourir à Dieu, pour appaiser sa colere par des Processions, & des prieres publiques. Plusieurs d'entre le peuple profiterent de cet auis. Mais ceux qui deuoient estre les Autheurs du desordre s'en moquerent, & poussierent le Gouverneur à continuer son dessein, & à porter le Carnauai iusqu'au premier Dimanche de Carefme; ce qui estoit aller contre vn Decret Synodal desia en pratique. Comme Saint Charles fut auerty de cette resolution, il publia des deffenses de faire aucuns spectacles publics, le premier Dimanche de Carefme, & les autres iours de ce temps de Penitence, sous peine d'excommunication, qu'encouroient, *ipso facto, l'action faite*, ceux qui actuelle

mentiouſteroient, danſeroient, ſe maſ-
queroient; ou feroient quelque autre
action de réiouiffance publique; & contre
ceux qui feroient les inuenteurs & les au-
theurs de ces diſſolutions. Il ſe reſerua l'ab-
ſolution de cette Censure. Pour les Spe-
ctateurs, il les priua ſeulement de l'entrée
de l'Egliſe, & retint pareillement le pou-
voir de leuer cét Interdit. Cette Ordon-
nance produiſit l'effet que deſiroit Saint
Charles. Car chacun craignant l'offenſe
de Dieu, & la peine des Cenſures, ſ'ab-
ſtint de faire aucune des choſes qui auoient
eſté propoſées & reſoluës. Cela mortifia
beaucoup le Gouverneur, qui crût que le
Cardinal auoit publié cette deſſence, pour
luy faire honte, & pour le faſcher. Quand
le ſaint Archeueſque ſceut ce mécontente-
ment, il employa quelques perſonnes
pour l'éclaircir de ſes ſoupçons, & luy
faire voir qu'il n'auoit eu autre veuë que
le ſalut des ames qui luy eſtoient com-
miſes, & l'accompliſſement de ſon deuoir.
Mais cette ciuilité ne le ſatiſfit pas, & ne
peut oſter de ſon eſprit le degouſt qu'il
eut contre Saint Charles, que l'Histoire
du Iuſſano remarque auoir eſté fomenté
par quelques Religieux tres-eſloignez de
l'eſprit de leur Ordre. Ils ſe donnoient la
liberté de blaſmer la conduite de ce Saint
Archeueſque; & quelques Predicateurs
meſmes ne ſe pouuoient empêcher de le
condamner dans leurs Sermons, avec vne
hardieſſe tres-ſcandaleuſe. Il y en eut vn
entre les autres qui s'emporta fort in-

S. Char-
les dé-
tourne
les diſ-
ſolutions
du Car-
nauai par
vne Or-
donnan-
ce qu'il
fait pu-
blier.
Le Gou-
uerneur
de Milā
s'en of-
fenſe.

Vn Re-
ligieux
tres-re-
formé
presche
contre
S Char-
les.

solemment contre luy ; & quand il en eut
Pauis , il ne fit autre chose qu'escrire à ses
Superieurs , afin qu'ils luy commandas-
sent de changer de stile , & de prescher
l'Euangile plus Apostoliquement qu'il ne
faisoit. Tout autre Euesque l'eust interdit
à l'heure mesme , & mis en prison ; &
eust eu droict de le faire , parce que com-
me il estoit d'un Ordre tres-reformé , ses
paroles faisoient impression sur l'esprit de
la populace , qui est persuadée que des
hommes qui vont pieds nuds , & vestus
d'un sac, n'ont point de passions humaines,
& que ce qu'ils reprennent ne peut estre
bon. Mais l'Inquisiteur de Milan , & l'E-
uesque de Lodi , estans informez de ces
predications scandaleuses , vinrent trou-
uer le Saint Cardinal , & luy representa-
rent ; que comme c'estoit faire vne action
de mansuetude , & de charité Chrestien-
ne, de pardonner ses propres iniures , c'e-
stoit violer la iustice , & offencer la Reli-
gion , d'endurer les outrages faits iniu-
stement à sa dignité : Que l'Euesque ne
pouuoit estre utile à son Peuple que par la
bonne odeur de sa vie, & par l'estime qu'on
faisoit de sa prudence , & que s'il souffroit
qu'un Predicateur, ou inconsideré, ou mali-
cieux, luy ostant son credit par des decla-
mations publiques contre les ordres qu'il esta-
blissoit , il verroit bien-tost tomber en rui-
ne le grād edifice de la reforme des mœurs
de ses Diocesains , qu'il auoit commencé
auec tant de trauail , & qu'il voyoit si heu-
reusement auancé. Enfin , ils luy firent

voir si clairement que ce n'estoit pas en «
 chaire qu'il falloit reprendre les Euesques, «
 & qu'il offensoit Dieu par sa patience en «
 cette rencontre, qu'il laissa agir l'Inqui- «
 siteur comme il trouuoit à propos. Il fit «
 donc coniointement avec le Vicaire Ge-
 neral de l'Archeuesque, vne information
 des choses qu'auoit dites ce Predicateur
 imprudent, l'interdirent de la predica-
 tion iusqu'à nouuel ordre, & le firent met-
 tre dans son Monastere, en vn lieu separé
 des autres Religieux. Cette cause alla à
 Rome, où il fut condamné à ne point pres-
 cher de quelques années, & à quelques
 penitences corporelles. Il les accepta avec
 beaucoup d'humilité, & de signes de re-
 pentir de la faute, laquelle estoit sans dou-
 te procedée d'un zele inconsideré plustost
 que de malice.

Le Gouverneur qui l'aimoit, & qui l'en-
 tendoit avec plaisir, parce qu'il censuroit
 le Cardinal qu'il n'aimoit point, fut fort
 piqué de le voir interdit au milieu de son
 Caresme, & prit cette iniure comme faite
 à sa personne. Les Peres de l'Ordre du
 Predicateur plus ialoux de l'honneur de
 leur Communauté, que soigneux de celuy
 de l'Eglise, offensé en la personne de
 Saint Charles, s'émeurent aussi avec
 beaucoup de chaleur; & au lieu de blas-
 mer leur Frere qui auoit failly, ils tasche-
 rent de le iustifier, & de reietter le tort sur
 le Saint Archeuesque, qui auoit eu tant de
 peine à se resoudre de le laisser chastier.
 Le Gouverneur escriuit à Rome pour se

1579.

On fol-
licite
puiffam-
ment à
Rome
contre S.
Charles.

plaindre de son Interdit , & pour hafter le iugement de la caufe qui y eftoit pendante pour le fait de la Iurifdiétion Ecclefiaftique. Il y auoit plufieurs perfonnes de qualité qui follicitoient pour luy contre la Cardinal , non pas en cachettes , mais à découuert , & qui le faisoient paffer pour vn homme fans prudence & fans iugement. Car c'eft ainfi que l'on qualifie ceux qui ont du zele & de la fermeté pour la conseruation de l'autorité de l'Eglise. En ce mefme temps les Cardinaux examinerent son quatriéme Concile Prouincial qu'il venoit de celebrer , & les intrigues furent fi fortes , qu'il ne s'en fallut guere qu'au lieu de le corriger , ils ne le reiettaffent entierement. Dans Milan on faisoit courir de faux bruits contre luy ; que le Roy d'Espagne auoit ordonné à son Ambassadeur auprès du Pape , de demander à fa Sainteté qu'il l'oftast de Milan , & au Gouverneur de cet Estat , qu'il l'en fift sortir par violence , comme vn homme qui par l'imprudence de fa conduite y caufoit du trouble , & de la confusion. Ces choses , quoy que fauffes , ne laiffoient pas de faire vne impression fur l'esprit du peuple , qui ne fçauoit pas distinguer le menfonge de la verité , & qui est d'autant plus facile à croire les faux bruits qu'ils font ridicules , & contre toute apparence.

S. Charles vient à Rome pour se defcendre.

Saint Charles fut auerry de l'estat de fes affaires à Rome , par Monfeigneur Speciano , qui luy marqua que ses ennemis auoient tellement réplit l'esprit du Pape , &

des Cardinaux , de mauuaises impressions contre sa conduite , qu'il ne trouuoit plus les audiances fauorables comme il faisoit auparauant , & qu'il falloit absolument qu'il se vint deffendre luy-mesme en cette Cour. Le Cardinal iugeant que ce voyage estoit necessaire , s'y resolut ; & il communiqua son dessein aux Visiteurs de son Diocese , & aux principaux Officiers de son Tribunal , qui le confirmerent en cette pensée. Il leur donna tous les aduis qu'il iugea propres pour se bien acquitter de leurs charges en son absence ; & ayant appris que l'Euesque de Bresse estoit à l'extrémité , il y courut en poste , & l'assista iusqu'à la mort , qui fut tres-chrestienne. Apres qu'il eut celebré ses funerailles , il partit , & passa à Mantouë , pour y voir sa Sœur , & y terminer quelques affaires domestiques. De là il prit le chemin de Rome ; & comme l'affaire qui l'y conduisoit , estoit vne affaire où l'honneur de Dieu se trouuoit interessé , il voulut passer par le desert de Camaldouli , qui est situé dans le Mont Apenin , entre la Toscane & la Romagne. Les passages y sont extrêmement dangereux , à cause des precipices que l'on y rencontre presque à chaque pas : & son Caudataire tombant dans vn , s'arresta au premier rocher , tandis que son cheual alla au fond , où on n'en eut aucune nouuelle. Il sejourna quelques iours dans la maison de ces saints Religieux , qui font vne vie heremitique , & les passa en Oraisons seruentes , en ieusnes , & en veilles,

pour demander la protection diuine dans les affaires qui le tiroient hors de son Diocèse. Cette retraite fut cause que le bruit courut dans Milan, qu'il auoit abandonné l'Episcopat pour se faire Hermite. Il alla de cette sainte solitude, au Mont Auerne, où à l'exemple du grand Saint François, il employa quelques iours à la meditation des souffrances du Fils de Dieu. Il visita encore la sainte Chappelle de Lorette, où il alla à pied depuis Fossembrune, c'est à dire, de plus de cinquante milles. Il y arriva le soir, & il courut droit à l'Eglise, où il demeura toute la nuit en oraison. Le lendemain, qui estoit la feste de la Natiuité de la Sainte Vierge, mystere auquel l'Eglise est dédiée, il dit la Messe solemnelle, & prescha avec tant de ferueur qu'il tira des larmes des yeux de tous ses auditeurs.

1579.
Il est fort
bien re-
ceu du
Pape.

Quand le bruit de son arriuée fut répandu dans Rome, plusieurs Cardinaux, des Prelats, & des Seigneurs de qualiré luy furent au deuant. Toute la Ville s'émeut, comme fit autrefois Ierusalem à l'entrée du Sauueur, & il trouua tant de peuple amassé pour le voir passer, depuis la porte appelée del Populo, iusqu'à Ponte-Mole, qu'il parut qu'en ce mouuement si extraordinaire il y auoit quelque chose de diuin. Le Pape qui estoit pour lors à Frescati, l'enuoya prendre le lendemain, luy fit mille caresses, & le logea dans le Palais de ses Neveux. Il le retint huit iours, durant lesquels il informa sa Sainteté de l'estat où se trouuoient les affaires de son Diocèse dans

Milan , & luy rendit vn compte exact de sa conduite , des oppositions qu'il trouuoit à l'establissement de la Discipline Ecclesiastique , par les ennemis declarez de toute reforme , & par ceux qui ayant plus de zele que de science , condamnoient legèrement ce qu'il faisoit pour le salut de son Peuple. Il luy parla du traitement que l'on auoit fait à son Concile Prouincial , où aucun Decret presque n'estoit demeuré entier. Le Pape-l'ayant fort paisiblement escouté , le plaignit , & le consola dans les persecutions qu'il souffroit , par l'exemple de tous les bons Euesques qui auoient esté traitez avec la mesme fureur par le Diable , & par le Monde , qui ne les peuent supporter , à cause qu'ils ne trauaillent qu'à détruire leur regne. Il voulut luy-mesme examiner son Concile , & il y trauailla quatre heures par iour durant vne semaine. Il en trouua tous les Decrets si saints & si raisonnables , qu'il ne douta point que les Censures qui en auoient esté faites , ne fussent vn effet de la malice , & de la ruse du Diable. Cét ennemy sçait se transformer en Ange de lumiere dans les esprits des Iuges , quand il veut se seruir d'eux pour leur faire condamner ou quelque innocent, ou quelques Reglemens utiles pour le salut des ames. Je veux dire, qu'il a l'adresse de faire conceuoir des terreurs friuoles , & des soupçons sinistres, quand il veut renuerfer des establissemens qui ruinent ses desseins, & qui luy dérobent les pecheurs sur lesquels il pretend conseruer

Le Pape
approu-
ue deux
Conciles
Prouin-
ciaux te-
nus par
S. Char-
les, -

sa tyrannie. Le Pape voulut faire connoître cette verité aux Deputez pour l'examen de ce Concile ; & pour cela il enuoya vn Prelat qui estoit pieux & fort versé en ces matieres , au Cardinal de Sens, afin de sçauoir de luy quelles raisons la Congregation pouuoit auoir eues de le gloser , ou plustost de le détruire entierement. Le Cardinal monstra vne grande liasse de memoriaux presentez par diuerfes personnes contre les Decrets ; & apres qu'il eut ouy l'Enuoyé du S. Pere , qui luy monstra que tout ce que l'on alleguoit estoit ou faux , ou impertinent ; il confessa que pour luy il n'auoit aucune raison à alleguer , & qu'il ne falloit pas se fier legerement aux autres. Charles rapporta cette réponse à sa Sainteté , qui fut fort consolée de voir les ruses du Diable découuertes , & qui confirma ce Concile , & encore le cinquième , que le bon Archeuesque auoit apporté , afin d'en auoir l'approbation. Il voulut pour témoigner à tout le monde combien il l'estimoit , le faire manger à sa table. Tous les matins il entendit sa Messe , & apres qu'elle fut dite , il voulut auoir ses ornemens , & les toucher par deuotion. Durant la semaine qu'il demeura auprès du Pape , sa maison parut aussi reformée qu'vn Monastere de Religieux tres-austeres ; & le Cardinal Neueu fit habiller tous ses domestiques à la façon de ceux de Saint Charles ; tant le bon exemple a de force pour confondre ou le vice , ou le luxe de ceux qui ne voulant pas l'imiter en toute son estendue , se sentent tou-

tefois contrains par respect de s'abstenir
 de tout ce qui luy est contraire. Tertullien
 disoit que le manteau des Chrestiens fai-
 soit rougir le vice de confusion. La mode-
 stie, la frugalité, l'humilité, la douceur, &
 la charité de Saint Charles, produisirent
 les mesmes effets dans Rome, à l'égard des
 Ecclesiastiques, & des Laïques, qui eurent
 honte de paroistre dissolus devant vn hom-
 me si mortifié. Deux Cardinaux qui par ie
 ne sçay quelles raisons, luy auoient toujours
 esté fort opposez, ne l'eurent guere entre-
 tenu, qu'ils changerent de sentimens pour
 luy, & qu'ils se détromperent de l'opinion
 qu'ils s'en estoient formée, comme d'un
 Prelat bien intentionné, mais inconsideré
 & incapable de la conduite d'un grand
 Diocese. Ainsi au lieu qu'auparauant ils le
 trauersoient en ses affaires, ils deuinrent
 ses amis intimes, & le seruirent avec beau-
 coup de chaleur, comme un homme saint
 & donné à l'Eglise pour estre l'exemple de
 toutes les vertus Pastorales. Il inuitoit sou-
 uent ses Confreres à manger dans son Re-
 fectoir, où il relaschoit pour l'amour d'eux
 quelque chose de la seuerité de son viure,
 afin de ne les pas effaroucher. Mais il fai-
 soit lire des Liures Spirituels, qui leur fai-
 soient entendre beaucoup de veritez qu'il
 iugeoit ne leur pouuoir dire avec bié-sean-
 ce. Il parloit plus librement aux Gentils-
 hommes Romains, & personne ne sortoit
 iamais d'auprés de luy, qu'il n'eust entendu
 de sa bouche quelque parole pour le porter
 à Dieu. Aussi la reputation de sa sainteté.

estoit-elle si grande dans Rome, que quand il passoit dans les ruës, le Peuple accouroit en foule pour auoir sa benediction; & que l'on le suiuoit aux Eglises où il alloit celebrer la sainte Messe, soit pour l'entendre, soit pour communier de sa main. Il faisoit de grandes aumosnes, & seruoit tous ceux qui n'auoient point d'accès auprès du Pape, avec d'autant plus de soin qu'ils estoient plus pauvres, & plus abandonnez. Plusieurs Euesques d'Italie vinrent tout exprés pour le consulter sur les difficultez qu'ils auoient dans l'exercice de leurs charges, & pour profiter de sa faueur auprès de sa Sainteté, qui l'écoutoit volontiers, & qui prenoit ses aduis dans les grandes affaires dequoy il se trouua toujours fort bien.

Tandis que le Saint Cardinal voyoit à Rome ses affaires s'acheminer aussi heureusement qu'il pouuoit souhaiter, le Diable luy suscitoit vn autre orage dans Milan. Car comme ses ennemis sçauoient tout ce qui se passoit, ils persuaderent au Gouverneur de faire enuoyer vn Ambassadeur de la part de la Ville, pour demander au Pape l'abrogation des Decrets, & des Ordonnances faites par l'Archeuesque. En effet, il n'y auoit point d'autre moyen apparent pour empêcher qu'il ne reuint avec la confirmation de tous les ordres qu'il auoit establis. Le Gouverneur fit aussi-tost assembler le Conseil de la Ville, où le Grand Chancelier assista pour intimider les Decurions, (qui sont les Conseillers de la Com-

munauté) & faire passer la deliberation de l'Ambassade. Plusieurs des Magistrats politiques qui sçauoient la cabale que l'on auoit faire, ne voulurent pas s'y trouuer, & ceux qui y furent presens, n'eurent pas la hardiesse de s'opposer à vne resolution aussi iniuste & honteuse qu'estoit celle-là pour Milan. La deputation fut donc conclue, & l'Ambassadeur fut choisi tel que voulut le Gouverneur, qui fut vn Senateur son confident, & ennemy declaré de Saint Charles. Quand on sceut cette resolution, chacun en fut affligé, & en reconnut l'injustice & l'ingratitude contre leur Archeuesque, qui venoit de se sacrifier pour eux, durant vne peste tres-cruelle. Mais on se contenta de murmurer, & personne ne se trouua assez hardi pour empêcher l'exécution d'une chose qu'il condamnoit. Le Cardinal en fut aduerty, & il en eut de la douleur, parce qu'encore que la Ville de Milan fust innocente de cette action si lasche, & si ingrate; toutefois on employoit son nom qui pouuoit auoir quelque force sur l'esprit de ceux qui seroient commis pour examiner le differend. Dans l'Italie chacun en parla selon sa passion, & sa connoissance; & mesme dans Rome, le bruit courut qu'il ne retourneroit plus à Milan, & que le Pape le faisoit son Vicaire. Quelqu'un de ses amis luy dit la nouvelle qui alloit par le monde, & le pria de luy en dire la verité. La réponse du Cardinal fut, *qu'il laisseroit plutôt le Chapeau que le soin des ames que Dieu luy auoit commises, pour lesquelles*

15804

les il estoit prest de souffrir la mort. Certes encore qu'il honoraist fort la Pourpre dont il estoit reuestu ; il honoroit dauantage le caractere de l'Episcopat , & il sçauoit fort bien faire la difference d'une dignité inuentée par les hommes , & dont l'Eglise se peut passer , encore qu'elle luy soit tres-honorable & tres-vtile ; & d'un Ministère que le Fils de Dieu a exercé luy-mesme sur la Terre , & sans lequel l'Eglise ne peut pas subsister vn moment. Ce bruit du Vicariat du Pape ne laissa pas de produire vn bon effet. Car plusieurs personnes qui viuoient avec beaucoup de scandale , changerent de façon de vie : & douze Courtisanes des plus fameuses , sortirent de Rome , ne voulant pas auoir la honte d'en estre chassées par ce Cardinal , ce qu'elles ne doutoient point qu'il ne fist dès le commencement de sa charge.

CHAPITRE XXV.

Suite du mesme sujet.

LE Pape s'estant retiré en vne maison de Campagne, y fit venir le Cardinal, pour sçauoir de luy ce que c'estoit que cette Ambassade. Le Cardinal luy en dit le détail, & luy découurit la fourbe du Gouverneur de Milan , qui auoit pratiqué cette deputation sous le nom de la Ville , pour authentifier dauantage les poursuites qu'il faisoit contre ses Ordonnances. Gregoire
estant

estant informé de la verité , resolut que S. Charles partiroit incontinent apres l'arrivée des Ambassadeurs , & le chargea de passer à Venise pour y traiter quelques affaires importantes. Mais avant que de partir , il envoya ordre à son Vicaire General, de faire publier de nouveau ses Ordonnances pour la sanctification des Festes, & contre les débauches du Carnaval au premier Dimanche de Carême , afin que le Peuple ne crût pas qu'elles fussent annullées pour le voyage des Ambassadeurs. Ils arriuerent, & le Cardinal les ayant luy-mesme presentez au Pape , avec des paroles d'honneur & de civilité pour les particuliers , monta à cheual le lendemain. Ils furent fort mortifiés de ce départ si prompt , & le prirent pour vne marque du mépris qu'il faisoit d'eux; de sorte qu'ils tascherent de l'arrester par de fausses protestations de ne vouloir rien traiter auprès de sa Sainteté , dont il püst avoir sujet de se plaindre. Mais il connut qu'ils luy tendoient des embusches , & que leur dessein estoit de l'arrester, afin que par son absence , les ordres qu'il avoit établis à Milan, vinssent à se relascher, & qu'ils pussent verifier leur vanterie de l'empescher d'y retourner jamais. Voyant que les choses tiroient de longue , ils escriuient au Gouverneur , qu'il estoit à propos de faire quelques réjouissances publiques , le premier Dimanche de Carême , afin de montrer au Pape , qu'ils n'auoient point accepté les Reglemens du Cardinal , & qu'il se conservoient toujours en leur ancienne

1580.

Le Cardinal
presente
au Pape
les Deputez
qui venoient
contre
luy, &
part de
Rome.

Le Gouverneur
entrepren-
d de faire fai-
re des
Iouſtes
contre
les def-
fences de
S. Char-
les.

poſſeſſion. Auſſi-toſt qu'il euſt receu cét ad-
uis, il fit publier vne iouſte, & commanda
qu'on dreſſaſt tout ce qui eſtoit neceſſaire
pour ce paſſe-temps, auquel il inuita tous
les Gentilſhommes de Milan. Mais aucun
ne fut aſſez complaiſant pour s'expoſer aux
Cenſures fulminées par l'Archeueſque, &
pour violer les deffenſes qu'ils auoient ac-
ceptées. Comme il ſe vid loin de ſon com-
pte de ce coſté-là, ne voulant pas que
l'affront luy en demeuraſt, il commanda à
ſon Capitaine des Gardes, de faire venir
ſa Compagnie de Cheuaux Legers, pour
faire la iouſte. Le Cardinal eſtoit retour-
né à Milan, où ſon Peuple l'auoit receu
comme vn Ange de Dieu, & dès le matin
du premier Dimanche de Careſme, il
s'eſtoit rendu dans ſon Eglife, où apres
auoir celebré la Meſſe Pontificale, il com-
mença la Communion generale. Il y auoit
vne ſi grande foule de gens, qu'encore que
quelques Chanoines communiaſſent à di-
uers Autels, toutefois l'heure de Veſpres
le trouua qu'il faiſoit encore cette fon-
ction. Il la quitta, non pas pour aller man-
ger quelque choſe, mais pour chanter l'Of-
fice: & quand il fut acheué, il monta en
Chaire où il fit vne des plus excellentes Pre-
dications que l'on euſt iamais ouyes de luy.
Cependant qu'il rauifſoit ſes Auditeurs,
non pas par des diſcours eſtudiez, mais par
la force de l'Eſprit de Dieu qui parloit en
luy, le Gouverneur fit paſſer deuant les
portes de l'Eglife, des Caualliers qui de-
uoient faire la iouſte. Ils eſtoient precedez

de beaucoup de Trompettes qui faisoient vn si grand bruit, qu'à peine pouuoit-on entendre la voix du saint Archeuesque. Tout autre que luy eust esté en desordre par vne action si insolente; mais il ne fit qu'une petite pose, & apres auoir leué les yeux au Ciel, il continua son Sermon, non seulement avec la mesme liberté d'esprit qu'il l'auoit commencé, mais encore avec plus de ferueur. Cette tranquillité d'ame ne pouuoit venir, ny d'insensibilité, car naturellement le Cardinal estoit prompt; ny de crainte du Gouverneur, comme il le témoigna bien-tost apres; ny d'aucune reflexion, car il n'eust pas le loisir de se recueillir en soy-mesme; ny d'aucune vertu morale, car elle ne va pas iusques-là. Mais ce fut vn effet de la Grace Episcopale dont il estoit remply, qui est vne grace de fermeté intrepide, & à l'épreuue de toutes les surprises. Quand la Predication fut acheuée, il estoit presque nuit, & le Cardinal estoit demeuré dans l'Eglise depuis le crepuscule du matin, iusqu'au crepuscule du soir sans manger. Il se retira donc chez luy, le cœur percé de douleur, non pas pour l'affront fait à sa personne, encore qu'il fut tres-grand; mais pour le mépris de l'autorité de l'Eglise, & pour l'offense commise contre Dieu. Il assembla des Docteurs habiles & pieux, qui apres auoir considéré l'importance de l'affaire, furent d'avis, qu'il deuoit declarer excommuniez tous ceux qui auoient fait ces iustes scandaleuses, ou qui en estoient les Autheurs,

3. Charles
les déclara
re excom-
muniez
tous ceux
qui a-
uoient fait
les iou-
stes, &
leurs Au-
gheurs.

& de priver de l'entrée de l'Eglise, ceux qui y auoient assisté, conformément aux Ordonnances faites sur ce sujet qui auoient esté toutes publiées. Cela fut aussi-tost executé, & on afficha les Lettres de cette Declaration par toutes les portes des Eglises principales, & aux places publiques. Deux qui auoient esté des spectateurs, dont le plus grand nombre estoit de la maison du Gouverneur, & quelques-vns mesme des iousteurs se firent absoudre incontinent. Cela luy fit tant de dépit, qu'il commanda qu'on les mist en prison, aussi-bien que l'imprimeur des affiches publiques de l'excommunication. Mais vn Predicateur Capucin qui preschoit le Carême dans l'Eglise Cathédrale, parla avec tant de force contre ceux qui résistoient aux Ordonnances de leur Pasteur, & méprisoient les Censures Ecclesiastiques, & contre les Confesseurs timides, ou interessez qui ne leur disoient pas la vérité, que les prisonniers furent mis en liberté. Le Jubilé qui arriva en mesme temps, conuia presque tous les coupables de ce grand desordre, à se faire absoudre; & comme c'estoit ce que saint Charles auoit pretendu, il fut fort content quand il apprit leur conuersion.

Cependant que ces choses se passoient à Milan, les Ambassadeurs de cette Ville contre leur saint Archeuesque, faisoient vne puissante sollicitation à Rome, afin de faire casser ses Ordonnances, & d'auoir la satisfaction qu'ils s'estoient vantez par

tout de remporter aisément. Le Pape mit
 l'affaire en diuerses Congregations , &
 voulut voir luy-mesme toutes les escriu-
 res des parties , & apres les auoir apostil-
 lées de sa main ; enfin il confirma par l'au-
 thorité Apostolique , toutes les Ordonnan-
 ces du Cardinal , comme saintes & viles
 au salut du Peuple. Les Ambassadeurs fi-
 rent de grandes plaintes de ce Iugement,
 mais elles furent inutiles , & ils se virent
 contrains de reuonir à Milan , avec le nom
d'Ambassadeurs du Carnaval , qui estoit tout
 ce qu'ils auoient gagné en leur voyage.
 Gregoire escriuit encore vn Bref à la ville
 de Milan , par lequel il leur recommandoit
 l'obeissance aux Ordres que leur Pasteur
 auoit establis , qui pourroient , dit-il , pa-
 roistre durs & difficiles au commencement
 à quelques-vns , mais qui enfin deuien-
 droient doux & aisez quand la Charité com-
 menceroit à se respendre dans leurs cœurs ,
 & qu'ils voudroient considerer les bonnes
 intentions de leur Archeuesque , qui leur
 auoit témoigné vne amour veritablement
 paternelle en des temps si fascheux , qu'ils
 n'en pouuoient iamais perdre la memoire
 sans se noircir d'vne extrême ingratitude.
 Les Ambassadeurs n'oserent presenter ce
 Bref , & il demeura fermé iusqu'apres la
 mort de S. Charles. Mais on en fit distribuer
 des copies dans Milan , qui donnerent vne
 grande ioye à toutes les personnes de quali-
 ré , & au Peuple , comme à ceux qui n'auoi-
 ent iamais approuué cette Ambassade scanda-
 leuse , & iniurieuse à l'honneur de leur Ville. 1580.

S. Charles vient en poste visiter le Gouverneur qui estoit malade à l'extrémité.

Le Gouverneur & les Magistrats Royaux ne laissoient pas toutefois de continuer à travailler tousiours le Cardinal dans l'exercice de la Iurisdiction Ecclesiastique. C'est ce qui le fit resoudre d'enuoyer en Espagne le Pere D. Bascapé, Clerc Regulier de la Congregation de saint Paul, afin qu'il püst faire entendre au Roy, l'estat veritable des choses, les entreprises de ses Officiers, & les raisons qu'auoit l'Eglise pour s'en defendre. Il le fit partir si secretement, apres l'auoir bien instruit de tout ce qu'il deuoit dire, & negocier, que ses ennemis n'en furent point du tout aduertis; de sorte qu'ils n'eurent pas le loisir de préoccuper le Roy, & de trauerfer sa negociation auant qu'elle fust commencée. Tandis qu'il estoit en voyage, le Gouverneur de Milan que le Cardinal auoit veu auant que d'aller à sa visite du Diocese de Bresse, pour l'exhorter à satisfaire l'Eglise des iniures qu'il luy auoit faites, sans pouuoir rien gagner sur son esprit, tomba malade, & fut desesperé des Medecins. Saint Charles prit la poste aussitost qu'il en fut aduerty, & vint descendre au Palais où il le trouua, & sans aucune connoissance, & dans vne agonie tres-violente. Aussi-tost qu'il se fut approché du liect, elle s'appaisa, & il reuint à luy-mesme; & ce charitable Prelat l'aida à bien mourir, avec autant d'affection que s'ils n'eussent iamais eu rien à démeler ensemble. Il celebra la Messe Pontificale à ses funeraillles, & conduisit le corps à la sepulture, dans le Monastere de la Paix, consola

sa veſue & ſes enfans , & leur offrit toute l'aſſiſtance dont ils auroient beſoin , & qu'il leur pourroit rendre dans leurs affaires. Apres cela , il retourna dans l'Eueſché de Breſſe pour en acheuer la viſite , qu'il faiſoit comme Archeueſque. Elle produiſit des fruits ineſtimables parmy les Eccleſiaſtiques , & parmy le Peuple , ſoit par ſon exemple , ſoit par ſes Predications , ſoit par ſes Ordonnances , ſoit par ſes entretiens familiers qui retirerent beaucoup de pecheurs obſtinez de leur mauuiſe vie , & confirmerent beaucoup de perſonnes vertueuſes en la pratique de la pieté.

Il ſembloit que la mort du Gouverneur deuoit auoir aſſoupy toutes les diſputes pour la Iuriſdiction , entre le Cardinal , & les Officiers du Roy : & cette eſperance , eſtoit d'autant mieux fondée , que le Gouvernement ſe trouuoit dans les mains de D. Sanchez de Gueuarre , qui commandoit dans le Chateau iuſqu'à l'arriuée du nouveau Gouverneur en tiltre. Il arriua toutefois vne nouvelle broüillerie par l'obſtination de l'Assistant Royal , qui faiſoit profeſſion ouuerte d'eſtre ennemy de ſaint Charles. Il auoit deputé l'Archipreſtre de l'Egliſe Metropolitaine , pour viſiter le Grand Hoſpital de Milan , afin d'y eſtablir les ordres neceſſaires pour ſa conduite. L'Assistant Royal en eſtant aduertty , fit cacher les Liures des comptes , & deffendit aux Adminiſtrateurs de ſe ſoumettre à la viſite de l'Archeueſque , ſous pretexte que l'Hoſpital eſtoit excepté par le Concile de Trente ,

Nouvelle
le broüil-
lerie en-
tre ſaint
Charles,
& les Of-
ficiers du
Roy
d'Eſpa-
gne, pour
la viſite
d'un
Hoſpi-
tal.

comme se trouvant sous la protection du Roy. Mais cette exception ne pouuoit pas subsister ; puisque par l'ordre obserué de tout temps, en la nomination des Directeurs, il paroissoit que le gouvernement dépendoit de l'Archeuesque, & qu'ils ne pouuoient rien faire sans son autorité, ou de son Vicaire General. L'Archiprestre tâcha de leur faire comprendre les raisons, & le droict du Prelat qui l'auoit deputé, & tenta tous les moyens de douceur dont il se pût auiser afin de pacifier les choses. Mais comme les Administrateurs estoient soustenus, ou intimidez par l'Assistent Royal, ils ne tinrent compte de tout ce qu'il leur put dire ; de sorte qu'il fut obligé de leur faire signifier vne Monition d'obeir à l'Archeuesque, sous peine des Censures. Ce remede fut vtile, car ils obeirent incontinent, & il n'y eut que celuy qui retenoit les Liures, qui demeura obstiné à ne les pas rendre. L'Archiprestre fut donc contraint de l'excommunier, & ce mal-heureux sous pretexte qu'il estoit Cheualier d'une Religion exempte, se mocqua de l'excommunication. La cause fut portée à Rome, où on declara la Censure auoir esté iuridiquement fulminée. On en fit des plaintes en Espagne ; & le Nonce Apostolique qui estoit Monseigneur Segá, Euesque de Plaisance, deffendit si genereusement les droicts du Cardinal, qu'il en vint vn ordre à ce Cheualier qui retenoit les Liures de comptes de l'Hospital, de les rendre à l'Archeuesque, qui

par ce moyen demeura en possession de le visiter comme auoient fait ses Predecesseurs.

Le Pere D. Bascapé arriva à Badajos Ville sur la frontiere de Portugal, où Philippe second sejournoit pour lors, afin de donner plus de chaleur à la guerre qu'il faisoit en ce Royaume, pour s'en mettre en possession apres la mort du Roy Henry, Successeur de Sebastien qui auoit esté tué en la bataille perduë contre les Mores en Affrique. Comme cette grande affaire luy touchoit fort au cœur, & estoit de la dernière importance, il ne donnoit audience à personne. Toutefois ayant sceu qu'il y auoit vn Ecclesiastique de condition qui la demandoit pour des affaires tres-importantes, il le vid le troisième jour apres son arrivée. Le Pere D. Bascapé luy presenta les Lettres de Saint Charles, & les Reliques qu'il luy enuoyoit, qui estoient la moitié du corps d'un des enfans que fit tuer Herode dans le terroir de Berthelem, & luy demanda encore la grace d'une autre audience, parce qu'il auoit beaucoup de choses à luy dire de vive voix, de la part du Cardinal, qu'il ne pouuoit mettre par écrit. Le Roy la luy promit, & la luy donna trois jours apres avec beaucoup de bonté. En cette audience le Pere D. Bascapé luy fit vn recit fidelle & succinct de l'estat où estoit le Diocese de Milan, des soins qu'auoit pris Saint Charles d'y reformer les desordres publics & particuliers, des principales ordonnances publiées pour ce su-

Le quatrième d'Aoust 1581.

Le Pere D. Bascapé a audience du Roy d'Espagne pour les affaires de S. Charles,

L v

iet, & des oppositions que ses Officiers luy auoient tousiours faites, sous pretexte de deffendre son autorité, des scandales qu'elles auoient causez, & des dommages que la Religion en souffroit. Il conclūd par vne tres-humble priere de vouloir luy-mesme prendre connoissance de cette affaire, ou de la commettre à des personnes pieuses qui eussent connoissance des droicts de l'Eglise, & qui fussent zelées pour la gloire de Dieu, & pour le salut des ames. Pour ce qui regardoit les droicts de la Iurisdiction, il protesta que S. Charles n'en vouloit pas parler, que la cause estoit pendante pardeuant le Pape, & qu'il s'en remettoit à son iugement. Philippe l'escouta avec beaucoup de patience, & le congedia avec de bonnes paroles. Quelque temps apres il luy fit dire, qu'il auoit remis cette affaire à son Confesseur, qui estoit le Pere Diego Claesio Dominiquain, & qu'il pouuoit negocier avec luy en toute sorte de liberté. Ce choix du Roy d'Espagne le consola beaucoup; car ce Religieux estoit vn homme de grande pieté, & tout à fait des-interessé dans l'affaire dont il auoit à traiter. Il l'instruisit à fond des raisons du Cardinal, & luy fit voir si clairement la droicte de ses intentions, la iustice, & la necessité de toutes ses Ordonnances, que le Confesseur en fit son rapport au Roy, à l'auantage de Charles; & luy representa que sa conscience l'obligeoit de soutenir vn Prelat qui trauailloit si utilement à la reforme de son Diocese, &

que Dieu auoit fuscité en son Siecle pour estre l'exemple de tous les autres Euesques. Philippe demeura fort satisfait de cette relation, & ordonna que l'on fist les dépenses les plus fauorables que S. Charles pouuoit souhaiter. Mais deux accidens empescherent pour quelques iours qu'elles ne fussent expédiées, & que le Pere D. Bascapé ne püst auoir audience. L'vn fut la maladie du Roy qui le mit à deux doigts du tombeau; & l'autre, la mort de la Reine, d'vne couche auant terme. Quand il fut en estat de traiter d'affaires, l'Enuoyé du Cardinal prit congé de luy, & il le chargea de le recommander aux prieres de son Maître, & de l'asseurer de sa protection. Il luy offrit en particulier vn Benefice fort considerable dans l'Estat de Milan, ou pour quelqu'vn de ses parens: mais ce bon Pere remercia sa Majesté, & s'estima trop bien payé de son voyage, de remporter à son Archeuesque, la satisfaction qu'il souhaittoit. Le Confesseur du Roy luy écriuit vne grande lettre, & l'assura qu'auant que le Duc de Terreneue partist pour Milan, dont il auoit esté choisi Gouverneur, le Roy luy donneroit des ordres exprés de bien viure avec luy, & de l'appuyer de son autorité en toutes les choses où il en auroit besoin. Saint Charles receut le Pere D. Bascapé qui luy apportoit de si bonnes nouvelles, avec vne grande ioye, & le loüa beaucoup de l'adresse qu'il auoit monstrée en sa negociation. Ses ennemis en furent fort mortifiez, & quand le nouveau Gouverneur

Le Pere
D. Bascapé rap-
porte à S.
Charles
des dé-
penses

tres. fa-
nora-
bles.

Les dis-
putes
pour la
Jurisdi-
ction ces-
sent en-
tière-
ment.

uerneur arriva, les choses prirent vne au-
tre face. Il rendit au Cardinal tout le res-
pect que l'on pouuoit attendre d'un hom-
me très-pieux. Il protesta hautement qu'il
auoit ordre de son Maistre, de l'assister en
toutes les occasions où il en auroit be-
soin, & de ne rien faire de consequence
dans le Gouvernement, sans son aui. Les
autres Ministres du Roy d'Espagne auoient
aussi receu des Lettres qui leur ordon-
noient la mesme chose. Le Chasteau d'A-
rone fut remis entre ses mains, & de cette
façon la tempeste qui auoit duré si long-
temps contre luy, fut changée en vne pro-
fonde bonace, & il ne trouua plus d'ob-
stacle dans la conduite de son Diocese de
la part des Ministres du Prince, qui le
considera tousiours comme vn homme de
Dieu. Il falloit vne fermeté pareille à la
sienne pour résister si long-temps à vn
orage si terrible & si opiniastre : & pour
peu qu'il eust relasché, l'autorité des
Archeuesques de Milan estoit aneantie
pour iamais, & celle du Gouverneur
elleuée sur ses ruines. Cette diminution
luy ostant le moyen de punir les pecheurs,
& d'establir les ordres necessaires pour
reformer les abus de son Diocese, eust
rendu toutes ses bonnes intentions inu-
tiles, & ramené l'ancienne confusion
qu'il auoit si heureusement changée en
vne police merueilleuse. Ce ne fut ny l'au-
sterité de son esprit, ny le desir de se si-
gnaler sur les autres Prelats par vne re-
sistance vigoureuse, ny aucun mécon-

tement contre les Magistrats, qui l'obligèrent à demeurer si ferme. Le zele seul de l'honneur de l'Eglise, & de l'autorité de sa charge, & du salut des ames, luy fit mépriser tous les perils qu'il pouvoit courir, & refuser tous les accommodemens que la prudence politique vouloit luy faire accepter. Aussi comme il bâtissoit sur la pierre solide, l'edifice demeura inébranlable, & Dieu qui vouloit l'éprouver par cette persecution, la finit aussi glorieusement qu'il pouvoit souhaiter.

CHAPITRE XXVI.

Des choses que fit Saint Charles durant les contestations pour la Jurisdiction.

LEs mauvais Euesques sont souvent trauez aussi-bien que les bons. Mais il y a cette difference entre eux, qu'outre que ceux-là donnent sujet aux Peuples de les contrarier, par le mauvais exemple de leur vice, ou par l'imprudence de leur conduite, les difficultez qu'ils rencontrent leur font perdre aussi-tôt courage, & qu'ils abandonnent le soin de leur Diocese, aussi-tôt qu'ils voyent quelque opposition au bien qu'ils y veulent faire. Cela procede de ce qu'ils ne se conduisent pas par l'Esprit de Dieu, qui n'estant autre chose que la Charité, est patient, & qui fait

considerer les hommes comme des malades dégoustez, & bien souuent furieux, qu'il faut guerir en dépit qu'ils en ayent. Au contraire, les Euesques qui sont dignes de ce nom, reçoient les persecutions qui leur arriuent, comme des marques d'amour du Pasteur des Pasteurs, lequel ayant parcouru la Judée durant près de quatre ans pour y porter la lumiere de la doctrine celeste, & y guerir tous les malades qu'on luy presentoit, auoit receu la plus cruelle & la plus honteuse mort dont le plus méchant des hommes pouuoit estre puny, pour recompense du bien qu'il auoit fait aux Iuifs. Ils considerent que les Saints Euesques des Siecles passez, les Athanases, les Hilaires, les Basiles, les Gregoires de Nazianze, les Chrysostomes, & les Cyrilles, n'ont eu que des tempestes, ou domestiques, ou estrangeres, à souffrir durant leur Pontificat; & que c'est vn Oracle de la Verité eternelle; que le Monde ne peut aimer que ce qui est sien, & par consequent, qu'il doit haïr vn bon Euesque qui combat toutes ses maximes, & qui veut destruire sa tyrannie. S. Charles se consolait par la meditation de ces veritez, & les reduisoit en pratique. Car comme il ne doutoit point que les persecutions qu'il souffroit ne fussent des leçons amoureuses que Dieu luy faisoit, pour le rendre vn saint Archeuesque, & pour augmenter son zele, afin qu'il s'appliquast avec plus de soin qu'il n'auoit encore fait, à procurer le bien des

*S. Jean,
ch. 15.*

1

ames dans son Diocèse, il mit son esprit en repos du costé de ses persecutions, & ne songea plus qu'au salut des brebis.

Il auoit desia estably dans sa famille, l'abstinence de la chair, des œufs, & du laiët, & quelques ieufnes dans la semaine, durant le temps de l'Aduent. Mais ne se contentant pas que cette deuotion fust pratiquée dans sa famille, il publia vne Lettre Pastorale adressée à son Peuple, par laquelle apres auoir representé la coustume de l'ancienne Eglise, qui estoit de se preparer par le ieune, & par des œuvres particulieres de deuotion, à la celebration de la naissance de Nostre-Seigneur; il exhorte tous les Fidelles qui sont sous sa charge, de renoueller cette pratique, & de s'abstenir pour le moins des réiouissances, des jeux & des festins, en vn temps si saint, afin de receuoir les graces que le Fils de Dieu a apportées au Monde, y entrant comme vn enfant foible, & sujet aux infirmités des autres enfans d'Adam. Cette Lettre fit vn fruit merueilleux dans son Diocèse. Car plusieurs personnes l'ayant leuë, ou ieufnerent l'Aduent tout entier, ou s'abstinrent de manger de la viande, ou se priuerent des œufs, & du laiëtage, ou firent quelques ieufnes en chaque semaine. On vid plus de monde aux Eglises durant les diuins Offices; les Sacremens furent plus frequentez, & il y eut plus de presse aux Predications qui se faisoient dans la Ville.

Comme Saint Charles vid le succès de

1573.

S Charles
publie
vne Let.
tre Pa-
storiale
pour le
ieune de
l'Aduent.

Seconde
Lettre
pour le
Jeusne de
Carême.

cette Lettre, il en publia vne autre quel-
que temps auant le Dimanche de la Sep-
tuagesime de l'année 1574. Son dessein
estoit de monstrier au Peuple, de quelle fa-
çon il se deuoit preparer à celebrer le Ca-
resme, pour entrer dans les sentimens de
l'Eglise, qui ne pouuoit souffrir, que l'on
passast au temps de la Penitence, par les
débauches, & les desordres du Carnaval.
Il est deregulé par tout le monde, mais on
peut dire que son dereglement regne en
Italie, & qu'il triomphoit à Milan. Car
non seulement il commençoit dès le mois
de Iannier, mais il alloit iusques dans la
premiere semaine de Carême; & durant
ce temps, il sembloit que ce fust vn cri-
me de paroistre sage, tant la folie estoit
vniuerselle & publique par toutes les ruës.
Le Saint Cardinal ne se contenta pas d'ex-
horter les Milanois à quitter cette mau-
uaise coustume; il ordonna que les Diman-
ches & les Festes, depuis la Septuagesime
iustqu'au premier Dimanche de Carême,
le Saint Sacrement seroit exposé dans l'E-
glise Metropolitaine, & dans trente au-
tres, disposées par les quartiers de la Vil-
le; qu'il s'y feroit des Processions solem-
nelles, & qu'il y auroit des Predications
par des hommes celebres, afin d'attirer le
Peuple, & de le détourner adroitement
des spectacles, & des recreations dange-
reuses qui se faisoient. Il commanda aux
Recteurs des Escoles Chrestiennes, de
les mener à ces Eglises, & de se rendre
avec elles apres Complies à la Carbe;

Arable, où toutes ensemble faisoient oraison mentale, durant quelque temps sous la direction des Prestres qu'il auoit deputez pour donner les poincts de la Meditation. Pour conuier les Fidelles à pratiquer ces saints exercices, il donna des Indulgences à ceux qui visitoient le Saint Sacrement, & le Dimanche de la Quinquagesime qui estoit celuy où on auoit accoustumé de faire de plus grands desordres, il fit vne Communion generale, où il distribua de sa main à ses cheres brebis, le pain du Ciel auquel elles s'estoient preparées par tant de bonnes œures. Elles accoururent à la sainte Table, en vn nombre presque infiny, & l'ameureux Pasteur ne pouuoit contenir sa ioye, voyant cette foule qui profitoit si bien de ses enseignemens.

Il employa presque toute cette année à visiter les Paroisses dans son Diocese, & ce fut en ce temps-là qu'il receut aduis que Henry III. deuoit passer par le Milanois pour venir en France prendre possession de son Royaume, que la mort de Charles IX. son frere luy auoit laissé. Il s'estoit enfuy de Pologne qui l'auoit esleu pour son Souuerain, esperant de la valeur qu'il auoit rémoignée aux batailles de Iarnac, & de Moncontour, de voir prosperer ses armes sous sa conduite. Aussi-tost le Cardinal enuoya vn Gentilhomme de qualiré pour luy faire compliment, auant qu'il entrast dans son Diocese; & le Roy qui estoit le plus ciuil de tous les hommes, le receut admirablement bien. Il luy récriuit vne

Il reçois
le Roy
Henry
III.

Lettre tres-ciuile , par laquelle il luy témoignoit vn extrême desir de connoistre sa personne , comme il connoissoit desia sa vertu par reputation. L'entreueuë se fit à Mouza. Charles y arriuant descendit à la maison de l'Archiprestre , & enuoya vn Prelat Milanois au Roy , pour luy demander l'heure où il pourroit rendre ses tres-humbles deuoirs à sa Majesté. Comme ce Prince apprit qu'il se dispoisoit en l'attendant de celebrer la sainte Messe. Quoy , dit-il , luy-mesme veut dire la Messe? Ouy, Sire , répondit cét Enuoyé , il la va dire, & il la dit tous les jours , s'il n'est malade. Allez donc l'aduertir , repliqua le Roy, que ie la veux entendre. Apres qu'il l'eut celebrée , il vint faire sa visite , & il fut receu avec tant de ciuilité , & de marques d'estime particuliere de sa personne , qu'il en demeura tres-satisfait. Car le Roy le fit courir incontinent , & l'entretint de plusieurs choses avec cette grace qui luy estoit particuliere , & qui le rendoit d'autant plus aimable aux Italiens , qu'elle estoit extrêmement esloignée de cette grauité Espagnole qui compte tous ses pas, & pese toutes ses paroles. Le Cardinal qui vouloit que toutes ses conuersations fussent Episcopales , donna à ce Prince plusieurs aduis pour la conduite de sa vie particuliere , & pour le gouuernement de son Royaume, sçachant le mal-heureux estat où il se trouuoit par la diuision de la Cour , & par la faction des Heretiques. Il luy recommanda entre autres choses la deffense de la Reli-

gion Catholique, comme celle qui estoit la pierre fondamentale de son throsne, & le plus precieux ioyau de la Couronne de France, qui se pouuoit vanter toute seule entre les autres Couronnes du Monde, de n'auoir encore esté iamais portée par vn Prince soupçonné d'heresie. Henry receut ses aduis avec respect, & se tint obligé du Reliquaire d'or qu'il luy enuoya sur le point qu'il alloit partir. Comme il estoit tres-liberal, il voulut faire donner mil écus à ceux qui le luy presenterent de sa part. Mais ils auoient ordre de refuser tout ce qui leur seroit offert. Il eust esté à souhaiter que ce grand Prince se fust bien souuenu des conseils du Cardinal, & qu'il eust fuiuy l'idée qu'il s'estoit formée pour le gouuernement de son Estat. Mais s'il ne les suiuiot pas exactement, il conserua tousiours vn grand respect pour luy; & quand il sceut les nouuelles de sa mort, il dit publiquement; *Que si tous les Italiens rassembloient à ce Saint Cardinal, il ne nommeroit pour Euesques en son Royaume que des hommes de cette nation.* Le Pape qui sceut comment cette entreueuë s'estoit passée, le loüa beaucoup d'auoir rendu au plus grand Roy de l'Europe, l'honneur qui luy estoit deu, & conserué tout ensemble la dignité de Cardinal, sans qu'il eust monstté aucune affectation pour cela, ny donné sujet de l'accuser de vanité, aux Courtisans qui nomment ainsi la conseruation vigoureuse de la dignité Ecclesiastique, dont l'éclat leur blesse la veuë, & qu'ils

voudroient voir auili comme ils s'auiilif-
sent eux-mesmes.

Ordon-
nance
pour la
celebra-
tion des
Festes.

Charles fit en ce mesme temps publier
vne autre Ordonnance pour la sanctifica-
tion des Festes, dont il representoit l'im-
portance & l'vtilité par l'autorité des
Saints Peres, par la tradition de l'Eglise,
& par des raisons tres-puissantes. Elle con-
tenoit plusieurs Reglemens : mais le prin-
cipal fut, qu'aucun Laïque ne prist sa place
dans le Chœur des Prestres, durant la ce-
lebration des Offices diuins. C'estoit sui-

Il' def-
fend l'é-
trée du
Chœur
des Eglis-
ses aux
Laïques.

ure l'exemple du grand Saint Ambroise,
qui n'auoit pas voulu permettre à Theo-
dore mesme d'y demeurer, apres qu'il eut
fait son offrande à l'Autel, mais qui luy fit
dire, que ce n'estoit pas sa place. Ajour-
d'huy par vn renuersement bien estrange,
ou plutôt par vne corruption digne d'es-
tre pleurée avec des larmes de sang, en
France le Chœur de nos Eglises Cathedra-
les n'est plus la place des Prestres, mais des
Magistrats seculiers, qui les en chassent, &
qui croient leur faire vne grande grace de
permettre qu'un petit nombre y demeure,
tandis que le plus grand a la douleur de ne
pouuoir assister aux principales ceremo-
nies, & à l'Office aux jours des plus gran-
des Festes. On a veu arracher des Chanoi-
nes de leurs places par de ieunes gens qui
auoient plutôt la mine de Galans parez
pour le Bal, que de Senateurs graues, &
serieux; & ces injures non seulement sont
souffertes, mais elles sont autorisées; & il
n'y a plus d'apparence de remede à vn mal

Si déplorable, parce que les parties sont les Juges des differends de cette nature. Le second Reglement de S. Charles pour les Eglises, fut que les femmes y entraissent la veste voilée; en quoy, il renouelloit l'ordre estably par l'Apostre S. Paul, qui recommandoit aux femmes de se mettre en cet estat pour le respect des Anges, soit qu'il entende à la lettre les Esprits bienheureux, lesquels sont dans les Temples consacrez à IESUS-CHRIST, & pour l'honneur desquels il veut qu'elles se couvrent: soit que comme l'ont interpreté les Saints Peres, il ait intention de parler des Prestres, qui sont les Anges visibles du Seigneur. C'estoit la coustume des anciennes Chrestiennes, & elle se renouella si bien dans Milan, apres l'ordonnance du Saint Cardinal, que non seulement elles se couvroient entrant dans les lieux dediez à Dieu, mais mesme qu'en marchant dans la Ville, elles alloient voilées.

L'année du Jubilé Vniuersel approchoit, 1575; & le Cardinal desirant que son Peuple profitast des thesors que l'Eglise leur ouvroit si abondamment, fit publier vne Lettre Pastorale, par laquelle il les conuioit d'aller visiter les sept Eglises de Rome, & leur enseignoit de quelle façon il falloit se conduire en ce voyage, afin de se disposer à gagner l'Indulgence. Il les aduertissoit de faire vne confession generale, auant que de se mettre en chemin, de cheisir la compagnie de personnes vertueuses; d'éviter toute débauche de bouche; & de reciter tous les iours, ou

Il ordonne que les femmes seront voilées dans les Eglises.

2. Cor. ch. II.

Il dispose son peuple à gagner le Jubilé qui estoit à Rome.

Auis
pour bie
faire le
voyage
de Ro-
me,

les sept Pseaumes Penitenciaux, ou le Rosaire, ou les Litanies de la Vierge; & en arriuât le soir aux lieux où ils deuoient coucher, d'aller droit à l'Eglise Parrochiale, pour adorer le S. Sacrement, & pour demander à Dieu, par l'intercession du Saint à qui elle estoit dediée, la grace de continuer heureusement leur voyage. Il donnoit aussi des auis à ceux qui ne pourroient pas quitter leurs maisons, afin de passer l'année sainte, saintement; & sur la fin, il exhortoit les pecheurs obstinez à ne laisser pas échapper ce temps acceptable, & ces iours de salut, de se conuertir parfaitement à Dieu, & de satisfaire à sa Iustice par vn moyen si facile, pour obtenir le pardon de leurs offenses.

Il va à
Rome
gagner
le Iubilé,

Saint Charles apres auoir donné ces ordres dans son Diocese, resolut d'aller à Rome pour gagner le Iubilé, & remit son voyage à l'Automne de l'année Sainte. Mais le Pape l'inuita si amoureusement, & si fortement de partir auant l'ouuerture, afin de résoudre par ces auis, beaucoup de choses vtils qu'il auoit enuie de faire pour l'edificatiō des Estrangers qui arriueroyent à Rome, qu'apres auoir receu de sa Sainteté, vne licence par écrit de laisser son Diocese, & estably tous les ordres necessaires pour son gouuernemēt en son absence; il se mit aussitost en chemin. Ce fut plûtoſt vn Pelerinage qu'un voyage. Car il se détourna pour visiter tous les lieux de deuotion qui estoient à droit, & à gauche, comme le Monastere de Camaldouli; le mont Aluerne, où Saint François auoit receu les Strigmates; le

Mont d'Olivet, Valombreuse, & plusieurs autres Eglises qui estoient en quelque reputation. C'estoit dans le mois de Decembre qu'il marchoit, & il suivoit les hautes montagnes de Toscane, où les chemins sont tres-difficiles, & les gistes tres-mauvais. Il disoit la Messe tous les iours avant l'Aurore; il marchoit bien avant dans la nuit; il ieusnoit, parce que c'estoit le temps de l'Aduent; Il ne faisoit porter aucunes provisions, & d'ordinaire à peine trouuoit-il de mauuais pain dans les hostelleries; de sorte que tout ce voyage fut vn temps de tres rigoureuse Penitence pour luy.

Il arriua à Rome le iour de Saint Thomas, & le Pape le receut avec des marques extraordinaires d'amitié & d'estime pour luy. Aussi-tost il eut communication de beaucoup de choses que sa Sainteté auoit enuie d'establir, pour faire que durant l'année sainte, Rome parust vne Ville sainte aux Estrangers qui y deuoient aborder de tous les lieux du Monde. Dès que ces affaires furent expédiées, il se retira dans le Monastere des Chartreux où il se prepara à gagner le Iubilé par des ieusnes, des veilles, & d'autres austeritez extraordinaires. Apres cela, il cōmença la visite des Eglises qu'il fit à pied, & quelques-vnes pieds nuds. Ses domestiques le suiuoient, & marchoiēt deux à deux avec vne contenāce mortifiée, & recitant des prieres vocales, ou faisant oraison. Pour luy, il estoit tellement occupé de Dieu, qu'il ne reconnoissoit pas ses meilleurs amis en chemin. Le Seigneur Colonne & son

De quel-
le façon
S. Char-
les fai-
soit les
Stations.

fils le rencontrant hors la Ville , comme il
 alloit à l'Eglise de Saint Paul, descendirent
 de carosse pour le saluer. Mais il passa son
 chemin sans les voir, non plus que sa Sœur,
 femme de Fabrice Colonne, qui estoit avec
 son beau-pere , & son mary. Il traita de
 mesme le Duc de Parme qui l'honoroit par-
 ticulierement ; & ces Seigneurs bien loin
 de s'en offencer , en furent fort édifiez.
 Plusieurs Gentilshommes se joignoient à
 sa compagnie pour faire les Stations avec
 la mesme deuotion que les personnes de sa
 suite. A cet extérieur si pieux & si modeste,
 le Saint Cardinal joignoit des œuvres de
 veritable pieté. Car il faisoit de grandes
 aumosnes , & retiroit dans les maisons de
 son Titre de Sainte Praxede, les Pelerins
 Milanois, & beaucoup d'autres Estrangers
 qui ne trouuoient point de couuert. Cette
 conduite le fit regarder comme vn Saint
 de toute la Ville de Rome, & plusieurs per-
 sonnes y estant venuës de toutes les Pro-
 uinces Catholiques , elles furent autant de
 trompettes de ses loüanges dans leur país,
 où elles publierent les actions de vertu
 qu'elles luy auoient veu faire.

Il fut fort assidu auprès du Pape , à qui il
 parla avec la liberté d'vn Saint Euesque,
 pour le porter à s'appliquer courageuse-
 ment & diligemment à la conduite de l'E-
 glise, dont Dieu luy auoit commis le soin,
 & à donner , par la reforme de sa famille,
 l'exemple aux autres Euesques de reformer
 les leurs , & d'estre de veritables Pasteurs
 des ames rachetées du sang de I. CHRIST.

Entre

Il donne
 de bons
 aduis au
 Pape.

Entre les aduis qu'il luy donna, le principal fut d'enuoyer des Visiteurs Apostoliques dans les Dioceses, afin de voir de quelle façon les Euesques se conduisoient, & comment ils faisoient obseruer les Decrets du Concile de Trente. Pour executer ce conseil, le Pape le chargea de la visite des Eueschez de la Prouince de Milan, comme Delegué Apostolique. Mais auant que d'accepter cette charge, il voulut que le S. Pere nommast vn Visiteur pour son Diocese; & il luy donna Ieronimo Ragazzone, Euesque de Famagouste en l'Isle de Chypre, qui le fut depuis de Bergame, Prelat d'vn tres-grand esprit, & d'vne plus grande vertu. Enfin, il prit congé de sa Sainteté, dont il obtint toutes les graces qu'il iugea necessaires pour l'establissement de la Discipline Ecclesiastique dans son Diocese, & pour la consolation de son Peuple. Il apporta la Bulle pour le Iubilé qui se deuoit gagner dans Milan en l'année 1576. l'Indulgence des sept Eglises de Rome, comme nous auons desia dit, & vn nombre infiny de Chapelets & de medailles benits par le S. Pere. Mais vne des plus belles actions de ce voyage, fut qu'il laissa le nom, & les Armes de la famille de Borromée, & prit pour celuy-là, son tiltre de Cardinal, qui estoit de sainte Praxede, & pour celles-cy, les images de S. Ambroise, & des Saints Martyrs, Geruais & Prothais, avec ce mot, *Tales ambio defensores, le souhaite de tels defenseurs*. Le terme *Ambio* a vne force plus grande, mais nostre langue ne le peut bien rendre: car

M

de tourner i'ambitionne de tels Defenfeurs , feroit moins François , & moins intelligible.

S. Charles part de Rome.

Il partit doncques de Rome au commencement du mois de Février pour s'en reue-
nir à son troupeau , dont l'abſence luy don-
noit de continuelles inquietudes. Il auoit
promis à Cefar de Gonzague , qui auoit ef-
pouſé ſa ſœur Camille , de l'aller voir à
Guaſtale , à ſon retour , pour y consacrer
vne Eglise qui auoit eſté nouuellement ba-
ſtie en vn lieu aſſez proche. Quand il arriua
à Bologne , il eut aduis que ce Prince eſtoit
abandonné des Medecins , & qu'il ſe mou-
roit. De ſorte que ſans ſe repoſer , il vint à
Guaſtale , & alla droit à la chambre du ma-
lade qu'il trouua dans vne réuerie furieufe,
& hors d'eſtat d'entendre ce qu'on luy di-
ſoit. Le Cardinal en fut touché de pitié , &
incontinent il fit expoſer le S. Sacrement , &
faire des prieres publiques pour luy. Il paſ-
ſa luy-mefme toute la nuit en Oraïſon ,
demandant à Dieu avec des gemiſſemens &
des larmes, le bon ſens pour ſon beau-frere,
& la grace d'une parfaite conuerſion. Il
l'obtint , & le malade reuint tout d'un coup
à luy-mefme , & fut capable de ſe confeſſer ,
& de receuoir le ſacré Viatique avec tant de
témoignages de repentir de ſes fautes ; &
vne ſi parfaite ſoumiſſion à la volonté de
Dieu , que S. Charles rendit vn témoigna-
ge tres-conſiderable de ſa fin Chreſtienne.
Quand les funerailles furent faites , & qu'il
eut consacré l'Eglise à laquelle il s'eſtoit en-
gagé , & conſolé ſa Sœur apres vne ſi gran-

de perte, il reuint à Milan. Le Peuple l'y re-
 ceut avec vne ioye que l'on ne pouuoit
 soupçonner d'estre contrefaite, mais qui
 paroissoit sur le visage, & dans les yeux de
 tout le monde, d'une façon si extraordinai-
 re qu'il en fut extrêmement consolé. Cer-
 tes, s'il y a quelque recompense en la terre
 pour les trauaux d'un bon Euesque, dont il
 luy soit permis de iouyr; c'est l'affection du
 Peuple qu'il gouuerne, quand elle naist de
 la reconnoissance des soins qu'il prend de
 sa conduite. Il n'appartient qu'aux tyrans
 de dire, Qu'ils me haïssent, pourueu qu'ils
 me craignent; & vn Prelat qui auroit les
 mesmes sentimens, seroit vn loup enragé
 dans sa Bergerie, & non pas vn Pasteur de
 brebis. Aussi-tost que le Saint Cardinal eut
 receu les complimens de toute la Ville, il
 s'appliqua à son ordinaire au gouuernement
 du Diocese, & se prepara à la visite
 des autres, dont le Pape l'auoit chargé.
 Mais auant que de commencer cette fon-
 ction, il receut son Visiteur Apostolique
 avec toute sorte d'honneur & de respect,
 pour témoigner son obeïssance au S. Siege,
 & enseigner à son Peuple, par son exemple,
 à reuerer celuy qui venoit de la part du Pe-
 re des Chrestiens. Il l'entretint fort parti-
 culierement des choses qu'il estimoit estre
 à faire dans sa visite, & luy donna tous les
 aduis necessaires pour la rendre fructueuse.
 Comme il l'eut veü en bon chemin, il
 partit pour faire celles de sa Prouince, & ne
 mena que six hommes avecque soy, qui ser-
 uoient tous pour les fonctions Ecclesiasti-

Il reuiet
à Milan.

Il reçoit
le Visi-
teur A-
postoli-
que.

ques. Il viuoit aux despens du Clergé qu'il visitoit, suiuant l'ordre des Saints Canons qui donnent ce droit aux Euesques Diocesains, que l'on appelle droit de Procuration; estant bien raisonnable que celuy qui laisse sa maison, & renonce à son repos pour les fatigues d'une longue visite, ne soit pas encore chargé d'une dépense, que bien souuent il ne pourroit faire pour auoir trop peu de reuenu. Mais le bon Cardinal en faisoit une si frugale, qu'il faisoit autant ceux qu'il visitoit par sa trop grande sobriété, que d'autres les affligent & les incommode, par la magnificence du traitemens qu'ils desirerent. Je ne m'arresteray point à descrire particulièrement la visite de sa Province qui fut d'un tres-grand fruit pour les Ecclesiastiques, & pour le peuple. Car il donna de si grands exemples de pieté, de desinterressement, de mépris des voluptez, d'austerité de vie, d'amour de Dieu, de soin des pauures, de zele pour les ames, de douceur & de patience. Il prit une connoissance si exacte de toutes choses; il fit des Reglemens si vtils, & si necessaires; il escouta si fauorablement toutes les plaintes; il remedia aux desordres avec tant de sagesse; il accorda tant de querelles fascheuses; il eut tant d'adresse à retirer les pecheurs obstinez hors de leur mauuaise vie: Enfin, il parla dans ses Predications avec tant de force, que la Grace de Dieu se seruit de luy pour faire des conuersions admirables. Le Peuple se pressoit pour l'entendre, & l'Histoire Italienne de sa vie remarque qu'à

Il visita
sa Pro-
vince,
comme
Delegué
du Pape.

Bergame, il communia en vn iour, onze mille personnes. Il trouua que les Corps des Martyrs, Firmus & Rusticus, reposoient dans vne Eglise d'un des Faux-bourgs avec peu de reuerence, & il iugea qu'il estoit à propos de les transporter dans la Ville. Les Habitans du Faux-bourg en estant aduertis, prirent les armes, se saisirent de l'Eglise, & se preparerent à empêcher par la force le transport de leurs Reliques. Le Cardinal qui en fut aduerty, les declara excommuniez, & ce foudre les espouuenta si fort, qu'ils demanderent incontinent pardon de leur faute. Le Cardinal leur donna l'absolution, & fit cette translation avec le concours de tout le peuple de la Ville. Dans Cremone, où il demeura trois mois, il visita vn des principaux Gentils-hommes qui estoit malade d'une fièvre pourpreuse, & desesperé par les Medecins. A peine se fut-il approché de son liét, que la fièvre le quitta, & il se leua dès le lendemain; ce qui ne seruit pas peu pour disposer les Cremonois à recevoir les Reglemens qu'il voulut establir dans leur Eglise.

Il auoit obtenu le Iubilé pour la Ville de Milan, & auant que de le publier, il fit imprimer vne Lettre Pastorale; dans laquelle il expliquoit à son Peuple, le prix du trésor des Indulgences que le Pape luy ouuroit si liberalement, & l'exhortoit à se disposer par vne veritable penitence, à le gagner. Il y reprenoit les vices qui regnoient dans la Ville, & assignoit les Eglises qui deuoient

1576.

Il publie
le Iubilé
dans Mi-
lan.

estre visitées , & donnoit les autres ordres neceffaires pour faire les ftations avec modestie , & avec pieté. Il commanda qu'elles fuſſent richement ornées , & qu'on les diuiſaſt par le milieu avec des planches de bois , afin de ſeparer les hommes d'avec les femmes. Il trouua le moyen d'empêcher qu'aucun n'allàſt ny à cheual, ny en caroffe, diſpenſant les vieillards & les malades des viſites eſloignées , & leur donnant des lieux proportionnez à leurs forces. Il fit preparer des logis pour recevoir ceux qui viendroient à Milan , des Parroiſſes de ſon Dioceſe , les vns pour les hommes , & les autres pour les femmes ; & ſur les grands chemins il fit mettre des Croix eſſeées pour faire ſouuenir les Pelerins de la Paſſion du Fils de Dieu , & empêcher qu'ils ne s'égaraffent. Le iour de la Purification de la ſainte Vierge, apres auoir celebré la Meſſe Pontificale , il monta en Chaire , publia le Iubilé , & fit lire la Bulle du Pape , & toutes les Ordonnances qu'il auoit faites pour le gagner. Enſuite il fit trois Proceſſions generales , le Mercredy , à l'Egliſe de S. Ambroïſe ; le Vendredy , à celle de S. Laurens ; & le Samedy , à celle de S. Simplicien ; mais auant que les Stations s'ouuriſſent, il mit les prieres de quarante heures dans la Cathedrale , pour obtenir de Dieu l'eſprit de Penitence neceſſaire pour profiter du Jubilé.

Il fait la translation des
 Durant ce temps de deuotion , il fit la translation du Corps de S. Mona , l'un de ſes Predeceſſeurs , qui eſtoit Milanois , &

de la famille des Borri, l'une des plus nobles de la Ville. Il porta avec le Visiteur Apostolique qui estoit à Milan, les Reliques de ce saint Prelat, & tout le peuple assista à la Procession, qui se fit depuis l'Eglise de S. Vital, iusqu'au Dôme, avec beaucoup de deuotion & de marques d'alle-gresse, pour honorer vn de leurs Conci-toyens. Il fit encore vne autre translation des Corps des Martyrs Saints Fidele, & S. Carpophore, de l'Eglise del'Abbaye d'Aro-ne que possedoient les Iesuites, à celle de S. Fidele qu'ils auoient à Milan. Quand les prieres de quarante heures furent finies, il fit la Procession generale pour ouurir le Iu-bilé. Le Clergé, les Religieux, & les Con-frairies de la Ville y assisterent avec tant d'ordre & de deuotion, que le saint Cardin-al en fut tres-satisfait & tres-consolé. Il commença à visiter les Eglises; où il fut ac-compagné des Chanoines de la Cathedra-le, & de ses domestiques, qui marchoi-ent deux à deux, recitant les Litanies, & des Pseaumes à voix basse; & avec vne conte-nance qui edifioit merueilleusement ceux qui les voyoient. En chaque Eglise où il trouuoit le peuple assemblé, il leur faisoit des exhortations courtes, mais qui estoient tres-feruentes, & toutes réplies de l'Esprit de Dieu, dont il estoit plein. Il auoit per-mis de gagner le Jubilé assistant aux Pro-cessions des Parroisses; de sorte que durant quinze iours, les ruës de Milan furent plei-nes de personnes qui alloient ensemble aux Stations. On ne rencontroit que des Cōpa-

Reliques
de quel-
ques
Saints,

gnies de Penitens vestus de sacs , & pieds nuds , qui se mettoient tout en sang par les Disciplines. Ce n'estoit pas seulement la populace qui paroissoit en cét estat ; les principaux Gentilshommes de Milan , & plusieurs Dames de qualité firent en cette occasion des actions publiques de Penitence. Enfin , Milan eut la face d'une Niniue penitente à la Predication de son Archevesque , à qui chacun donnoit mille benedictions. Des Processions arriuoient tous les iours de diuers lieux du Diocese , & le Cardinal lauoit les pieds à vn grand nombre d'hommes , avec vne humilité qui rauissoit d'estonnement ces pauvres Villageois. Il les communioit la pluspart de sa main ; il les visitoit dans les logis qui leur estoient preparez , pour voir s'ils auoient les choses necessaires ; Enfin , il trauailloit comme s'il eust eu trente corps , au lieu d'un , ou plustost comme s'il n'en eust point eu du tout. Il ieusna avec plus de rigueur qu'à l'ordinaire ; il prit de plus rudes , & plus longues disciplines ; & il coucha sur des planches de bois , sans auoir aucune couuerture sous luy. Il voulut par cette mortification expier vne negligence dont en effet il n'estoit pas coupable , qui estoit , que quelques Pelerins n'auoient point trouué de liect dans vne maison destinée à les recevoir. Ainsi S. Gregoire le Pape qui fut vn tres-grand aumosnier , ayant appris qu'un pauvre estoit mort dans Rome , faute de secours ; crût que Dieu luy demanderoit compte de cette vie , encore qu'il eust donné

tous les ordres necessaires d'assister les necessiteux qui se trouuoient dans la Ville. Il ieusna, il veilla, & pria durant plusieurs iours pour expier cette faute qui n'estoit sienne que par l'excès de sa Charité Pastorale qui est tres-delicate quand il s'agit du salut des brebis qui luy sont commises. Ces deux exemples doiuent faire trembler les Ecclesiastiques qui laissent perir de faim ceux qu'ils sont obligez de nourrir dans leurs Benefices, & qui employent leur patrimoine (car c'est ainsi que les Conciles nomment les reuenus Ecclesiastiques) en des dépenses superflues, pour ne pas dire honteuses & criminelles.

Fin du premier Liure.



M v



LA VIE
DE S. CHARLES
BORROME'E.
LIVRE SECOND.

CHAPITRE PREMIER.

*De la peste qui arriua à Milan , &
de ce que fit S. Charles durant
cette calamité.*

1576.



PEINE le temps du Iubilé fut-il passé que la face de Milan changea presque en vn moment, , & qu'au lieu d'une Ninive penitente qu'elle auoit paru, elle deuint vne Ville de feste & de ioye, pour la reception d'un Prince qui y fit quelque séjour sur la fin du mois de Iuillet, pour de là passer en Espagne. Ce changement si subit donna de l'affliction au Cardinal, mais il en eut bien-tost vn sujet plus legitime. Car la peste se decouurit dans la Ville, & il l'auoit predite sur l'auis qu'il receut de l'Archiprestre de Monza, que dans vn Bourg

assez proche de ce lieu, beaucoup de personnes mouroient subitement. Les Medecins se trompent, dit-il, au Docteur Iesfano, & prennent pour des fièvres aiguës, ce qui est vn mal contagieux. Dieu veut chastier le Peuple de Milan de ses pechez, & il faut se preparer à souffrir ce fleau de sa Iustice, & à secourir ceux qu'il frappera. Il eut en ce mesme temps nouuelle que l'Euesque de Lodi estoit malade à l'extrémité; & aussi-tost il monta à cheual, pour l'assister en ce passage, comme il auoit accoustumé de rendre cét office à tous ses Suffragans. En chemin il apprit sa mort, de sorte qu'ayant pris le deuil, il vint à Lodi faire les funerailles de ce Prelat. Là il receut auis par vn Courrier exprés, comme la peste faisoit quelque progres dans Milan, qui estoit en vn grand desordre par l'absence du Gouverneur, & des principaux Gentilshommes. Il reuint incontinent à la Ville. & il trouua les ruës pleines de Peuple qui crioit, Misericorde, & qui luy demandoit son assistance, comme des enfans à leur pere. Quelques Ministres du Roy d'Espagne, & les Magistrats de la Police, le vinrent visiter incontinent apres qu'il fut arriué, & le coniurerent de prendre soin de la Ville en cette calamité, & d'establir tous les ordres qu'il iugeroit necessaires pour s'opposer au mal dont elle estoit menacée, estant tellement depourueus de conseil, qu'ils ne sçauoient alors ce qu'ils deuoient faire. Il les receut avec beaucoup de douceur, & leur promit d'en-

La peste
se décou-
ure dans
Milan.

ployer son bien , sa personne , & sa vie, pour le service du Peuple , sans craindre la mort , comme y estant obligé par le deuoir de sa charge , & s'y sentant encore porté par l'amour particuliere qu'il auoit pour les Milanois. Mais il les coniuira de vouloir seconder ses soins , & de ne point abandonner la Ville , comme beaucoup de personnes de qualité auoient fait.

Disposi-
tions in-
terieures
de Saint
Charles,
lors que
la peste
sedécou-
ure.

Quand il fut seul , il considéra qu'il falloit aller à la source du mal , & que comme la peste estoit vn des traits dont la Iustice de Dieu se sert pour chastier les pechez des Villes , c'estoit elle qu'il deuoit appaiser. Il se considéra chargé de tous les crimes de son Peuple , à l'imitation du Sauueur du Monde qui auoit porté les offences de tous les hommes , & il resolut de commencer la Penitence publique par luy-mesme. Il arresta donc de ieusner tous les iours , de faire de plus grandes veilles , & de ne coucher plus que sur des planches de bois , sans auoir autre chose sous soy qu'un méchant drap. Il ordonna trois Processions generales où le Peuple assista en grande foule, & où dans les Sermons qu'il fit , il reprocha aux Magistrats qu'ils auoient esté fort diligens à preparer des remedes humains contre la peste , mais qu'ils n'auoient point songé à ceux qui estoient plus necessaires , à corriger les vices publics , & à implorer la misericorde de Dieu. Il les accusa encore d'auoir deffendu les assemblées des Confraternitez de la Ville , ce qui auoit esté cause que beaucoup de per-

sonnes qui s'y trouuant celebroident saintement les Festes , s'estoient adonnées à la débauche.

Quand les amis de saint Charles le virent resolu de servir luy-mesme les pestiferez , ils firent tout ce qu'ils pûrent pour le faire changer de resolution , & pour l'obliger de se retirer en vn lieu assésuré, d'où il pourroit enuoyer ses ordres pour l'assistance des malades. Mais ils ne pûrent rien obtenir du Saint Cardinal , qui aimoit trop ses brebis pour les laisser exposées à vn mal si dangereux , & dans vne si grande calamité , sans les assister. Toutefois pour mettre sa conscience en vn plus grand repos , & ne rien faire legerement, en quoy on pust auoir raison de blasmer l'imprudence de son zele ; il assembla plusieurs personnes de doctrine & de pieté, qui n'auoient deuant les yeux que l'honneur de Dieu , & l'acquit de son deuoir, afin de se gouverner selon leurs auis. Il leur fit sa proposition ; si estant Archeuesque de Milan , & la peste rauageant sa Ville Episcopale , qui sans sa presence seroit exposée à vne tres-grande calamité, il n'estoit pas obligé de demeurer pour y servir les malades , & si en conscience il luy estoit permis de s'absenter. On allegua tout ce qui pouuoit estre dit sur cette matiere , & enfin on conclud qu'il n'estoit point obligé d'exposer sa vie à vn peril si manifeste , & qu'il se deuoit conseruer pour son Diocése , dont Milan ne faisoit qu'une portion : Que sous ses ordres les

Ses amis
tâchent
en vain
de le dé-
tourner
de servir
les pesti-
ferez.

» malades pouuoient estre assiste, & qu'il
 » deuoit considerer que sa personne estoit si
 » vtile à toute l'Eglise qu'il n'en pouuoit pas
 » disposer aussi librement qu'un autre Eues-
 » que par qui Dieu eust fait moins de gran-
 » des choses, & témoigna en vouloir en-
 » core à l'auenir faire de plus merueilleuses.
 » Cette conclusion, quoy qu'appuyée de ces
 » raisons, & de beaucoup d'autoritez de
 » Docteurs Orthodoxes, ne plût point au
 » Cardinal : & il soustint contre eux que le
 » deuoir d'un bon Pasteur en vne pareille
 » rencontre estoit de donner sa vie pour ses
 » brebis, ce qu'il leur prouua par plusieurs
 » passages des Peres, & par beaucoup d'ex-
 »emples des Saints Euesques de tous les
 » Siecles. Ceux qu'il auoit assemblez luy re-
 » pliquerent, que ce qu'ils auoient fait estoit
 » vne œuvre de perfection, & non pas d'o-
 » bligation. A ce mot, Saint Charles ré-
 » pondit, puisque c'est vne œuvre de per-
 » fection, j'y suis obligé, car l'Episcopat
 » est un estat de perfection acquise. Ils ne
 » sceurent que répondre à cette repartie ;
 » seulement ils le coniurerent de se ména-
 » ger, & de ne s'exposer pas sans vne gran-
 » de necessité, & sur tout d'éuiter de tou-
 » cher les personnes atteintes du mal. Il
 » leur promit de le faire autant qu'il pour-
 » roit : & comme il fut resolu de rendre un
 » seruice si perilleux à ses brebis, il crût qu'il
 » deuoit disposer de ses affaires, comme s'il
 » eût esté assuré de mourir. Il fit donc son
 » testament, par lequel laissant à ses heri-
 » tiers ce que par les Loix il ne leur pouuoit

Il dispo-
 se de ses
 affaires
 comme
 s'il eust

oster, il nomma le grand Hospital de la ^{deuxième} Ville son heritier, & fit plusieurs legats à ^{rir.} ses domestiques; & à diuers lieux de deuotion. Apres qu'il eut mis cét ordre à ses affaires temporelles; il commença à s'appliquer au soin des malades, visitant les maisons où ils estoient enfermez, & le lieu appellé Saint Gregoire, qu'un Duc de Milan auoit fait bastir autrefois pour retirer les pestiferez. Ceux qui y estoient enfermez se mirent aux fenestres, & le coniuurerent de les assister au moins pour les besoins de leur ame, avec des paroles si pitoyables qu'elles eussent esté capables d'attendrir vn cœur de diamant, à plus forte raison toucherent-elles le cœur paternel du Saint Cardinal, qui fondit en larmes, & leur promit de les secourir de tout son pouuoir. Il effectua bien-tost ses promesses; car dès qu'il fut reuenu dans son Palais, il enuoya à la Monnoye, sa vaisselle d'argent, dont il fit battre des pieces de diuerse valeur; qu'il fit distribuer aux pauvres personnes affligées de peste. Il vendit tous ses meubles, il fit porter à l'Hospital de la santé, tout ce qui pouuoit y seruir, & iusqu'à son propre liét. Mais comme tout ce qu'il pouuoit faire de luy-mesme, ne suffisoit pas aux necessitez d'un si grand nombre de malades, il fit faire des questes dans la Ville, dans la Province, & encore dans les États voisins; de sorte que pour le temporel, il pourueût assez abondamment à la necessité publique. Il n'auoit point de gens qui voulussent

Il vend
sa vaisselle
d'argent

seruir les pestiferez , & aucun Prestre ne s'estoit encore présenté pour leur administrer les Sacremens. Il fut donc contraint de faire venir quelques hommes des valées de son Diocese , suiettes pour le temporel à la Seigneurie des Suisses , qui ne craignoient pas la peste dauantage qu'une autre maladie commune , & vn Prestre de la mesme nation , qu'il mit tous dans la maison du Lazaret , ce qui fut d'un merueilleux secours pour ces miserables. Ce n'estoit pas assez ; car les malades de la Ville auoient aussi besoin de secours , & les Curez s'enfuyoient tous de crainte du mal. S. Charles eut recours aux Religieux , & il s'en trouua quelques-uns qui s'offrirent pour seruir , si leurs Superieurs le leur vouloient permettre.

Il y eut aussi des personnes Laïques qui promirent de faire la mesme chose , ce qui consola extrêmement le Cardinal. Comme il deuoit visiter les infectez , il auoit besoin de quelques personnes de seruire qui l'assistassent en cette action , & tous les domestiques auoient conspiré ensemble de ne le point suivre , soit qu'ils eussent peur de la peste , soit que par cet abandonnement , ils voulussent le mettre en estat de ne pouuoir s'exposer luy-mesme , comme il auoit resolu. En effet , quand il les assëmbla , il les trouua dans cette disposition , & cette premiere fois , il ne put rien gagner sur leur esprit. Mais comme il ne se rebutoit pas pour les premieres difficultez qu'il rencontroit dans ses

desseins, il parla en particulier à ceux qu'il iugeoit propres pour l'accompagner, & ils ne pûrent pas résister à la force de ses exhortations qui leur changerent tellement le cœur, qu'ils se remirent absolument à sa conduite, & se repouterent heureux qu'il les voulust associer à vne si bonne œuvre. Il prescrivit aux autres de sa famille ce qu'ils devoient faire pour leur conservation, & voulut que quand il auroit visité des malades, ils l'évitassent luy-mesme comme vne personne suspecte qui leur eust esté estrangere. Dieu benit visiblement cette courageuse resolution; car aucun de ceux qui le suivirent par tous les lieux infectez, n'eurent pas seulement vn petit mal de teste; & pour luy, quoy qu'il administraست les derniers Sacremens de sa propre main aux malades qui s'en alloient mourir, il iouit tousiours d'une parfaite santé. Ainsi Dieu prenoit vn soin extraordinaire de celuy qui faisoit des choses si extraordinaires pour le salut des ames qu'il luy avoit commises, & faisoit par cét exemple de terribles reproches aux Pasteurs timides, qui voyant venir le loup s'estoient enfuis avec tant de lâcheté.

S. Charles considerant que le mal s'augmentoit de iour en iour escriuit vne grande Lettre au Pape, par laquelle il luy demandoit plusieurs graces; qu'il pust employer les Religieux qui se voudroient donner au service des pestiferez, quand mesme leurs Superieurs ne le voudroient pas permettre; qu'il pust appliquer au soulagement

Demandes que
fait S.
Charles
au Pape
pour le
service
des pe-
stiferez,

» des malades , les legats pies laissez pour
 » d'autres œuvres : qu'il luy fust permis , &
 » aux autres Confesseurs d'absoudre des cas
 » referuez au S. Siege , & de donner l'Indul-
 » gence pleniére aux mourans ; & que l'Autel
 » de la Chapelle de l'Hospital de la santé eust
 » le mesme priuilege pour les morts, qu'auoit
 » l'Autel de S. Gregoire de Rome. Il deman-
 da encore des Indulgences pour ceux qui
 seruiroient les pestiferez , & pour luy-mes-
 me , afin d'inciter plusieurs personnes à s'y
 déuoüer par le desir de gagner ces thresors
 de l'Eglise , qui sont incomparablement
 plus estimez par les Italiens, que par les au-
 tres Nations.

Le Pape accorda tout ce qu'il demandoit,
 & luy fit faire vne responce dans laquelle
 louiant le zele & le courage qu'il témoi-
 gnoit en cette perilleuse occasion , pour le
 salut de ses brebis , il l'exhortoit de mesna-
 ger sa personne , & de ne s'exposer pas te-
 merairement , pour conseruer sa vie qui
 estoit si vtile à son Diocese , & à toute l'E-
 glise. Il enuoya encore vne Lettre Pastora-
 le au peuple de Milan , où il l'exhortoit de
 receuoir en esprit de Penitence , le fleau
 dont il plaisoit à Dieu de le frapper , & de
 recourir à sa misericorde par le ieusne , les
 aumônes , & la priere , & monstroït l'obli-
 gation qu'auoient les Chrestiens de s'affi-
 mter les vns les autres en cette rencontre ,
 par plusieurs passages des Saints Peres , &
 par des raisons tres-puissantes. S. Charles
 la fit imprimer dans vn Liuret, & y adiouta
 la traduction de quelques Homelies de S.

Le Pape
 écrit vne
 Lettre
 Pastorale
 à la Vil-
 le de Mi-
 lan.

Denis, Euesque d'Alexandrie, de Saint Gregoire de Nazianze, de Saint Cyprien, & de l'Epistre de Saint Augustin à Honorat, où il traite expressement de l'obligation des Pasteurs à la residence, dans le temps de la persecution. En suite, il fit vne assemblée des Curez de la Ville, & des autres Prestres, & monstra si clairement à ceux-là qu'ils estoient obligez d'administrer les Sacrements aux malades de leurs Parroisses, que la Grace de Dieu se seruant de la force de ses remonstrances, les disposa tous à rendre ce deuoir à leurs brebis, & les rendit aussi courageux en ces fonctions, qu'auparauant ils s'estoient monstrez lasches & timides. Il y eut aussi plusieurs Ecclesiastiques, lesquels sans auoir d'autre obligation que celle de la Charité de Christ qui les pressoit, se donnerent à Saint Charles pour le seruice des pestiferez, & qui le soulagerent beaucoup en ce trauail qui estoit fort grand. En ce mal-heureux temps, vn bon Prestre qui assistoit les malades, fit vne action d'vn courage veritablement intrepide, ou pour mieux parler d'vne Charité tout à fait heroïque. On auoit ietté parmy les morts, vn pauvre homme qui ne l'estoit pas encore. Quelque temps apres il reuint à foy, & se trouua au milieu de cinquante ou soixante corps puans qui n'estoient pas enterrez. Le Prestre de S. Gregoire passa sur ces entrefaites; & comme ce pauvre miserable ouyt la clochette qui sonnoit deuant le Saint Sacrement, il se leua du milieu de ce tas de morts, & le conjura

ra de luy venir donner le sacré Viatique. Le Prestre fut fort surpris de cette rencontre; mais le Dieu qu'il portoit le fortifiant, il n'hésita point, & il marcha sur tous les corps pour luy aller donner la consolation qu'il demandoit. Vn moment apres le pestiferé expira, & alla vray-semblablement iouyr de la presence visible de celuy qu'il venoit de recevoir sous le voile corruptible des especes Sacramentales.

La peste augmentoit de iour en iour dans Milan, & toutes les personnes de qualité en sortoient pour se retirer dans leurs maisons de campagne. Saint Charles en estant aduertty, pria ceux qui restoit encore dans la Ville de le venir voir, & il leur parla avec tant d'efficace qu'il les fit résoudre de demeurer pour assister leurs Concitoyens, en l'absence du Gouverneur qui n'auoit point voulu reuenir, ny prendre aucun soin de cette miserable populace. Il la diuisa en diuers quartiers, & les bailla à gouverner à quelques Gentilshommes sages & pieux, qui auoient sous eux d'autres Bourgeois, & ordonna que toutes les semaines ils s'assembleroient, afin de pourvoir aux besoins des malades, & de conclure ce qui se deuoit faire selon l'occurrence. Vn Ecclesiastique se trouuoit tousiours dans ces Congregations, & par ce moyen l'ordre fut establi dans la Ville, & les pestiferez receurent beaucoup de soulagement. Mais comme les choses alloient fort bien pour l'ordre, il arriva vne dispute entre les Officiers du Roy d'Espagne, & les Officiers de la Ville,

pour la dépenſe , les vns la rejettant ſur les autres. Cela fut cauſe que durant quelque temps ; les pauvres ſouffrirent beaucoup. Mais le Gouverneur ayant eſté obligé de faire vn voyage à Milan , pour des affaires importantes , Saint Charles luy écrivit vne Lettre hardie , dans laquelle il le reprenoit fort librement d'auoir abandonné la Ville en vne occaſion ſi perilleuſe, & le menaçoit du chaſtiment de Dieu , s'il ne pouruoyoit aux neceſſitez qu'elle ſouffroit. Cette Lettre l'eſtonna , & fut cauſe que le differend pour la dépenſe des malades , fut accom-
modé.

Le commerce eſtant tout à fait ceſſé dans Milan , les Marchands donnerent congé à tous les Artisans qui trauailloient ſous eux, & qui leur eſtoient deuenus abſolument inutiles. Les Gentilshommes & les Bourgeois congédierent auſſi beaucoup de ſeruiteurs qu'ils ne pouuoient plus entretenir ; de ſorte que Milan ſe vid rempli d'une grande multitude de perſonnes abandonnées , & qui eſtoient ſur le point de mourir de faim. Elles eurent recours à S. Charles , comme au Pere commun de tous les miſérables ; & vn matin on les vid entrer dans ſon Palais deux à deux , ayant deſia l'horreur de la mort ſur le viſage. Ce ſpectacle émuſt les entrailles paternelles du Saint Archeueſque , & luy tira les larmes des yeux. Il leur promit de les ſecourir, encore qu'il n'eut pas preſentement dequoy le faire , car il auoit vendu tous ſes meubles pour en diſtribuer l'argent aux malades,

1576.

Horrible pau-
vreté de
Milan.

comme nous auons desia dit. Mais la Charité Episcopale est ingenieuse, & sçait trouuer des moyes de satisfaire à ses intentions, lors qu'il semble qu'elle est tout à fait priuée de secours. Il choisit dans cette multitude de gens abandonnez de leurs Maistres, ceux qui pouuoient seruir en ce temps de calamité, & il en mit les vns aux gardes, les autres à purifier les maisons, ceux-cy à seruir les pestiferez, ceux-là à faire quelque autre chose pour la Ville ; & comme il en restoit trois ou quatre cens qui ne pouuoient estre vtiles à rien, il les enuoya en vne maison abandonnée qui estoit à huit milles de Milan, où il eut soin de leur salut, & de leur vie corporelle. Il en donna la conduite aux Peres Capucins, & leur prescriuit des regles salutaires ; de sorte qu'ils vesquirent avec tant de modestie & de pieté, qu'ils paroissoient tous estre des Religieux tres-reformez. C'estoit sans doute vne grande merueille de voir viure ce grand nombre de personnes si differentes d'âge, de nation, d'humeurs, d'esprit, d'inclinations, & d'habitudes, en vne si grande paix, & avec tant de deuotion. Mais l'esprit de Saint Charles passoit dans ses ouurages ; & comme la Fable dit, que tout ce que Midas touchoit, deuenoit or : ainsi toutes les personnes dont le Saint Cardinal entreprenoit la conduite, deuenoient modestes & religieuses. Il visitoit souuent ces pauvres refugiez, & il les exhortoit avec des paroles si enflâmées de l'amour de Dieu, qu'ils benissoient tous le malheur qui les auoit mis en estat de rece-

uoit ce secours de luy. Quand l'Hyuer arriva, il se trouua bien empesché où il trouueroit de l'étoffe pour les vestir, & pour empêcher qu'ils ne perissent de froid. Il s'aduisa donc de faire mettre en pièces toutes les tapisseries qui estoient dans son Palais, les tapis, les linges, les portieres, les vieux habillemens, & les tours de lit; de sorte qu'il ne resta que deux paires de linceuls pour chacun de ses domestiques, afin de pouuoir changer. Il fit encore acheter beaucoup de draps, pour fournir à ceux qui estoient dans les maisons de santé; & il ne craignit point de s'endebter pour les secourir, estant tout prest de se vendre luy-mesme, s'il le falloit, pour imiter le grand Saint Paulin, Euesque de Nole. Son exemple porta beaucoup d'habitans de Milan à ouurir leur bourse, & à faire des aumosnes fort considerables pour habiller ces malheureux, ou plustost pour vestir I E S V S-CHRIST en leurs personnes. Les Dames luy apportoiēt leurs diamans, leurs perles, leurs chaisnes, & leurs autres ioyaux, afin qu'il en distribuast le prix selon sa prudence. Les femmes Iuifues en firent autāt dans le desert pour l'ornement du tabernacle: mais les Milanois par leur liberalité empêcherent la cheute & la ruine des Temples du Dieu viuant, & se bastirent des Tabernacles dans le Ciel, qui ne pūrent leur estre rauis, & qui ne changerent pas de place comme celuy de Moïse, mais qui demurerent fermes & immuables dans l'eternité. C'estoit vn spectacle bizarre, & en quel-

que façon ridicule , de voir ces pauvres vêtus les vns de verd , les autres de rouge, ceux-cy de tapisserie , ceux-là de toile , qui d'une couverture de chaïses , qui d'un tapis de pied. Mais les yeux de la Charité trouuoient cette diuersité plus pretieuse & plus agreable que les plus magnifiques liurées du Monde.

CHAPITRE II.

Suite du mesme sujet.

1576. Quelque diligēce qu'on apportast pour empêcher le cours de la peste , elle croissoit tous les iours, de sorte que le Saint Cardinal reconnoissant que la colere de Dieu estoit allumée contre la Ville de Milan , resolut de l'appaiser par quelques actions publiques de penitence, & d'humiliation , devant sa diuine Majesté. Il ordonna pour cet effet trois Processions generales à diuerses Eglises. Quand les Magistrats le sceurent , ils essayèrent de luy faire changer de resolution , luy representant que le concours du Peuple qui s'y trouueroit , estoit tres-perilleux , & que vraysemblablement le mal s'augmenteroit. Mais le Saint Cardinal leur representa , que désormais c'estoit vne folie de fonder l'esperance de la fin d'une peste si fort allumée, sur des remedes humains ; que la Iustice de Dieu se seruant de ce fleau pour chastier les

S. Charles ordonne diuerses Processions.

les Milanois, c'estoit elle qu'il falloit appaiser ; & que peut-estre se laisseroit-elle fléchir aux prieres d'un peuple assemblé qui luy feroit comme vne sainte violence. Il leur apporta l'exemple du Pape saint Gregoire, lequel en vne pareille occasion auoit ordonné dans Rome, vne Procession generale, qui fut si agreable à Dieu, que comme elle finissoit, l'Ange de Dieu apparut remettant son épée au fourreau ; ce qui estoit vn signe que le mal cesseroit, comme en effet il cessa entierement. Les Magistrats furent satisfaits de ses remontrances, & se disposerent tous à l'accompagner. Le iour de la ceremonie estant venu, le peuple se trouua au Dôme, où le S. Archeuesque mit des cendres sur la teste de chacun, afin qu'à l'exterieur mesme chacun eust des marques de penitent. Il fit cette action avec tant de zele & de pieté, que tous ceux qui sortoient de devant luy, fondoient en larmes. Mais il en fit bien verser d'autres quand on le vid paroistre avec sa chappe violette, dont il auoit le Capuchon abaissé iusques sur les yeux, portant vne grosse corde au col, marchant pieds nuds, & tenant vne grande Croix entre les mains avec l'Image du Sauueur, sur lequel il tenoit les yeux attachez, & baignez de larmes. Les Chanoines, les Prestres, & plusieurs seculiers mesmes, parurent en mesme estat que leur S. Pasteur, & on n'a iamais veu rien de si pitoyable & de si touchant que fut cette Procession. Le Cardinal s'y offrit à la colere de Dieu, comme vne victime publi-

Il y assista nuds
pieds, &
vne corde
au col.

N

que , & le pria tres-ardemment de le fraper tout seul , & d'épargner ses brebis , se reconnoissant le plus grand pecheur du monde deuant sa Iustice , & estimant sa vie bien employée , si elle s'en vouloit contenter. Comme il marchoit sans songer où il mettoit les pieds , il donna contre vn clou qui luy entra si auant dans le poulce , que l'ongle s'enleua , & qu'il luy fit vne profonde blessure dont il sentit vne grande douleur. Il ne s'arresta pas neantmoins pour cét accident : mais il continua son voyage , durant lequel il éprouua quelque chose de ce qu'il souhaittoit si fort , c'est à dire quelque peine corporelle. Quand il fut de retour dans sa chambre , le Chirurgien visita sa blessure , qu'il trouua grande & fascheuse. Toutefois il ne voulut pas qu'on luy coupast l'ongle que quand les Processions furent finies. A la troisième il porta l'un des Cloux dont nostre Seigneur fut attaché , que l'on garde dans l'Eglise Cathedrale avec beaucoup de veneration , & qui estoit celuy qu'Helene , mere de Constantin , auoit fait mettre au frein du cheual de ce pieux Empereur , pour le rendre inuulnérable à la guerre : en quoy elle suiuit sans doute plustost les sentimens de la pieté maternelle , que les regles de la pieté Chrestienne , qui demandoient qu'une chose si sainte fust tenue avec plus de respect. Au retour de la Procession il fit mettre ce Clou si venerable sur le grand Autel , & ordonna les prieres de quarante heures , où le Peuple assista avec beaucoup d'assiduité & de deuotion.

A chaque heure il se faisoit vne exhortation dont le sujet estoit tiré des mysteres de la Passion de nostre Seigneur , & les Auditeurs en sortoient si touchez , que fondant en larmes , ils crioient hautement , *Misericorde*, qu'ils alloient demander à Dieu au Tribunal de la Penitence. Saint Charles fit vne autre Procession plus laborieuse ; car elle alla presque par toute la Ville , & il y assista au mesme estat qu'il auoit fait à la premiere. Dieu tesmoigna que ces actions publiques de pieté luy estoient agreables ; car aucun ne fut frappé du mal pour y auoir assisté , ce qui n'estoit pas arriué à la Procession de saint Gregoire , dont nous auons parlé , où quatre-vingt personnes moururent. Le Cardinal ne se contentant pas de cela , establit encore diuers exercices de deuotion dans son Diocese , & dans Milan. Il fit faire des Processions chaque iour de la semaine aux Parroisses , aux Chapitres , & aux Religieux , qui venoient separément à l'Eglise Metropolitaine , & les Chanoines de celle-cy , alloient tous les Mardis à saint Ambroise. Il les y accompagnoit , & marchoit tousiours nuds pieds , encore que les rues fussent pleines de glace , & de neige. Mais les eaux des plus grands fleuves ne peuuent esteindre le feu de la Charité , quand elle est allumée dans le cœur d'un Euesque , par le Dieu qui s'appelle , Charité. Aux iours de Feste on chantoit les grandes Litanies auant que de commencer la grand' Messe , & on faisoit oraison mentale durant quelque temps , dont vn Prestre

destiné pour cela en chaque Parroisse , proposoit les points. Chacun de ceux qui celebrent la Messe , disoient vne Collecte dressée pour demander la fin du mal contagieux ; & il y auoit des prieres composées pour estre dites le matin & le soir dans chaque famille ; de sorte que la Ville de Milan , & le Diocese se trouuoient en vne continuelle oraison. Le Diable qui ne manque iamais de se mesler dans les actions les plus pieuses , & qui profite de tout pour perdre les ames , fit répandre parmy le peuple beaucoup de billets & de caracteres en forme de medailles que l'on disoit estre bonnes pour se preseruer du mal. Le Saint Cardinal en estant aduertty , publia vne defense des'en seruir , comme estant des choses superstitieuses , & condamnées par l'Eglise.

Encore que ce saint Pasteur n'oubliait rien de ce qui pouuoit seruir à appaiser la colere de Dieu ; elle se monroit neantmoins tousiours plus enflammée par le progres que faisoit la peste de iour en iour. Cela fut cause qu'il proposa aux habitans de Milan , de faire vn vœu public & solemnel à S. Sebastien , dont l'Eglise a tousiours reclamé la protection dans la violence du mal contagieux , & dont ils deuoient attendre vne assistance particuliere , comme estant né d'une mere Milanoise , & ayant passé les premieres années de sa vie dans leur Ville. Le Cardinal les fit encore souuenir qu'en l'année 672. du temps du Pape Adéodat , ou Dieu-donné , Rome ne fut

Les Mi-
lanois
font vn
vœu à S.
Seba-
stien.

deliurée de la peste qui l'auoit presque desolée entièrement, que par le vœu qu'elle fit de dedier vn Autel à ce Saint Martyr, qui fut autrefois appellé le défenseur de la Foy. Ils furent donc aisément portez à faire ce que saint Charles leur conseilloit. Ce vœu contenoit, que la ville de Milan rebâtiroit l'Eglise de saint Sebastien qui s'en alloit en ruine; qu'elle y fonderoit vne Messe pour chaque iour de la semaine; qu'elle chomeroit sa Feste à perpétuité avec le ieiune de la veille; qu'elle luy offriroit vn vase d'argent pour mettre quelques reliques de son Corps, & qu'au plustost elle iroit en Procession à sa vieille Eglise, & que durant dix ans, elle se continueroit au mesme iour du vœu, qui fut le 15. du mois d'Octobre, & à perpétuité, le iour de la Feste. Comme le nombre des malades augmentoit, il fut nécessaire de bastir plusieurs cabanes en vn grand champ que l'on choisit pour cela, où l'on fit dresser des Autels, afin qu'ils pussent entendre la sainte Messe. Les Magistrats qui auoient soin de la Police firent publier vne quarantaine par toute la Ville, durant laquelle il estoit defendu à qui que ce fust de sortir de sa maison, sous peine de la vie. Le Cardinal ordonna la mesme chose aux Ecclesiastiques, hormis à ceux qui deuoient seruir les malades. La Ville fit vne despenſe insupportable à toute autre qu'à Milan durant le temps de cette separation; & auparavant le nombre de ceux qui viuoient des aumônes publiques; alloit à soixante & dix mille. Enfin elle fut contrainte de

s'adresser à toutes les villes de l'Estat, qui témoignèrent en cette occasion beaucoup de charité, & y ennoyèrent vne assistance considerable. Pour saint Charles il n'auoit plus rien dans son Palais dequoy il pust assister son troupeau, & tous les iours il s'endebroit de grosses sommes. Car sa charité n'auoit point d'autres bornes que la misere de son Peuple, & bien souuent il estoit obligé d'emprunter ce qui estoit necessaire pour la subsistance de sa maison. Vn iour apres auoir couru par toute la Ville pour donner diuers ordres, il reuint sur le soir chez luy, où il ne trouua pas vn morceau de pain pour manger. Il auoit desia fouillé dans la bourse de tous ses amis, & il ne scauoit plus à qui, entre les hommes, il pouuoit auoir recours dans vne si grande necessité. Mais son principal refuge estoit en Dieu, & tandis qu'il le prioit dans son Oratoire, il vint vn Gentilhomme qui luy apportoit mille escus que luy enuoyoit vn des principaux Seigneurs de la Ville, pour faire l'aumosne. Ce secours de la Prouidence qui arriua si à propos, augmentant sa foy, augmenta encore sa charité; & il s'en seruit pour porter plusieurs personnes riches à ouuir liberalement la main pour assister les pauvres, & à se priuer des meubles pretieux & superflus qu'aussi bien ils ne pouuoient retenir en conscience, tandis que les membres de I E S V S - C H R I S T estoient tout nus, & perissoient de froid dans leurs cabanes.

Celles que l'on auoit entreprises de nouveau estant faites, il fallut auoir des Prestres pour administrer les Sacremens, & faire les autres fonctions Ecclesiastiques. Les Curez ne pouuoient abandonner leurs Parroisses; il n'y auoit donc plus que les Religieux qui fussent en estat de seruir. Saint Charles auoit receu de Rome le Bref, par lequel le Pape luy donnoit l'autorité d'employer ceux qui voudroient s'offrir à luy, quoy que ce fust sans le consentement de leurs Superieurs. Il assembla tous ceux cy, & les particuliers qui pouuoient entendre les Confessions, & leur fit vn discours si puissant pour les porter à se dévouir au seruice des pestiferez, par la consideration de la charité generale dont les Chrestiens se doiuent rendre des offices les vns aux autres, dans l'extrême necessité, s'ils veulent estre dignes du nom qu'ils portent, & encore par la profession particuliere que font les Religieux du mépris de la vie presente, & par l'assurance des Couronnes preparées à ceux qui la perdent en cette occasion, que les Saints Peres appellent vne espece de Martyre; que tous ceux qui l'ouyrent en furent émeus, & se sentirent disposez à faire tout ce qu'il desireroit d'eux. Vingt-huit se presenterent sur le champ, & de iour en iour, plusieurs autres s'offrirent pour le mesme seruice, entre lesquels il y eust plus de Capucins, que des autres Ordres. Il les embrassa avec tendresse, & les fit loger dans l'Archeuesché, donnant ordre qu'ils fussent fort bien traitez,

afin de pouuoir supporter le travail qu'ils entreprenoient. Ce grand nombre de Religieux qui souffrirent les pestiferez, il ne mourut que deux Iesuites, deux Barnabites, & dix Capucins, qui furent sans doute les plus fauorisez de celuy pour l'amour de qui ils auoient exposé leur vie, & que l'Eglise eust bien pû honorer; comme elle fait le vingt-huitième de Février, dans le Martyrologe, les Prestres, les Diacones, & les Laïques qui dans vne grande contagion estoient morts au seruice des malades. Milan en vid, à cet exemple, plusieurs se venir presenter à saint Charles à la fin des exhortations qu'il faisoit tous les iours par les quartiers, montant sur vne pierre afin d'estre mieux entendu, & parlant comme vn homme qui pouuoit dire avec l'Apostre, *La Charité de Christ nous presse*. On ne peut dire quels furent ses soins, durant la quarantaine publique pour tous les Habitans de Milan. Il ordonna aux Ecclesiastiques d'observer le ieusne, parce qu'ils entroient dans le temps de l'Aduent, & exhorta les Laïques à se confesser, & à recevoir la sainte Eucharistie, auant que de s'enfermer dans leurs maisons. Il fit dresser des Autels en vn endroit de chaque rue, où, se mettant à la fenestre, ils pouuoient entendre la sainte Messe. Les Confesseurs alloient aux portes, & là entendoient les Penitens, qui communioient aussi au mesme lieu de la main du Prestre étably pour cét effet. Il faisoit aussi faire des prieres publiques dans chaque rue, six fois

2. Cor.
oin. 5.

le iour, & la nuit, & on chantoit des Pseaumes, les Litanies, & d'autres Oraisons accomodées à la calamité de la Ville. La grosse cloche du Dôme sonnoit aux heures qui estoient marquées, & chacun l'entendant, se mettoit à la fenestre, & répondoit au Prestre, qui en bas commençoit à entonner ce qui se deuoit dire. De cette façon Milan deuint comme vn de ces Monasteres où autrefois la louange de Dieu estoit perpetuelle, & chaque maison ressembloit à vne cellule, ou plustost à vne Eglise de Religieux, qui faisoient retentir l'air de cris & de voix lamentables pour demander misericorde. Tous les iours le saint Cardinal visitoit vn quartier, ou alloit aux cabanes, dans lesquelles il entroit souvent pour consoles les pauvres malades qui y estoient enfermez, & ayder les mourans à faire vne bonne mort. Il donnoit le Sacrement de Confirmation tous les ans aux Festes de la Pentecoste, dans les diuerses Parroisses de la Ville. Mais cette diligence n'empeschoit pas qu'il n'y eust vn grand nombre de personnes dans Milan, qui ne l'auoient point receu. Le temps de la peste eut paru à tout autre moins zélé que luy, fort mal propre pour le conferer: mais la crainte de la mort ne le put empescher de donner ce secours à son Peuple. Au contraire, ce fut la raison qui l'y obligea, afin que, comme parlent les anciens Conciles, ceux qui seroient malades, sortissent parfaits Chrestiens de ce monde, s'ils venoient à mourir, & que les saints recoussent

Il donne
le Sacre-
ment de
Confir-
mation.

N v

la grace d'un Sacrement appelé le sceau, & la perfection du Christianisme, par les Saints Peres. Il fit donc publier dans la Ville, qu'il le confereroit, & il alla de porte en porte l'administrer à tous ceux qui se presenterent durant qu'ils estoient en quarantaine, sans faire aucune distinction des maisons suspectes, ou frappées, de celles qui ne l'estoient pas. Quand il alla visiter les Villages du Diocese où la peste faisoit aussi de tres-grands ravages, il confirma les pestiferez de mesme que les autres, voyant qu'ils s'approchoient de luy pour recevoir cette grace : & comme il estoit en un certain Chasteau, un de cette qualité mourut à ses pieds, venant d'estre oinct de sa sainte main. Il baptisoit les enfans qui naissoient dans les cabanes, & apres les enuoyoit aux Nourrices qu'il auoit destinées pour les esleuer. Il auoit promis à ses Curez, de ne les abandonner pas s'ils estoient attaquez du mal, & il leur tint sa promesse. Car celuy de saint Raphaël estant frappé de peste, il resolut de luy porter le Viatique, & de luy donner l'Extreme-Onction. Comme on sceut sa resolution, plusieurs personnes de qualité dans Milan, vinrent se ietter à ses pieds, & luy presenterent les larmes aux yeux, qu'il s'alloit exposer au peril évident de perdre la vie, de laquelle dépendoit le salut de la Ville, & du Diocese, & que d'autres Prestres pouuoient rendre cette assistance à ce Curé. En effet, ils luy en presenterent un qui s'offrit de l'aller communier, & le conjurerent par

Il donne
le Viatique à un
de ses
Curez
frappé
de peste.

les entrailles de IESVS-CHRIST, de se vouloir conseruer pour son troupeau, dont la Iustice vouloit qu'il preferast le soin à celui d'un particulier. Le Cardinal tenant le Saint Sacrement à la main, entendit tout ce qu'ils luy voulurent dire; mais quand ils eurent cessé de parler, il les remercia de ce témoignage de leur affection, & leur representa, qu'outre l'obligation de la promesse solemnelle qu'il auoit faite à ses Curez, & aux autres Prestres qui s'estoient offerts pour le seruice des malades, le de- uoir d'Archeuesque demandoit qu'il fust ce qu'il alloit faire, & que si en cette occasion il ne donnoit l'exemple de la charité pour ses freres, tous les autres auroient sujet de trembler, & de se retirer. Il dit cela avec tant de fermeté, que ceux qui l'en vouloient empescher n'oserent plus le contredire, & ne pûrent faire autre chose que de verser des larmes qui monstroient leur crainte de perdre un si bon & si saint Pasteur. Il alla donc dans la chambre du malade, il le communia, il luy donna l'Extreme-Onction, & il y demeura iusqu'à ce qu'il eust rendu l'ame, bien qu'il y sentist si mauuais que l'on ne pouuoit en approcher. Il rendit la mesme assistance à deux autres Curez, & à tous les Prestres qui en eurent besoin. Car il ne s'exposoit pas sans nécessité, & sa charité qui n'estoit nullement timide, n'estoit pas aussi temeraire & indiscrete; & quand il auoit assisté de cette sorte quelque pestiféré, il demouroit six iours séparé de tout le monde, durant

lesquels il se faisoit luy-mesme, afin de ne communiquer à personne le mal qu'il pourroit auoir pris.

CHAPITRE III.

Suite du mesme sujet.

IL seroit impossible d'écrire toutes les choses que fit le Cardinal dans la visite des Parroisses de son Diocèse, où la contagion s'estoit répandue. Il marchoit continuellement. Il ne dormoit la nuit que fort peu de temps, encore estoit-ce sur quelque chaise, ou sur quelque table, craignant de se mettre dans des lits infectez. Il mangeoit mesme en pleine rue, & à cheval, pour ne point perdre de temps, & n'entrer dans aucune maison suspecte. Il est vray que tous les Gentilshommes qui estoient retirez dans les Villages, s'approchoient librement de luy, & le seruoient avec ioye, ne craignant pas de pouoir prendre du mal de celuy qui portoit la benediction par tout. Comme il se hazardoit continuellement, le bruit de sa mort fut si generalement erû dans la Province, que quelques Euesques firent ses funeraillles. Mais le Peuple de Milan en témoigna vne douleur si sensible & si extraordinaire, qu'aussi-tost qu'il en fut auerty, il y euint en haste pour les consoler par sa presence. Son retour leur apporta vne ioye qu'il est

mal-aisé de représenter ; & il' en receut aussi vne fort grande de les trouuer dans les exercices spirituels où illes auoit laissez. La quarantaine fut encore prolongée, & il remit la publication du Jubilé que le Pape auoit fait faire par l'Italie, pour demander à Dieu qu'il luy plust de la deliurer de la peste qui la trauailloit, au commencement de l'année 1577. Il le celebra avec les mesmes ceremonies, & assista aux Processions generales qui se firent, au mesme habit, & y marcha nuds pieds, comme il auoit fait au premier, dont nous venons de parler. Le mal commençant à diminuer, il resolut de faire vne visite generale de la Ville, & du Diocèse, & de benir toutes les maisons de Milan. Pour disposer son Peuple à profiter de ces actions, il publia vne Lettre Pastorale toute enflammée d'un zele Apostolique, par laquelle il témoignoit à ses Diocésains, qu'il vouloit s'appliquer au soin de leur salut, comme s'il n'eust encore rien fait pour cela, & trauailler de tout son pouuoir à destruire le rogne du peché, & establir en eux le regne de l'amour de Dieu. Il commença la benediction des maisons par le Palais Archiepiscopal, & il estoit en train de continuer par toute la Ville, quand ce dessein, qui eut apporté de grands fruits aux Habitans par les preparations saintes où il les auoit obligez, fut arresté par les Magistrats Royaux, sous vn pretexte mal fondé, de quelque entreprise sur leur Iurisdiction. Le Gouverneur auoit prolongé la quaran-

raine dans Milan ; mais saint Charles obtint de luy la permission pour les Habitans de sortir de leurs maisons , & de venir communier dans leurs Parroisses , à la Feste de Pasques. Le concours fut grand aux Eglises , & il n'en arriua point d'accident nouveau , & depuis ce iour - là , les hommes eurent la liberté toute entiere de se promener par la Ville. En ce même temps, il fit vne Procession solennelle , où il porta le saint Clou , dont nous auons desjà parlé , sous vn riche dais , soustenu tour à tour par le Gouverneur , les Senateurs , & les principaux Gentilshommes de Milan. Il le reposa sur l'Autel de l'Eglise Metropolitaine , où commencerent les prieres de quarante heures , à chaque heure , le Cardinal fit vne exhortation au Peuple ; ce qui fut d'un tres-grand trauail pour luy , & d'une consolation indicible pour ses Auditeurs.

L'Esté approchoit , & saint Charles auoit sujet de craindre que la peste qui n'estoit pas esteinte , ne se r'allumast par la saison. C'est ce qui l'obligea de presser les Magistrats politiques de Milan , de commencer le bastiment de l'Eglise de saint Sebastien. Tous les materiaux se trouuerent bientôt preparez , & la veille de la Feste de la Natiuité de la sainte Vierge , il y mit la premiere pierre avec beaucoup de solennité. L'oblation du vœu se deuoit faire le quinzième d'Octobre , & le Cardinal voulant que cette action fust celebrée avec des dispositions particulieres de Peni-

tence, qui la rendissent agreable à Dieu, & qui obtinssent de sa misericorde la fin de la peste, ordonna trois ieusnes dans la semaine precedente, & quelques Processions à diuerses Eglises, & conuia tous les Milanois à se confesser, & à communier auparauant. Apres la Feste de S. Martin, il fit celebrer dans la Cathedrale, trois Offices pour ceux qui estoient morts de la contagion, & pour lesquels on n'auoit point fait de prieres, à cause de leur nombre & de leur pauureté. Les mesmes deuoirs leur furent rendus dans les Paroisses, & dans les Eglises des Reguliers avec vne deuotion qui edifia tous ceux qui y assisterent.

Enfin, le temps de la misericorde diuine 1578.
pour Milan arriua, & la peste y cessa entièrement. Le Cardinal rendit des actions de graces à Dieu pour cette deliurance, qui furent pieuses & magnifiques. Il fit diuerses Processions, où tout le Clergé, & tous les Reguliers se trouuerent. Il establit les prieres de quarante heures, & prescha à chacune avec vne ferueur admirable. Il publia vn liuret, où il enseignoit à son Peuple, de quelle façon il deuoit viure désormais pour n'estre pas indigne de la grace de la santé que Dieu luy donnoit, & n'obliger pas sa Iustice à reprendre en main le fleau dont elle l'auoit chastié si severement. Il escriuit à tous les Euesques de sa Prouince, pour leur donner auis que la santé estoit bonne à Milan, & pour les prier de faire remercier Dieu dans leurs

La peste
cesse dan
Milan.

Dioceses , de cette grace qu'il auoit faitè au sien. On compta qu'il estoit mort de peste dix-sept mille personnes , & huit mille dans le Diocese , entre lesquels il se trouua six vingt Ecclesiastiques. Dans les Monasteres des Filles , peu de Religieuses furent emportées par le soin que S. Charles en prit. Ainsi finit cette memorable peste , qui seruit comme d'un grand theatre , où toutes les vertus du S. Cardinal parurent avec un éclat qui ébloüit ses ennemis & ses ennemis , & leur fit confesser qu'en cette occasion, son zele s'estoit montré prudent, son courage intrepide, sa pieté régulière , sa liberté immense , sa patience inuincible , sa foy inébranlable , son esperance ferme , & sa charité infatigable. La reputation de sa sainteté se répandit par toute l'Italie , où on auoit bien de la peine à comprendre , qu'un grand Cardinal comme luy eust fait si bon marché de sa vie , que de l'exposer avec tant de courage pour les plus misérables personnes de son Diocese. Il en receut les Lettres de congratulation & de loüange des Cardinaux & des Euesques les plus pieux ; de beaucoup de Princes , & de personnes de qualité , qui luy témoignèrent la veneration qu'ils auoient pour luy , apres vne preuve si forte & si solennelle de sa vertu. Tous ces cloages ne l'enferment point de vanité , & il répondit toujours, qu'il n'estimoit pas qu'on le deust tant louer de s'estre acquitté d'un deuoir dont il ne pouuoit se dispenser sans estre extrêmement coupable deuant

Dieu, & deuant les hommes. Les dépenses qu'il auoit esté obligé de faire durant cette contagion, & les objets qu'il auoit eus continuellement deuant les yeux, le détacherent encore dauantage de l'amour de la vie presente, & des richesses perissables : & ce fleau terrible pour les pecheurs, fut vne leçon merueilleuse pour luy de toutes les vertus Episcopales, dans lesquelles il fit vn incroyable progres.

CHAPITRE IV.

Saint Charles reforme plusieurs choses dans son Diocèse.

LEs trauerses que Saint Charles receuoit de la part des Gouverneurs, & des Officiers du Roy d'Espagne, ressembloient à ces vents furieux qui enracinent dauantage les grands chesnes qu'ils s'efforcent de renuerser. Car au lieu de se relascher & de perdre courage, comme il arriue aux personnes peu fondées en la vertu, il prenoit de nouvelles forces, comme nous auons desia dit, & s'appliquoit avec plus de soin au gouvernement de son Diocèse.

Il trouua donc alors qu'il y auoit dans 1578. Milan, vne Eglise Collegiale dediée à Saint Estienne, où seruoient six Chanoines avec vn Preuost, lesquels comme ils auoient peu de reuenue, ne pouuoient faire les Offices diuins avec la splendeur que deman-

Il augmenta le service dans l'E-

Eglise de
Saint
Estienne

doit l'antiquité de ce Temple, & la deuotion du Peuple. Il y auoit vne autre Eglise aussi Collegiale dans vne méchante petite Bourgade, sur la frontiere de l'Estat de Milan, & des Venitiens, où residient vingt Chanoines, & vn Doyen; & comme ce lieu estoit vne terre des confins, il estoit vne terre d'assassins, selon le Prouerbe Italien, & vn asyle de Bandis. Les Ecclesiastiques y estoient fort mal-traitez, & toutes les raisons de droict vouloient qu'il les transférast en vne habitation plus seure pour leur vie. Cette occasion vint bien à propos pour le dessein du Cardinal. Car il les transféra à Milan, laissant à leur place vn Curé avec deux autres Prestres; & les vnit avec ceux de Saint Estienne. Pour faire qu'ils eussent vn reuenu honneste, il les reduisit à dix-huict Chanoines, & establit vn Theologal, pour faire les leçons, & les Predications ordonnées par le Concile de Trente. Cela mit cette Eglise auparauant abandonnée, dans vn grand lustre, & artira beaucoup de monde aux Offices qui s'y celebrent avec splendeur, & avec pieté.

Il transfere les
Reliques
de Saint
Denis
Euesque
de Milá,
& de
plusieurs
autres
Saints

Il apprit que dans son Eglise Metropolitaine, les Reliques de Saint Denis, Euesque de Milan, qui fut enuoyé en exil par l'Empereur Constance, à cause qu'il n'auoit pas voulu souscrire la condamnation de Saint Athanase, (ce qui en ce temps-là estoit signer l'heresie des Arriens,) & les Corps de Saint Aurele Euesque, & de Sainte Pelagie, qui à la Couronne de Virginité, auoit joint celle du Martyre, n'estoient pas tenus

avec assez de decence. Il les tira des caiffes où on les gardoit, & les mit sous le grand Autel de l'Eglise fousterraine qu'il auoit reparée. Il fit faire encore des Chefs d'argent pour exposer à la veneration du Peuple, & porter en Procession les restes de Saint Maxime, vn des Martyrs de la Legion Thebaine, de Sainte Tecle, & des Saints Mona, & Galdino, Archeuesques de Milan.

Il auoit estably la visite des sept Eglises dans la Ville en la mesme maniere qu'on la fait à Rome, & obtenu les mesmes Indulgences qui s'y gagnent. Mais comme le Diable a tousiours sa part dans les deuotions publiques, par les abus qu'il y fait glisser, il eut aduis que ces Pelerinages de deuotion donnoient occasion à quelques desordres parmy les hommes & les femmes qui s'y rencontroient. Cela l'obligea de faire publier vne Ordonnance, par laquelle il enjoignit à ceux-là, & à celles-cy, de faire leur visite separément, & donna tous les ordres necessaires pour l'execution de ce reglement. Il fut tres-salutaire, & ce qui estoit auparauant pour plusieurs, vne occasion de débauche, ou vn amusement inutile, deuint vne action de pieté. Tous les ans il auoit ordonné qu'il se feroit vne Procession generale à ces sept Eglises le iour de la Visitation de la Sainte Vierge, où les Chapitres, & les Parroisses se trouuoient separément, afin d'éuiter la confusion. En suite de ces actions, il tint son cinquième Synode, pour reconnoistre l'estat

1578.

des Prestres de son Diocèse, apres le frain de la peste; & durant les trois iours qu'il dura, il fit des exhortations si puissantes à ses Curez, que tous se retirerent échauffez d'un nouveau zele pour se bien acquitter de leurs charges.

Il tasche
de por-
ter les
Chanoi-
nes à vi-
ure en
commun

Comme l'omesprit ne s'occupoit nuit & iour qu'à trouuer les moyens de deuenir plus parfait, & de perfectionner les autres, il eut vn violent desir de porter les Chanoines de son Eglise Cathedrale à vivre en commun avec luy, selon l'ancien vsage de son Eglise, qui a esté celuy de toutes les Eglises en leur commencement, & durant plusieurs Siecles apres, comme personnel le reuoque en doute. Il les assemblea vn iour dans son Palais, & leur proposa son dessein, offrant de mettre le premier tous les reuenus de l'Archeuesché dans la masse commune, dont il ne tireroit rien que ce qui luy seroit necessaire pour l'entretien de sa famille. Il leur representa que le Fils de Dieu en auoit donné l'exemple vivant avec les douze Apostres, sans retenir rien en propre des aumosnes qu'on luy faisoit: Que les premiers fideles qui n'auoient qu'un cœur & qu'un ame, n'auoient aussi qu'une mesme table: Que la Charité se refroidissant parmy eux, s'estoit conseruée parmy les premiers Euesques, & leurs Prestres qui vivoient ensemble; Que Saint Augustin, aussi-tost qu'il fut mis sur la Chaire d'Hipponne, establit vne Communauté de Clercs, qui fut depuis vn Seminaire de Saints Prelats pour toute l'Afrique: Que depuis son

temps, les Chanoines des Eglises Cathedrales vivant presque tous sous la regle
 de ce grand Saint, prenoient leur repas en
 commun avec leurs Euesques, & receuoient
 de luy toutes les autres choses qui estoient
 necessaires à leur entretien: Que telle auoit
 esté la coustume de l'Eglise de Milan, com-
 me il paroïssoit par vne Epistre d'Eugene
 III. Que les vtilitez de cette Communau-
 té ne se pouuoient nombrer: Qu'elle ostoit
 la sollicitude domestique aux particuliers,
 laquelle les embarasse, & les empêche de se
 donner entierement à Dieu: Que la Chari-
 té fraternelle se conseruoit par ce moyen:
 Que l'exemple des plus vertueux reformoit
 ceux en qui il y auoit quelque desordre, sans
 qu'il fust besoin de parler: Que les doctes
 instruisoient les ignorans; Qu'il se faisoit
 vne parfaite communicatiō de toutes cho-
 ses; & enfin, que cette façon de viure se-
 roit d'un merueilleux exemple à toute la
 Ville. Plusieurs des Chanoines qui écou-
 terent son discours, en furent persuadez,
 & offrirent de mettre leurs reuenus en
 commun. Mais la plus grande partie alle-
 gua tant d'inconueniens, que cette entre-
 prise demeura imparfaite, & que S. Charles
 n'eût que la consolatiō de l'auoir proposée.

En ce mesme temps, il alla encore vi-
 siter le Saint Suaire que l'on garde à Thu-
 rin, comme nous le raconterons particu-
 lierement, & au retour de ce Pelerinage,
 il fit vne retraite dans le Mont Varalle,
 où d'espace en espace, il y auoit trente-
 huit Oratoires disposez, qui representoient

1578.

Il fait
vne re-
traite au
mont
Varalle.

par des figures en bosse , les mysteres de la Passion du Sauueur. Ce lieu estoit proche des Montagnes des Suisses , en vne asfiette assez agreable , & si fort éloigné de toute habitation, que ceux qui se vouloient retirer durant quelques iours , pour faire les exercices spirituels , ne pouuoient choisir vn lieu plus propre & plus fauorable à leur dessein. Vn Religieux de Saint François , qui auoit demeuré dans le Conuent du Saint Sepulchre de Ierusalem , auoit étably cette deuotion , & basti vne Eglise à l'honneur de la Sainte Vierge , & plusieurs petites Chapelles qui estoient semées dans la montagne. Saint Charles n'auoit avec luy que le Pere Adorne , de la Compagnie de Iesvs , qui estoit son Directeur , afin de faire sous sa conduite , la visite des Oratoires. Il la commença dès qu'il fut descendu de cheual ; & le soir , il ne mangea que du pain , & ne beut que de l'eau. Apres vn repas si austere , il poursuivit ses Pelerinages qu'il continua bien auant dans la nuit , encore que le temps fust fort froid. A chaque Oratoire, il faisoit sa meditation sur le mystere qui y estoit representé ; & le Pere Adorne , homme extrêmement spirituel , luy en donnoit les poincts , comme si de luy-mesme il n'eust pas sceu les choisir. Mais il vouloit en cette conduite , faire vn sacrifice d'humilité , & se soumettre à la direction d'un Prestre , qui estoit confus de voir en vn si grand Cardinal, la docilité d'un petit Nouice.

Dans cette année , Philippe II. fut fort

mal-heureux dans la famille , & dans son Royaume. Il perdit Dom Venceslaus d'Austrie , son Neveu , & Dom Jean du mesme nom , son frere bastard , qui auoit gagné la bataille de Lepante. Il l'auoit fait Gouverneur du Pais bas en vn temps où il estoit besoin d'un Prince aussi vaillant , aussi sage , & d'une aussi grande reputation que luy , pour resister aux progres que faisoient les Gueux ; car c'est ainsi qu'on nommoit ceux qui sous pretexte de Religion , & de mauvais traitement , s'estoient reuoltez contre leur Souuerain legitime , & qui depuis se sont faits reconnoistre par luy , pour Souuerains eux-mesmes. Dom Ferdinand , son fils aîné , qui estoit desia reconnu pour son Successeur par les Estats d'Espagne , mourut aussi peu de temps apres Dom Jean d'Austrie , & remplit de douleur l'ame de son Pere qui l'aimoit tendrement. Il en donna aussi-tost aduis aux Viceroyes , & aux Gouverneurs de ses Royaumes , par vne Lettre digne , en verité , d'un Prince tres-religieux. Car il défend que l'on fasse dans ses Estats aucune chose qui marque la tristesse publique pour la mort de son Fils ; mais à la place des pompes funebres , il ordonne qu'il se fasse des Processions , & des prieres publiques , afin d'appaiser la colere de Dieu , & exhorte ses Sujets à retrancher les pechez & les scandales publics , qui ont attiré sur la personne , & sur ses Royaumes , cette calamité domestique. Le Gouverneur de Milan ayant receu cette

Constâ-
ce Chre-
stienne
de Phi-
lippe II.
en la
mort de
son Fils.

dépêche, l'enuoya dès aussi-tost à Saint Charles, qui ne la put lire sans estre touché de ioye & de douleur tout ensemble; sentant la perte que faisoit l'Espagne en la mort de Dom Fernand, & estant d'autre costé tres-satisfait de voir de si belles marques de pieté & de zele pour l'amour de Dieu, en ce grand Roy. Il écriuit à sa Majesté Catholique, & à la Reine, des Lettres remplies de tres-saints aduis pour faire un bon vsage de ce grand coup, & de cette terrible épreuve de leur soumission à la volonté diuine. Il publia encore vne Lettre Pastorale, qu'il adressa au Peuple de Milan, dans laquelle il inséra celle du Roy; & son sujet estoit vne exhortation à la penitence, pour détourner de la Maison Royale, & des Royaumes d'Espagne, les effets de la Iustice de Dieu, qui chastie les Rois pour les Peuples, comme il chastie les Peuples pour l'amour des Rois. Il établit encore des Stations, & les prieres de quarante-heures dans toutes les Eglises de Milan, & des Processions generales & particulieres de chaque Parroisse. Il ne cessa d'exhorter les Milanois à fléchir la colere diuine par des ieunes frequents, & des aumosnes abondantes, dont le propre effet est de racheter les pechez. Pour luy, il donna l'exemple de ce qu'il conseilloit de faire. Car il fit de plus longues veilles, & pratiqua de plus grandes austerez qu'il n'auoit accoustumé, pour le salut de son Prince qu'il aimoit avec tendresse, & pour la prosperité duquel il auoit vne ardeur toute particuliere,

S. Charles ordonne diuerses actions de deuotion en cette ré-
contre.

particuliere, qu'il témoignoit si visiblement en toutes rencontres, que les bruits que le Gouverneur, & ceux qui fauorisoient son party, répandoient parmy le Peuple avec tant de soin contre sa fidelité, estoient aussi ridicules que méchans, & ne pouuoient tromper que des personnes tout à fait ignorantes des choses du Monde. Mais cette calomnie luy a esté commune avec les plus Saints Euesques de tous les Siecles, que l'on n'a iamais manqué d'accuser de n'estre pas affectionnez à leurs Princes temporels, parce qu'ils n'estoient pas leurs flatteurs, ou leurs esclaves, & qu'ils défendoient avec vigueur les droicts de l'Eglise, & soustenoient l'autorité de leur charge. Encore si cette accusation ne venoit que de leurs Officiers, elle pourroit paroistre excusable. Mais on ne l'entend que trop souuent dans la bouche de ceux qui ayant l'honneur de porter le mesme caractère, le trahissent indignement, ou par vne lasche complaisance, ou par vn interest peu considerable; comme s'ils n'estoient pas establis de Dieu pour opposer vn front de fer & d'airain aux Princes qui veulent mettre la main sur l'encensoir, & pour leur dire; Il ne vous est pas permis de vous mesler de ces choses. Dieu vous a donné vos Royaumes à gouverner, & à nous l'Eglise à conduire. Vous luy deuez vostre assistance, & vostre protection; mais c'est comme des enfans la rendent à leur mere qu'ils deffendent, & à qui ils n'entreprennent pas de commander.

CHAPITRE V.

*Du voyage que fit saint Charles à
Thurin, pour visiter le saint
Suaire.*

1578. **L'**Amour profane rend précieux à vn
Amant toutes les choses que sa Mai-
stresse a touchées, ou qui luy ont seruy, &
il s'en fait des faueurs quand il les peut
auoir entre les mains. Mais autant qu'en
cela il fait paroistre d'extravagance, & bien-
souuent d'idolatrie; autant l'Amour diuin
pour le Sauueur du Monde, est-il iuste &
raisonnable dans la veneration qu'il rend
aux instrumens de sa Passion, & aux cho-
ses qui ont approché de son Corps sacré.
C'est pourquoy on a tousiours rendu tant
d'honneur à la Croix, aux Cloux, à la Lan-
ce, & à la Couronne d'espines, qui ont
seruy pour operer les mysteres de nostre
Redemption. Saint Charles auoit vne de-
uotion particuliere à Iesus crucifié, & sa
meditation ordinaire estoit sur ses souffran-
ces pour l'amour des hommes. Il se reti-
roit continuellement dans les trous de la
pierre; ie veux dire dans le costé de son
Sauueur mort sur la Croix, & là il beuuoit
à longs traits ce sang précieux qui en sor-
toit, & qui luy laissoit tousiours vne heu-
reuse & diuine soif, quoy qu'en mesme
temps elle fut heureusement appaisée. Il

gardoit dans son Eglise Metropolitaine, vn des Cloux dont le Fils de Dieu auoit esté attaché ; & il sçauoit que dans Chamberry, on conseruoit vn des Suaire dont il auoit esté enuelopé. Il auoit tousiours eu vn tres-violent desir de visiter cette pretieuse Relique, & les affaires de son Diocese l'en auoient empesché. Mais quand il vid Milan deliuré de peste, il songea à contenter sa deuotion, & resolut de passer les Monts pour venir en Sauoye. Le Duc Philbert sçachant son dessein, voulut luy épargner le trauail de ce long & difficile voyage, & fit apporter le saint Suaire à Thurin, de quoy il luy donna aussi-tost aduis par vn de ses Secretaires qu'il enuoya exprés à Milan, & le pria de luy faire l'honneur de venir logger dans son Palais, où il l'attendoit comme vn Ange du Ciel pour y apporter toutes sortes de benedictions.

Saint Charles voulut faire de cette visite, vn Pelerinage veritablement digne d'vn Euesque, & qui püst seruir de modele aux Pelerinages que font les Catholiques, afin d'en remporter le fruit qui leur est propre, que l'on ne peut douter estre l'expiation des pechez, & la participation au mystere, ou à la grace du Saint dont on va visiter les Reliques. Car, comme dit saint Hierosme, il ne sert de rien d'auoir esté en Ierusalem voir les lieux où le Sauueur a souffert la mort pour les hommes, & ce pelerinage n'est qu'vn voyage de curiosité, & qu'vn trauail inutile du corps, si on ne quitte ses vices aux pieds du Sepulchre de Iesvs-

De quel-
le façon
S. Char-
les fit ses
Pelerina-
ges.

CHRIST, dans Ierusalem, & si on n'en
 uest reuenu les passions crucifiées avecque
 luy. Vne Vierge qui a ioint les roses du
 martyre au lys de la virginité, ne peut
 auoir agreable la deuotion de celuy qui
 dans ses voluptez detestables, ioint la bru-
 talité, à l'impudence; & l'honneur qu'il
 croit rendre à ses cendres, l'offence au lieu
 de la rendre propice, s'il ne sort de la bouë
 où il se plonge, & ne se resout de l'imitet.
 Par ces diuines regles, il y a bien peu de
 Pelerins au monde; mais beaucoup de cou-
 reurs, ou de voyageurs, qui reuiennent pi-
 res des lieux de deuotion qu'ils ont visitez,
 qu'ils n'estoient quand ils sont partis de
 leurs maisons, parce qu'ils ont mal fait vne
 action sainte, & qui de sa nature les deuoit
 auancer en la pieté.

Le Saint Cardinal, dont nous escriuons
 l'Histoire, sçauoit ces veritez, & il les pra-
 tiqua d'une façon admirable dans le Peleri-
 nage que nous allons raconter. Il choisit
 dans sa famille, douze personnes pour
 l'accompagner, & prit encore le Pere Ador-
 ne son Confesseur, pour conduire cette
 petite troupe dans les exercices spirituels
 qu'il pretendoit faire le long du chemin. Il
 partit le sixième iour d'Octobre, apres auoir
 dit la Messe dans la Chapelle Archiepisco-
 pale, communiqué ceux de sa suite qui n'e-
 stoient pas Prestres, & beny leurs bourdons
 solennellement. Le Clergé de l'Eglise Me-
 tropolitaine l'accompagna iusques hors de
 la porte, où il prit congé d'eux, & les em-
 brassa fort tendrement, Tous les matins il

disoit la sainte Messe, & les Prestres de sa compagnie la celebroident en mesme temps que luy ; les autres communioient de sa main. Auant que de partir, on recitoit Prime, & Tierce ; on n'oubloit iamais l'Itineraire, & en chemin, on faisoit deux heures d'oraison mentale. Apres cela, on disoit le Rosaire, & on meditoit assez longtemps sur chaque mystere. Si cela estoit acheué auant que d'arriuer à la disnée, on adioustoit quelques Pseaumes, & on faisoit quelques discours spirituels pour employer toutes les minutes du temps utilement & saintement. En arriuant au lieu où on deuoit dîner, on alloit à la principale Eglise, où on recitoit Sexte, & None. Apres cela, on se retiroit pour prendre le repas, qui estoit de viandes quadragesimales, & on lisoit vn Liure de deuotion durant que l'on demouroit à table. Au sortir, on retournoit à l'Eglise, où on disoit Vespres, & le temps de l'apresdisnée s'employoit encore à l'oraison mentale, & à reciter les sept Pseaumes Penitenciaux, & autres prieres vocales. Le soir, on retournoit à l'Eglise, où on disoit Complies, & on faisoit encore oraison durant quelque temps. Apres souper, on tenoit vne petite conference, où chacun rendoit compte de sa meditation, & le Pere Adorne proposoit les poincts de celle qui se deuoit faire le iour suiuant. En suite, on faisoit l'examen de conscience qui duroit vn quart-d'heure. Le Cardinal donnoit sa benediction à tous, & de l'eau beniste, & chacun se retiroit pour

dire Matines, & pour se coucher, Gregoire de Nisse, dit, que le chariot où il faisoit la visite de quelques Eglises que le Synode d'Antioche luy auoit ordonnée, deuint vn Monastere, parce qu'il chantoit des Pseaumes durant tout le chemin avec ceux qui l'accompagnoient. Saint Charles pouuoit bien dire comme luy, que sa façon de voyager estoit vne retraite de deuotion, & sa compagnie vn Monastere portatif de Religieux occupez en Dieu, & de Dieu. Le voyage dura quatre iours, & les poincts de la meditation furent; Premièrement sur les trauaux des voyages du Fils de Dieu annonçant l'Euangile aux hommes; Secondement, sur les fatigues de ceux des Apostres, allant prescher par le monde; Troisièsmement, sur le pelerinage du Chrestien en cette vie; Quatrièsmement, sur les moyens de rendre au Saint Suaire, l'honneur qui luy est deu, & d'en tirer vn profit particulier pour son auancement en la vertu.

Hôneurs
que re-
çoit S.
Charles
durant
son Pele-
rinage.

Dans tous les lieux où il passa, il fut receu comme vn Saint. Les Euesques, le Clergé, les Reguliers, les Gouverneurs, les Gentilshommes, & le Peuple, se presserent pour le voir, & pour recevoir sa benediction, & luy firent tous les honneurs qu'ils eussent pû rendre au Vicaire de I E S V S-CHRIST mesme, ou à leur Souuerain. A Verseil, le grand Maistre de la Maison du Duc de Sauoye, avec vn autre Seigneur, luy vinrent faire vn compliment de la part de son Altesse, & l'accompagnerent inf-

qu'à Thurin. L'Euesque, plusieurs Chanoines, & quelques autres personnes de piété, se ioignirent à sa troupe pour faire ce pelerinage. Cette journée fut longue & fascheuse, à cause des mauuais chemins; de sorte que le Cardinal estant fort fatigué s'alla coucher sans manger aucune chose. A huit milles de Thurin, l'Archeuesque vint au deuant de luy avec beaucoup de Gentilshommes que le Duc enuoyoit pour luy faire honneur. Il se trouua luy-mesme pour le receuoir, à vn quart de mille hors de la Ville, estant accompagné du Prince son fils, & de toute sa Court. Les caresses furent grandes, & on voyoit bien qu'elles partoient d'une veritable estime que faisoit ce Prince, de la personne de saint Charles. Les Pelerins entrerent comme en triomphe, au bruit de toute l'Artillerie que l'on tira, & le Cardinal eut la droite sur le Duc. Il alla à l'Eglise Cathedrale, & de là à celle de saint Laurens où estoit gardé le saint Suaire, où il fit vne longue oraison. Apres il fut conduit par le Duc, dans le mesme Palais où on auoit logé Henry III. à son retour de Pologne, & qui auoit les mesmes ameublemens. On n'oublia rien dans la magnificence du seruice qui luy fut fait, & le Prince le traita, non pas en Cardinal, mais comme il eut pû faire vn grand Roy. Il eût mieux aimé estre logé dans vne cabane, s'il eust suiuy sa propre inclination, & tout cét appareil de grandeur estoit insupportable à son cœur amoureux de la sainte humilité. Il receuoit toutefois

Le Duc
de Sa-
uoye le
reçoit
magnifi-
quement.

ces honneurs qu'on luy rendoit sans mon-
 strer qu'ils luy fissent peine, afin de donner
 cette consolation au Duc qui les luy defe-
 roit avecque ioye ; & pour trouuer par là
 vne entrée dans son esprit, afin d'y faire
 glisser agreablement les aduis qu'il auoit
 resolu de luy donner pour son salut. En ef-
 fet, dans tous les entretiens qu'il eut avec-
 que luy, il luy parla avec tant d'efficace
 des obligations qu'ont les Princes d'em-
 ployer leur autorité pour faire regner
 Dieu dans leurs Estats, & d'en bannir les
 pechez autant qu'il leur est possible, par la
 Iustice des Loix, & la seuerité des peines
 dont ils ne se doiuent iamais dispenser pour
 des considerations politiques : il luy fit voir
 si clairement la vanité & l'inconstance de
 toutes les grandeurs de la terre, les perils
 où elles exposoient ceux qui y sont éleuez,
 & les difficultez de faire leur salut, s'ils ne
 veilloient continuellement sur eux-mes-
 mes, & ne renonçoient aux maximes du
 Siecle, que cette visite fut tres-auanta-
 geuse au Duc de Sauoye, & que par son
 conseil il fit beaucoup de choses vtils à ses
 Sujets, dont sans cela, il ne se fust iamais
 aduisé.

Le Cardinal parmy ces honneurs, eut oc-
 casion de souffrir quelque chose en la visite
 du S. Suaire. Car comme la longueur & la
 difficulté des chemins luy eut fait venir
 beaucoup d'ampoules sous les pieds, il se
 les fit couper par vn Chirurgien mal adroit
 qui toucha la chair viue, & luy fit vne
 blessure assez profonde ; de sorte qu'il ne

pouuoit marcher sans ressentir vne extrême douleur. Il alla toutefois à pied à l'Eglise de saint Laurens où se conseruoit la Relique, & y dit la Messe à laquelle vn grand nombre de personnes pieuses communia. Le Duc fit porter le saint Suaire à la Cathedrale, où l'Archeuesque accompagné de ses Chanoines le fit voir à loisir aux Pelerins qui baisèrent avec deuotion les endroits qui auoient touché les playes du Sauueur. Sur le bruit que l'on le monstroit publiquement, il estoit venu de tous costez vne grande foule de monde, de sorte qu'au lieu de l'Eglise Metropolitaine, on fut contraint de le déployer dans la grande place qui est denant le Chasteau. De là, il fut porté à la Cathedrale en Procession, où assisterent deux Cardinaux, qui estoient saint Charles, & le Cardinal de Verseil, deux Archeuesques, celui de Thurin, & de Tarentaise, & six Euesques, parmy lesquels se trouua Louys de Grimaud, ou de Beuil, Euesque de Vence. Le Duc, son fils, les Seigneurs de sa Cour, & les Cheualiers de saint Maurice, & de Saint Lazare, vestus des habits de leurs Ordres, suiuiuoient le Clergé, & apres eux vne multitude innombrable de Peuple où estoient mesme des Heretiques qui auoient accouru des Valées de Piedmont, & de Sauoye, pour voir le saint Cardinal. On commença les prieres de Quarante heures à la façon qu'elles se pratiquoient à Milan, & à chaque heure il se faisoit vne exhortation. Saint Charles en fit trois : le Cardinal de Verseil

Il void le
S. Suaire.

en eut vne pour sa part ; & les autres furent prononcées par les Euesques presens , & par d'autres celebres Predicateurs. Le profit qu'elles firent dans l'esprit des Auditeurs , ne fut pas petit : le voyage du Cardinal eut plus de succès qu'il n'en esperoit , puis qu'outre sa propre consolation, il produisit encore la conuersion de beaucoup de pecheurs qui se sentirent touchez par ses paroles , & par son exemple. Avant qu'il partist , le Duc luy presenta ses deux fils, Charles , & Amedée , qui se mirent à genoux pour receuoir sa benediction. Il les voulut faire leuer , mais ils s'obstinerent tellement à demeurer en cette posture d'humilité , qu'il fut contraint de les y laisser , & de les benir comme ils souhaitoient. Le Duc commanda à son aîné de venir le Cardinal pour son pere , & pria celuy-cy de le receuoir pour son fils. Cette alliance se fit de la sorte , & elle continua par des devoirs reciproques de respect , & d'amitié , qu'ils se rendirent en toutes rencontres. Enfin , saint Charles prit congé d'eux , & leur témoignant sa reconnoissance pour la bonne chere qu'ils luy auoient faite , il leur souhaita toutes sortes de benedictions du Ciel & de la Terre , pour leur recompense. Le Duc , & toute sa Cour , l'accompagnerent assez loin hors de la Ville : & ce bon Archeuesque qui imitoit parfaitement le Fils de Dieu , en l'austerité de sa vie , & en son zele pour le salut des ames , luy fut encore semblable en ce poinct , qu'il receuoit de l'honneur

DE S. CHARLES BORROMÉE. Liv. II. 325
parmy les Estrangers , & ne trouuoit que
de la contradiction & du mépris dans son
ingrate Patrie.

CHAPITRE VI.

*Des Conciles & des Synodes que tint
S. Charles, & de la façon
dont il les celebrait.*

L'Eglise a tousiours eu recours aux Con-
ciles Generaux , & aux Synodes Dio-
cesains , soit pour destruire les Heresies
qui se sont esleuées dans son sein , soit
pour reformer les mœurs corrompues des
Fidelles. Durant plusieurs Siecles , elle
s'est heureusement seruie de ce remede , &
elle a tousiours éprouué l'effet de la pro-
messe du Fils de Dieu , *où trois seront assen-* S. Mat-
blez en mon nom , là ie seray au milieu d'eux. thieu ,
Le Concile de Nicée qui fut si celebre , or- ch. 18.
donne que tous les ans on tiendra deux
Assemblées dans chaque Prouince. Mais
comme cela ne se pouuoit faire qu'avec
beaucoup de peine & de trauail pour les
Euesques qui se fussent trouuez en voyage
toute l'année, les Conciles Prouinciaux
furent establis de cinq en cinq ans , & les
Synodes toutes les années. C'est l'Ordon-
nance du dernier tenu à Trente , & saint
Charles qui l'auoit fait conclure heureuse-
ment, voulut donner l'exemple de l'ob-
seruation de ses Decrets en ce point. Mais

O vj

comme ce n'est pas assez que de tenir des Conciles pour la pompe, & pour la forme, & qu'ils doiuent estre vtils à la Prouince où ils se celebrent, le Cardinal y apportoit des preparations si saintes, que ie les veux remarquer par le menu, afin d'instruire ceux qui sont obligez à la mesme chose par leur caractère. Nous parlerons premierement des Synodes.

Auant que d'indiquer son Synode Diocesain, il tenoit la Congregation de ses soixante Vicaires Forains, & des Prestres des portes de Milan, par lesquels il apprenoit les besoins de leurs Vicariats, & les choses qu'il falloit y ordonner pour le salut des ames. Sur les difficultez qui se presentent en la resolution des Reglemens, chacun disoit son auis; & le Cardinal remarquoit soigneusement tout ce qui se proposoit d'utile. Il logeoit tous ces Ecclesiastiques dans son Palais, de sorte que n'estant point pressez de partir, à cause de la despenſe, les affaires s'examinent à loisir, & fort meurement. C'estoit vne Escole pour les Sçauans, & pour les ignorans. Car les vns & les autres apprennent tousiours quelque chose de saint Charles, qui auoit receu de Dieu vne si grande lumiere dans les affaires Ecclesiastiques, qu'il débrouilloit les plus embarrassées, & trouuoit des issues pour sortir de certains pas où la prudence humaine n'en rencontroit point. Quand le temps du Synode approchoit, il faisoit faire des Processions, & exhortoit le Clergé & le Peuple, d'implorer

la grace de Dieu pour rendre cette action utile à son Eglise, par les prières, les jeunes, & les aumônes; de purifier leur conscience par le Sacrement de la Penitence; & de s'approcher de la sainte Eucharistie. Outre cette Congregation generale de ses Vicaires Forains, il en tenoit deux autres des Visiteurs de la Ville, & du Diocèse. Là, on traitoit de l'ordre du Synode; on éliſoit les Officiers qui estoient necessaires, & on pourvoyoit au logement des Curez, & autres Ecclesiastiques qui devoient y assister. Car il n'estoit permis à aucun de loger aux cabarets; & le Cardinal faisoit l'Hospitalité aux Prestres des Villes, & des Montagnes, & aux autres qui estoient les plus pauvres. Le iour du Synode estant venu, tout le Clergé alloit en Procession de l'Eglise Cathedrale à l'Eglise de saint Ambroise, & chacun marchoit avec tant de modestie & de deuotion, que les Seculiers qui les voyoient passer en estoient tres-édifiez. L'Assemblée duroit trois iours, & le Cardinal faisoit trois exhortations, qui enflammoient le cœur de ses Auditeurs d'un nouveau zele pour trauailler au salut des ames, & sacrifier toutes choses pour ce dessein. Il ne falloit mesme que le regarder pour estre touché de deuotion, tant la pieté s'estoit renduë visible sur sa face pale & décharnée, & tant il auoit bien sceu mesler la douceur & la grauité. Il ne se contentoit pas de parler en general à ses Curez, sur les deuoirs communs de leurs charges, il les entretenoit en particulier,

& s'informoit de l'estat de leurs amés, avec vne bonté veritablement paternelle. Il les instruisoit dans leurs doutes ; il les consolait dans leurs peines, & les encourageoit à auancer tousiours dans la vertu, de sorte que ses Ecclesiastiques ne seroient iamais d'auprés de luy, qu'ils ne fussent & plus zelez, & plus habiles. C'est pourquoy il ne faut pas s'estonner si retournant dans leurs Parroisses, ils répandoient dans le cœur de ceux qui estoient sous leur conduite, le feu du zele, & de la charité dont ils estoient embrasés. Voilà de quelle façon saint Charles celebrait ses Synodes. Parlons maintenant de ses Conciles Prouvinciaux.

Des C6. Il prenoit vn soin tres-exact de s'informer de la façon de viure de ses Suffragans, **cilesPro-** de l'estat de leurs Dioceses, & des abus **uinciaux.** qui y regnoient, soit parmy les Prestres, soit parmy le Peuple. Il marquoit tout ce qu'il apprenoit dans vn Liure destiné pour ce sujet, & là-dessus il fondeit les Decrets qu'il auoit enuie de faire. L'année où le Concile se deuoit tenir, il se retiroit en vne maison solitaire de la campagne avec quelques personnes habiles en ces matieres de Canons & de Discipline, avec qui il consultoit les Reglemens qu'il iugeoit necessaires. Deux mois auparauant la celebration il auertissoit les Euesques de la Prouince, leurs Chapitres, & les témoins Synodaux de se trouuer à Milan, au iour qu'il leur marquoit. Il n'en exceptoit personne, sans vne excuse legitime,

comme de maladie, ou d'absence en vn pais esloigné. Vn Cardinal qui estoit son Suffragant, voulut partir de Milan peu de temps auant qu'il deût tenir vn Concile Prouincial. Il le fit prier fort ciuilement de s'y trouuer; & comme il n'entint pas beaucoup de compte, & qu'il se dispoſoit à s'en aller, il luy fit intimer vn Bref du Pape, qui luy ordonnoit d'y aſſiſter. Cette ſignification le ſurprit, & le piqua: il obeït toutefois, & diſſimula ſon reſſentiment. Vn autre Eueſque s'excuſant de ne pouuoir venir au Concile, à cauſe des affaires de ſon Prince, dont il eſtoit le Miniſtre; Saint Charles ne receut point cette raiſon en payement. Au contraire, elle le porta plutoſt à luy faire ſignifier vne monition de ſ'y rendre, parce qu'il iugeoit que rien n'eſtoit plus éloigné de l'eſprit Episcopale, que l'adminiſtration des affaires temporelles d'un Souuerain, qui occupent tout à fait vn Eueſque, & l'empeschent de ſonger aux beſoins de ſon Diocèſe, comme il eſt obligé: Dieu qui a diſtingué l'Egliſe des Royaumes, a donné des Miniſtres à chacun: Et comme il y a de l'impiété aux Magiſtrats politiques de ſe meſler des fonctions, & du gouuernement Eccleſiaſtique: de meſme il y a de la temerité & de l'ambition à vn Prelat chargé du ſoin des ames, de ſe charger de la conduite d'un Eſtat, ſi Dieu ne l'y appelle viſiblement, pour peu de temps, & pour repa- rer de grands deſordres, où luy ſeul ſoit capable.

de remedier. Car avec ces exceptions, non seulement il peut, mais il est obligé de servir son Prince, & sa Patrie; son caractere ne le dispensant pas de ce deuoir naturel, & la Charité Episcopale l'y obligeant encore par vne raison particuliere.

L'Euesque dont nous parlons, n'estoit pas en ces termes. C'est pourquoy saint Charles l'obligea de se trouuer au Concile
 „ Prouincial, & luy representa fortement;
 „ qu'il laissoit vne fonction sainte, & diuine, comme estoit celle de gouverner des
 „ ames rachetées par le Sang de I E S V S-
 „ C H R I S T, pour se mesler du gouuer-
 „ nement des affaires temporelles d'un Prin-
 „ ce, dont vn autre pouuoit s'aquitter aussi-
 „ bien que luy: Que pensant s'éleuer par cet
 „ employ, il se degradoit, & s'abaissoit luy-
 „ mesme, la conduite des Fidelles pour le
 „ salut eternel estant incomparablement
 „ plus noble que celle du plus grand Royau-
 „ me du Monde; Que les soins dont il estoit
 „ accablé ne pouuoient souffrir qu'il eust ce-
 „ luy de son Diocese, dont Dieu luy deman-
 „ deroit vn compte tres-rigoureux; Qu'il
 „ estoit obligé de faire beaucoup de choses
 „ mal seantes à vn Euesque, & de pratiquer
 „ des maximes bonnes à la verité pour la
 „ politique, mais peu conformes aux re-
 „ gles de l'Euangile: Enfin, que l'esprit Ec-
 „ clesiastique, selon lequel il estoit obligé de
 „ viure, ne se pouuoit conseruer dans la Cour,
 „ que par vn miracle qu'il ne iugeoit pas
 „ se deuoir faire pour l'amour de luy. Ces
 „ aduis, qu'il accompagna de beaucoup

de douceur, ouvriront les yeux à celuy qui les receut, & furent cause que laissant l'employ politique, il s'attacha à la residence, & fit tous les devoirs d'un bon & charitable Pasteur. J'ay allegué ces deux exemples pour faire voir la fermeté de Saint Charles en ce qui regardoit la Discipline Ecclesiastique dans sa Prouince, sur le faict des Conciles Prouinciaux, qu'il iugeoit avec raison estre la chose la plus necessaire pour le bon gouvernement des Dioceses. Il en celebra six, de trois ans en trois ans, & onze Synodes, qui contiennent tout ce que l'on peut souhaiter pour le bon reglement d'une Prouince, & d'un Diocese.

CHAPITRE VII.

De la visite que fit Saint Charles de quelques Vallées sujettes aux Suisses, & aux Grisons.

LEs differends que Saint Charles auoit ^{1567.} avec les Gouverneurs de Milan, & les Magistrats Royaux, eussent esté capables d'occuper tout autre esprit que le sien, & de le détourner de tous les soins de son Diocese. Car outre qu'il ne pouuoit auoir d'affaire plus importante, elle s'estoit encore aigrie par beaucoup de rencontres fascheuses, & il y alloit de l'honneur du Cardinal, d'en venir à bout. Toutefois, comme il n'agissoit pas par les motifs qui conduisent

les autres hommes , mais par l'esprit Episcopal , qui est toujours accompagné de tranquillité & de douceur ; il songeoit avec autant d'application au gouvernement de ses brebis , que si ce differend où pour luy il s'agissoit de tout , n'eust esté d'aucune consequence. Dans son Diocese il auoit trois Vallées qui dépendoient pour la Souueraineté temporelle , de trois Cantons Catholiques des Suisses , où la Discipline Ecclesiastique estoit entierement dereglée, l'autorité de l'Archeuesque abolie , & la pieté tout à fait alterée dans les Prestres, & dans les Laïques. En cet estat que Saint Charles n'ignoroit pas , elles demandoient la presence de leur Pasteur , pour trouuer quelque remede à des maux si pressans , & si extrêmes. La saison n'estoit pas propre pour faire cette visite ; car ce pais éloigné de Milan de cent milles , est tres froid , & Saint Charles voulut partir au commencement du mois d'Octobre. Mais quand il s'agissoit du salut des ames de ses brebis , ce bon Pasteur ne consideroit point sa santé ; & les lieux les plus sauvages , les chemins les plus difficiles , les montagnes les plus aspres, les glaces, les neiges, & les precipices, ne le pouuoient empêcher de faire promptement son deuoir. Pour travailler sans opposition dans la visite de ces Vallées , il écriuit vne lettre fort ciuile aux Cantons qui en estoient Souuerains , par laquelle il les aduertissoit de son dessein , & les prioit de joindre leur autorité à son zele , afin que les ordres qu'il establiroit dans leurs

païs fussent inuiolablement gardez. Aussi-
 tost chaque Cantō deputa vn Ambassadeur
 pour receuoir le Cardinal, & pour l'accom-
 pagner dans sa viûte, ce qu'ils firent avec
 toute la ciuilité qu'il pouuoit souhaiter. On
 ne peut exprimer les desordres que Saint
 Charles trouua particulièrement dans les
 Ecclesiastiques, qui pour la pluspart estant
 entrez dans leurs Benefices, par simonie,
 viuoient comme des gens sans Vocation,
 & ne menoient pas seulement vne vie de
 gens d'honneur, bien loin d'en mener vne
 chrestienne, & Clericale. Ils estoient dans
 vne profonde ignorance des premiers ele-
 mens de la Religion. Ils entretenoient des
 femmes publiquement. Ils faisoient vn tra-
 fic à decouuert, comme des Marchands. Ils
 ne prenoient aucun soin de leur Paroiss-
 siens, qu'ils laissoient viure dans toute sor-
 te de licence, ne pouuant, ou n'osant re-
 prendre dans les autres, ce qu'ils ne vou-
 loient pas corriger en eux-mesmes. Ils ad-
 ministroient les Sacremens sans garder
 presque aucunes des ceremonies prescrites
 par l'Eglise. Leurs Eglises estoient si sales, &
 si mal entretenues, qu'elles ne differoient en
 rien des lieux prophanes: Enfin on ne pou-
 uoit voir vn Clergé plus corrompu en tou-
 tes manieres. Le Peuple qui auoit de si
 mauuais exemples, estoit aussi extrême-
 ment vicieux. Il est vray qu'il auoit beau-
 coup de simplicité & de bonté naturelle, &
 que ses pechez venoient plustost d'ignorance
 que de malice. Saint Charles voyant
 tant de desordres, sentoît vne douleur que

*Aux
Actes
ch. 17.*

ses yeux pleuroient avec des larmes de sang. Comme Saint Paul dit, que l'ardeur de son zele s'échauffa quand il vid la Ville d'Athenes plongée dans vne superstition generale : ainsi le Cardinal se sentoit pressé par l'amour Pastoral avec plus de vehemence, reconnoissant le malheureux estat des Habitans de ces pauvres Vallées. La saison, comme i'ay desia dit, estoit fort incommode, & les chemins par où il falloit passer, fort difficiles, & presque inaccessibles ; mais la charité de Saint Charles surmonta toutes ces difficultez. Il marcha à pied par ces môtagnes: Il grimpa en des lieux où il falloit aller sur les mains: Il passa au trauers des neiges, & des torrens: Il souffrit la faim, & la soif: Il ne coucha d'ordinaire que sur des coffres de bois: Enfin il suporta des incommoditez auxquelles sa pieté plûstot que ses forces naturelles, le firent résister. Les Habitans de ces miserables Villages estoient ravis d'admiration, voyant vn Cardinal viure d'une façõ si rigoureuse, & souffrir tout ce qu'il souffroit pour procurer leur salut. Aussi ces preuues de sa charité paternelle, leur gaignerent tellement le cœur, qu'ils furent tres-dociles pour receuoir ses instructions, & les reglemens qu'il establit pour toutes les choses qui regardoient leurs mœurs, & la police Ecclesiastique. La douceur avec laquelle il parloit à tout le monde, & la liberalité qu'il leur fit paroistre, faisant la dépense de sa visite, & celle des Ambassadeurs mesme, seruirent beaucoup pour faire agréer toutes les ordonnances

qu'il publia, & pour remettre ces trois Vallées sous l'obeïssance de l'Archeuesque de Milan. Comme il se plaignit aux Ambassadeurs, de ce que les Cantons auoient usurpé la iurisdiction sur les personnes Ecclesiastiques; ils luy répondirent; Qu'ils y auoient esté contraincts par leur vie scandaleuse, & par la negligence de ses Predecesseurs, qui auoient entierement abandonné le soin de ce Peuple; mais que le voyant soigneux de leur salut, ils luy promettoient de ne se plus mesler du iugement de ceux qu'ils laissoient volontiers à son Tribunal, & qu'ils n'auoient autre dessein que de faire obseruer le Concile de Trente dans leurs pais. Le Clergé s'y soumit par vn acte solemnel, & encore aux Decrets des Conciles Prouinciaux, & des Synodes celebrez à Milan. Il finit sa visite avec vne extrême satisfaction des Seigneurs de ces Vallées, & emmena six ieunes hommes de leur Nation pour les esleuer dans son Seminaire. Aussi-tost qu'il fut arriué à Milan, il y enuoya de bons Prestres pour y venir cultiuer ce qu'il y auoit semé, & conduire ces Peuples qu'on pouuoit bien nommer auparauant, des brebis errantes par les montagnes, sans conduite de Pasteur, & exposées à la fureur des loups.

Il auoit reconnu dans cette premiere visite, que l'Herésie se glissoit insensiblement dans les Cantons Catholiques, par le moyen des Maistres d'école, lesquels estant heretiques, faisoient couler le venin de l'Herésie dans les esprits des ieunes

“Saint
“Char-
“les fait
“rece-
“voir le
“Conci-
“le de
“Trente
“dans le
“pais des
“Suisses
“

Il y fait
changer
les Mai-
stres d'é-
cole.

enfans , sous pretexte de leur enseigner les bonnes Lettres. Les Peres les enuoyoiẽt dans les païs qui en estoient infectez , pour apprendre la langue Allemande ; & ils reuenoient d'ordinaire corrompus en leur creance , apres quoy ils corrompoient les autres. Saint Charles qui voyoit par là vne mal-heureuse ouuerture à la ruine de la Religion , & qui craignoit avec raison , que le mal ne s'estendist iusques à Milan , par le moyen du commerce , & du voisinage ; proposa quelques expediens aux Seigneurs particuliers de ces trois Vallées qu'il visitoit pour empêcher le progrès de cette infection. Mais ils répondirent tous , que s'agissant d'un ordre general , il falloit que les choses fussent arrestées dans vne Diete. Elle se tint bien-tost apres , & il y enuoya vn Deputé qui eust charge de visiter tous les Cantons Catholiques , de faire de grands presens aux Seigneurs , & de les inuiter souuent à manger , & de viure presque à leur mode pour les gagner , & les porter aux resolutions qu'il desiroit d'eux pour la conseruation de la Foy dans leur païs.

Quand la Diete fut assemblée , le Deputé de Saint Charles s'y trouua , & eut vne audience en laquelle il proposa trois choses , qu'il iugeoit necessaires pour empêcher le progrès de l'Herésie dans le païs où son exercice n'estoit pas permis. La premiere estoit , que l'on ostast les écoles aux Maistres heretiques : La seconde , que les peres n'enuoyassent plus leurs enfans dans les Cantons separez de l'Eglise Romaine. Et la troisiéme , qu'aucun Capitaine , ou

Commissaire, infecté d'Herésie, ne prist connoissance des affaires qui pourroient regarder la Religion Catholique ; mais quel'on establîst vn Official qui en feroit profession, dont l'Office seroit de chastier ceux qui sortiroient de l'Eglise. Ces propositions furent fort diligemment examinées ; & apres quelque debat sur la derniere, enfin elles furent receuës, & il s'en fit vne Loy generale du commun consentement de ceux qui tenoient la Diete. Le Deputy signifia aux Maistres des écoles, l'ordonnance des Seigneurs, par laquelle il leur estoit fait commandement de sortir du pais ; & en effet, il les chassa des lieux où ils estoient établis. Ainsi la peste de l'Herésie fut esloignée de l'Italie, où il estoit fort à craindre qu'elle n'entraist par ces trois Vallées dont nous venons de parler.

Comme le Cardinal reconnut le besoin que tout ce pais auoit de son assistance, & particulièrement les Parroisses dependantes de l'Euesché de Come ; il s'appliqua toujours avec vn soin particulier à leur procurer tout le secours qui estoit en sa puissance. Le plus important fut de leur obtenir vn Nonce Apostolique, lequel avec l'autorité du Pape, pourueût à tous les desordres qui s'estoient glissez, & établîst tous les reglemens necessaires pour conseruer la Foy, & la discipline de l'Eglise. Gregoire XIII. entra aussi-tost dans ses sentimens, & nomma Monseigneur Iean François Bonhome, Euesque de Verseil, pour exer-

cer cette charge auprès des Cantons Catholiques. C'estoit vn homme que la sagesse de son zele, l'eminence de sa doctrine, son experience, & sa pieté, rendoient tres-propre à vn employ si difficile, & si laborieux. Il répondit à l'esperance que Saint Charles en auoit conceuë, & suiuit fort fidellement les aduis qu'il luy auoit donnez, pour se bien acquitter de sa charge, & pour rétablir la Discipline Ecclesiastique parmy ceux qui n'en obseruoient aucune regle. Cét employ faisant connoistre dequoy il estoit capable, le Pape l'enuoya Nonce auprès de l'Empereur, en l'année 1581. & luy confia la conduite de la deposition de l'Archeuesque de Cologne, du Preuost, & de quelques Chanoines de son Eglise, qui estoient infectez de l'Herésie, & de l'élection d'un nouueau Prelat, pour remplir le Siege Electoral. Cette affaire estoit tres-delicate, & elle auoit besoin d'une profonde prudence pour auoir le succès que l'on souhaitoit pour la seureté de la Religion Catholique. Elle l'eut fort heureusement, & le fils du Duc de Bauiere fut esleu, qui se montra tres-ardent pour la conseruation de la Foy, que son Predecesseur auoit malheureusement trahie.

S. Charles
les fonde
de vn

Saint Charles ne se contenta pas d'auoir fait pour ayder les Suisses, les choses que nous auons racontées; il en fit vne qui couronnoit toutes les autres, & qui luy donnoit moyen d'executer entierement les desseins qu'il auoit pour conseruer la Foy Catholique dans le país où elle estoit receuë, & la

& la faire mesme entrer dans ceux d'où l'Hereſie l'auoit chassée. Ce fut de fonder dans Milan, vn College qu'il appella Heluétique, c'est à dire des Suisses, où s'esleuoient de ieunes gens de cette Nation, aux lettres saintes, & à la pieté; lesquels retournant en leurs païs, y exerçoient les Cures, y preschoient, y catechisoient les peuples, & respendoient l'esprit de deuotion qu'ils auoient receu dans le Seminaire. Du commencement de la fondation, il nourrit quarante ieunes hommes, la moitié Suisses, la moitié Grisons, qu'il mit sous la conduite des Oblats de S. Ambroise, pour le spirituel, & à qui il donna des regles presque semblables à celles que l'on gardoit dans ses autres Seminaires. Il prit si fort cette œuvre à cœur, que par l'vnion de plusieurs Benefices qu'il obtint du Pape, il porta le reuenue iusqu'à huit mille escus d'or. Il auoit vn soin tres-particulier de ceux qui estoient esleuez dans ce College, les regardant comme des ouuriers qu'il instruisoit pour travailler en des païs incultes, & y planter la Foy. Aussi eut-il la consolation d'en voir sortir plusieurs qui firent de grands fruits dans leur patrie, & qui furent tres-recommandables par leur doctrine, & par leur pieté. Les vallées de la Valteline, & de Chaunene, en furent fort secouruës, & l'Hereſie eut en eux des ennemis qui ne firent ny trêue, ny paix, avec elle, & qui l'esloignerent fort loin du Diocese de Milan. Il y auoit dans la Valteline, vne Eglise dediée à la sainte Vierge, qui estoit celebre par les

College
pour les
Suisses
dans Mi-
lan.

Pelerinage de S.
Charles,
à vne
Chapelle
dediée à
la sainte
Vierge.

miracles qui s'y faisoient. Saint Charles fit dessein de l'aller visiter. Quand les Habitans du lieu de cette deuotion le sceurent, ils luy enuoyerent des Deputez pour le prier de leur faire l'honneur de les venir voir, l'asseurant que non seulement il consoleroit les Catholiques, mais que les Heretiques mesmes seroient resioüis de sa presence. Auant que de se mettre en chemin, il prit la licence de l'Euesque de Come, dans le Diocese duquel la Valteline est située, d'y prescher la parole de Dieu; & puis il comença son pelerinage, marchant à pied le baston à la main, employant tout le temps du voyage à prier, ou mentalement, ou vocalement. Il trauersa vne montagne tres-rude, & trouuant des païsans dans les villages, il s'arrestoit, & leur enseignoit la creance de l'Eglise Catholique, qu'il scauoit bien que les Ministres leur deguisoient, afin de leur en faire conceuoir de l'horreur, & de rendre ridicules les plus Saints Mysteres. Quand il entra dans la Vallée, le Peuple du lieu de Tiran vint au deuant de luy, & le receut avec beaucoup d'honneur. Il y auoit mesme plusieurs Heretiques, qui furent fort estonnez de voir vn Cardinal de si grande qualité, en habit de Pelerin, à pied, sans suite, sans equipage, & sans aucune de ces choses somptueuses qu'ils reprochent si cruellement aux Prelats de l'Eglise Catholique. Il alla tout droit à l'Eglise, & il y passa vne bonne partie de la nuict, deuant l'Image de la sainte Vierge, sans s'estre tant soit peu delas-

fé de la fatigue du mauuais chemin qu'il auoit fait. Le lendemain celuy qui exerçoit la Iustice dans le lieu pour les Grisons, le vint visiter. D'abord il fit quelque difficulté de le voir, à cause qu'estant Heretique, il le tenoit pour excommunié. Mais les Catholiques luy presenterent qu'il estoit tres-important qu'il luy fust bonne chere, & qu'il le receût ciuilement, afin de le trouver fauorable en beaucoup d'occasions où il leur nuiroit, s'il le rebutoit avec rudesse. Cette consideration l'obligea à le faire entrer, & à le traiter avec vne grande douceur. Le Podesta luy offrit de la part de ses Seigneurs, toute la Vallée, & encore soy-mesme; à quoy saint Charles respondit, qu'il le remercioit de sa ciuilité, & qu'il ne desiroit autre chose de luy, que le salut de son ame. A cette responce, le Podesta repliqua, qu'il auroit bien enuie de luy parler en particulier, & quand ils furent entrez dans vn lieu assez retiré, il luy confessa les larmes aux yeux, qu'il reconnoissoit son erreur, & qu'il auoit dessein de se faire Catholique, mais qu'il ne pouuoit pas si tost l'accomplir, pour quelques interets qu'il auoit avec les Seigneurs du pais. Apres cela il le pria de permettre qu'il assistast à sa Messe; le Cardinal s'en excusa, parce que la regle de l'Eglise ne luy permettoit pas de célébrer deuant vn Excommunié; mais il luy accorda volontiers la faueur d'entrer dans l'Eglise, & d'oüir sa Predication. Le bruit de son arrivée attira beaucoup de Peuple des montagnes voisines, & chacun

Paroles
remar-
quables
de saint
Charles,
au com-
mence-
ment de
son Ser-
mon dās
le Dioce-
se d'un
Euesque
son Suf-
fragant,

fut rauy d'admiration, le voyant en chaire avec la Mitre en teste. L'Histoire Italienne de sa vie remarque, qu'il commença son Sermon par ces paroles : *Je suis monté en ce lieu par la permission de Monseigneur vostre Euesque* ; ce qu'il fit tout exprés pour leur enseigner à respecter l'autorité de leur Pasteur ordinaire, dont il ne vouloit pas vsurper la fonction principale, qui est de prescher, sans sa licence, encore qu'il l'eust pû faire, ou par le droit commun qui donne aux Euesques le pouuoir d'annoncer l'Euangile par tous les lieux où ils se trouvent, s'ils ne sont particulièrement interdits de cette fonction ; ou par les Canons anciens qui veulent que l'Euesque offre à son Confrere, l'Autel, & la Chaire ; ou par la visite Archiepiscopale qu'il faisoit en cette Parroisse. Son discours fortifia merueilleusement les Catholiques, & mit les Heretiques en vn desordre qui fut d'autant plus grand, que l'exemple de la vie austere & toute sainte du Cardinal, les confondoit, & ne leur laissoit aucun sujet de soupçonner la verité de ses paroles. On le vouloit retenir plus long-temps dans ces Vallées : mais comme il auoit la visite de l'Euesché de Bresse à acheuer, il fut contraint de dire adieu à ces pauvres gens dont il auoit gagné le cœur. Le salut des Suisses luy tenoit tousiours tres-fortement à l'esprit, & il fit tant avec leurs Seigneurs des Ligues Catholiques, qu'ils y receurent les Capucins, & les Iesuites, afin que ceux-là par l'austerité de leur vie, & ceux-cy par

leur doctrine, introduisissent la piété, & la science de la Religion Chrestienne, parmy ces Peuples qui auoient grand besoin de ces deux choses. Les derniers fonderent deux Colleges, l'un à Luzerne, & l'autre à Fribourg, où ils s'employèrent vtilement à l'instruction de la ieunesse, ce qui dans peu de temps fut vn renouvellement de toute cette contrée.

CHAPITRE VIII.

Suite du mesme sujet.

Quelques années apres le Cardinal fut le Visiteur Apostolique des païs des Grisons, (c'estoit autrefois la Rhetie) qui est fort ample, & qui contient des vallées remplies de beaucoup de peuple. La Ville principale s'appelle Coire, & auant que l'Herésie en eust chassé la Religion Catholique, c'estoit vn Euesché sujet à l'Archeuesque de Milan. De cinq vallées que comprend ce petit Estat, il y en auoit vne appelée Mesolcina, laquelle estoit presque toute remplie de Sorciers, ou de gens qui vsoient de malefices contre les animaux, les fruits de la terre, & les hommes mesmes. Le dommage qu'ils faisoient vint à vne telle extremité, que les Habitans, en vne assemblée generale qu'ils firent pour consulter sur les remedes qu'ils pouoient ap-

1583.

Visite de
S Char-
les dans
vne val-
lée rem-
plie de
Sorciers

porter à ce mal , résolurent d'en aduertir saint Charles , & de le prier de les assister de son autorité , ou de ses conseils. Ils luy depescherent des Deputez qu'il receut avec d'autant plus de ioye, qu'il le vid offrir vne occasion laquelle il cherchoit depuis longtemps. Il les traita avec beaucoup de civilité ; & incontinent apres leur depart , il ennoya dans cette Vallée , François Borsato , Jurisconsulte Mantouian , homme pieux , sçauant , & fort sage , pour y exercer l'Office d'Inquisiteur , contre les Sorciers , & les Empoisonneurs publics. L'employ estoit tres-difficile ; mais ce Iuge s'en demella avec tant de prudence , qu'il remedia aux desordres qui ruinoient la Vallée , fit quelques punitions des Sorciers les plus opiniastres , & par le suplice de peu de gens , conuertit plusieurs coupables , & les retira de leurs pratiques diaboliques. Saint Charles se resioüit extremement , apprenant de quelle façon il auoit reüssi , & iugea qu'apres cette bonne disposition à sa visite , il estoit à propos de choisir des hommes extraordinaires pour l'y accompagner. Il ietta donc les yeux sur le Pere François Panigarole , Religieux de saint François , l'un des plus fameux Predicateurs d'Italie ; sur le Pere Achille Gagliardi , de la Compagnie de I E S V S , & sur Bernardo Morra , son Auditeur general ; personnages que leur doctrine , leur eloquence , leur pieté , & leur reputation , rendoient extremement recommandables. Il partit de Milan avec eux au commencement du mois de No-

tembre, & vint à Rouerreto, qui estoit le lieu principal de la Vallée, où il fut receu par le peuple avec des tesmoignages de respect & de ioye qui n'estoient pas ordinaires. Il monta en Chaire en arriuant, & prit pour theme de son Sermon, l'Histoire de Ioseph que son pere enuoya pour sçauoir ce que faisoient les freres, l'appliquant au soin qu'auoit eu d'eux le souuerain Pontife, de la part de qui il les venoit visiter. Cette Predication fut tres-efficace pour ces pauures gens, leur gaigna tout à fait le cœur, & les disposa à faire tout ce qu'il desiroit. L'ordre qu'il establit en cette visite, fut, que le matin le Pere Panigarole faisoit vn Sermon meslé de controuerse pour confirmer les Catholiques en leur creance, & pour ramener à l'Eglise, les Heretiques qui le venoient escouter. Apres cela, le Cardinal disoit la Messe, & faisoit vn autre discours moral contre les pechez, & les mauuaises coustumes qui regnoient dans le pais. Apres le disner, le Pere Gagliardi enseignoit le Catechisme, avec tant de clarté & de methode, que les plus stupides y estoient instruits, & edifiez. Il y auoit plusieurs Prestres qui entendoient les Confessions, & qui recueilloient les fructs de la semence que les Predicateurs iettoient, pour disposer les Fideles à la sainte Communion. Mais l'exemple de la vie du saint Archeuesque, fut plus puissant sur ce Peuple que toutes les Predications qu'ils entendoient. Les plus obstinez dans leurs debauches s'en retirerent, voyant vn Cardi-

Ordre de
la visite
de saint
Charles.

nal de cette qualité, qui ieusnoit tous les iours, les Festes exceptées, au pain & à l'eau; qui couchoit sur vn peu de paille; qui ne se chauffoit point, encore que le froid fût tres-rigoureux; & qui passoit presque toutes les nuits en oraison. Il faisoit toute la despense de la visite, & donnoit de grandes aumônes aux pauvres, qui trouuoient en luy vn pere tousiours disposé à les secourir, & qui mesme preuenoit leurs besoins.

L'Inquisiteur ayant acheué les procez des Sorciers, & de ceux qui vsoient de malefices, les rapporta à saint Charles, qui trauailla si heureusement pour les retirer de leur peché, qu'en vne seule fois il en conuertit cent cinquante, qui se confesserent & communierent de sa main. Onze vieilles femmes qui estoient comme les maistresses des autres, demeurerent obstinées, & on fut contraint de les liurer au bras seculier, qui leur fit expier par le feu, les sorcelleries qu'elles exerçoient depuis si longtemps. Il y auoit vn Preuost de l'Eglise de Rouereto, qui tenoit le premier lieu entre les Sorciers, & qu'ils reconnoissoient comme leur Chef. Le Cardinal employa les raisons, les prieres, les larmes, les menaces & les promesses, pour tâcher de flechir son cœur, & de le porter à la penitence. Mais le Diable auoit pris vne si puissante possession de son cœur, qu'il demeura sourd à tout ce qu'il entendit de la bouche de son Prelat. Enfin voyant son endurcissement, il fut contraint de venir à sa degradation; & les larmes qu'il respendit durant

cette ceremonie , furent des marques de la peine qu'il auoit à exercer ce chastiment contre vn Prestre. Deux Moynes Apostits qui auoient des femmes & des enfans, profiterent mieux de sa bonté, & de sa charité. Car ils se ietterent à ses pieds, & le prièrent d'auoir pitié de leur malheur. Il les embrassa avec amour, & apres leur auoir donné l'absolution, il les fit recevoir dans la Religion qu'ils auoient abandonnée, & plaça leurs femmes & leurs enfans, en des maisons establies dans Milan, où on pourueut à leur entretien. Il mit de bons Prestres de la Compagnie de I E S V S, & de la Congregation des Oblats, à la place des scandaleux qu'il trouua dans le país, & il se seruit d'eux pour instruire le Peuple, & le conduire à la pieté Chrestienne par leurs bons exemples. Il eut vne patience merueilleuse avec beaucoup de femmes qui estoient engagées dans des superstitions diaboliques, & par là il vint à bout d'en reduire plusieurs à les abandonner. Il fit aussi abjurer l'Herésie à beaucoup de gens qui la professoient avec obstination : & le Chancelier de la vallée fut vn de ses principaux trophées. A la place des Liures heretiques qu'il fit brûler, il en distribua d'autres qui enseignoient la verité, & les bonnes mœurs, lesquels il enuoya prendre à Milan. Il y auoit beaucoup de personnes mariées dans les degrez deffendus, & d'autres qui estoient tombez en diuerses Censures. Il remedia à tous ces desordres, avec l'autorité du Pape, qu'il auoit tres-ample.

pour tous les cas qui se presenteroient dans la visite. Il reconcilia les Eglises poluës par des sepultures d'heretiques : Enfin il changea toute la face de ces Vallées , & d'un desert sauvage & sterile , il en fit des montagnes belles & fecondes , comme le Thabor & l'Hermon , pour parler le langage de l'Ecriture.

Ayant appris que les Grisons tenoient vne Diete , il'estoit necessaire d'y faire représenter , que pour assurer la Foy & le salut des Peuples , il falloit les pourvoir de Prestres qui ioignissent la sainteté de la vie , à la pureté de la doctrine , & leur laisser la liberté de faire venir des Ecclesiastiques des Prouinces , où il seroit plus aisé d'en trouver de pieux & de capables. La Loy du pais estoit contraire , & il y auoit de grandes difficultez à surmonter pour la faire rompre. Mais comme rien de ce qui pouuoit seruir aux ames , ne luy paroissoit mal-aisé , il choisit vn Deputé pour se presenter de sa part à cette Diete , qui auoit toutes les conditions necessaires pour luy faire auoir la satisfaction qu'il desiroit. Ce fut Monseigneur Morra , ce Docteur dont nous auons desia parlé , qui auoit laissé la Magistrature ciuile pour se faire Prestre sous sa discipline. Il luy bailla Ambroise Formis qui estoit vn excellent homme , pour l'accompagner , & luy seruir de trucheman. Outre les instructions qu'il leur donna , il les chargea d'une Lettre pour l'Euesque de Come , par laquelle il le coniueroit d'auoir plus de zele que iusqu'alors il n'en auoit té-

moigné , pour le salut de ses brebis , & de songer au compte que Dieu luy en demanderoit à l'heure de la mort. Les Seigneurs qui tenoient la Diete , écoutèrent ces Enuoyez avec beaucoup de témoignage d'honneur pour le saint Cardinal , & leur accorderent tout ce qu'ils desirerent d'eux, horsmis la liberté de faire venir des Prestres de dehors , demeurant fermes à vouloir qu'ils fussent du pais des Grisons , & des Suisses.

Durant qu'ils negotioient à Coire , saint Charles visitoit vne contrée que l'on appelloit la Comté de Bellinzone , qui estoit sous la Seigneurie des Suisses. Il n'y trouua point d'Heretiques à la verité , mais il fut bien affligé d'y trouuer tant de corruption parmy les Ecclesiastiques , & les Catholiques. Ceux-là estoient pour la plus part entrez dans leurs Benefices par la Simonie ; & ceux - cy n'auoient rien des mœurs Chrestiennes , mais viuoient comme de mauuais Payens. La plus part des mariages estoient nuls , à cause des degrez de parenté dans lesquels ils estoient contractez , & il y auoit grand nombre de personnes embarassées dans les Censures. S. Charles donna à tous ces maux les remedes necessaires pour le repos des consciences , & fit l'office d'un excellent Medecin parmy tant de malades qui sembloient estre desesperer. Il fonda vne Prebende qu'il nomma Scholastique , & en fit pouruoir un personnage pieux & sçauant, pour instruire les ieunes gens en la Doctrine Catholique,

& s'opposer à l'Herésie dont le païs estoit environné. Le Pere Gagliardi, par son ordre, composa vn Catechisme, où par vne methode claire & faeile, il enseignoit la Foy Catholique aux plus stupides, & en instruisoit les plus capables. Il auoit dessein de fonder vn College dans ce quartier, & il en ietta quelques fondemens; mais il ne put acheuer cette bonne œuvre estant preuenue par la mort.

Les Ministres s'efforcent de réuerfer tout ce qu'auoit fait saint Charles.

Iusques icy, le Diable sembloit estre demeuré comme estourdy du courage, & du zele de saint Charles dans vn païs dont il estoit presque le maistre absolu. Mais aussitost que le Cardinal fut retourné à Milan, où il vint pour celebrer la feste de la Natiuité de Nostre-Seigneur; les Ministres qui estoient presque tous des Apostats de diuerses familles religieuses, considererent serieusement le peril qu'ils couroient de se voir chassés, & de passer leur vie dans vne grande misere, si l'autorité de l'Archeuesque de Milan continuoit à s'establis dans le païs. Leur interest leur donnant de
 „ l'audace, ils vinrent à la Diete qui duroit
 „ encore, & là ils presenterent; qu'il s'agissoit maintenant de la liberté & du salut de la Patrie; que les Habitans de la vallée
 „ Mesolcina auoient hazardé l'une & l'autre,
 „ receuant vn Inquisiteur, & la personne de
 „ l'Archeuesque de Milan; que par ce moyen
 „ c'estoit oster la liberté de conscience, &
 „ donner vne atteinte à la confederation que
 „ l'on auoit avec la France, dont saint Charles estoit ennemy, comme attaché aux in-

terests d'Espagne ; qu'en cela , ils auoient peché contre les Loix du País ; qu'ils estoient dignes de chastiment , & que si on ne remedioit de bonne heure à ces nouveautez , elles se trouueroient enfin ruineuses à la liberté publique. Ces remonstrances colorées des raisons d'Estat , furent fort fauorablement ouyes par les Heretiques , qui faisoient le plus grand nombre de l'Assemblée ; & les Catholiques , quoy qu'affectionnez à S. Charles , n'oserent pas en cette rencontre , faire paroistre tout leur zele de peur d'estre accusez de n'auoir pas assez d'amour pour leur Patrie. Il fut donc resolu que l'on procederoit criminellement contre ceux qui auoient receu l'Inquisiteur , & l'Archeuefque. La procedure fut fort rigoureuse , & plusieurs se virent obligez de se venir rendre prisonniers dans Coire. Les Seigneurs de la Ligue Grise se ressentirent de cette violence , & prirent la deffence des accusez qu'ils soustenoient , & il estoit vray , n'estre pas Grisons , mais seulement leurs Confederez. Le Cardinal fut fort affligé quand il apprit les nouuelles de cette persecution , & il employa tout son credit auprès des Suiffes Catholiques , pour faire deliurer les prisonniers. Leur autorité fut si puissante , qu'ils sortirent de prison sans aucun chastiment : & ce secours donna tant de hardiesse aux Peuples que l'on auoit crû intimider , qu'ils resolurent de faire subsister tous les Reglemens de saint Charles , & de deffendre la Religion Catholique , mesme par les armes , s'il estoit

necessaire de les employer. Ainsi la petite persecution que l'on fit aux Habitans de cette Vallée, ne seruit qu'à les confirmer dauantage dans la Foy: & si on les eust laissez en repos, il y a grande apparence que peu à peu leur zele eust pû venir à se relascher, & que les ordres establis par le Cardinal se fussent alterez d'eux-mesmes. Il commença dès lors à negocier avec les Suisses Catholiques, pour les obliger d'enuoyer des Ambassadeurs aux Grisons, afin de les porter à laisser la liberté de conscience dans leurs Pais, ce qui estoit conforme aux articles de leur Confederation, & de les menacer, s'ils ne donnoient les mains à vne proposition aussi iuste que celle-là, de ne leur donner aucune assistance dans leur besoin. Mais la mort du Cardinal empecha le bien de cettè negotiation, dont le succès eust ramené presque tous les Heretiques à l'Eglise.

Il en-
noye des
Missio-
naires en
d'autres
Villes.

Les Catholiques qui habitoient les autres Vallées, ayant sceu le profit qu'auoit fait sa visite dans la Melsocine, & la liberté qu'il auoit procurée à ceux que les Ministres auoient fait mettre en prison, luy écrivirent le miserable estat où ils estoient reduits sous la tyrannie des Heretiques, & le besoin de sa presence, & du secours de quelques Prestres qui fussent instruits sous sa Discipline. Les choses n'estoient pas encore disposées à recevoir sa visite utilement; c'est pourquoy il se contenta de leur enuoyer des Ouyriers excellens pour les instruire & les consoler. Ce furent le

Pere François Adorne de la Compagnie de IESVS, le Pere Dominique Bouvier, de la Congregation des Clercs Reguliers de saint Paul; & à Plurio, lieu assez peuplé, Marc Aurele Gratarola, Prestre de la famille des Oblats. Ces bons Prestres firent de grands fruits par leurs Predications, leurs Cathechismes, leurs Conferences, & l'exemple de leur vie qui auoit encore plus de force sur l'esprit du Peuple ignorant, que leur doctrine. On venoit des montagnes éloignées pour les entendre. Les bons Catholiques s'auançoient en l'amour de la pieté, & les pecheurs sortoient de la bouë de leurs pechez, où ils auoient demeuré enseuelis depuis plusieurs années.

Les Ministres Heretiques furent au desespoir de voir ces progrès de la Religion Catholique, dans les lieux où ils croyoient la pouuoir exterminer, & la honte d'auoir si mal reüssi dans leur premiere persecution, aioustoit l'interest particulier de la vengeance, à l'ardeur du faux zele dont ils estoient échauffez. Ils reuinrent donc à Coire, & là ils agirent avec plus de chaleur que iamais auprès des Seigneurs, pour leur ietter dans l'esprit des soupçons contre saint Charles, qu'ils accusoient comme Espagnol, & comme petit Neveu de Jacques de Medicis, qui auoit autrefois pris Chauene & Morbegne, dans la Vallée de la Valteline; de songer à se rendre Maistre du Pais, pour le Roy d'Espagne, par les Prestres qu'il auoit enuoyez de Milan. Ils aiousterent aux missions generales

On met
le Pere
Bouvier
en pris6.

qui regardoient l'intereſt commun , des plaintes particulieres , contre le Pere Bouvier , & contre Gratarola. Ces diſcours irriterent contre eux, les Seigneurs Grisons & ſans examiner autrement cette affaire, ils donnerent ordre de les prendre priſonniers. Le plus grand effort des Miniſtres fut ſur l'eſprit de la populace , qui eſt aiſément pouſſée à toutes les extremitez de la fureur , par le zele de la Religion , ſoit fauſſe , ſoit veritable ; & qui en cette occaſion n'a aucune lumiere pour diſcerner les intereſts particuliers de ceux qui agiſſent. De cette ſorte , les Habitans de la Vallée nommée Bregalia qui eſtoit toute Heretique , prirent les armes , & ſe preparenterent à venir à Chauene , pour ſaiſir le Pere Adorne , qui évita ce mal-heur en ſe retirant , ſur l'avis que les Catholiques luy donnerent du deſſein que l'on auoit formé contre luy. Le Pere Bouvier fut mis en priſon dans Coire , & n'en pût ſortir qu'en promettant qu'il vuideroit le País dans vn certain temps qu'on luy limita. Pour Gratarola , quinze Seigneurs , dont le plus grand nombre eſtoient Heretiques , vinrent à Chauene , où ils l'arreſterent. Les Chefs de l'accuſation contre luy eſtoient ; qu'il ſeruoit d'eſpion au Cardinal Borromée ; qu'il animoit les Catholiques contre les Heretiques , pour les ietter dans vne guerre civile ; qu'il auoit publié le Calendrier Gregorien , lequel n'eſtoit point en vſage dans le País , & qu'il enſeignoit vne fauſſe doctrine. Le criminel ſe deffendit de

ces calomnies avec tant d'ingenuité, & de force, & fut si puissamment aidé du Podesta de Plurio, qui estoit dans le Conseil, que sur le témoignage qu'il rendit de sa probité, & de la prudence de sa conduite, il fut renvoyé absous avec permission de continuer l'exercice de ses fonctions Ecclesiastiques. L'heureux euenement de cette accusation donna autant de ioye aux Catholiques, qu'il fit sentir de dépit & de rage aux Heretiques, qui virent tous leurs mauuais desseins destruits par le iugement de ceux qu'ils croyoient deuoir rendre les Ministres de leur vengeance, & qui augmentèrent le credit de S. Charles, pensant l'abolir tout à fait parmy ses Peuples.

CHAPITRE IX.

*De la deuotion de Saint Charles pour
la Mere de Dieu, & de quelques
Translations de Corps Saints
qu'il a faites.*

L'Esprit de l'Eglise a tousiours esté d'opposer ses deuotions presentes, aux erreurs que les Heretiques auançoient contre la verité, afin de faire éclatter d'auantage la sainteté des mysteres qu'elle auoit la hardiesse d'attaquer. C'est de là qu'est venu le culte public & solemnel qu'elle réd à la Ste. Vierge, lequel prit son accroissement du temps de Nestorius, au commencement

du cinquiesme Siecle , & qui depuis ce temps-là , s'est tousiours augmenté. Car comme cét Heresiarque luy voulut oster par son Herésie , le glorieux tiltre de Mere de Dieu , & la reduire à celuy de Mere de CHRIST , qu'il ne consideroit que comme vn pur homme ; les Euesques assemblez au Concile d'Ephese , qui se tint dans vne Basilique laquelle-luy estoit dediee , commencerent à celebrer ses loüanges avec plus d'ardeur , & de deuotion , & S. Cyrille y prononça vne Homelie , qui en contient de si grandes , que sans son autorité elles pourroient paroistre excessiues. On commença quelque temps apres à la représenter sous la forme d'vne ieune Vierge qui tenoit l'enfant IESVS entre les mains , comme vne preue de sa Maternité diuine. La deuotion alla tousiours croissant vers elle ; & l'ignorance du peuple vint à tel poinct dans les Siecles suivans , qu'il s'y commit beaucoup d'excez. De sorte qu'il faut confesser que lors que l'Herésie de Luther & de Calvin , parut dans le monde , la superstition de ce costé-là , estoit si grande , qu'elle faisoit gemir ceux qui connoissoient les bornes où doit aller l'honneur qui est deu à la Mere de IESVS-CHRIST. Mais si quelques Catholiques tomboient dans vn defect , les Heretiques se precipiterent dans vn autre beaucoup plus dangereux , & qui approchoit de la fureur. Car outre que par des escrits impies , ils attaquèrent l'honneur de la sainte Vierge , & tascherent de la dépouiller

de ses veritables auantages ; ils s'emportèrent contre les Temples qui estoient dediez en son honneur , & contre ses Images , avec tant de barbarie , que leurs excez furent odieux mesme aux personnes de leur party , qui auoient quelque reste de sagesse , & de sens commun. Saint Charles qui connoissoit que l'honneur rendu à cette sainte Creature , estoit comme le caractere des Catholiques , taschoit par toutes sortes de moyens de l'establir , & de porter ses Diocesains à rendre à celle qui auoit conceu leur Sauueur , vn honneur religieux , qui s'arrestast dans les bornes que prescrivait la verité. Il auoit vn grand soin d'aller dans tous les Lieux où elle estoit particulièrement honorée. Lors qu'il faisoit ses visites , il pouruoyoit à les restablir , s'ils alloient en decadence , & il y faisoit des presens magnifiques pour porter les autres à imiter sa liberalité. Dans l'Eglise Cathédrale de Milan , il dedia vn Autel en son honneur ; il y fonda la Confrairie du Rosaire , & obtint du Pape toutes les Indulgences qui sont accordées à celle qui est dans l'Eglise de la Minerue à Rome. Il procura que la mesme deuotion se pratiquast en toutes les Parroisses de son Diocese : & ordonna que tous les Samedis , les Curez chantaissent sur le soir vne Antiphone en son honneur , & inuitassent le peuple à se rendre à l'Eglise , par le son des cloches. Il fit mettre ses Images sur la porte des Temples , & conuia chacun à dire

son Office , à reciter le Chapelet , & à communier au iour des Fêtes qui luy sont dédiées. A huit milles de Milan , elle auoit vn petit Oratoire que le peuple frequentoit , & où il faisoit de grandes offrandes , sur le bruit de quelques miracles faits par son Image , qui estoit dépeinte sur vne vieille muraille. Saint Charles en estant aduertty , vint sur le lieu , fit des informations exactes des choses qui estoient arriuées , & les enuoya au Pape pour receuoir son aduis. Depuis il ietta les fondemens d'une Eglise magnifique à la place de cette petite Chapelle ; & fonda vne Societé de quelques Prestres pieux & habiles , de la Congregation des Oblats , pour escouter les Confessions de ceux qui viendroient à ce Pelérinage , & pour faire en sorte qu'il fust aussi vtile aux pecheurs pour leur veritable conuersion , que d'ordinaire il leur est nuisible , par l'ignorance des mauuais Medecins qui se trouuent en ces Lieux de deuotion. Car bien loin de leur faire conceuoir l'horreur des crimes presque innombrables dont ils y viennent se décharger , n'osant les découvrir à leurs Pasteurs ordinaires , qui en sçauent la continuation ; & de leur donner les remedes salutaires d'une penitence en quelque façon proportionnée à leurs offenses ; ils les escoutent avec impatience pour satisfaire à la foule qui les accable. Ils ne se donnent pas la peine de sonder le fond de leur conscience toute corrompue , & ne leur imposent que des satisfactions si legeres ,

qu'elles n'expient point le passé, & n'ont aucune force pour empêcher leurs rechutes, quel'on voit presque arriver aussi-tost qu'ils sont de retour en leurs maisons. Il est vray que si ces pelerinages estoient faits avec quelque peine, & dans quelques bonnes dispositions qui fussent interieures, on les pourroit prendre pour vne satisfaction laborieuse. Mais d'ordinaire, ils se font sans incommodité, & sans deuotion; de forte qu'ils ne doiuent nullement estre confiderez par ceux qui veulent veritablement deliurer ces pecheurs de leurs mauvaises habitudes, & qu'il faut vser d'autres remedes plus rudes, afin de leur rendre la santé. Car le Sacrement de Penitence ne consiste pas en la simple declaration des pechez que l'on a commis. C'est vn grand sacrilege de les retenir quand on se confesse. Mais ce n'en est pas vn moindre, que de les confesser de bouche seulement, sans que le cœur soit touché d'un veritable repentir. Or s'il est tel, il n'y a point de satisfactions si rigoureuses que le Penitent ne recoiue, & qui ne luy paroissent legeres en comparaison des peines de l'Enfer qu'il a meritées.

Après le culte de la Mere de I E S U S-CHRIST, il auoit vn grand respect pour les Saints, & pour leurs Reliques, estimant que les honorer sur la terre, c'estoit entrer dans les sentimens de Dieu, qui les ayant laissez dans l'obscurité, les opprobres, l'infamie, & la persecution durant leur vie, leur

S. Charles honoroit les Sts. & leurs Reliques.

rend iustice apres leur mort , les met sur la teste de ceux qui les ont foulez aux pieds, & leur fait trouuer la gloire qu'ils ont si soigneusement éuitée. Cette deuotion de saint Charles fut cause , que dans tous les Conciles Prouinciaux , & dans ses Synodes , il fit des Reglemens exacts pour tenir les Reliques , du moins avec vne bien-seance deuotieuse , si on ne les pouuoit conseruer magnifiquement. Vn des principaux fut , qu'on les mist dans les Eglises ; au lieu qu'auant luy , chacun les gardoit dans sa maison. Il en monstra l'exemple aux autres qui auoient de la peine à se priuier de ces thresors , donnant vn Reliquaire fort precieux qu'il auoit , aux Peres de saint Paul de Milan. Les Supérieurs des Lieux de deuotion où elles se trouuoient , prenoient la liberté d'en donner à leurs amis , ou aux personnes de grande condition qui les venoient visiter : & ainsi peu à peu , ils s'en trouuoient eux-mesmes priuez. Le Cardinal pour remedier à ce desordre , obtint du Pape, vn Bref par lequel il estoit deffendu à toutes sortes de personnes , de donner aucunes Reliques à qui que ce fust , sans la permission de sa Sainteté. Il fit diuers Translations des Corps de plusieurs Saints , pour les placer plus honorablement qu'ils n'estoient. Nous auons desia parlé de quelques-vnes qu'il celebra avec vne pieté & vne magnificence dignes de son zele , & de sa deuotion ; & maintenant nous dirons vn mot des dernieres.

Les Moines de S. Benoist , qui sont de la Congregation du Mont Cassin en Italie, auoient restably leur Eglise de S. Simplicien , Archeuesque de Milan , & Successeur de S. Ambroise , qui l'honoroit comme son Pere. Pour acheuer cét édifice , il falloit rompre le grand Autel , & le transporter en vne autre place. Il y auoit beaucoup de Corps saints enfermez dessous , & les Moines donnerent auis au Cardinal, du dessein qu'ils auoient de les tirer de là, afin qu'il les vint reconnoistre, & qu'il luy plust de faire la ceremonie de leur translation. Il se rendit à leur Eglise , & il trouua trois caisses, en vne desquelles estoient les Corps des Martyrs , Sisinius , Martyrius , & Alexandre , qui auoient souffert dans le pais de Trente, & celuy de S. Benigne, & S. Berice, Archeuesques & Citoyens de la Ville. Dans la seconde caisse estoient les Corps de deux autres Archeuesques, S. Ampellius, & S. Geronce. Le troisieme coffre , contenoit le Corps de saint Simplicien , qui auoit eu la mesme dignité. Ce dernier estoit en vne particuliere veneration à S. Charles, à cause de sa doctrine & de sa sainteté, qui l'auoient rendu si recommandable à saint Ambroise, à saint Augustin , & aux Euesques de son temps. C'est pourquoy il voulut faire cette translation avec vn appareil plus magnifique qu'aucune autre qu'il eust encore faite. Il fit conuier beaucoup d'Abbez , & des principaux Religieux de la Congregation du Mont Cassin , par l'Abbé du Monastere de Milan , & il inuita plusieurs

Il fait la
translatiō
du Corps
de saint
Simpli-
cien,

En l'an
400.

Le 27.
iour de
May
1582.

Euesques à s'y trouuer , entre lesquels il n'oublia pas son cher amy, le Cardinal Gabriel Paleote, premier Archeuesque de Bologne, avec qui il viuoit dans vne particuliere familiarité. Il publia vne Lettre Pastorale, par laquelle il conuioit les Fideles de se trouuer à cette action de pieté, & à ieusner trois iours de la semaine qui la deuoit preceder, & il obtint pour ceux qui y assisteroient, vne Indulgence Pleniére. Il fit dresser des prieres, & composer diuers Hymnes qui se chanterent à la Procession. On sonna les cloches solennellement dans toutes les Eglises de la Prouince, plusieurs iours auparauant, afin que la deuotion fust generale, & que ceux qui ne pouuoient y estre presens de corps, y assistassent en esprit. On tapissa toutes les ruës depuis le Dôme de Milan, iusqu'à l'Eglise de S. Simplicien, par où les Corps Saints deuoient passer. On dressa des arcs, & on attachâ diuers tableaux, où les actions de ces grands Seruiteurs de Dieu estoient représentées. Enfin, on n'oublia aucune magnificence, pour rendre cette action la plus solennelle qui eust iamais esté faite dans Milan. Le Cardinal passa toute la nuit en priere deuant leurs Reliques; & le iour estant venu, voicy comment marcha la Procession. Toutes les Ecoles de la Doctrine Chrestienne alloient les premieres en grand nombre. Apres suiuoient les Compagnies des Croix, & des Penitens, en vne longue file. Les Reguliers de diuers Ordres, deux cent Moines du Mont Cassin, le Clergé de

de la Ville, & des lieux d'alentour, venoient apres, chacun en leur rang, tous reueſtus de chappes magnifiques, & avec des cierges en leurs mains. Seize Abbez du Mont-Caffin, habillez Pontificalement, marchoiét deuant neuf Eueſques de la Prouince. Les Chanoines du Dôme alloient immédiatement deuant les Reliques, que les Eueſques & les Abbez portoient tour à tour. Les deux Cardinaux, Charles, & Paleote, portoient la teſte de S. Simplicien, qui fut trouuée encore fort fraiſche, & fort belle, & fermoient la Proceſſion. Le Gouverneur, le Senat, la Nobleſſe, & vn peuple infiny, venoient apres le Clergé, portant des Cierges allumez, & faiſant retentir l'air des Hymnes qu'ils chantoient en l'honneur des Saints dont ſe faiſoit la Tranſlation. Les Communautéz Religieuſes deuant les Eglises deſquelles la Proceſſion deuoit paſſer, les ornerent à l'enuy de tableaux, & d'inſcriptions ingenieuſes. Celles des Ieſuites du College de Brera, furent les plus eſtimées. La face du Palais Archiepiſcopal eſtoit la plus richement parée, & ſaint Charles auoit fait faire les portraits de tous les Archeueſques de Milan, depuis l'Apoſtre ſaint Barnabé, iuſqu'à ſon Predeceſſeur immédiat. Le nombre ſe montoit iuſqu'à ſix vingt & trois, dont il y en auoit quatre-vingt natifs de la Ville qu'ils auoient gouvernée. La Proceſſion eſtant reuenné à l'Egliſe de S. Simplicien, qui eſtoit tres-magnifiquement ornée, les Eueſques qui auoient fait vn fort grand tour, & qui n'en pouuoient

Q

plus de lassitude, allerent se reposer dans le Monastere. Mais S. Charles, comme s'il n'eust eu aucune fatigue, chanta la Messe Pontificale deuant les Corps des Saints, & prescha apres l'Euangile avec tant de ferueur, qu'on ne pouuoit assez admirer la force de son corps, qui paroissoit bien n'estre soustenu que par celle de sa deuotion. Auant que de se mettre à table, il seruit douze pauures teste nuë, & avec tant de charité, & d'humilité qu'ils furent tous hors d'eux-mesmes, voyant faire des actiōs si basses avec tant de ioye, à vn homme de sa qualité. Apres cela il mit les prieres de Quarante heures dans l'Eglise de S. Simplicien, & on remarqua qu'il y en auoit demeuré près de cinquante en Oraison. Quand ce temps fut passé, il mit les Corps Saints sous le grand Autel, & laissa ce Monastere tout embaumé de l'odeur de sa deuotion. Quelques iours apres, il fit encore la Translation de S. Iean Bon, Archeuesque de Milan, où le Cardinal Paleote se trouua; & si elle ne fut celebrée avec la mesme magnificence que celle dont nous venons de parler, ce fut avec la mesme fatigue pour luy. Car il ne sçauoit ce que c'estoit que de s'épargner tant soit peu; & il agissoit comme s'il eust eu vn corps de fer, quoy qu'il en eust vn abattu par les ieunes, & les autres mortifications qu'il pratiquoit. Sa principale & plus tendre deuotion estoit pour S. Ambroise, qu'il auoit pris pour le modele de sa vie. Il visitoit tres-souuent l'Eglise qui luy estoit dediée, il l'inuoquoit

DE S. CHARLES BORROMÉE. Liv. II. 365
en toutes les affaires, & dans les resolutions
qu'il auoit à prendre ; il songeoit tousiours
comment S. Ambroise se fust-il gouverné
en cette occasion. On disoit de ce Saint,
qu'il trauailloit plus que vingt autres Eues-
ques en l'instruction des Cathecumenes.
Mais on pouuoit dire de S. Charles , qu'il
trauailloit plus que cent Euesques dans tou-
tes les fonctions Pastorales , & plus que S.
Ambroise mesme , la conduite de l'Eglise
de ce temps demandant beaucoup plus de
soin & de trauail que la conduite de l'Eglise
du temps de ce grand homme , & l'autho-
rité Episcopale se trouuant si fort diminuée,
que l'on peut dire que comme les premiers
Siecles ont veu iusques où elle pouuoit al-
ler , les derniers voyent iusques où elle peut
descendre.

CHAPITRE X.

*De la maniere dont S. Charles traitoit
avec les Euesques , & avec les
Presbres.*

L'Histoire Ecclesiastique nous apprend
que la pieté Chrestienne , & le respect
des Euesques qui sont les Chefs de la Reli-
gion , ont tousiours marché d'un mesme
pas ; que quand celle-là a esté dans sa pure-
té , & dans sa ferueur , celui-cy a esté aussi
tres-sincere ; comme quand les mœurs des
Fidelles ont commencé à se corrompre,

Qij

l'honneur que l'on rendoit aux Pasteurs ; s'est visiblement diminué. Autrefois les Empereurs descendoient de leur throsne pour leur donner le baiser , & les peuples se mettoient à genoux deuant eux ; & les saluoient avec cette parole , *le vous adore* : maintenant à peine les Princes leur ostent-ils le chapeau. Les Magistrats leur disputent leur rang , les dépouillent de toute leur auctorité , & par vne enuie qui leur est comme naturelle , ils n'oublient rien à faire , pour les ranger à la condition du peuple. Celuy-cy ne sçachant point en quoy consiste l'excellence de leur dignité , la sainteté de leur Ministère , & la necessité de leurs fonctions : & pour confesser la verité , ne voyant pas en la pluspart des Euesques , les vertus Episcopales , le zele pour la gloire de Dieu , pour l'autorité de l'Eglise , & pour le salut des ames ; la fermeté , & le desintéressement que leur dignité les oblige d'auoir ; mais plustost vne vie tout à fait seculiere & prophane ; les regarde comme de grands Seigneurs , qui ne luy sont considerables que par leur despense , & peu à peu les méprise dans le fond du cœur , quoy qu'au dehors il leur rende quelque honneur & quelque deference. Saint Gregoire de Nazianze se plaignoit de son temps , que l'Ordre le plus saint de tous estoit deuenu le plus ridicule , & le plus mesprisé , par sa propre foiblesse , son auarice , son ambition , & sa dependance seruile des Puissances temporelles. C'est par ces mesmes choses que l'Episcopat s'est si fort ravalé en no-

stre Siecle , & il est à craindre qu'enfin il ne tombe dans le dernier mépris. A Rome où est la source de l'Episcopat , les Euesques conseruent assez leur dignité , à l'esgard des seculiers : mais elle est presque aneantie à l'esgard des Cardinaux , dont la pourpre s'égale à celle des Roys , & qui ne reconnoist rien au dessus d'elle , que la dignité qui est vnique par l'institution de I E S V S-CHRIST. Les Euesques qui les precedoient autresfois sans aucune contestation , & qui signoient deuant eux dans les Conciles , se sont peu à peu laissez mettre derriere. Les Princes ont esté bien aises de voir s'éleuer vne dignité nouuelle qui affoiblissoit l'autorité des Prelats de leurs Royaumes , & qui se faisant desirer par eux , les rendoit moins capables de resister à leurs volonte. Peu à peu ou ils l'ont demandée pour leurs parens , ou pour leurs fauoris , & ainsi ils ont contribué à son eleuation. Dans Rome où on peut dire qu'ils regnent , les Offices où les Euesques se raualent dans leurs maisons , la cour qu'ils font dans leurs antichambres , leurs deferences presque seruelles , leur grand nombre , leur pauureté , & la pretention d'arriuer à la mesme dignité dont ils se rendent esclauens , sont les causes du mespris que l'on en fait. Escrivant ces choses , ie ne pretens point raualer la dignité du Cardinalat que ie respecte ; mais ie crois deuoir parler avec la sincerité d'un Historien , & la liberté d'un Euesque , qui a sujet de ressentir le raualement de sa dignité.

S. Charles estoit Cardinal , & Archeuefque. Il ne relaschoit rien de ce qui estoit des auantages de la premiere dignité ; & il le fit bien paroistre en la reception de Henty III. qui estoit le premier Roy de l'Europe, & dans quelques autres rencontres avec des Princes d'Italie. Mais il la confideroit dans ce qu'elle a d'Ecclesiastique, en quoy elle est sainte & sacrée. Sa pourpre ne luy paroiffoit éclatante , que parce qu'elle luy representoit le sang de I E S V S - C H R I S T ; & l'aduertissoit , qu'il deuoit estre tousiours prest à répandre le sien pour la defence de l'Eglise. Il rémoigna toutesfois assez souvent qu'il estoit disposé de la quitter , plutôt que d'abandonner la conduite des ames dont il estoit chargé comme Archeuesque de Milan. Il voulut donner l'exemple aux autres Cardinaux , & aux Princes seculiers, de l'honneur qui est deu aux Euesques , comme aux Pasteurs legitimes du troupeau de I E S V S - C H R I S T , que le S. Esprit a ordonnez pour le paistre , pour le conduire , & pour le defendre ; qui ne font qu'un seul Euesque avec le Souuerain Pontife , & sans lesquels l'Eglise ne peut subsister , comme elle peut faire sans la dignité dont nous parlons. C'est pourquoy il leur donna le titre de Reuerendissimes, que plusieurs Cardinaux ne leur donnoient pas , se contentant de celuy de *Molto Reuerendo* , *fort Reuerend*. Il ne vouloit pas souffrir qu'ils l'accompagnaissent en Cortège, dans les visites qu'il leur alloit rendre , ou aux Princes ; en quoy il ne craignoit point de paroistre sin-

gulier, pourueu qu'il donnast vn exemple de traiter avec honneur, ceux dont le Caractere est vne chose si sainte, & si sacrée. Quand il en arriuoit quelque vn à Milan, il enuoyoit ses Gentilshommes au deuant de luy, hors des portes de la Ville. Il les faisoit receuoir dans l'Eglise Cathedrale, par des Chanoines, en leur habit de Chœur, qui les accompagnoient iusques dans son Palais, où ils estoient seruis par ses Gentilshommes avec toute sorte de respect. Il venoit les receuoir hors de son appartement quand ils luy rendoient leur visite, & les accompagnoit iusqu'au degré avec tant de marques d'honneur & d'amitié, que les plus pointilleux en compliments auoient sujet d'en demeurer satisfaits. Durant leur seiour dans Milan, il les obligeoit de donner la benediction au peuple, & leur faisoit faire toutes les fonctions Episcopales qui se presentent. Il les assistoit de sa protection dans leurs affaires auprès du Pape, & les seruoit tousiours efficacement. Il leur representoit la grandeur de leur ministere, afin qu'en l'honorant des premiers, ils le fissent honorer aux autres.

Disant vn iour avec le Duc de Ferrare, Alphonse d'Est, l'Euesque prit la seruiette, & la luy presenta. Mais bien loin de receuoir cet honneur, il le fit mettre à table avecque luy, & l'accompagna hors de la sale, quand il s'en alla, ne faisant point de difficulté de laisser le Duc tout seul, pour luy apprendre comment il deuoit traiter son Prelat. En effet cet exemple eut plus de

Honneur
que rend
S. Char-
les aux
Euesques
de Fer-
rare &
de Thu-
rin,

Q^{iiiij}

force dans cette petite Cour, pour y faire honorer l'Euesque Diocesain, que tous les discours que le Cardinal eust pû faire de son excellence, & de l'obligation qu'ont les Chrestiens de la reuerer. Tandis qu'il estoit à Thurin, l'Archeuesque de la Ville vint au Palais, comme il s'entretenoit avecque son Altesse de Sauoye. Aussi-tost qu'il sceut qu'il alloit entrer dans le lieu où ils estoient, il se leua, & laissant le Duc, il alla au deuant de ce Prelat, avec vn accueil si fauorable qu'il apprit à ce Souuerain celuy, qu'il deuoit luy faire dorefnauant. Il luy fit vne douce reprimande de ce qu'il ne faisoit pas porter sa Croix deuant luy, quand il venoit au Palais, & adiousta qu'elle deuoit entrer dans la chambre du Duc mesme. Allant dans les ruës, il le faisoit marcher à costé de son Altesse & de luy, pour le rendre par là, plus considerable à son peuple.

Il res-
soit les
Prestres,
& parti-
culiere-
ment les
bons.

Il portoit aussi vn grand respect au Sacerdote, & en donnoit des exemples remarquables en toutes les occasions qui se presentent. La seule difference qu'il mettoit entre les Prestres, venoit de celle qu'y mettoit la pieté & le seruice qu'ils rendoient à l'Eglise. Car encore qu'il fist cõpte de la noblesse des familles, comme d'un auantage naturel extremement considerable; toutefois il auoit beaucoup plus de respect pour la noblesse de la Prestre, qui consiste dans les vertus Sacerdotales. Il caressoit les bons Ouuriers qui trouaillent dans son Diocese. Il les louoit de ce qu'ils auoient fait de bien, pour les porter à faire encore mieux.

Il leur donnoit des aduis prudens pour leur conduite, & auoit soin de leur establissement, lors qu'ils y songeoient le moins. Jamais il ne parloit en ton de maistre, au moindre Clerc de son Diocese : & pour les Prestres, il leur donnoit tousiours audience debout. Il ne pouuoit souffrir qu'aucun qui fust dans les Ordres sacrez luy rendist le moindre seruicè pour sa personne, qui fust vil ; & en les traitant de cette sorte, il imposoit vne loy à ses autres Domestiques de les respecter.

CHAPITRE XI.

De quelle façon S. Charles traittoit avec les Reguliers.

Saint Charles regardoit les Reguliers comme des personnes consacrées à Dieu, par vne vie plustost Angelique qu'humaine, comme des remparts qui par leurs ieunes, leurs veilles, leurs austeritez, & leurs prieres, s'opposoient iour & nuict à la iustice de Dieu, & comme des Ouuriers qui seruoient vtilement à l'Eglise. Il leur fondeoit des Monasteres dans Milan, & dans son Diocese. Il leur faisoit de grandes aumônes, & se seruoit volontiers d'eux dans la conduite des Ames. Mais avec cet amour, il ne laissoit pas de se tenir à leur égard dans les regles estroites de la Iurisdiction Epis-

Q^v

*Acta
Ecclesie
Mediola-
nensis in
Concilijs
Prouin-
cialibus.*

copale, & il ne leur voyoit rien entrepren-
dre qui la pût blesser tant soit peu, qu'il
n'arrestast leurs entreprises avec vn coura-
ge inflexible. Les Actes de l'Eglise de Milan
sont remplis d'ordonnances, qui reglent
leurs fonctions. Ils ne pouuoient prescher
dans les Eglises des Seculiers, sans la per-
mission par escrit; & il les examinoit rigou-
reusement sur certains points, dont on
estoit conuenue dans les Conciles Prouin-
ciaux, outre ceux que chaque Euesque iu-
geoit propres pour son Diocese. Ils estoient
inserez dans leurs Lettres d'approbation,
& aucuns Religieux n'estoient exempts de
cét examen. Ils faisoient tous la Profession
de foy auant que de commencer à prescher,
entre ses mains, ou celles de son Vicaire
general. S'ils sortoient dans leurs Sermons,
des regles qu'il auoit prescrites; s'ils auan-
çoient des propositions temeraires, ou
scandaleuses, s'ils se recommandoient eux-
mesmes aux charitez des auditeurs; s'ils di-
soient des boufoneries; s'ils publioient des
Indulgences, sans la permission, ou il les
suspendoit de la Predication, ou il les pu-
nissoit d'une autre sorte. Quand il faisoit
ses visites, il conuoquoit tous ceux qui se
trouuoient dans le lieu, lesquels y enten-
doient les confessions, & s'informoit
d'eux diligemment, de la maniere dont
ils administroient le Sacrement de Peni-
tence. Il estoit tres-exact & tres-rigoureux
en l'examen de ceux qu'il admettoit pour
ce ministere; & il vouloit qu'ils fussent
auancez en âge quand ils deuoient enten-

de les confessions des femmes. Dans les Monasteres qui auoient la Iurisdiction Episcopale, nul Regulier n'eust osé entreprendre de confesser sans sa licence. Il suspendoit ceux qu'il ne iugeoit pas s'acquitter assez religieusement de cette fonction si importante. Il les obligeoit de suivre les instructions dressées dans les Conciles Provinciaux, pour administrer ce Sacrement de la reconciliation des hommes avec Dieu, d'une maniere qui retirast les pecheurs de leurs pechez, & non pas qui les y entre tint, par vne trop grande facilité de donner l'absolution. Les occasions où il falloit la differer, où la refuser absolument, y estoient marquées. Ceux qui absoluient des cas qu'il s'estoit reseruez, en vertu de leurs priuileges, encouroient aussi-tost l'excommunication. Les Superieurs des Maisons Religieuses estoient obligez de luy apporter tous les ans, au temps de l'Aduent, & du Careme, les noms des Confesseurs qui estoient dans leurs Conuents. Il les obligeoit de donner aux Curez le Catalogue de ceux qu'ils auoient confessez durant la quinzaine de Pasques, & de s'informer d'eux de la façon de viure des malades qu'ils alloient confesser dans leurs Parroisses. Quand il les receuoit à l'ordination, il estoit tres-rigoureux à les examiner sur tous les points que les Conciles auoient particulierement specifiez, & qui estoient necessaires pour l'exercice de l'Ordre

Qvj

qu'ils vouloient prendre. Il leur faisoit observer toutes les Fêtes , & tous les ieunes qui se solemnisioient & se gardoient dans les lieux où leurs Monasteres estoient situez. Ils n'eussent osé recevoir aucun Prestre à celebrer la Messe dans leurs Eglises , sans ses Lettres , par lesquelles il leur en donnoit la licence. Ils ne pouvoient la dire dans les Oratoires qui estoient dans les lieux de leurs demeures , que le Profne ne fust fait ; si les Cures ne leur permettoient d'en user autrement. Ils estoient obligez de se trouver aux Processions , sous peine d'excommunication , & il regloit absolument les rangs qu'ils deuoient tenir. Il chastioit, selon les Bulles de Gregoire X V. & de Pie V. ceux qui estoient negligens à empêcher les irreuerences qui se commettoient dans leurs Eglises. Il leur faisoit publier toutes les censures & les interdits qu'il auoit prononcez. Les seruiteurs Laïques qui demeuroient dans leurs Monasteres , venoient tous communier dans leurs Parroisses , au temps de Pasque. Il ne permettoit pas qu'ils entreprissent d'exorciser les possédez , sans sa permission , & quand il la leur accordoit , c'estoit à la charge d'observer les reglemens qu'il auoit faits sur ce sujet. Enfin la preuoyance de Saint Charles auoit réglé toutes choses à l'égard des Reguliers , en ce qui regardoit les fonctions Hierarchiques où il

les appelloit , & il estoit inflexible en l'observation de ses ordonnances. Il auoit mis la reforme dans tous leurs Monasteres : & si le vice y regnoit dans les particuliers, il estoit contraint de se cacher , & il n'offensoit point les yeux du peuple. Cette severité déplaisoit à ceux qui estoient accoustumés à viure sans discipline , & qui croyoient que leurs priuileges leur donnoient pouuoir de tout entreprendre , & de tout faire à leur fantaisie. Ils ne pouuoient s'empescher dans les compagnies où ils se trouuoient , de condamner sa conduite , & de l'accuser d'imprudence , & d'une trop grande rigueur. Nous auons rapporté les emportemens d'un Predicateur qui estoit d'un Ordre tres-reformé , lequel soit par un zele tres-inconsideré , soit pour complaire au Gouverneur, avec qui le Cardinal estoit en mauuaise intelligence , soit par quelque autre raison particuliere , auoit en sa presence , & dans la Chaire de son Eglise Cathedrale , parlé fort insolemment contre sa façon de gouverner son Diocese. Plusieurs Cômunautez se liguerent avec les Magistrats qui luy faisoient un procez deuant le Pape , & crurent que cette occasion estoit fauorable , pour secoüier un ioug qu'ils trouuoient trop pesant sur leurs espaulles. Cette vnion fut sensible à saint Charles , parce qu'elle estoit de personnes que leur genre de vie rendoit venerables au Peuple , & obligeoit à soustenir la Discipline qu'il auoit establie dans son Diocese. Mais quoy qu'ils pussent dire , machiner,

& entreprendre contre luy, il suiuit tousjours son chemin, & demeura ferme à ne rien laisser diminuer, par leurs entreprises, de l'autorité de sa charge.

CHAPITRE XII.

De l'amitié qu'auoit saint Charles pour ses parens.

LE Sacerdoce Chrestien a cela de particulier & d'auantageux sur le Sacerdoce legal, que son esprit destache les Prestres de tous les sentimens de la chair, & du sang, les tire hors de leur famille, & les fait entrer dans la maison de Dieu, comme peres de tous les Fideles egalelement, & comme les Cooperateurs de celuy qui est Prestre selon l'ordre de Melchisedech, dont la genealogie n'est point raportée dans l'Ecriture. Le Diable toutefois qui prend à tasche de corrompre ce que le Fils de Dieu a estably de plus pur, & de plus saint dans son Eglise, a si heureusement trauaillé pour estouffer dans les ames des Ecclesiastiques, ce desinterressement de la maison, & de la parenté, qu'on n'en voit gueres qui ne soient beaucoup plus attachez à sa grandeur, & à ses interests, que les Laiques les plus emportez en cet amour. C'est ce qui en fait tant d'auares pour leurs personnes, tant d'iniustes pour la reparation de leurs Eglises, & tant d'impitoyables pour les

pauvres, qu'ils laissent perir de faim, tandis qu'ils comblent de bien des parens, ou qui n'en ont pas besoin, ou qui en font vn tres-mauvais vsage, & qui en font tout à fait indignes. La Charité qui suit les regles de la Iustice, oblige sans doute les Beneficiers de prendre soin de ceux qui leur appartiennent, & de les preferer aux autres qui ne leur sont liez que par la fraternité Chrestienne. Mais cette preference a des bornes beaucoup plus estroites qu'on ne se les prescrit d'ordinaire; & elles ne peuuent souffrir qu'on despoüille entierement ceux dont les biens Ecclesiastiques sont le patrimoine, pour mettre les autres dans l'abondance, & dans la vanité du Siecle. Tous les saints Prestres en ont vsé de la sorte, & ont tousiours mieux aymé qu'on les accusast de n'estre pas bons parens, que d'en courir le reproche d'estre appelez des voleurs, par les pauvres de I E S U S-CHRIST. Certes il faut confesser, que du temps de saint Charles, cette verité n'estoit guere connue, & qu'elle estoit encore moins pratiquée. Pie V. bien esloigné de la maxime de ses Predecesseurs, dont le plus grand soin sembloit n'auoir esté que d'eriger leurs neuveux en Princes, auoit donné vn exemple merueilleux de l'esloignement de cet amour dereglé, lequel, comme parle le Concile de Trente, a causé de si grands maux dans l'Eglise. Car il auoit demandé aux Cardinaux en plein Consistoire, la permission de donner à sa Niepce, vne fort petite somme, ne voulant pas se dispenser

tout seul de cette chetive liberalité pour vne personne qui luy estoit si prothe. Cette moderation receut beaucoup de loüanges, mais elle eut fort peu d'imitateurs, & ses Successeurs en ont bien vsé d'une autre forte. Saint Charles qui auoit le cœur véritablement Episcopal, fut tres-rigoureux en cette pratique; & ce n'est pas vne des moindres preuues de sa sainteté, que de s'estre deffendu contre la tendresse naturelle qu'il auoit pour ses parens, dans vn estat où il luy estoit si facile de les porter tous dans les premieres dignitez de l'Eglise. Il s'opposa à la promotion de quelqu'un qui le touchoit de fort près, ne iugeant pas qu'il eust les conditions necessaires à vn Euesque; & aimant bien mieux oster cette dignité de sa maison, que de l'y mettre aux despens d'un Diocese qu'il croyoit deuoir estre mal gouuerné par cet homme. Toute sa famille gronda contre luy; mais il la laissa gronder, & fut tousiours ferme dans sa resolution. Il ne leur faisoit point de caresses particulieres, non pas mesme au Comte Federic, encore qu'il fust Ecclesiastique, & qu'il fist de grands progres dans les sciences & dans la pieté. Il luy a succédé en l'Archeuesché de Milan, & a marché sur les traces de ses Vertus Episcopales avec l'applaudissement de toute l'Italie. Nous auons beaucoup d'ouurages de luy, écrits en Latin, & en Italien, qui témoignent qu'il sçauoit également bien les belles Lettres, & les Lettres Saintes. Encore que ses parens fussent des principaux

de la Ville de Milan, il ne les visitoit qu'une ou deux fois l'année, pour ne manquer pas aux devoirs de la civilité. Quand ils estoient malades, il leur rendoit toute l'assistance, & tous les offices de charité dont ils avoient besoin, pour les disposer à bien mourir. Il s'est quelquefois trouvé aux nopces de ses Cousines; mais 'c'estoit afin de les rendre Chrétiennes, d'empescher la superfluité & la profusion des festins qu'on avoit résolu de faire, & de donner l'exemple aux personnes de condition, de celebrer leurs mariages plus chrestienement qu'ils n'avoient accoustumé. Quand quelqu'un de ses proches luy recommandoit une affaire, il l'examinait avec plus de severité, de crainte que les sentimens de l'affection naturelle ne le fissent pancher de ce costé-là, contre la Justice. Il n'accordait aucunes graces à leur recommandation, & ils avoient besoin d'employer des mediateurs auprès de luy, quand ils desiroient en obtenir quelque'une pour eux-mesmes. Jamais il ne voulut se servir de sa faueur auprès du Roy d'Espagne, pour leur faire avoir ou des biens, ou des dignitez, ou pour leur conseruer les fiefs qui estoient dans sa maison. Cette conduite desinteressée parut en l'affaire de la forteresse d'Arone, qu'il remit si librement entre les mains du Gouverneur qui s'en estoit voulu saisir, & qu'il ne redemanda point, encore que ce fust la plus importante place que possedast sa famille. Quand il y alloit, il ne logeoit pas mesme dans la maison paternelle, mais en

celle de quelque Ecclesiastique. Nous auom remarqué qu'il laissa les armes de sa Maison, pour prendre en leur place, les images de saint Geruais, & de saint Prothais, avec ce beau mot, *Tales ambio defensores*. La pratique de l'Eglise iustifie cette action. Car elle est que les Euesques ne signent plus le nom de leurs familles, mais celuy de leur Baptisme, & de leur Diocese, qui est incomparablement plus glorieux & plus noble. Les Euesques qui en vsent autrement pensent se distinguer de leurs Confreres, par l'auantage de leur naissance: mais c'est d'une distinction qui leur fait iniure, & qui témoigne qu'ils ont les sentimens trop seculiers, & trop prophanes.

Saint Charles vouloit iouyr de tous les fruits de son patrimoine, qu'il employoit en œuvres pieuses pour son Diocese, comme il fit l'argent de quelques terres qu'il vendit dans le Royaume de Naples. Il le chargea mesme de quelques pensions, pour recompenser ceux qui l'auoient suiuy dans ses fonctions Episcopales: & ayant laissé par son testament diuerses choses à ses amis, il ne laissa pas ses escrits au Comte Federic son Cousin, encore que par toute sorte de raison, ils semblaient luy appartenir. Enfin, il disoit auoir reconnu par experience, que iamais il ne sortoit de la compagnie de ses parens, qu'il ne sentist en soy quelque affoiblissement de l'esprit de deuotion, avec lequel il y estoit entré. Aussi ne recommandoit-il rien si fortement à ses Prestres, que de garantir leur cœur de cette

tendresse, dont les effets estoient si malins, & si inévitables. L'experience fait voir tous les iours la verité de cét aui. Si on vouloit examiner d'où viennent les mauuaises affaires qui troublent le repos de la vie des plus grands Prelats, on en trouueroit la cause dans l'amour démesuré de leurs parens, qui les porre ou à oster à tous les autres les bien-faits où ils ont droit de pretendre; ou à faire des violences en leur faueur; ou à soustenir leurs iniustices; ou à manquer à de certaines obligations de leurs charges, de peur en y satisfaisant, de diminuer l'amas qu'ils leur preparent. Le mesme malheur arrive aux Ecclesiastiques de moindre condition, & c'est vne tyrannie dont ils sont accablez les premiers. Car quand les parens ont vne fois empieté leur esprit, & qu'ils sont engagez à leur faire du bien; ils ne demandent plus, ils arrachent, & à peine laissent-ils aux Maistres, les choses necessaires à la vie. S'ils sont plusieurs, l'auarice qui les possede tous également, les met aux mains, les vns avec les autres, & dans cette tempeste domestique les pauvres Prestres ont tant d'angoisses à souffrir, que leur foiblesse leur sert de supplice, & qu'ils ont pour bourreaux ceux qu'ils deueroient auoir pour leurs consolateurs, & pour le soustien de leur vieillesse.



CHAPITRE XIII.

*De la façon dont saint Charles traitoit
avec ses domestiques.*

*Aux
Ephes.
ch. 6.*

Nous auons parlé de la Discipline de la Maison de saint Charles , qui estoit comme vn abregé de celle de son Diocese. & qu'on pouuoit bien appeller vne Eglise domestique. Mais nous auons oublié beaucoup de choses que nous rapporterons en ce Chapitre. Il pratiquoit à l'égard de ses Seruiteurs , le precepte de l'Apostre , qui oblige les Maistres de les traiter avec douceur , & de ne les épouuanter pas par de continuelles menaces , sçachant qu'il n'y a qu'un Seigneur des Maistres & des Seruiteurs , lequel regne dans les Cieux , & qui ne iuge pas des personnes par leur qualité. Il auoit vn cœur de Pere pour tous. Il s'informoit de tous leurs besoins , & il y pouruoyoit avec Charité. Il auoit vn si grand soin qu'ils eussent les choses necessaires pour la vie , & qu'elles fussent bonnes, que souuent il se faisoit apporter à table, le pain que l'on donnoit à la basse famille , pour voir luy-mesme , s'il estoit tel qu'il auoit ordonné. Il ne falloit pas entrer chez luy avec des pretentions de Benefices, ou d'autres grandes recompenses ; mais il donnoit à tous des appointemens honnestes & proportionnez à leur condition. Sa liberalité

s'estendoit mesme sur leurs parens , quoy qu'ils fussent hors de la Ville de Milan. Comme il connoissoit parfaitement l'esprit , & le talent de chacun de ses Ecclesiastiques , lors que les Benefices venoient à vaquer , il les en pouruoyoit sans qu'ils les demandassent ; & leur donnoit les instructions pour les bien gouverner. Quand ils estoient malades , il les visitoit luy-mesme , & les recommandoit aux Medecins , & à celuy qui auoit soin de l'Infirmierie. Il ne vouloit point que l'on congediast ceux que la vieillesse , ou la maladie rendoient inutiles à son service , ny qu'on les enuoyast dans les Hospitaux ; mais il ordonnoit qu'ils fussent entretenus dans sa maison iusqu'à leur mort. Vn iour il sceut que celuy qui en auoit la charge , voyant vn vieux Estasier tout à fait incapable de seruir , le vouloit mettre dehors : il l'en reprit , & luy commanda de le retenir , & de luy donner sa paye ordinaire , sans exiger aucun service de luy. Quand ses Seruiteurs estoient obligez de faire quelque voyage pour leurs affaires , il leur faisoit bailler de l'argent , & vne monture. Il se seruoit de quelques-uns pour écrire sous luy , ou pour lire , durant la nuit ; & quand ils ne se leuoient pas à l'heure prescrite , il les alloit éveiller luy-mesme. S'il falloit passer par les chambres de quelques-uns de ses Gentils-hommes , il ostoit les pantoufles de ses pieds pour marcher plus doucement , afin qu'ils ne s'éveillassent point. Le Pere Dom Bascapé estant avec luy en visite , fut attaqué soudainement

d'un mal qui l'obligea de se coucher. Le Cardinal le vint visiter aussi-tost, & craignant qu'il ne fust pas assez bien couuert, il luy enuoya la couverture de son lit. A considerer ces actions en elles-mesmes, elles sont petites, ie l'auouë ; & ie ne doute point que ceux qui n'ont que l'esprit du Monde, ne s'en mocquent, ou ne les estiment point. Mais ceux qui ont l'esprit de la Charité Chrestienne, & qui sçauent iusqu'ou elle abaisse les Saints, les estimeront tres-grandes. Ils reconnoistront par elles, combien saint Charles auoit de tendresse pour ses freres Chrestiens ; & combien il estoit esloigné de cette rudesse de beaucoup de Maistres, qui traitent leurs Seruiteurs comme des esclaves ; pour qui ils n'ont dans la bouche que des crieries, des menaces, des reproches, & des iniures ; qui ne leur pardonnent pas les fautes les plus legeres, qui ne les excusent iamais, & qui ne se soucient ny de leur santé, ny de leur maladie. Les Ecclesiastiques qui en vsent de la sorte, sont encore plus blasrables que les Laïques, parce que c'est à eux à instruire les autres par l'exemple de la douceur & de la charité pour les domestiques. Ils sont d'ordinaire sujets à tomber dans deux extrémitez opposées. Les vns souffrent tout, & les enrichissent au delà de leur condition, & pour les mettre à leur aise, font bien souuent des violences & des iniustices tres-scandaleuses. Les autres ne leur pardonnent rien, & en ayant tiré tout le seruice qu'ils peuuent,

les abandonnent avec vne cruauté tout à fait barbare. La Charité Chrestienne marche entre ces deux precipices. Elle excuse beaucoup de fautes quand elles ne regardent que le service du Maistre. Elle pouruoit à leur recompense, avec moderation; mais elle ne donne sujet à personne de se plaindre, que pour les accommoder, on luy fasse tort. Le principal objet de saint Charles en supportant les defauts & les imperfections de ses Seruiteurs, estoit de leur enseigner à se supporter les vns les autres, & il leur disoit souuent ces belles paroles de l'Apostre. *Supportez les fardeaux les vns des autres, afin que vous accomplissiez la Loy de IESVS-CHRIST.* 6.

Aux Gal. ch.

Et certes, il estoit absolument necessaire que ce precepte Apostolique fust estroitement gardé dans sa maison, où il y auoit cent personnes toutes differentes d'aage, de qualité, de nation, d'esprit, & d'humeur, autrement il s'y fust formé tous les jours des querelles. Et comme en Italie la haine est presque tousiours furieuse; on eust veu souuent des exemples tragiques de vengeance dans vne famille qui deuoit apprendre aux autres, le pardon des iniures. Mais l'exemple du S. Cardinal, sa douceur, sa patience, & ses soins, bannirent toute sorte de diuision entre ses domestiques, & y establirent vne si parfaite Charité, que l'on pouuoit dire d'eux, qu'ils n'auoient qu'un cœur, & qu'une ame. La paix qui regnoit entr'eux estoit vne predication muette pour toutes les familles de

Milan , où elle ne pouuoit habiter , non pas seulement entre plusieurs domestiques , mais entre les peres , & les enfans , & les parens les plus proches. Quelques-vnes en furent touchées , & s'efforcèrent d'imiter vn si saint exemple , à quoy toutes les exhortations qu'on leur eust pû faire , n'eussent pas eu la force de les porter. Mais les Ecclesiastiques du Diocese , & les Euesques de la Prouince , & du voisinage , en profiterent particulièrement. Car ils establi-
rent chez eux la mesme Discipline que faisoit garder leur Metropolitain , & leurs domestiques donnerent autant d'édification à leurs Peuples , qu'auparauant ils leur auoient donné de scandale. On ne peut assez exagérer combien il est important que les Prelats veillent sur eux , & quels maux cause le déreglement de leur vie. Car on ne s' imagine pas qu'ils haïssent eux-mesmes le peché qu'ils endurent en ceux qui les approchent , & qu'ils ayent le zele contre les pecheurs estrangers , qu'ils n'ont pas pour les pecheurs de leur famille. On croit aisément que la vie priuée dément la vie publique , & la parole. Enfin , tous les Habitans d'une Ville n'entendent pas tousiours parler leur Euesque ; mais ils voyent à toute heure ses domestiques , qui répandent parmi eux l'odeur de vie , ou l'odeur de mort , & qui semblent leur permettre de la part de leur Maistre , tout ce qu'il leur permet à eux , ou tout ce qu'il ne veut pas connoistre par sa negligence. L'Apostre la leur deueroit rendre redoutable par ces terribles

Epistre
2. à Ti-
mothée,
ch. 5.

ribles paroles. Si quelqu'un n'a point de soin de ses domestiques, il a ravié la Foy, & est pire qu'un Infidelle. Et qui peut douter que ce soin ne se doive principalement estendre aux besoins spirituels, & à la correction des vices, qui sont plus nuisibles, sans comparaiſon, que les maladies corporelles, principalement en ceux dont ie parle, à cause que le mauuais exemple corrompt le Peuple que l'Euesque est obligé de sanctifier en toutes manieres.

CHAPITRE XIV.

De la Droiture & de la Prudence de S. Charles dans ses affaires,

LE Monde qui n'approuue iamais que ce qui est sien, & qui remarque vne petite paille dans l'œil de ceux qui font profession de ne suiure pas ses maximes, pour viure selon celles de l'Euangile, accuse d'ordinaire les deuots de n'estre pas sinceres & de bonne foy dans leurs affaires; & d'auoir plus d'attachement à leurs opinions, & plus de chaleur dans leurs interests, que les personnes les plus déreglées. S. Charles fut traité de cette sorte, & on l'accusa d'opiniaſtreté, & d'indiscretion de zele dans les grands combats qu'il eut à ſouſtenir contre les Gouverneurs de Milan, & dans beaucoup d'entreprises pour le bien de son Diocèse. Mais ceux qui connoiſſoient

R

la verité de ses sentimens , & les motifs qui le faisoient agir , estoient bien persuadez, qu'on interpretoit ses actions d'une façon fort iniuste & fort malicieuse. La haine qu'il portoit au peché , & le desir de le détruire dans l'ame de tous ses Diocesains; le zele ardent qu'il avoit pour leur salut , l'amour violent qu'il portoit à l'Eglise , le rendoient inflexible dans les résolutions qu'il avoit une fois prises comme utiles à son Peuple ; Et il n'en prenoit jamais d'importantes sans recourir premièrement à l'Oraison , & à des exercices extraordinaires de Penitence. Aussi ne manquoit-il jamais de recevoir du Pere des lumieres qu'il consultoit, les lumieres dont il avoit besoin pour executer les desseins qu'il luy avoit inspirez. Et certes , il n'y a point d'esprit humain pour sage , pour éclairé , & pour sçavant qu'il pût estre , qui eust esté capable de le retirer de tant de mauvaises affaires, où l'obligation de deffendre l'autorité Episcopale , l'avoit engagé ; & pour faire un si grand nombre de Reglemens necessaires pour retablir la Discipline Ecclesiastique dans son Diocese. Apres avoir consulté Dieu , il consultoit le Vicaire de I E S V S- C H R I S T , quand les choses estoient importantes , & luy rendoit un compte exact de toutes ses raisons, afin de suivre l'Oracle de celui qu'il croyoit recevoir de l'Espoux de l'Eglise , des lumieres plus pures pour la conduire, que les Pasteurs inferieurs qui dépendent de luy. Il appelloit encore dans ses Congregations,

les plus habiles personnes , les plus sages , & les plus pieuses qui fussent dans Milan. Il leur exposoit son dessein , il leur disoit les raisons qu'il croyoit auoir de le prendre , & il se soumettoit à leur iugement avec tant d'humilité , & de sincérité , que chacun prenoit la liberté de luy dire ses pensées , sçachant bien qu'on ne pouuoit luy faire vn plus grand plaisir que de luy parler librement. Nous auons assemblé dans vn Chapitre particulier, toutes les Congregations qu'il tenoit , & par leur nombre , on void qu'en nulle chose , il ne vouloit rien faire sans conseil. Ce n'est pas qu'il en eust beaucoup besoin ; car son auis estoit tousiours le bon , & la lumiere celeste qui remplissoit son esprit , luy faisoit tousiours choisir la resolution qu'il falloit prendre. Mais son humilité & son dessein de faire bien tout ce qu'il entreprenoit , luy donnoit de la défiance de son esprit , & l'obligeoit de recourir aux autres. Il ne se fioit pas toutefois tellement à ses Officiers , qu'il ne prist garde de fort près , aux expéditions qu'ils auoient faites. Il les reuoyoit routes , & il n'y en auoit guere où il ne trouuast quelque chose à retrancher , où à adiouster , parce que personne n'entendoit si bien que luy les Ordres Ecclesiastiques.

En Italie , le Tribunal des Euesques connoist presque de toutes sortes d'affaires , & celuy de saint Charles estoit tousiours fort occupé , à cause de la grandeur du Diocèse. Les Iuges Ecclesiastiques estoient

R ij

accusez de rendre les procès eternels par des formalitez & des chicanes. Le Cardinal trauailla à oster cét abus, & fit dresser vn Liure, où il donne à tous ses Officiers, toutes les instructions, & establit tous les Reglemens necessaires pour les obliger à rendre vne bonne & prompte Iustice aux parties. En effect, la face de ce Tribunal changea bien-tost, & les choses s'y passerent avec toute la diligence & l'integrité que l'on pouuoit desirer. Il ne donnoit les charges de Iudicature qu'à des Estrangers, afin d'empescher que les parens, les alliez, & les amis, ne les portassent à faire quelque faueur aux vns, & quelque tort aux autres. Au contraire, ceux dont il se seruoit pour le gouuernement spirituel de Milan, estoient de la Ville, afin qu'ils eussent plus de credit sur les esprits, & qu'ils formassent vne Escole eternelle de bons ouuiers pour seruir les Archeuesques qui luy deuoient succeder.

Il rendoit volontiers office à tous ceux qui le luy demandoient; mais il s'informoit exactement de la Iustice des prieres qu'on luy faisoit: & autant qu'il estoit prompt à écouter celles qui se trouuoient legitimes, autant estoit-il seueré à reietter celles qui pouuoient tant soit peu blesser sa conscience. Comme il estoit dans Rome, vne Dame le pria avec beaucoup de larmes de vouloir s'employer pour retirer son fils de prison, d'où il couroit fortune de ne sortir que pour mourir honteusement par

la main d'un bourreau. La douleur de cette mere affligée le toucha de compassion ; mais quand il sceut le sujet pour lequel on auoit pris son fils , il ne crût pas se pouuoir employer pour obtenir sa grace , sans offenser la Iustice , & il pria cete Dame de l'excuser.

Il estoit si peu attaché à ses interets ; qu'ayant sceu que ceux qui auoient charge de ses affaires, alloient avec trop de rigueur contre ses debiteurs , & monstroient trop d'exactitude pour conseruer ses droicts ; il les en reprit seuerement , & leur ordonna de se comporter avec tant de douceur , qu'ils ne donnassent sujet à personne de crier. C'est en ce point que bien souuent beaucoup de personnes de grande pieté font des fautes considerables , & qu'ils donnent sujet par leur fermeté inexorable en l'exaction de leurs reuenus , & par les procès qu'ils intentent assez legerement , de decrier la deuotion , qui n'est pas coupable de la dureté de leur conduite. Saint Ambroise a dit que I E S U S-CHRIST n'est pas vn homme de Barreau , & tous les Ecclesiastiques le doiuent imiter en cela , s'ils veulent conseruer l'esprit de leur condition , qui les separe des affaires du Siecle , & les esloigne de tout ce qui peut sentir l'aspreté de l'auarice. Je ne veux pas que les Beneficiers laissent perdre les droicts de leurs Benefices qu'ils sont obligez de conseruer. Mais l'Apostre leur dit , qu'en certaines rencontres , il vaut mieux souffrir quelque petite perte ,

que de scandaliser le Peuple par vne ex-
cès sordide , & que troubler le repos
des familles par des procès de peu de con-
séquence.

Saint Charles auoit esté durant le Pon-
tificat de son Oncle , maistre des affaires
de la Chrestienté. Il traitoit tous les iours
auec les Ambassadeurs des Princes , auec
les Cardinaux , les Euesques , les Reli-
gieux , & des Seculiers de toutes sortes de
condition. Il se pouuoit selon l'usage de
la Cour , faire vn langage qui ne signifie
rien , & qui contente le monde par son ga-
limathias agreable. Mais il crût que cette
façon d'agir estoit indigne d'un Cardinal,
& sa langue fut tousiours l'interprete de sa
volonté. Il n'amusoit point les personnes
par de fausses esperances pour les tenir en-
gagées à son seruice , ou pour les empes-
cher de luy faire du mal. Il disoit tousiours
franchement ce qu'il pouuoit , & ce qu'il
vouloit faire , & il n'y auoit point en ses
promesses , ces quinze ou seize degrez que
l'on a remarqués en celles d'un Cardinal
Neueu de ces derniers temps , par où il fal-
lust passer auant que d'obtenir ce que l'on
demandoit. Il fut encore plus pieux quand
il gouuerna son Diocese , & ne s'engagea
iamais à rien promettre , qu'auparauant il
n'eust bien examiné s'il pouuoit , ou s'il
deuoit faire ce que l'on luy demandoit.
Quand on recherchoit son auis sur quelque
chose , il parloit auec la mesme sincerité , &
il aymoit mieux mécontenter ceux qui le
consultoient , que de sentir le moindre re-

mords de conscience pour ne leur avoir pas dit la verité. Il traitoit de cette sorte avec les Papes, & quoy qu'il eût vn extrême respect pour leur dignité, il ne sçauoit ce que c'estoit de les flatter, ou de biaiser vne réponse de peur de leur déplaire. Ce procéde si franc & si candide luy reüssissoit toujours : & on aimoit mieux la secheresse de ses paroles, que la douceur des autres, parce que l'on sçauoit bien que la Charité le faisoit toujours parler, & qu'il estoit rempli de l'Esprit de Dieu. Comme il estoit sincere, il ne pouuoit souffrir les fourbes, & il ne vouloit auoir aucun commerce avec eux. Vn iour quelque vn de ceux dont il se seruoit, luy dit, Monseigneur, ie vous diray librement ce que ie pense de cette affaire. Quoy ? l'interrompit le Cardinal, ne parlez-vous pas toujours avec liberté ? Sçachez que ie ne pretends point auoir pour amy, celuy dont la langue n'explique pas librement la pensée. Cela estoit cause que ceux qui traitoient avec luy, alloient avec beaucoup de franchise, & que l'on ne se hazardoit pas de le tromper par de belles paroles, sçachant bien qu'il ne pardonnoit iamais cette conduite double & trompeuse, si contraire à l'Esprit Ecclesiastique.



CHAPITRE XV.

*De l'esprit naturel de saint Charles ;
de sa science , & de sa
maniere de prescher,*

L'Esprit de Charles n'estoit pas aisé , vif , lumineux , comme celuy des saints Gregoires de Nazianze , & de Nyssé , de Basile , de Chrysostome , d'Ambroise , & d'Augustin , dont les escripts ont tant de politesse , de fleurs , & de pointes. Au contraire , il auoit quelque pesanteur naturelle ; de sorte que ce que les autres faisoient en seioiant , luy coûtoit beaucoup de temps & de travail. Mais comme il connoissoit ce defect naturel , il essayoit de gagner par l'assiduité du labeur , & par la diligence , ce que la Nature ne luy auoit pas donné. C'est ce qui l'obligeoit à prendre des heures dans la nuit pour estudier , & à retrancher sur son sommeil , ce qui luy eust esté necessaire. Mais s'il n'auoit pas cette facilité bien-heureuse qui deuore les Liures , & qui produit si heureusement de belles & de grandes choses en quelques personnes ; il auoit la solidité du iugement , qui vaut sans doute mieux que la chaleur & la lumiere de l'imagination. Delà venoit que tous ses discours & tous ses escripts estoient pleins de suc , & on pouuoit dire de luy , ce que l'on disoit d'Ari-

stote, qu'il trompoit sa plume dans le bon sens. En effet, il a publié vn grand nombre de Lettres Pastorales, d'auis aux Ecclesiastiques, aux Nobles, aux Magistrats, aux Reguliers, aux hommes, aux femmes, aux artisans, aux pauvres, & aux riches. Il a dressé des instructions pour les Seminaires, pour les Colleges, pour les Confraternitez de son Diocese. Il a écrit des Lettres particulieres à toutes sortes de personnes qui le consultoient sur des affaires importantes. Mais en toutes ces productions d'esprit, on void tant de iugement, de sagesse, de prudence, & de solidité, que l'on est espouuenté de la vaste capacité de ce grand homme pour les choses Ecclesiastiques. Il estudioit incessamment ces matieres; & elles estoient si bien rangées dans son esprit, il se les estoit faites si propres, qu'apres qu'il auoit trauaillé à quelques Reglemens, on ne pouuoit rien trouuer ny à retrancher, ny à aiouster. Il penetroit dans toutes les inclinations, les interets, & les pensées des hommes, pour s'accommoder à la force des vns, & à la foiblesse des autres, avec tant d'adresse, que depuis sa mort, tous les grands Euesques ont reconnu qu'il estoit superflu de trauailler aux choses où il auoit mis la main; & qu'il n'y auoit qu'à le suivre pour bien faire. Mais il faut auoüer qu'outre la lumiere de la prudence naturelle, il auoit vne lumiere plus haute, & que l'Histoire Ecclesiastique ne nous fournit point d'exemple d'aucun Euesque qui l'ait eüe si estendue pour le

gouvernement d'un Diocèse. I E S U S-
C H R I S T l'auoit donné à son Eglise,
comme vne source de la Science Ecclesia-
stique, où il auoit resolu que tous les Pre-
lats puisassent pour apprendre à bien con-
duire leur troupeau. Il fit ramasser ses Sy-
nodes, & ses Conciles, & ses principales
instructions dans vn Volume, que par hu-
milité il nomma les Actes de l'Eglise de
Milan. Depuis sa mort on l'a augmenté de
plusieurs pieces; mais ie souhaitterois que
l'on donnast au Public, quelques-vnes de
ses saintes Lettres que l'on garde en tant de
Volumes dans la Bibliothèque Ambrosien-
ne. Il n'auoit pas la parole fort libre. Com-
me le Pape Gregoire XIII. eut pensée de
l'enuoyer Legat en Espagne; vn Prelat qui
auoit beaucoup de pouuoir sur son esprit,
l'en dissuada, & luy dit, qu'un homme qui
begayoit comme luy, ne seroit pas propre
à cet employ. Saint Charles le sceut, & il
ne s'en fascha point, reconnoissant qu'il
auoit dit la verité. Ce défaut estoit cause
qu'il ne preschoit pas agreablement pour
les qualitez exterieures de l'Orateur, &
qu'il ne falloit pas l'aller écouter pour satis-
faire ses oreilles. Quand il se preparoit
pour vn Sermon, il faisoit vn grand ar-
bre, & diuisoit son sujet en plusieurs
pointes. Il preschoit plustost par concep-
tions, que par raisonnemens sublimes
tirez des Sciences. Mais l'esprit de Dieu
qui animoit ses paroles, suppléoit au dé-
faut de la prononciation, & des autres
graces du langage. Il donnoit à son Peuple

une nourriture solide. Il luy parloit comme ayant puissance, à l'exemple du Fils de Dieu, qui a donné dans l'Euangile, l'exemple aux Pasteurs de la maniere dont ils doivent prescher. L'eloquence seculiere est criminelle dans la bouche de tous les Predicateurs, parce qu'elle aneantit la force de la Croix de I E S V S - C H R I S T. Mais elle est abominable & ridicule dans la bouche d'un Euesque, qui doit parler en Pere, & en Maistre à ses enfans, & qui oste toute la force à ses paroles, quand elles sont si ajoustées & si recherchées. Le stile de saint Charles estoit graue, & digne d'un vray Archeuesque. Il employoit l'Escripture Sainte heureusement, & il cherchoit dans ce diuin Arsenal, des armes pour combattre les vices. C'estoit à eux qu'il faisoit la guerre, & il taschoit de les déraciner du cœur de ses brebis. Comme Iesvs-CHRIST parloit en luy, ses brebis l'escoutoient, & ce fut par ce moyen principalement, qu'il fit changer de face à la ville de Milan.

Il estoit naturellement prompt & seuer, & la vie austere qu'il menoit, ses ieusnes, & ses veilles auoient encore augmenté sa feuerité, & sa melancolie; mais cette humeur ne faschoit & n'incommodoit personne. Il auoit un pouuoir merueilleux sur ses inclinations naturelles, & elles ne luy faisoient iamais rien faire dont il eust sujet de se repentir. Les broüilleries qu'il eut avec les Gouverneurs de Milan, les affaires des Chanoines de la

Scala , & des Religieux que l'on nommoit Humiliez, furent terribles, & capables d'ébranler le plus ferme esprit du Monde , & de luy donner du chagrin. Mais saint Charles n'en changea iamais de visage, iamais il n'en parut plus réueur qu'à l'ordinaire , & on ne remarqua iamais autre action en luy , durant ces grandes tempestes , sinon que quelquefois il portoit le doigt à son nez. Il écoutoit tous ceux à qui il donnoit audience , avec vne patience & vne douceur admirable. Il ne se mettoit point en colere contre ceux qui perdoient le respect , & qui luy disoient des choses ou extrauagantes , ou inutiles. Il excusoit, comme nous auons dit, les fautes de ses domestiques , & ne s'en plaignoit iamais, bien loin de les gronder , & d'en conceuoir du dépit.

La Nature luy auoit donné vne grande fermeté d'ame pour mépriser tous les perils , & pour vaincre toutes les difficultez qui se trouuoient dans les entreprises où il y alloit de la gloire de Dieu , de l'honneur de l'Eglise , & du bien de son Diocèse. Tandis qu'il auoit ces grandes contestations pour la Iurisdiction Ecclesiastique, diuerses personnes luy venoient donner des auis , que l'on faisoit des desseins contre sa vie , & luy en marquoient beaucoup de circonstances. Il les remercioit de ces preuues de leur affection ; mais il ne s'en troubloit pas dauantage , & n'apportoit aucune nouvelle precaution pour se garantir des embusches qu'on luy dress

soir. Nous auons dit qu'il brussa vn paquet, par lequel on luy mandoit le détail d'une entreprise faite pour le tuer, avec vne tranquillité de visage qui surprit celuy qui le luy auoit apporté. Il auoit accoustumé de dire, qu'il estoit beaucoup plus affligé, & auoit plus d'inquietude voyant vn Ecclesiastique manquer à son deuoir, & à quelques Reglemens de ses Conciles, que s'il voyoit tous les Princes du Monde liguez pour le perdre; Car il estoit bien assuré que Dieu dont il deffendoit la cause, ne l'abandonneroit iamais à leurs mauuais desseins; ou, que s'il le laissoit perir, sa perte luy seroit bien auantageuse, puis qu'elle le tireroit de la terre où la vie mortelle luy estoit ennuyeuse, pour le faire entrer dans la patrie celeste, apres laquelle il soupiroit si ardemment.

CHAPITRE XVI.

De l'Esprit Episcopal de saint Charles.

Tous les Ordres Religieux que Dieu a donnez à son Eglise pour la seruir, ont leur Esprit particulier, qui est, comme la difference indiuiduelle qui les distingue les vns des autres. Tandis que cet Esprit se conserue en eux, ils subsistent; & si-tost qu'il se corrompt, ils tombent en ruine, &

deuiennent aussi scandaleux à l'Eglise, qu'ils luy ont esté vtils. Or cét Esprit est vn écoulement, ou vne impression de quelqu'un des Estats, ou des Mysteres de IESVS-CHRIST, qui veut estre honoré par eux, & se répandre entre les hommes par leur moyen. Car comme dans le monde corporel chaque creature est vne image de quelque perfection essentielle de Dieu: de mesme dans l'Eglise, chaque Ordre est vne image de quelqu'un des Estats de IESVS-CHRIST, & cette image est en mesme temps l'Esprit qui le viuifie. Ainsi l'estat de sa retraite dans le desert, & de sa vie cachée, est honoré par les Anachorettes, & par les Moines qui font profession de Solitude, tels que sont les Chartreux, les Benedictins, & les Camaldules en Italie; & tandis qu'ils demeureront cachez, & solitaires, leurs Ordres subsisteront dans leur pureté. Ceux de saint François, & de S. Dominique, ont pour leur Esprit, la pauvreté, & la predication du Fils de Dieu, qu'ils honorent particulièrement, & leur conseruation dépend de leur fidelité à cét Esprit qui est comme leur amé. On en voit vne preuue bien évidente dans les déreglemens qui sont arriuez en l'Ordre de S. François, où les biens ont estouffé la deuotion, & corrompu les mœurs de telle sorte qu'il en a fallu faire plusieurs Reformes, dont la pauvreté a tousiours esté le fondement.

L'Ordre Episcopal doit donc auoir son Esprit, & il ne peut estre particulier, parce que c'est à luy à purifier, à illuminer, &

à perfectionner tous les Ordres de l'Eglise. C'est pour luy que tous les Ordres sont establis, & luy seul subsistera iusqu'à la fin des Siecles, tandis que les Ordres succedant les vns aux autres, s'aboliront entierement. Car l'Eglise est vn Corps immortel; & par consequent, il faut qu'il ait vn Esprit qui le viuifie eternellement, nul corps ne pouuant viure que de son Esprit, qui doit estre proportionné à ses fonctions, & à la fin pour laquelle il est estably. Dieu est la fin qu'il regarde, & sa fonction est de l'honorer. Or Dieu, dit saint Augustin, ne peut estre honoré qu'en l'aimant. L'amour doncques est le culte que l'Eglise rend à Dieu sur la terre, & qu'elle luy rendra à iamais dans le Ciel. Les Euesques sont les Chefs de ce Corps sacré; ils doiuent donc auoir la plenitude de cét amour, pour le répandre dans les membres. Ainsi, l'amour sublime de Dieu, ou la Charité parfaite, est l'esprit Episcopal, que ie nomme Zele. I E S U S-CHRIST est l'Euesque des Euesques, aussi a-t'il receu la plenitude de cét amour, & de ce Zele, qui en est la quintessence, & il s'applique à luy-mesme ces paroles de Dauid, *Le zele de ta maison m'a deuoré.* Quand il donne à Pierre le gouvernement de son troupeau, il ne luy demande point s'il est sçauant, s'il est genereux, s'il est pitoyable, s'il est constant, s'il est sage; mais il l'interroge seulement sur son amour. *Pierre m'aimes-tu plus que tes compagnons? pais mes brebis, pais mes agneaux.* Saint Augustin parlant de cét amour des Pasteurs.

Psal. 68.

S. Iean,
ch. 21.

Traité de l'Eglise, dit, que son ardeur doit croistre
 11. *sur S.* iusqu'à cette perfection, qu'elle esteigne
Jean. dans leur ame, la crainte naturelle de la
 „ mort; & que ceux qui paissent les brebis de
 „ I E S V S- C H R I S T, comme si elles estoient
 „ leurs brebis, & non pas les siennes, sont
 „ conuaincus de s'aimer eux-mesmes, & non
 „ pas I E S V S- C H R I S T.

Le zele est donc l'esprit de tous les Euesques, & rien ne fait leur difference en l'ordre de la sainteté, que la difference de ce feu diuin, dont tous doiuent estre embrasez. Ot ie puis dire hardiment, que depuis les Apostres, nul Euesque n'en a esté plus ardemment allumé que saint Charles, & que Dieu le luy auoit donné pour le répandre sur tous les Prelats de l'Eglise de son temps. C'est la lumiere de ce zele qui luy fit establir tant de Congregations, pour estre informé exactement de la façon dont les ames de ses Diocesains estoient conduites par les Pasteurs subalternes. C'est ce qui le rendoit si exact & si rigoureux en leur choix. C'est ce qui le faisoit si vigilant pour empêcher les moindres desordres dans son Diocese. C'est ce qui le pressoit d'exhorter les Euesques, non seulement de sa Prouince, mais tous ceux avec lesquels il traitoit, de considerer le prix des ames qui leur estoient commises, & d'apprehender le compte qu'il en falloit rendre à Dieu. Vn Cardinal qui estoit Euesque d'un fort petit Diocese, n'y residoit point, & S. Charles l'en reprenant avec liberté, il luy dit; que son Diocese estoit de si peu d'estendue,

qu'il pouuoit aisément le gouverner sans y faire residence. Ce discours luy perça le cœur, & il representa si fortement à son Confrere, qu'une seule ame rachetée du Sang de I E S U S- C H R I S T, meritoit la residence du plus grand homme du monde, qu'il le laissa remply de confusion. Il se trouvoit beaucoup de lieux dans les montagnes du Diocese de Milan, qui estoient si pauvres, qu'ils ne pouvoient entretenir vn Curé. Il les pourvoyoit de Prestres à qui il donnoit la subsistance, & ce fut pour cette raison qu'il establit la Congregation des Oblats.

Vn autre ayant dit dans sa maison, où il l'estoit venu visiter, qu'il ne sçauoit que faire, il apprit cette parole apres son depart. A l'heure mesme il entra dans son cabinet, où il dressa les principaux articles des occupations d'un bon Euesque, & au dessous de chacun, il escriuit ces paroles ; *Et apres cela, vn Euesque dira qu'il ne sçait que faire.* Aussitost il fit partir en poste vn de ses principaux Ecclesiastiques, pour porter ce memoire au Prelat à qui cette parole estoit échappée sans y penser, & sans mesme qu'il s'en ressouuint. Il le receut avec beaucoup de respect, & il en tira le profit qu'il deuoit, s'occupant tout de bon à faire les choses que S. Charles luy marquoit. Et certes, si Vespasien disoit qu'il falloit qu'un Empereur mourust debout ; il y a bien plus de raison de dire d'un Euesque, qu'il doit vivre & mourir debout, en trouuillant au champ que Dieu luy a donné à cultiuer, &

que l'oyſſueteſté eſt la peſte de l'Eſprit Epiſcopal dont nous parlons.

Durant le ſejour que Saint Charles faiſoit dans ſon Seminaire, il prenoit la peine de donner luy-meſme les poincts d'oraiſon à quelques Clercs qui demandoient d'y eſtre receus, & il exigeoit d'eux tous les iours, le compte de leur meditation, avec vne douceur & vne humilité qui rauirent d'admiration l'Eueſque de Nouare qui s'y trouua preſent. Vne fois emportée de ſon zele, il luy dit, *O que ie demeure- rois volontiers au ſervice d'un bon Eueſque qui m'enuoyast tantost d'un coſté, & tantost d'un autre, pour ſeruir les ames, ſi ie n'eſtois point dans la dignité où ie me trouue !* C'eſtoit vouloir reſſembler au Pasteur des Pasteurs, qui dit, *que le Fils de l'Homme eſt venu au Monde pour ſeruir, & non pas pour eſtre ſeruy.* Toutes ſes Predications eſtoient allumées du feu de ce zele; mais c'eſtoit dans ſes Oraisons Synodales qu'il paroifſoit plus viſ & plus ardent. Ses Curez ne les entendoient iamais ſans en eſtre embrazez, & ils s'en retournoient dans leurs Parroiſſes comme des fournaifes qui le répandoient par tout. Ce Zele le rendoit infatigable, & on pouuoit dire, qu'il en eſtoit plus animé que de ſon ame. Et certes, ſ'il eût eu moins de force, il n'eût iamais pû reſiſter à tant de trauaux qu'il a ſoufferts, ny vaincre de ſi eſtranges difficultez que celles qu'il rencontroit dans l'exercice de ſa charge. Ce zele ne luy faiſoit trouuer rien de bas, rien qui fuſt indigne de ſa Pourpre. Comme il fai-

soit la visite à pied dans vne Vallée de son
 Diocèse , il rencontra vn pauvre pastre,
 qui estoit dans vne méchante cabane hors
 du chemin. Il l'alla trouuer , & luy apprit à
 faire le signe de la Croix, & à dire l'Oraison
 Dominicale , avec la mesme attention que
 s'il eust fait vn grand Sermon dans sa Ca-
 thedrale. Ce zele s'estendoit à inspirer aux
 Seculiers aussi-bien qu'aux Ecclesiastiques
 le soin du salut des ames, & pour les en ren-
 dre capables, il establir grand nombre d'Es-
 choles Chrestiennes dont nous auons par-
 lé. Ce zele passoit les bornes de ses Diocè-
 ses , & il escriuoit aux Cardinaux, aux Eues-
 ques, aux Curez , & aux Prestres des autres
 Prouinces , dans toutes les occasions , pour
 les porter à faire leur deuoir avec soin , &
 avec courage. Il respondoit à tous ceux qui
 le consultoient sur les difficultez de l'exerci-
 ce de leurs charges; & le Saint Esprit parloit
 tousiours par luy. Il n'y auoit point de si pe-
 tites affaires qu'il ne s'en mélast volontiers,
 quand elles pouuoient seruir au salut des
 personnes ; & comme il ne regardoit que
 l'Image de son Dieu dans les hommes , les
 plus pauvres luy estoient aussi considerables
 que les plus riches , & les plus nobles. Pour
 leur donner plus de commodité de l'abor-
 der , il alloit presque tousiours à pied par la
 Ville , & il les escoutoit avec vne douceur
 dont ils estoient ravis. Enfin , ce zele pour
 son Eglise, estoit si grād, que dans la chaleur
 de ses contestations avec les Gouverneurs
 de Milan , comme quelqu'un luy dit à Ro-
 me, qu'il n'y retourneroit plus, il luy répon-

dit vn iour ; qu'il abandonnerois plustost le *Chapeau*, que son *Archepesché*.

C H A P I T R E XVII.

De la deuotion de S. Charles.

COMME les Euesques sont les maistres de la Deuotion Chrestienne, ils la doiuent inspirer aux autres, & estre comme des bassins de cette Vertu, pour parler avec S. Bernard, auant que d'en estre des canaux. La Religion & la Deuotion sont deux Vertus differentes, quoy qu'elles ayent vn objet commun, qui est l'honneur de Dieu. Mais la Religion regarde cét honneur en general, & toutes les choses qui le concernent, & la deuotion est vne consecration particuliere de la personne à cét honneur, & à ce culte, qui luy donne vne volonté prompte, & tousiours disposée à faire toutes les choses qui appartiennent au seruice de la diuine Majesté. Or comme il y a difference entre faire vne chose, & la faire promptement, ardemment, agreablement, & suauement, la Religion qui donne le premier, est distinguée de la Deuotion qui donne le second. Saint Charles faisoit bien voir par toutes les actions de sa vie, & par la conduite de son Diocese, combien il estoit religieux, & avec quelle ardeur il se portoit à toutes les choses qui regardoient

Le culte de Dieu. Il n'y auoit rien de petit pour luy en cette matiere, & il s'appliquoit aux moindres choses avec la mesme attention, qu'aux plus importantes. Cela paroist dans ses Reglemens, où il descend depuis le Sanctuaire iusqu'aux benoistiers, aux cloches, & à la lessive des linges de l'Autel. Le peuple appelle deuots & pieux ceux qui exercent beaucoup d'actes extérieurs de Charité vers les pauvres, ou de temperance dans la vie austere qu'ils menent, dont l'exterieur est mortifié, ou qui ont des visions & des extases. Saint Charles n'a point eu ces graces extraordinaires, non plus que les grands Euesques du temps passé, dont toutefois la sainteté estoit si eminente. Au contraire, il se défioit extremement de leur verité dans les personnes qu'on luy disoit les receuoir de Dieu, & il les examinoit avec tant de seuerité & de lumiere, qu'il en reconnoissoit bien-tost la tromperie. Vne ieune fille dans Milan, ayant fait de bonne heure profession d'une vie fort retirée & fort penitente, acquit avec le temps vne si grande reputation de sainteté, que non seulement beaucoup de personnes Laïques, mais encore beaucoup de bons Prestres, & de Religieux s'y laisserent abuser, & la consulterent comme vne personne qui auoit des communications tres-estroites avec Dieu. On en parla à S. Charles pour le conuier de la voir. Mais aussi-tost il soupçonna qu'il y auoit de la fourbe en cette personne dont on faisoit tant de contes. Il ne la voulut point visiter, & il ordonna au Pere

Adorne son Confesseur de la voir , & d'examiner son esprit , & sa conduite : Il auoit beaucoup de lumiere pour les choses spirituelles : mais elle n'empescha pas qu'il ne fust trompé par cette femme artificieuse , qui sceut admirablement se contrefaire deuant luy. Il en fit donc vn rapport au Cardinal , plustost auantageux , que capable d'augmenter ses soupçons. Mais il ne voulut pas s'en arrester à sa relation. Il crût tousiours qu'il y auoit de l'imposture ; & pour en estre tout à fait éclaircy , il défendit au Confesseur ordinaire de cette Beate pretendue , d'entendre sa Confession , & d'auoir aucun commerce avec elle. Il mourut quelque temps apres qu'il eut donné cet ordre ; mais on reconnut presque aussi-tost que c'estoit vne fourbe qui vouloit tromper le Monde , & qui n'estoit rien moins que ce qu'elle paroissoit estre. Comme les femmes & les Religieuses sont plus sujettes que les autres à estre trompées , ou par le Diable , ou par leur imagination , laquelle estant molle reçoit aisément les images des choses , & en compose de nouuelles ; il leur parloit souuent de ces illusions , & leur recommandoit la pratique des vertus solides , & de l'humilité , qui est , dit saint Augustin , la gardienne de la Virginité Chrestienne. Pour luy , comme ie viens de dire , outre la garde de cette vertu , il pratiquoit encore l'Orai'on Mentale , qui estoit la nourrice de sa deuotion. Il paroist qu'il la faisoit par les regles que luy prescri-

uoit le Pere Adorne , son Confesseur , qui sont celles que suiuent presque toutes les personnes qui font profession de Pieté. Ce n'est pas qu'il ne receust de grandes lumieres de Dieu , & principalement pour la conduite de son Diocese ; car il le consultoit sur toutes , & son zele estoit vn effet de ce feu diuin qu'il receuoit dans la priere. On trouua apres sa mort , vn grand nombre de memoires , contenans diuerses matieres recueillies pour luy seruir de poincts d'Oraison. La Passion de nostre Seigneur estoit le mystere qu'il meditoit le plus souuent , & avec le plus de douceur. Il auoit fait bastir dans son Palais vne petite cellule en vn lieu fort esloigné du bruit pour prier plus en repos. Durant qu'il estoit en voyage , s'il ne falloit parler d'affaires, il auoit l'esprit si fort appliqué à Dieu , qu'il ne regardoit pas bien souuent par quel sentier sa mule alloit ; vn iour elle tomba dans vn chemin , sans qu'il s'en apperceût , ny qu'il fist aucune action pour la faire releuer. Vne autre fois son cheual s'estant abbatu , il demeura engagé dessous. Ses gens passerent sans le voir , & ayant pris garde qu'ils ne le suiuoient pas , ils reuinerent , & le trouuerent qu'il prioit. Tandis mesme qu'il negocioit , & qu'il donnoit audience , son esprit estoit recueilly en Dieu , & il ne laissoit pas avec tout ce recueillement , d'estre aussi attentif aux affaires qu'il le falloit pour les bien terminer. Mais on n'a iamais sceu ce que son esprit faisoit en cette contemplation continuelle, ny ce que Dieu.

luy communiquoit; si ce n'est par la maniere de sa vie, qui estoit veritablement extatique; c'est à dire, separée de la vie de la terre. Pour la priere vocale, il estoit tres-soigneux de reciter son Office, & il le disoit tousiours à genoux, & la teste nuë. Je n'ay garde de condamner ces personnes à qui nostre Seigneur parle à toute heure, & qui traitent avecque luy dans la derniere familiarité. Mais il y a sujet de craindre que ces apparitions qui semblent friuoles, ne soient vn effet de leur imagination blessée, ou de leur esprit qui se mocque de la foiblesse de ceux qui les croient. Je n'estime pas non plus qu'elles puissent bien s'accorder avec cette secreete vanité de cœur qu'elles font paroistre lors que l'on semble douter de ce qu'elles disent; ny que le Fils de Dieu apparaisse à des femmes pour les diuertir, sans les rendre plus mortifiées, ou sans en vouloir tirer quelque fruit pour son Eglise. Cependant les hommes qui se laissent gouverner par leurs sens, prisent toutes ces choses, & les reçoient sans les vouloir examiner. Ils se pressent d'aller voir ces personnes extraordinaires; mais on ne voit point que leur commerce les retire de leurs mauuaises habitudes, & les détache du Monde. Le Diable se transforme en Ange de lumiere en mille façons, & la voye marquée dans l'Euangile, & tenue par les Saints des Siecles passez, est sans doute la plus assurée. Il y a dans l'esprit de l'homme, depuis sa corruption par le peché, vn fond d'erreur, qui le rend susceptible de toutes

DE S. CHARLES BORROME'E Liv. II. 412
toutes sortes d'illusions. C'est pourquoy les gens sages , & particulierement les Euesques , se doiuent défier de ces visions extravagantes. Car pour peu d'indulgence qu'ils apportent à les examiner , ils les autorisent , & sont cause qu'elles se multiplient iusqu'à l'infiny ; comme on voit qu'une pierre iettée dans l'eau , ayant produit un cercle, il s'en fait de nouveaux les uns apres les autres qui s'accroissent à mesure qu'ils se forment. Or pour faire ce discernement, il est besoin premierement d'auoir la teste bien faite , & d'estre sçauant sans estre orgueilleux. Mais principalement il faut auoir la lumiere de Dieu qui penetrant dans les replis les plus cachez de l'esprit & du cœur des hommes , y void des choses que ceux qui les ont ne voyent pas bien souuent eux-mesmes.

CHAPITRE XVIII.

Des austeritez corporelles de saint Charles.

L'Euangile nous presente deux modelles S. Matt. de vie bien differents en IESVS-CHRIST, ch. II. & en saint Iean Baptiste. Celuy-cy paroist au monde ne beuant, ny ne mangeant , & les hommes dirent qu'il estoit possédé du Diable. Celuy-là viroit d'une façon commune , alloit aux festins où on l'inuitoit , & ne pratiquoit aucune austerité corporel-

S

le ; & ses Enuieux le nommoient vn yro-
gne , vn gourmand , & l'amy des pecheurs.
Le Monde a tousiours son esprit , & il con-
damnera tousiours les Seruiteurs de Dieu,
quoy qu'ils puissent faire. Cela parut
en saint Charles. Car auant luy, on accusoit
les Euesques d'estre trop delicats , & trop
voluptueux en leur vie : & quand on vid ce
Cardinal viure dans vne si grande austerité,
on commença à dire , qu'il menoit la vie
d'vn Anachorete, & non pas d'vn Euesque;
que par ses veilles , & ses abstinences , il ai-
grissoit son sang , & se rendoit moins pro-
pre pour trauailler dans son Diocese ; qu'il
estonnoit par cette seuerité ceux qui se fus-
sent volontiers approchez de luy ; & qu'il
estoit plustost le desespoir que l'exemple
de ses Ecclesiastiques. Il est certain que
I E S V S - C H R I S T est le modele de la vie
des Euesques, & saint Iean Baptiste, le mo-
dele des Moines , & des Penitens. I E S V S -
C H R I S T venoit au Monde pour retirer
les hommes du peché , & leur apprendre la
verité ; de sorte qu'il deuoit conuerser avec
eux , & mener vne vie conforme à la leur ,
pour le boire & pour le manger , afin de ne
les esloigner pas de luy par vne austerité qui
les eust épouuantez. Cependant S. Hieros-
me l'appelle le Prince de la Penitence ; &
celle qu'il fit dans le desert est le modele de
celle de tous les Prestres , & de tous les Lai-
ques. Il commande à ses Apostres de man-
ger toutes les choses que l'on leur presente-
ra , & ne leur prescrit point de ieusnes , ny
de certaines viandes à l'exclusion des au-

tres. Et il falloit bien qu'ayant à courir par le Monde, & à prescher à toutes sortes de personnes, ils vesquissent de la façon dont viuoient ceux qu'ils vouloient instruire. Mais les Apostres avec tout le trauail de leur predication, ne laissoient pas de pratiquer la mortification corporelle, quand la charité du prochain le leur permettoit. S. Paul nous dit de luy-mesme, qu'il chastie son corps, & qu'il le reduit en seruitude, de peur qu'ayant presché aux autres, il ne se trouue du nombre des reprouuez. Il parle de ses ieunes, & de ses veilles, qui estoient des austeritez volontaires. Tous les Saints Euesques des premiers Siecles ont mené vne vie penitente pour leur particulier; & elle ne les a pas empeschez de traualier pour l'Eglise vniuerselle par la composition de beaucoup d'ouurages, & de conduire tres-sainement leurs Dioceses. Comme ils auoient presque tous esté tirez de la solitude, ils retenoient dans l'Episcopat l'austerité qu'ils auoient pratiquée dans le desert. S. Ambroise faisoit des ieunes extraordinaires. S. Martin, l'honneur & la gloire de l'Eglise de France, viuoit estant Prelat, comme il auoit fait estant Moine. Doncques la vie penitente estant la vie de tous les Chrestiens, les Pasteurs de l'Eglise ne peuuent pas s'en exempter, & ils en ont l'exemple dans le Prince des Pasteurs, & dans tous les Saints Euesques qui les ont precedez. Ils y sont mesme tenus par le deuoir de leur charge, à cause qu'ils sont obligez de porter les pechez du peuple deuant

I. aux
Cor. ch.
9.

S. 5

Dieu ; c'est à dire , de faire penitence pour les pecheurs qui ne la font point , & de luy demander pour eux , par les ieufnes , les veilles , les larmes , & les prieres , la grace dont ils ont befoin pour sortir de l'abîme où ils font enfevelis. Ainsi quand on dit que la vie des Euesques doit estre commune, on ne peut entendre , ny qu'elle soit molle, & voluptueuse , ny qu'ils ne puissent & ne doiuent pratiquer la sainte mortification. Mais il faut que la prudence du S. Esprit regle leur zele en cette rencontre , & qu'elle les empesche de faire les choses qui peuvent les rendre inhabiles à servir les ames qui leur sont commises , ce qui est leur deuoir principal. Telles sont les austeritez extraordinaires qui leur osteront les forces du corps necessaires pour leurs fonctions , qui leur aigriroient trop l'esprit , échaufferoient trop leur sang , les rendroient coleres , chagrins , fascheux , & insupportables au prochain , à la foiblesse de qui ils sont obligez de s'accommoder, pour imiter l'Apostre, qui disoit de luy-mesme,

2. aux
Cor. ch.
11,

qui est infirme entre vous , que ie ne sois infirme avecque luy ? Nous en auons vn exemple admirable en Spiridion , ce fameux Euesque qui assista au Concile de Nicée. Il ieusnoit le Carefme avec la rigueur pratiquée en son Siecle ; & vn soir en ce temps de penitence, vn Pelerin prest de s'éuanouir de faim , entra dans sa maison , & luy demanda à manger. Il ne s'y trouua rien pour luy donner qu'un morceau de viande salée. Spiridion la fit apprester , & commanda qu'on la ser-

uist à ce pauvre Estranger. Comme il estoit Chrestien , il faisoit difficulté de rompre l'abstinence du temps , mais le bon Euesque voyant son scrupule, en mangea le premier pour le conuier par son exemple , à faire la mesme chose. En cela il obeït à la Loy de la Charité , qui est la Loy premiere & vniuerselle de l'Euangile , & qui comme telle , deuoit préualoir sur la Loy Ecclesiastique du ieusne du Careme.

Il faut considerer dans l'austerité de la vie de S. Charles, le dessein de Dieu en le donnant à l'Eglise, & si elle l'empeschoit de faire parfaitement son deuoir , pour inger si elle est digne de reprehension, ou de louange. Il est certain qu'au Siecle où il nasquit, la vie des Euesques , & des Ecclesiastiques, estoit tres-molle , tres-voluptueuse, & tres-corrompue. Les Heretiques en faisoient vne des principales raisons de leur separation de l'Eglise. C'estoit le sujet de leurs declamations parmy le peuple , qui se laissoit bien plustost prendre à ces desordres qui bleffoient ses yeux, qu'aux mauuais arguments dont ils se seruoient pour establir leur Doctrine. Dieu vouloit apporter vn remede à vn si grand mal , & d'un costé confondant les Heretiques qui reprochoient aux Euesques la dissolution de leur vie , par vn exemple si éclattant qu'ils ne le pussent contredire , de l'autre faire honte aux Prelats , de leurs delices , par l'austerité d'un de leurs Confreres. Dans ce dessein , il porte S. Charles sur la Chaire de Milan , & luy inspire cette façon de viure si rigoureuse,

S iij .

qu'elle semble surpasse les forces humaines. Mais la Prudence du S. Esprit parut visiblement dans cette conduite. Car, comme nous auons desia dit, il fonda ses forces, & s'accoustuma peu à peu à ce ieusne terrible au pain & à l'eau. Encore en Carefme laissoit-il le pain, & ne viuoit que de figues seiches, ce qu'il continua iusqu'à la mort. Son corps se trouua capable de cette abstinence, & elle le guerit mesme d'un catherine où il estoit sujet. A la rigueur de ce ieusne, il adioustoit les disciplines sanglantes, les haïres, & la duresse du liest, ne couchant que sur la paille. Vn de ses domestiques luy disant vn iour, que le froid estoit extreme, & qu'il deuoit faire chauffer son liest. Il luy répondit en riant, que le moyen de n'auoir point de froid en se couchant, estoit d'entrer au liest plus froid que le liest mesme. Il n'estoit pas delicat en ce pain & en cette eau, dont il se contentoit; car il ne vouloit point qu'on luy donnast de pain cuit & appresté d'une façon particuliere. Il mangeoit dans ses visites, & dans ses voyages, celui qu'il trouuoit chez ses Curez; & dans les plus mauuaises Hostelleries, le plus noir & le plus dur estoit tousiours le meilleur pour luy. Il esteignoit sa soif aussi-bien avec de l'eau bourbeuse qu'avec l'eau la plus claire du monde. Ce n'est pas qu'il choisist celle là plustost que celle-cy; mais il s'accommodoit à la pauureté des lieux où il se trouuoit; & il iugeoit que permettre la moindre satisfaction à ses sens dans les choses qu'il faisoit pour les mortifier, c'estoit corrompre la penitence.

Ses parens , ses amis , beaucoup de personnes de pieté , le pressoient de vouloir adoucir ce rigoureux traitement qu'il se faisoit à luy-mesme. Le Pere Louys de Grenade , ce fameux Religieux de saint Dominique, dont les Escrits ont fait tant de miracles dans le Monde , en la conuersion des pecheurs , luy escriuit vne fort grande Lettre sur ce sujet. Vn de ses domestiques en fit plainte à Gregoire XIII. qui luy adressa vn Bref , par lequel il luy deffendoit cette abstinence si rigoureuse. Aussitost qu'il l'eût receu , (c'estoit au temps de la semaine Sainte) il modera son ieusne , pour obeïr au Vicaire de IESVS-CHRIST. Mais il éclaircit sa Sainteté, & la rendit capable de luy permettre d'en vser comme il voudroit. Il répondit au Pere Grenade , qu'en l'austerité de sa vie , il imitoit les Saints Nicolas , les Spiridions , & les Chrysostomes , qui n'auoient pas laissé de s'acquitter des devoirs de l'Episcopat , encore qu'ils vesquissent dans vne continuelle penitence ; qu'il auoit éprouné ses forces ; que ce que l'on croyoit détruire sa santé , la conseruoit ; & qu'estant ieune , il se conseruoit avec tant de soin , qu'il n'eust pas pû aller par la ruë sans calote sous son cha- peau , tant il estoit delicat , mais que depuis qu'il s'estoit accoustumé à marcher dans ses visites , par le chaud du iour , il n'estoit plus incommodé du Soleil. Ce n'est pas qu'il ne se fist vne fort grande violence , & sur tout dans la pratique des longues veilles qu'il faisoit pour vaquer à la priere , & à

l'estude. Car naturellement il aimoit à dormir, & il auoit besoin de sommeil pour rafraischir sa bile & son sang. Cela estoit cause que se trouuant dans les Assemblées; & aux Predications, il sommeilloit quelquefois. Vn Prelat le voyant vn iour dormir, celuy sembloit, à vne Predication où il estoit, dit à l'oreille d'un de ses amis. Si i'estois le Directeur du Cardinal Borromée, ie l'obligerois de dormir dans son liét, & d'estre éueillé au Sermon. Cependant, Charles, encore qu'il sommeillast, ne laissa pas de retenir tout ce qu'auoit dit le Predicateur; & il en fit le rapport à quelques Cardinaux qui disnerent avecque luy, ce qui les surprit extremement, car ils croyoient qu'il n'eust rien entendu.

Mais ce qui termine absolument cette question, est que les austeritez que pratiquoit Charles; ne l'empeschoient pas de trauailler pour son Diocese, avec toute la force que l'on pouuoit desirer. Elles ne le rendoient point plus chagrin, plus difficile à aborder, ny plus seuer pour les autres. Car il estoit bien esloigné de l'humeur de ceux qui veulent que ce qu'ils pratiquent soit la règle de la vie de ceux qu'ils conduisent, & qui estant pleins de l'amour d'eux-mesmes, n'estiment & n'aiment que ceux qui leur ressemblent. Il laissoit ses Ecclesiastiques dans la vie commune, & il destournoit mesme ceux qui le vouloient imiter, de s'engager à des austeritez dont ils n'estoient pas capables. Ainsi cette abstinence qui desseichoit son cerueau, le rendoit plus

propre à recevoir la lumiere seiche, qu'un ancien Philosophe disoit, rendre l'ame très-sage. Elle luy laissoit plus de temps pour travailler, & le deliuroit de beaucoup de choses fascheuses qui accompagnent la bonne chere. C'estoit vn continuel sacrifice qu'il faisoit de sa conuoitise sensuelle pour ceux qui suiuoient ses mouuemens desreglez, & dont le ventre estoit le Dieu. Ainsi en se sanctifiant luy-mesme, il sanctifioit les autres, & il offroit son corps comme vn rempart contre les traits que la colere diuine eust lancez sans cela sur ceux qui la prouuoient tous les iours par leurs débauches. Concluons donc que la vie de S. Charles n'est pas vn exemple regulier que tous les Euesques doiuent suiure. Mais que les Euesques apprennent de sa vie penitente, à mener vne vie sobre, & à retrancher ces superfluites & ces delicateffes de leurs tables, qui sont si indignes des Ministres de I E S U S-CHRIST, qui consomment tous leurs reuenus, & qui priuent les pauvres du secours qu'ils ont raison d'exiger d'eux, comme de ceux qui ont la dispensation de leur patrimoine.



CHAPITRE XIX.

Des occupations journalieres , & reglées de S. Charles.

LEs choses que nous auons dites de saint Charles, font assez connoistre que toute sa vie estoit saintement occupée pour la gloire de Dieu, & pour le salut des ames qui luy estoient commises. Mais pour mieux faire voir encore l'usage qu'il faisoit du temps, & son exactitude en la conduite de son Diocese, j'ay crû qu'il estoit à propos de rapporter par le menu ses occupations journalieres.

Tous les mois il tenoit vne fois la Congregation des Curez de la Ville, & du Diocese, & deux fois celle des ceremonies, celle du College des Nobles, celle de l'Hospital; celle des Oblats du saint Sepulchre, celle des Estudes du Clergé, celle des personnes establies pour terminer les procès, celle de la conseruation des biens Ecclesiastiques, & celle des peres de famille, pour leur enseigner à la bien conduire.

Au mois de Ianuier, il tenoit la Congregation de la Discipline Ecclesiastique, qui estoit vne preparation à la Congregation generale du Clergé, laquelle il auoit ordonnée dans son quatriesme Synode, & qui se faisoit en la maniere suiuite. Le second iour estoit pour la Congregation

du Clergé de l'Eglise Metropolitaine, où se faisoit le Scrutin, pour estre informé de la maniere dont l'Office diuin se recitoit, des Estudes, & de la façon de viure des Chanoines, & des autres Ecclesiastiques. Le troisiéme iour, se tenoit la Congregation des Chanoines des autres Eglises Collegiales de la Ville. Le quatriésme, la Congregation des Curez, pour sçauoir de quelle façon ils administroient les Sacremens; & s'acquittoient de la conduite des ames. Le cinquiéme, celle des Chapelains; & le sixiéme, celle des Clercs inferieurs. Dans toutes, saint Charles faisoit des exhortations pleines de zele, & s'informoit exactement du détail des choses. Dans la seconde semaine du mesme mois, il tenoit d'autres Congregations; celles de tous les Confesseurs de la Ville, où les Reguliers estoient appelez, & où il leur demandoit compte de la maniere dont ils se gouernoient dans l'administration d'un Sacrement si important au salut des Fidelles, & pour lequel il auoit fait des Reglemens si salutaires. Outre cette Congregation, il tenoit celle des Docteurs Legistes, celle des Medecins, celle des Aduocats de l'un & de l'autre Tribunal; & il les communioit tous de sa main.

Au mois de Février, il tenoit la Congregation pour la reduction, & l'exécution des Legats pies, & celle qui deuançoit la Congregation des Vicaires Forains où il traitoit des choses qui se deuoient proposer au Synode prochain. Ceux-cy s'assembloient

S vj

le troisiéme iour de la semaine auant le Dimanche de la Septuagesime, & luy rendoient compte de l'estat du Diocese. La dernière Congregation estoit celle des Oblats de S. Ambroise.

Au mois de Mars, il visitoit les Monasteres des Religieuses, & se trouuoit aux assemblées des Dames de pieté qui s'appliquoient aux œuvres de Charité dans la Ville. Il tenoit vne seconde ordination, & auant que de la celebrer, il assistoit à l'examen de ceux qui se presentoient aux Ordres, & leur faisoit diuers discours pour leur en représenter la sainteté; & leur enseigner les dispositions avec lesquelles ils les deuoient recevoir. C'estoit en cette action où il apportoit plus de seuerité & de diligence, sçachant bien que tel qu'est le Prestre, tel est le peuple; & que la reformation de ses mœurs dépend de celle des Ministres qui le conduisent. Il auoit fait diuers Reglemens dans ses Conciles pour prescrire ce que deuoient faire, & en quel estat deuoient estre ceux qui demandoient l'Ordination: & il estoit si rigoureux à les observer, que nulle consideration, nulles prieres, nulles instances de ses amis, ou de ses parens, ne pouuoient l'obliger à s'en relascher tant soit peu. Certes c'est en ces occasions où il faut qu'un Euesque soit inflexible: Et ie ne puis assez déplorer la foiblesse de ceux qui sur vne Lettre de recommandation, reçoient à la plus haute dignité qui soit dans le Monde, des hommes qu'ils ne voudroient pas recevoir au nôbre de leurs domestiques.

Au mois d'Avril, saint Charles faisoit la visite des prisons Archiepiscopales, où il examinoit soigneusement tous les prisonniers, afin de sçavoir les causes pour lesquelles ils estoient detenus, & si on expedioit leurs affaires. Il faisoit la troisième Ordination. Il tenoit la Congregation de tous les Prefets de la Ville, & des Vicaires Forains. Celle de la reduction des legats pies, qui se devoit faire dans le Synode prochain, & celle où on dispoit les actions, & l'ordre de cette Assemblée. Il faisoit la visite des Seminaires, & du College des Suisses, où il examinoit tous ceux qui y estoient élevez, & s'informoit exactement de leur progrès en la pitié.

Au mois de May, il tenoit une Congregation pour reconnoistre & mettre par ordre tous les nouveaux Decrets, & les autres choses qui se devoient faire dans le Synode, & celles des Vicaires Forains, un jour avant sa celebration, où se faisoit un Scrutin tres-exact de l'estat de la Ville, & du Diocese, & où on traitoit des moyens les plus propres pour faire avancer le Peuple en vertu. Le Synode duroit trois iours, & saint Charles preschoit à chacun sur de differents sujets, mais qui estoient tous accommodez aux besoins des Ecclesiastiques

Au mois de Juin, il se preparoit à la visite du Diocese, par la tenuë de beaucoup de Congregations particulieres, & il deputoit des Visiteurs par les six quartiers de la Ville pour luy en rapporter l'estat. En

suite, il visitoit quelque quartier de son Diocese, où il se gouvernoit, comme nous auons desia remarqué. Il employoit le mois de Iuillet, & le mois d'Aoust à la mesme fonction, & la chaleur de cette saison estoit bien moindre que celle de sa Charité.

Au mois de Septembre, il visitoit encore les Seminaires, le College des Suisses, & celuy des Nobles. Il examinoit ceux qui deuoient estre ordonnez.

Au mois d'Octobre, il tenoit vne Congregation generale pour regler les Estudes des Ecclesiastiques, & les matieres qui se deuoient lire dans les Escoles, l'année suivante, par les Theologiens, & par les Canonistes.

Au mois de Novembre, il faisoit la visite des Eglises, des Hospitaux, & des autres lieux de deuotion de la Ville. Le lendemain du iour de la Commemoration des Morts, il preschoit solennellement deuant le Senat, & denant les Magistrats, pour leur enseigner de quelle façon ils se deuoient conduire dans l'administration de leurs charges. Il tenoit encore la Congregation de tout le Clergé en la mesme maniere que celle du mois de Ianuier.

Au mois de Decembre, il continuoit la visite de la Ville, qui estoit tres-laboreuse.

Outre ces Congregations rangées ainsi par tous les mois de l'année, il en tenoit quelqu'une chaque iour de la semaine. Le Lundy estoit destiné pour celles du saint Office de l'Inquisition, du Tribunal, de

la Fabrique du Dôme, & de la Discipline du Clergé, & du Peuple. Le Mardy estoit pour celles des Religieuses, & pour les affaires spirituelles du College, & des Seminaires. Le Mercredi estoit pour celles du Tribunal, & il preschoit en l'Oratoire du Saint Sepulchre. Le Ieudy estoit pour celles de l'administration du temporel des Seminaires, & pour celles de la Penitencerie. Le Vendredy estoit pour celles de l'administration des biens du College des Suisses. Le Samedi, il tenoit celles de l'Hospital. Tous les iours il donnoit Audience le matin, & apres son disner, à toutes les personnes qui la demandoient, & il preferoit toujours les plus pauvres, & les plus misérables, aux plus riches. Il écou-toit avec tant de patience, il répondoit avec tant de douceur, il expédioit si promptement tout ce qui pouvoit estre dépesché sur l'heure, que tout le monde sortoit de l'Audience plein de respect & d'affection pour luy. Je ne parle point de ses autres fonctions extraordinaires, comme estoient les consecrations des Eglises, des Autels, des Calices, & des Cloches, les Benedictions des habillemens Sacerdotaux, des Croix, & des Images, les vestures, & les Professions des Religieuses, les promotions au Doctorat de ses Seminaristes, les diuerfes Processions qu'il faisoit, & les Communions generales dans les Eglises. Il officioit Pontificalement en toutes les Festes de Nostre-Seigneur, de la Sainte Vierge, & des Saints de son Diocese. Il

ne manquoit iamais d'y prescher, & en toutes rencontres il faisoit des exhortations particulieres. Avec toutes ces fonctions, il estudioit tous les iours vn temps assez considerable. Enfin, il est impossible de concevoir comment vn homme seul estoit capable de faire ce qu'il faisoit. Aussi ne donnoit-il pas vne seule minutte à son diuertissement; & au lieu que les autres reprennent leurs forces en se delassant; il en trouuoit de nouvelles dans le trauail. On remarqua qu'il n'estoit entré dans le iardin de son Palais, que deux ou trois fois en sa vie. Il n'auoit que son Diocese, & son deuoir dans l'esprit, & il ne pouuoit prendre plaisir qu'aux actions qui regardoient son salut. Il ne sçauoit ce que c'estoit de se promener; & comme vn iour il alla à Caprarole, qui est cette belle & fameuse vignes des Farneses, il entra tout droit dans l'appartement qu'on luy auoit preparé, d'où il ne sortit point pour voir toutes les choses rares qui sont dans cette maison. Vn Prelat l'en voulut entretenir, puis qu'il n'auoit pas voulu les voir; mais il rompit son discours par ces belles paroles, *il faut songer à faire des bastimens, eternels dans le Ciel, & non pas à bastir sur la terre.* Passant vn iour à Vigeuane, on luy dit qu'il auroit besoin d'un iardin pareil à celuy de l'Euesque de cette Ville, & il répondit, *le iardin d'un Euesque doit estre la Bible.* Le Cardinal Gambara le menant dans son Palais, luy en fit voir toute la magnificence, & saint Charles luy dit, *Monsieur vous au-*

riez mieux fait de bastir quelque Monastere de l'argent que vous a cousté cette Maison. Cen'est pas qu'il soit absolument deffendu aux Euesques d'accommoder leurs maisons de campagne, où ils se retirent quelquefois pour se delasser de leurs fatigues. Mais il y a grande difference entre des aiustemens modestes que l'on leur peut donner, & des dépenses superbes, qui sentent le luxe des maisons Seculieres, & qui ne seruent qu'à faire paroistre la magnificence du Maistre qui les a faites. Il est impossible que le bien des pauvres n'y entre, ce qui est desia vn larcin sacrilege; & que ceux qui entreprennent ces bastimens, n'empruntent ce que d'ordinaire ils ne payent iamais, ce qui est vne iniustice terrible; ou qu'ils ne retranchent quelque chose de ce qu'ils employeroient pour leur Diocese, ce qui est vne grande faute contre la Charité Episcopale, qui doit faire preferer à vn bon Pasteur, le salut & le bien de ses brebis, non seulement à ses diuertissemens, mais à sa vie même.

CHAPITRE XX.

Du dernier voyage que fit saint Charles à Rome.

LEs Euesques d'Italie gardent la coutume d'aller visiter de trois ans en trois ans, les tombeaux des Saints Apostres, &

saint Charles , ce terme estant écoulé, voulut s'acquiter de son deuoir. Outre cette raison , il auoit beaucoup d'affaires d'importance à traiter avec le Pape pour le bien de son Diocèse, & de sa Prouince; & il estoit encore conuié de se rendre à Rome pour des interests considerables de l'Eglise Vniuerselle. Il fit ce voyage , comme il auoit fait les autres , c'est à dire , comme vn Pelerinage de deuotion , & en tous les lieux où il fit quelque sejour , il laissa vne odeur admirable de sa pieté. Les Capucins du Monastere de Sabionete , furent épouuantez de l'austerité de sa façon de viure, auprès de laquelle celle qu'ils pratiquent, leur sembla en quelque façon molle & delicieuse. Il fut receu dans Rome , avec la mesme foule de Peuple , & les mesmes applaudissemens de la Noblesse , des Prelats , & des Cardinaux , qu'il auoit esté aux autres voyages ; & on le regarda comme vn Ange visible qui ne tenoit à la terre que par vn point. Il disoit tous les iours l'Office diuin , dans l'Eglise de Sainte Praxede , à genoux , & la teste nue , encore qu'elle fust fort froide, & fort humide. Auât que de le commencer , il faisoit Oraison mentale , durant vne heure ; & apres qu'il l'auoit acheuée , il se confessoit , & celebrait la sainte Messe. Plusieurs personnes de qualité y assistoient , quoy qu'il la dist fort matin. Des Dames de condition s'y trouuoient aussi , & communioient de sa main , avec vne deuotion particuliere. Apres estre sorti de l'Autel , ou il

donnoit audience à ceux qui auoient à traiter d'affaires avec luy ; ou il trauailloit aux siennes , ou il alloit chez le Pape , qui le faisoit souuent appeller. Quand il reuenoit de la Ville , il alloit d'abord adorer le saint Sacrement dans l'Eglise ; & disoit les petites heures. Son disner estoit de pain & d'eau , & il dormoit deux ou trois heures la nuit , sur vne chaise dans son Oratoire. Encore bien souuent la passoit-il toute entiere dans la Chapelle qui est sous le grand Autel de l'Eglise de sainte Praxede ; & comme le grand saint Antoine , il se plaignoit amoureusement à Dieu , de ce que le Soleil se leuant sur l'horison , venoit le retirer des douceurs où son ame nageoit dans la priere. Durant ce séjour , il donna ordre à ceux qui faisoient ses affaires , de bastir vne Sacristie toute nouuelle , & de la fournir des ornemens necessaires pour le seruice de l'Autel, en quoy il estoit toujours magnifique. Mais son principal soin regardoit ceux qui traitent les sacrez mysteres : & d'autant plus qu'il voyoit de desordre dans la vie du plus grand nombre des Prestres , & des Prelats de cette grande Ville ; d'autant plus son zele s'échauffoit-il pour y apporter quelque remede. Dans les conuersations qu'il auoit avec les Cardinaux , & les Euesques , sa bouche parloit toujours de l'abondance de son cœur, c'est à dire de la sainteté des mœurs des Ministres de l'Eglise ; de l'enormité de leurs fautes qui corrompent les Peuples, & leur donnent non seulement l'exem-

ple, mais encore comme la Loy de pecher ; de l'employ des biens Ecclesiastiques, dont Dieu leur demandera vn compte si rigoureux , & qu'il faudra rendre , non pas selon les mauuaises coustumes , que la vanité & la volupté du Siecle ont introduites ; mais selon les Loix inuiolables des Saints Canons, & selon la nature de la chose mesme. Enfin , il sçauoit si bien représenter le prix des ames rachetées par le Sang de I E S V S- C H R I S T , que les Pasteurs negligens laissent perir par leur faute ; & d'vn autre costé , la ioye du cœur de ceux qui trauaillent selon leurs forces , à les sanctifier ; que personne ne sortoit de son entrelien , qu'il ne fust touché d'vn violent desir de mener vne vie plus réglée , & de s'acquitter mieux de son Ministère ; ou qui ne demeurast conuaincu de la vérité des maximes qu'il n'auoit pas le courage de suivre. Car il sçauoit faire entrer dans les esprits les choses qu'il disoit , avec tant de douceur , & de force tout ensemble ; & d'ailleurs , il soustenoit ses discours par de si merueilleux exemples , qu'il ne laissoit aux plus obstinez , aucune replique , & qu'il conuainquoit tousiours l'entendement , s'il ne persuadoit pas la volonté. Il ne se contenta pas d'employer les entretiens particuliers pour reformer les Prelats, il establit vne Congregation dans l'Oratoire de S. Ambroise , pour les Euesques de Lombardie , où chacun faisoit des exhortations sur des sujets differents, soit de doctrine , soit de pieté. Elle fut bien-tost

frequentée par les autres Prelats , & dans
 la suite du temps, plusieurs s'y formerent à
 parler en public, & à prescher à leurs Peu-
 ples. Le Pape voyoit S. Charles avec grand
 plaisir, & le consultoit sur toutes les affaires
 qui se presentotent , sçachant qu'outre la
 prudence humaine , il auoit encore la lu-
 miere de l'Esprit de Dieu. Il y auoit pour
 lors deuant luy, vn differend de tres-gran-
 de importance , entre deux petits Prin-
 ces d'Italie , & on ne voyoit pas de iour, ny
 à l'accommoder , ny à le terminer par vn
 iugement , sans qu'il y eust à craindre
 beaucoup de mal-heurs entre eux , dans la
 suite. Le Pape en chargea Saint Charles,
 & comme il auoit vne grande creance au-
 près de l'vn , & de l'autre , il se porta sur
 les lieux , & l'accommoda avec vne égale
 satisfaction des deux parties. Mais auant
 que de s'en mesler , il eut recours à ses ar-
 mes ordinaires , qui estoient le ieusne , les
 veilles , & la priere ; & Dieu qui se laissa
 fléchir par cette voye , opera si puissam-
 ment dans le cœur de ces Princes , qu'il
 les amolit , & les porta à faire tout ce que
 le Cardinal desiroit d'eux. Il obtint du
 Pape , durant son sejour à Rome , deux
 Benefices considerables pour son Semi-
 naire de Milan , & pour la Congregation
 des Oblats. L'vn estoit vne Prepositure
 qui auoit appartenu à l'Ordre des Humi-
 liez ; & l'autre estoit vne Abbaye qui venoit
 de vacquer par la mort d'vn Commenda-
 taire. Il seroit à souhaiter que les Com-
 mandes , qui d'ordinaire ne seruent qu'à

entretenir la vanité , & les delices de leurs titulaires , fussent employées à vn vsage si saint dans les Dioceses , & sur tout dans ceux où les Euesques n'ont pas assez de reuenue pour entretenir vn Seminaire , & fournir aux autres despeses que demande le bon exercice de leurs charges. Car au iourd'huy on ne fait guere de distinction entre vne Abbaye, ou vn Prieuré simple, & la Ferme d'une terre; si ce n'est qu'on laisse déperir les Benefices , & qu'on a moins de soin de les bonifier que si c'estoit vn heritage receu de ses peres que l'on pust laisser dans sa maison. A peine se peut-on resoudre de porter l'habit Ecclesiastique, & quād on s'acquitte du Breuiaire , on croit auoir satisfait à tous ses deuoirs : comme si par la nature des biens de ces Benefices, laissez pour la nourriture des Moines , & des pauvres, & encore par les Loix Ecclesiastiques, vn Titulaire n'estoit pas obligé d'estre vn dispensateur fidelle des reuenus , de prendre soin du salut des Peuples qui luy payent les dixmes , & de seruir l'Eglise , ou par la Doctrine, ou du moins par le bon exemple de sa vie. Chacun se presse pour auoir du bié de cette nature , & il est veritablement fort doux à en iouyr , comme font la pluspart de ceux qui le possèdent & qui en iouissent: mais à l'heure de la mort , il se trouuera vn pain de larmes , & de desespoir , quand la conscience en reprochera le mauuais vsage, & quel'on se verra dans l'impossibilité de restituer ce que l'on aura volé aux Moines, aux pauvres, & aux Eglises. Les dis-

penſes dont on ſ'eſt flatté, ne pourront pas appaiſer des remords ſi cuiſans , & ſi legi-
times. La verité que l'on n'a pas voulu
écouter , parlera dans le fond du cœur,
avec toute ſa force ; & on aymeroit mieux
auoir eſté vn miſerable Laique , qu'un
grand Beneficier de cette ſorte. Je n'ay pû
m'empêcher de faire cette digreſſion , que
i'ay creü eſtre plus neceſſaire en noſtre
Siecle, qu'elle n'a iamais eſté. Je prie Dieu
à qui ſeul il appartient de toucher les cœurs,
de grauer ces veritables maximes dans
l'ame de ceux qui en ont beſoin , & d'e-
ſteindre en eux ces conuoiſiſes baſſes &
honteuſes d'amaffer de grands reuenus,
pour en faire des deſpenſes friuoles , ou
pour enrichir leurs parens qui ſont leurs
plus grands ennemis.

Saint Charles ayant acheué ſes affaires à
Rome, prit congé de ſa Sainteté , qui luy
donna toutes les marques d'eſtime & d'at-
fection qu'il pouuoit ſouhaiter. Il partit au
mois de Ianuier qui eſtoit vne faiſon fort
mal propre au voyage : mais ſon amour
pour ſon troupeau , ſurmontoit toutes les
difficultez du temps , & des chemins. Il
paſſa par Sienne , où l'Archeueſque le lo-
gea chez luy , & luy fit vn feſtin tres - ſu-
perbe. C'eſtoit vn mauuais regale pour
vn homme qui ne mangeoit ordinaire-
ment que du pain , & qui ne beuuoit que de
l'eau. Il ſe mit toutefois à table , mais il
mangea ſi peu , & avec tant de contrainte,
que les principaux Gentils-hommes de la
Ville qui le ſeruoient , reconnurent bien
aiſément que cette deſpenſe faite par ce

1583.

Prelat, le bleffoit, & ne s'accordoit pas avec ses maximes. Apres dîner, il fit vne pluye furieuse : mais quoy que luy pust remonstrier l'Archeuesque, il voulut partir, & il luy dit ces belles paroles, qui furent vne correction fort adroite de la despenſe superflue de son repas : *Monſeigneur, ſi ie demourois icy ce ſoir, vous me feriez vne chere pareille à celle de ce matin, & ce ſeroit aux dépens des pauvres de la Ville, dont vn grand nombre viuroit des viandes ſuperflues que vous nous auez fait ſeruir.* C'eſtoit parler en Eueſque des vieux temps ; mais la nouveauté des Siecles n'a apporté à la Prelature, que de la vanité, de l'orgueil, & de la magnificence ſeculiere, qui deſhonorent l'Episcopat par les choſes que l'on croit eſtre neceſſaires pour le rehausſer.

CHAPITRE XXI.

De quelques autres actions de ſaint Charles auant ſa mort.

1583.

Saint Charles reuint à Milan, où il fut receu par ſon Peuple pour lequel il auoit des affections ſi tendres, & ſi paſſionnées, avec tous les témoignages de reſpect & d'amour que ſa vertu meritoit. Il comença à s'appliquer aux fonctions de ſa charge avec ſon zele ordinaire, ou plutoſt il les fit avec vn zele nouveau : car il augmentoit

mentoit rous les iours en luy ; & le sentier
 de sa vie estoit veritablement semblable au
 sentier du Soleil , qui va de lumiere en lu- *aux*
 miere , iusqu'à ce qu'il arriue au iour par- *pron.*
 fait. Il receut avec vne grande consola- *ch. 4.*
 tion , la nomination que fit le Roy Catho-
 lique , au Gouvernement du Milanois , de
 la personne de Dom Charles d'Arragon,
 Duc de Terreneufue , qui vint d'Espagne,
 avec des ordres tres-exprés deviure en bon-
 ne correspondance avec luy. Sa douceur , sa
 pieté , & la veneration qu'il auoit pour le
 Cardinal, l'eussent porté toutes seules à en-
 vser de la sorte : & de la façon qu'il se com-
 porta, il fit bien connoistre que leur bonne
 intelligence estoit plustost vn effet de son
 estime, & de son amitié, qu'une obeïssance
 aux cōmandemēs de son Maistre. Il enuoya
 au deuant de luy ses Gentilshommes , & à
 l'entrée de la Ville, il le fit recevoir par son
 Vicaire General , qui estoit accompagné
 de quelques Prelats, & de toute sa maison.
 Aussi-tost qu'il fut arriué à son Palais
 il l'alla visiter , & luy parla avec tant
 de ciuilité , & d'affection , qu'ils nouierent
 dès lors vne amitié tres-estroite. Pour luy
 en donner des marques publiques , le Car-
 dinal fit faire vne Procession generale par
 toute la Ville , afin de demander à Dieu, les
 lumieres & les graces necessaires au nou-
 uveau Gouverneur , pour se bien acquitter
 de sa Charge , qui est vne des plus impor-
 tantes de tous les Estats d'Espagne. Il sca-
 uoit par experience de quelle necessité il
 estoit pour la conseruation de la Discipline

T

Ecclesiastique qu'il auoit establie dans sa Prouince , & pour la reformation des mœurs de ses Diocesains ; d'auoir vn Ministre du Prince touché d'vn mesme esprit de pieté , & brullant d'vn même zele. Car encore qu'en Italie les Magistrats temporels ne se messent point des affaires de l'Eglise ; toutefois quand ils se contentent de ne les pas appuyer de leur autorité , la pluspart des bonnes intentions des Euesques demeurent inutiles , principalement en ce qui regarde les Laïques. La crainte de déplaire à vn Gouverneur , où l'esperance d'en tirer quelque profit , est cause qu'on le flatte dans sa mauuaise intelligence avec son Pasteur. L'auersion que les personnes déreglées en leurs mœurs ont à toute sorte de Reglemens qui les contraignent, fait que l'on s'attache plustost à celuy qui laisse les gens dās leurs mauuaises habitudes, qu'à celuy qui s'oppose à leurs mauuaises inclinations, & qui ne peut ny attirer les personnes à foy , par la recôpense, ny les intimider par l'apprehension des peines temporelles , beaucoup plus redoutables aux hommes charnels , que les peines spirituelles. Au contraire , quand les deux puissances s'vnissent pour faire obseruer les Loix Ecclesiastiques , elles ne trouuent rien qui leur resiste : & ceux qui ne s'y soumettent pas par le motif de la conscience, y obeissent par le motif de la crainte d'attirer sur eux vne punition qui les touche en ce qu'ils ont de plus sensible, comme l'honneur , le bien ou les autres commoditez de sa vie. Or il n'y a que la pieté Chrestienne

qui sçache faire cette vnion. L'amitié humaine, ou la reciproque estime que peuvent auoir vn Gouverneur, & vn Euesque l'un pour l'autre, sont fondées sur des choses extrêmement muables, & suiettes à changer, par les interests : au lieu que la Grace est vn fondement solide, & inébranlable dans les cœurs qu'elle possède, estant vne participation de la nature de celuy qui ne peut iamais changer. C'est la raison qui obligea saint Charles de recourir à Dieu par des prieres publiques, pour obtenir de sa bonté, vn esprit veritablement Chretien pour le nouveau Gouverneur, afin que non seulement il se ioignist avec luy pour exterminer le peché de l'Estat de Milan, pour quelque temps, & dans de certaines occasiôs: mais afin qu'il agist toujours d'une mesme sorte, pour auoir part en la recompense de ceux qui trauaillent à la vigne du Seigneur. Ses prieres furent exaucées, & le Duc de Terreneue ne se contentant pas d'appuyer les Reglemens que le Cardinal auoit faits pour les Prestres, & pour les Laïques, en fit de nouveaux qui dépendoient de l'autorité seculiere, lesquels alloient à la mesme fin; de sorte que l'on disoit dans Milan, que la Prouince estoit gouvernée par deux Cardinaux, l'un de robe courte, & l'autre de robe longue. Les homicides, & les autres grands crimes qui se commettoient auparauant, cessèrent tout à fait : & les Magistrats qui auoient pour la part de leur Iurisdiction, les affaires criminelles furent presque sans

exercice. Milan deuint vne Ville pleine de feureté; le commerce y fleurit, & Dieu, donna vne si grande benediction à la terre, qu'elle rapporta vne moisson plus abondante qu'elle n'auoit fait de memoire d'homme.

En cette année, il celebra son dixième Synode, & y il publia les Decrets du sixième Concile Prouincial, afin qu'ils fussent obseruez dans son Diocese, à la lettre. Il y fit vne Oraison Synodale à son accoustumée, & prit son texte de ce qui est rapporté dans Esdras, de la ioye qu'eurent les ieunes Iuifs, apres le retour de la captiuité de Babylone, voyant ietter les fondemens du Temple, tandis que les vieillards pleuroient amerement, eux qui auoient veu le premier, auquel le second n'estoit nullemēt comparable. Il appliqua cette Histoire à l'estat present de l'Eglise de Milan, qui reuiouyssoit à la verité, tous les gens de bien par l'ordre qui y auoit esté estably; mais qui se trouuoit si esloigné de la Pieté, & de la Discipline de l'Eglise primitiue, que ceux qui en auoient connoissance, ne se pouuoient empescher de pleurer, lors qu'ils pensoient serieusement à cette difference, Augustin Valere, Euesque de Verone, se trouua present à ce Synode, & lia avec S. Charles, vne amitié tres-estroite. Ce Prelat ne se contenta pas d'auoir beaucoup de rendresse pour luy; il tâcha de l'imiter parfaitement. En effet il fut vn exemple de pieté, & comme il appelloit saint Charles vn second S. Ambroise, on peut bien l'appeller vn second S. Charles.

Vn particulier nommé Bartolomeo Pappi, mourut à Rome, & laissa tout son bien pour fonder vn College au lieu d'Ascone, sur le Lac Majour, où de ieunes gens seroient eleuez à la Pieté, & aux bonnes Lettres. Le Pape auquel il auoit laissé la direction, & la superiorité de ce College, en donna le soin au Cardinal, qui en fut rauy, voyant que ce luy estoit vne occasion fauorable de faire vn establissement tres-necessaire dans le Pais des Suisses, qui en auoit si grand besoin pour l'instruction de leur ieunesse. Il ne tarda guere à mettre la main à l'œuvre, & il alla luy-mesme à Ascone, où il fit choisir vne place propre pour ce College, & y mit la premiere pierre. On y trauailla en diligence, & il fut acheué l'année suiuate. Il y auoit vne de ses Parroisses, dans le voisinage, où la peste faisoit de grands rages : mais comme il estoit accoustumé à ne pas craindre ce mal qui fait tant de peur à tout le monde, le danger de sa vie ne le put empescher d'y aller faire sa visite. Elle fut d'vne tres-grande consolation pour tous ces pauures Habitans, & particulièrement pour les personnes infectées, qu'il consola avec vne bonté, & vne charité dont ils furent transportez de ioye, & qui leur fit benir le mal lequel leur procuroit vn secours si charitable, & si inespéré. Comme il y trouua vne grande pauvreté, il y fit des aumosnes proportionnées au besoin; & il emprunta de ceux qui l'accompagnoient, tout l'argent qui se trouua dans leur bourse; de

Il visite
vne Par-
roisse où
estoit la
peste,

forte qu'il fut contraint d'en prendre de quelques Marchands , pour s'en retourner à Milan.

Il vient
visiter le
Duc de
Sauoye,
malade à
l'extre-
mité , &
il le gue-
rit.

En ce mesme temps , il eut auis que le Duc de Sauoye , qu'il aimoit tendrement, estoit malade dans Verseil , & que les Medecins desespoient de sa vie. Aussi-tost il monta à cheual , & vint en diligence trouuer le malade qui estoit à l'extremité. Dès que ce Prince l'eust veu , il leua les mains au Ciel , & dit *le suis guery*. Sa Foy ne le trompa point : car aussi-tost il parut vn amandement si visible en son mal, qu'on ne le pût attribuer qu'aux prieres de saint Charles. Il le communia le lendemain de son arriuée , & fit faire les prieres de quarante heures dans l'Eglise Cathedrale , pour demander à Dieu sa santé , qu'il obtint aisément de sa diuine Misericorde. Le Duc apres sa mort enuoya vn grand lampadaire d'argent à son tombeau , avec vne attestation solemnelle d'auoir receu de luy la guerison de cette maladie.

1584.
Il tient
son on-
zième
Synode.

Il reuint à Milan , où il celebra son onzième Synode , dans le mois d'Avril. Il y prescha quatre fois avec plus de zele & de ferueur qu'il n'auoit iamais fait , comme s'il eust eu quelque aduertissement interieur que c'estoit la derniere fois qu'il parleroit à ses Curez , & à ses Ecclesiastiques. Ils en furent aussi tres-sensiblement touchez , & s'en retournerent chez eux plus enflammés qu'ils n'auoient iamais esté , au service des ames , & à l'observation de la

Discipline establie par leur Saint Prelat. Il y publia le volume qu'il auoit arresté en la Congregation de ses Vicaires Forains, où estoient contenus tous les auis, & toutes les regles necessaires pour la conduite de ses Parroisses, & pour donner à l'Eglise de Milan, la derniere perfection de la pieté Chrestienne. L'Esté arriuant, il alla visiter quelques lieux de son Diocese; & y establit beaucoup de Reglemens necessaires pour la dignité du culte diuin, & pour l'instruction des Fideles. Il transfera vne Eglise Collegiale dans vn gros Bourg, d'vn autre où elle estoit inutile & abandonnée, parce que les Chanoines n'y pouuoient resider, pour ne s'y pouoir loger; & cette translation fut fort vtile, mettant dans vne Parroisse assez grosse, vn nombre suffisant de Prestre pour la seruir.

Le Pape Gregoire X I I I. le deputa pour aller accommoder quelques affaires à Verseil, où l'Euesque Diocesain ne residoit pas, estant Nonce auprès de l'Empereur. Les principaux Gentils-hommes de la Ville auoient des querelles tres-facheuses, & les choses estoient sur le point d'vne tres-grande rupture, qui ne pouoit aboutir qu'à des assassinats effroyables. Plusieurs personnes de pieté s'estoient employées pour les accommoder, mais Dieu en reseruoit la gloire à saint Charles. La reputation de sa Sainteté prepara les esprits à l'escouter avec vn grand respect: & la maniere dont il parla, fut si puissante, que par l'Esprit de Dieu, il esteignit les

Il vient à
Verseil
par ordre
du Pape,
pour accommoder des
affaires
facheuses.

inimitiez que l'on croyoit irreconciliables, & reünit des cœurs qui sembloient ne se deuoir iamais rapprocher. Ce fut vn Ange de Paix pour cette pauvre Ville diuisée ; & comme elle estoit menacée de quelque horrible mal-heur, si les diuisions eussent continué, on ne peut exprimer la reconnaissance qu'elle témoigna au Cardinal de l'en auoir garentie par sa prudence. Les Euesques voisins l'y vinrent visiter pour profiter de ses discours, & de ses conseils, qu'ils receuoient comme des Oracles du saint Esprit. Entre les autres, le Cardinal Vincenzo Lauro, Euesque de Mondeui, en Piedmont, luy fit vne visite qui luy fut tres-agreable. Il le conuia de la part du Duc de Sauoye de l'aller voir à Thurin, où ce Prince seroit bien aise de recevoir de luy quelque témoignage de la ioye qu'il auoit de son mariage avec l'Infante d'Espagne. Saint Charles se resolut aisément à cette visite, qui luy donneroit encore moyen de voir le Saint Suaire de Nostre-Seigneur. Le Duc le receut, non seulement comme vn grand Cardinal, mais comme vn grand Saint ; & il entendit encore de sa bouche beaucoup d'auis pour la conduite de sa vie publique & particuliere, dont il eust esté à souhaiter qu'il se fust seruy. Sa vie eust esté plus tranquille, & il auroit fait moins de peine à la France, qui le trouua tousiours dans toutes les conspirations qui furent formées pour troubler son repos. Mais le discours de la façon d'agir d'vn des plus habiles Princes de

son temps , ne doit pas estre davantage estendu dans la vie d'un Saint qui n'agissoit point par l'Esprit du Monde. Quand il prit congé du Duc , celui-cy le conuia de luy faire l'honneur de reuenir à Thurin pour benir ses nopces , lors que l'Infante y seroit arriuée. Le Cardinal luy fit d'abord vne réponse ambiguë , & comme il se vid pressé , enfin il luy dit nettement : *Je ne croy pas que nous nous renouions iamais.* Ce furent des paroles qui eurent bien-tost leur effet , comme nous l'allons raconter.

CHAPITRE DERNIER.

De la maladie , & de la mort de Saint Charles.

ENCORE que toute la vie de saint Charles fust vne retraite mentale , toutefois il auoit accoustumé d'en faire vne locale tous les ans , en quelque Monastere écarté , où il employoit quelques iours pour faire vne reueuë seueré de sa vie , & pour prendre vn nouuel Esprit de zele & de pieté. Avant que de s'en retourner à Milan , il voulut passer au Mont Varsalle , dont nous auons parlé , & y faire ses exercices. Pour cela , il enuoya prendre le Pere Adorne , qui estoit son Confesseur , & auquel il se soumettoit avec la

1584.

S. Charles fait vne retraite au Mont Varsalle, où il tombe malade.

T V

docilité & l'humilité d'un Nouice, dans les choses spirituelles, luy qui y estoit un si grand Maître. Comme cette retraite devoit estre la dernière de sa vie, & sa preparation à la mort, il la fit avec plus de ferueur que toutes les autres. Il couchoit sur des planches de bois où il n'y auoit qu'une méchante couuerture. Il ne dormoit que trois ou quatre heures; il ne mangeoit que du pain, & ne beuvoit que de l'eau; & il faisoit six heures d'Oraison mentale, trois durant le jour, & trois durant la nuit. Ses Disciplines estoient tres-longues, & tres-rigoureuses; & il traitoit son corps avec autant de cruauté que s'il eust esté un esclau tout à fait rebelle à la Loy de l'Esprit. Il fit une Confession generale, & la nuit auparauant, il demeura huit heures en Oraison, les yeux baignez de larmes, & le cœur serré d'une douleur aussi viue que s'il eust examiné les plus énormes crimes du monde. On l'auoit tousiours veu tres-vny à Dieu durant ses retraites: mais en celle-cy, il parut plus abysmé en luy, & plus detaché de toutes les choses du monde, qu'il n'auoit iamais fait. C'est que son ame commençoit à sentir son dégagement du corps; qui ne devoit plus guere tarder à se faire. En effet, le vingt-quatrième d'Octobre, il eut un accès de fièvre; mais il le cacha si bien, qu'aucun des siens ne s'en apperceut; & il ne laissa pas de continuer ses exercices de penitence, & la visite des Oratoires de cette solitude. Il y en auoit deux ausquels il auoit plus deuo-

tion, & où il s'arrestoit plus long-temps à prier. C'estoit ceux de l'Oraison de Nostre-Seigneur au Jardin, & du Sepulchre. En l'un il entroit dans les angoisses de l'agonie de son Sauveur; & dans l'autre, il se mettoit en estat de mort avec luy, par vne parfaite renonciation à tous les sentimens, & à toutes les pensées de son amour propre, & par l'oblation de la vie d'Adam qui restoit en luy; afin qu'elle fust entierement détruite par la mort du Fils de Dieu.

Ayant eu vn second accès de fièvre, qui monstroît qu'elle se regloit en tierce, il le découurit au Pere Adorne, qui luy ordonna d'adoucir vn peu l'austerité de sa penitence, la longueur de son Oraison, & le travail de ses veilles. Aussi-tost il obeît, & souffrit que l'on fist cuire son pain en de l'eau pure, & sans sel, ce qui estoit vne grande delicateffe pour luy. Il permit encore que l'on mist vn peu de paille sur les planches, où il dormoit, & il abregea son Oraison de quelque heure. Mais il ne cessa point de celebrer la sainte Messe, encore que l'accès le prist cômme il alloit à l'Autel. Apres le troisième, il partit de la montagne pour aller fonder le College d'Ascone; & estant pressé du mal, il revint à Milan sur le Tesin. Arriuant à l'Archeuesché, quoy qu'il eust grand besoin de se mettre au lit, il entra toutefois dans la Chapelle, où il fit Oraison durant quelque temps. Apres cela, il se coucha, mais auparavant il auoit eu soin de recommander avec empressement, que l'on fist bien

traitter vn de ses Estafiers qui estoit malade. Les Medecins vinrent aussi - tost le visiter , & trouuerent que sa fièvre estoit continuë. Il leur abandonna son corps pour les remedes , comme il fit sa conscience entre les mains du Pere Adorne , ne voulant ny rien prendre , ny rien faire , que par son commandement. Il fit venir ses Cameriers pour reciter l'Office diuin avec eux ; mais les Medecins l'ayant auerty que son mal ne pouuoit pas souffrir la contention de cette priere vocale , il se contenta de l'ouyr reciter aux pieds de son lit. Il auoit tousiours esté particulierement deuot aux mysteres de la Passion de Nostre-Seigneur , & c'estoit la plus douce occupation de ses pensées. Cette deuotion s'accrût en luy à la fin de sa vie : & comme il ne vouloit pas appliquer son esprit trop fortement à la Meditation des douleurs de son Maistre , pour n'échauffer pas trop sa teste , il fit dresser vn Autel dans sa chambre , & mettre dessus vn tableau où le Fils de Dieu estoit représenté dans le Sepulchre , & au fonds de son lit, vn autre , où on le voyoit priant au Jardin des Oliues. Par cemoien il meditoit des yeux , & empeschant son entendement d'agir , il laissoit à son cœur la liberté de produire tous les mouuemens d'amour , de compassion, de reconnoissance, d'vnion, & de sacrifice, que la Grace luy inspiroit. Encore qu'il fust extrêmement foible , il vouloit toutefois comunier le lendemain dans sa Chapelle. Mais le Pere Adorne luy dit,

qu'il ne pouuoit faire cela sans accroistre
 extrêmement son mal , & s'offrit à dire la
 Messe dans sa chambre , sur l'Autel qui y
 estoit dressé. Le Cardinal luy repartit que
 sa Chambre n'estoit pas vn lieu sacré pour
 offrir le Sacrifice : & comme le pere Ador-
 ne luy eut repliqué , que toute la maison
 d'un Euesque estoit sacrée ; il demeura fer-
 me dans sa premiere resolution , si son mal
 ne l'empeschoit de l'executer ; *Ne voulant*
pas , dit-il , *donner aux autres l'exemple de fai-*
re dire la Messe dans leur chambre , contre les or-
des de l'Eglise. Les Medecins arriuant , le
 trouuerent presque sans fièvre , mais fort
 peu de temps apres, l'accez reuint avec tant
 de violence , qu'ils furent incontinent rap-
 pellez. Ils luy toucherent le poux , & trou-
 uerent que les forces luy alloient défail-
 lir. Cét accident les surprit extrêmement , &
 ils en aduertirent aussi-tost le Pere Adorne,
 afin qu'il preparast le Cardinal à la mort.
 Cette nouuelle ne l'estonna point , & il de-
 manda incontinent le Viatique. L'Archi-
 prestre du Dôme , accompagné de tous les
 Chanoines , le luy apporta , & il le receut
 avec tous les signes extérieurs de deuotion
 que son extrême foiblesse luy pût permet-
 tre. Le Comte d'Altaemps , & son fils , le
 Comte René Borromée , estoient aux
 pieds de son lit, avec tous ses domestiques,
 fondans en larmes , & soupirans pour la
 perte d'un si bon Maistre. Il voulut leuer la
 main pour leur donner sa benediction ,
 mais il fallut qu'on luy aydast à faire le si-
 gne de la Croix , tant ses forces estoient

affoiblies. On luy donna l'Extrême-Onction durant laquelle il entra dans l'agonie. Sa chambre se remplit incontinent de Prestres, & tandis que les vns faisoient la recommandation des mourans, le Pere Adorne estoit auprès de luy, avec le Crucifix à la main, qui luy crioit quelques paroles courtes, mais affectueuses, & propres à l'estat où il se trouuoit. Dom Bascapé qui l'assistoit aussi, se souuenant de luy auoir souvent ouy dire, qu'il desiroit mourir dans la cendre, & le cilice, l'en reuestit d'un qu'il couurit de cendres benites, & demeura auprès de luy iusqu'à ce qu'il eust rendu son ame à Dieu. Quand la nouvelle de l'extrémité de sa vie se répandit dans Milan, toute la Ville se troubla; & quoy qu'il fust nuit, chacun sortit de sa maison. Les vns allerent aux Eglises pour demander à Dieu, qu'il leur conseruast leur Pere commun: les autres vinrent à l'Archeuesché pour le voir. Ceux-cy firent des Processions par les rues, ceux-là vestus en Penitens, prirent de rigoureuses disciplines. Enfin, tous furent saisis d'une douleur si amere, & si tendre, que l'on n'entendoit que cris, & que gemissemens, en quelque lieu que l'on püst aller. Le bruit vint iusques dans les Cloistres des Religieuses, & chacune demanda à Dieu avec des larmes, & des sôûpirs, la santé de celuy qui les conduisoit avec tant de sagesse, & de charité, & à qui elles auoient de si grandes obligations. Le Gouverneur vint à l'Archeuesché, mais ayant trouué le Cardinal sans connoissance, il ne pût faire autre

Chose que messer ses larmes aux larmes de ceux qu'il trouua dans sa chambre, & que témoigner par des paroles passionnées, le regret qu'il auoit de perdre vn Prelat pour lequel il auoit vne si estroite amitié. Enfin, ce saint Archeuesque apres auoir demeuré quelques heures en vne agonie fort paisible, alla receuoir dans le Ciel, la recompense des trauaux qu'il auoit soufferts pour le service de son Maistre, en la quarante-septième année de son âge, commencée depuis vn mois. Aussi-tost que le bruit des cloches eut appris sa mort au Peuple de Milan, on vid dans la Ville vne aussi grande consternation, que si les Ennemis s'en fussent rendus maistres par surprise. Chacun crût auoir perdu son pere, & son defendeur, & on apprehenda quelque grande calamité pour la Prouince, à qui Dieu enleuoit vn si saint Euesque, en la fleur de son âge. Ses funerailles se firent avec toute la pompe qui estoit deuë à sa qualité, & à sa pieté, encore que par son testament il eut retranché toutes ces dépenses qui ne seruent de rien qu'à faire voir la vanité des viuans. Le Cardinal Sfondrat, Euesque de Cremone, celebra la Messe à son enterrement, & le P. Panigarole fit l'Oraison funebre, qui fut souuent interrompue par ses larmes, & par ses soupirs, aussi-bien que par les cris des Auditeurs, qu'ils estoient incapables de retenir. Dieu ne tarda guere à glorifier son Seruiteur, par vn si grand nōbre de miracles, que son tombeau fut incontinent enuironné de vœux rendus par ceux qui auoient recen-

Le troi-
siesme de
Nouem-
bre de
l'an

1584

la guerison de diuerſes maladies par ſon interceſſion. Les Chanoines du Dôme firent tout ce qu'ils purent pour ſ'oppoſer à cette deuotion populaire, voulant attendre que l'Egliſe l'eût authoriſée; mais il leur fut impoſſible d'en venir à bout. Clement VIII. que le Cardinal Baronius informa de ce concours vniuerſel, à ſon Sepulchre, leur fit dire, qu'ils n'empêchaſſent plus la deuotion des Peuples. Enfin, Paul V. le mit au nombre des Saints, & l'Egliſe honore auioird'huy par vne authorité legitime, celuy que la voix du Peuple auoit deſia canonizé.

*Fin de la vie de ſaint Charles
Borromée.*



ELOGE

DE

S. CHARLES

BORROME'E,

Cardinal du tiltre de Sainte
Praxede, & Archeuesque
de Milan.



A naissance de S. Charles, selon la chair & le sang, ne pouvoit estre guere plus illustre. Mais la naissance, selon l'Esprit de Dieu fut incomparablement plus noble & plus éclatante. Il méprisa tous les auantages de celle-là, & il conserua avec soin toute la gloire de celle-cy. Il estima beaucoup plus la famille où il estoit entré par le Baptême, que celle

d'où il estoit sorty en venant au Monde. L'aneantissement de I E S U S- C H R I S T, qui est le Chef de l'une, luy parut plus glorieux que l'elevation du Prince du Siecle, qui est le Chef de l'autre. Il aima mieux mourir avec le premier, au Sacrement de sa regeneration, que viure avec le second dans toutes ses vanitez. Il y mourut en effect au peché; mais ce fut pour ne plus mourir de la mesme sorte. La mort qu'il y receut, opera en luy vne vie constante qui le conduisit à la vie immortelle. Il s'y dépouïlla du vieil homme pour ne le reuestir iamais, & il s'y reuestit du nouveau pour ne le plus dépouïller. Il reconça aux pompes du Monde, lors qu'il ne les connoissoit pas, & il les méprisa tousiours depuis qu'il les eust connus. Il declara la guerre au Diable, & il ne cessa de la luy faire avec vn courage invincible. Il y promit de prendre la Croix de son Sauueur, & il la porta tous les iours de sa vie. Il y commença à deuenir la nouvelle creature, & il se renouuella si constamment par la Penitence, qu'il ne resta plus de vieillesse en luy.

Son enfance fut plus sage que l'âge parfait de ses compagnons. Dieu le preuint dès le berceau par des graces extraordinaires, & le marqua de son Sceau, comme vn vase d'élection. Son esprit parut alors aussi innocent que ses membres, & on ne vid point en ses petites coleres, en ses impatiences, & en ses ialousies, des marques de la corruption de son origine. Ses inclinations estoient toutes portées à la

vertu. Il n'y eut rien à défricher en vne si bonne terre, & elle se trouua capable de la culture que ses parens, qui estoient de vrayz Chrestiens, eurent soin de luy donner. Il suça la deuotion avec le lait, & auant que d'estre capable des fonctions de la Nature, il fut capable de celles de la Pieté. La foiblesse de l'âge ne luy apporta point d'empeschement. Il connut Dieu, lors que les autres enfans ne se connoissent pas encore eux-mesmes. Les petits Oratoires qu'il bastissoit estoient des modeles des grandes Eglises qu'il deuoit bastir. Si les ieux de ce merueilleux Enfant sont prophetiques, quelle doit estre sa vie quand il sera Pasteur de l'Eglise ?

On le vestit de long, comme vn Clerc, & cette robe modeste luy parut plus precieuse qu'vn manteau Royal, parce qu'elle le consacroit à Dieu. Elle estoit pour luy vne leçon de modestie, de retenue, & de grauité: mais il la pratiquoit si fidèlement, qu'il ne luy donna iamais sujet de rougir d'aucune legereté qu'il eust faire. Quand il fut Titulaire d'vne Abbaye que son Oncle Iule Borromée, luy auoit resignée, il en voulut estre l'Administrateur. Les Loix Ciuiles ne luy eussent pas laissé en cét âge, l'administration de son patrimoine. Mais son pere connoissoit que sa pieté valoit mieux que la majorité des autres. Il auoit desia trop d'experiences de sa vertu, pour craindre que le bien des pauures fust mal mesné par celuy qui les ayroit si tendrement. En effet, il ne se trompa

pas dans sa creance. Cét Abbé qui n'estoit qu'un Enfant, fut veritablement ce que son nom signifioit, c'est à dire, un pere des miserables. Les reuenus qui sont la rançon des pechez, & l'heritage des indigens, furent employez aux vsages pour lesquels ils estoient destinez. Les meubles, les jeux, la bonne chere, ne consumerent point ce qui deuoit nourrir les membres de I E S U S-CHRIST, l'Administrateur en prit la moindre part, & il donna un exemple à l'Eglise que depuis long-temps elle n'auoit pas veu.

Dans l'Vniuersité de Paue, où il alla pour faire ses Estudes, le mauuais air de la compagnie des Escoliers ne le put corrompre. Il passa au trauers de cette mer de débauche, sans perdre la douceur de ses eaux, ny en salir la purété. Il estoit attaqué des vagues de tous costez, & cette tempeste se trouuoit d'autant plus perilleuse qu'elle auoit moins de violence. Son âge, l'impunité des crimes, ou plustost la gloire qu'il en eust tirée parmy ses camarades, & leur mauuais exemple, luy tendoient des pieges inéuitables. Mais la Foy dont son cœur estoit remply, luy seruoit d'une ancre sacrée qui l'empeschoit d'estre emporté par un orage si agreable. Un de ses domestiques le mit à une épreuue bien plus dangereuse. Il fit couler une femme dans sa chambre, qui auoit tous les charmes propres pour le seduire. Elle employa les caresses les plus flatueuses dont son effronterie estoit capable. Elle estalla tout ce qu'elle auoit d'attraits,

elle versa tous ses poisons , elle alluma tous les feux qu'elle auoit en reſerue. Mais ſes charmes furent défaits , ſes careſſes ſe trouuerent inutiles , ſes attraits n'eurent point de force , ſes poisons perdirent leur malignité , & ſes feux deuinrent de glace contre Charles , qui ſe ſauua par la fuite de cette redoutable ennemie de ſa pureté. Il aimamieux fuir que combattre , & dérober la victoire , que ſe mettre au hazard de la perdre en la diſputant. Ce danger ſi glorieuſement éuité luy donna de la défiance de ſoy-mefme , au lieu de le rendre temeraire. Cette bataille ſi genereuſement gagnée luy apprit à craindre d'eſtre vaincu. Son triomphe ne l'endormit point , & il veilla toujours de peur d'eſtre ſurpris par vn ennemy qui ne reſoſe iamais. Il connoiſſoit qu'il n'y auoit ny tréue , ny paix à faire avecque luy , & que lors qu'il paroifſoit le plus foible , il eſtoit le plus redoutable. Il ſçauoit qu'il portoit en luy-mefme cét ennemy , & qu'il auoit dans le fond des moüelles le venin dont il ſe deuoit deffendre. Enfin , c'eſtoit vn Ange terreſtre en pureté , mais vn Ange aneanty par l'humilité de ſon cœur. Il portoit ce threſor du Ciel dans vn vaiſſeau de terre ſujet à ſe caſſer , & il le donnoit à garder à la Grace dont il l'auoit receu. La pureté de ſon cœur eſtoit plus grande que celle de ſon corps. Il n'y auoit pas la moindre tache d'orgueil & de confiance en ſes forces , qui le ſouillaſt deuant les yeux de celuy qui eſtant vn tres-pur Eſprit , ne peut aimer vn corps chaſte animé

par vn esprit remply de son amour propre. Il sçauoit que Dieu est Saint en s'aimant, mais que l'homme ne se sanctifie qu'en se haïssant soy-mesme.

Quand le Cardinal de Medicis son Oncle fust esleu Pape, la fortune luy presenta tous les honneurs & tous les thresors de l'Eglise. Chacun s'en vint réjouyr avecque luy, & on en fit comme vne feste publique dans Milan. Mais Charles considéra la Chaire de saint Pierre, comme vn Throsne esleué au dessus duquel estoit vn precipice effroyable. Cette hauteur ne luy fit point tourner la teste, mais elle le fit trembler d'horreur pour celuy que la Providence venoit d'y porter. Il considéra le poids de la charge, & non pas cét attirail de pompe qui l'accompagnoit. Il recourut au Sacrement de la Penitence pour purifier son cœur des moindres pensées de vanité, que la premiere dignité du monde qui entroit dans sa maison, pouuoit luy auoir données. Il se fortifia par le Corps de **I E S V S- C H R I S T**, contre ces grandeurs qui le regardoient. Il demeura chez luy, & il fallut que le Vicaire de **I E S V S- C H R I S T** adioustast la menace aux prieres pour le faire venir à Rome. Il vid aussi-tost entre ses mains, le timon du vaisseau pour le gouverner. Il ne connoïssoit encore ny la mer, ny le vaisseau, ny les matelots, ny les vents, ny les estoiles, ny les écueils : mais l'Esprit de Dieu qui le conduisoit sans qu'il le reconnust, suppléa en luy le defect de l'experience. A l'âge de vingt-deux ans, il pa-

rut vn vieillard en sagesse, en prudence, & en grauité. Il fit en se ioüant les affaires dont il deuoit estre accablé. Il suffit à toutes, & leur foule ne seruit qu'à decouurir la capacité de son esprit. Il consultoit des personnes habiles dans celles qui estoient importantes, & il aimoit mieux receuoir d'eux la lumiere, que la prendre dans soy-mesme. Son autorité qui n'auoit point de bornes, ne le porta iamais à aucune violence. Il ne s'en seruit que pour bannir de Rome, ce qui en pouuoit troubler le repos, & pour faire viure l'innocence en seureré. La Iustice entre ses mains tint tousiours la balance droite. La puissance des criminels ne fit point dissimuler leurs crimes; & les pauures oppressez trouuerent en luy, vn Protecteur inflexible aux recommandations, & à la faueur. Il estoit accessible à tout le monde, & quoy qu'il ne fust pas flateur, personne ne sortoit mécontent de son audience, parce qu'il estoit sincere. Il ne faisoit point esperer les choses qu'il ne vouloit pas accorder. La promptitude de ses refus dont il rendoit la raison, tenoit lieu de grace à ceux qui se fussent ruinez en esperant. Il auoit la famille d'un Neneu de Pape, mais elle estoit composée de tant de personnes habiles qu'il en forma vne Academie. L'esprit, la science, l'eloquence, & la vertu y donnoient l'entrée, & le plus fauory estoit celuy qui auoit le plus de merite.

L'Herésie continuoit à faire d'horribles rauages dans la Frâce, & dans l'Allemagne,

& la conclusion du Concile de Trente estoit le seul remede qui pouuoit arrester le cours d'un si grand mal. Les interets particuliers de la grandeur Pontificale, de la Cour de Rome, & de la famille de S. Charles, le deuoient empescher de songer à sa conuocation. Mais il n'a d'autres interets que pour la famille de I E S U S- C H R I S T, & pourueu que la Paix y puisse estre establee, il ne se soucie pas de toutes les pertes de sa maison. Il porte son Oncle à le conuoyer, & pour auancer vne œuvre si importante, il perd le sommeil, & le repas : il quitte tous autres soins, & n'épargne aucune dépense. Enfin, cette grande Assemblée se conclut heureusement. Le S. Esprit rend ses Oracles par la bouche des Peres assemblez. L'Herésie est confondue, les erreurs sont frappées du foudre, la Doctrine Catholique est enseignée dans sa pureté, la Discipline de l'Eglise est restablie en son ancienne splendeur, les ruines de la maison de Dieu sont réparées, & le Temple est comme rebasty de nouveau. Charles fut aussi soigneux d'observer les Decrets du Concile qu'il l'auoit esté de le faire cōclure. Il les imprima dans sa memoire, mais il les graua mieux dans son cœur. Ce fut sur ce modele qu'il regla la conduite de sa vie publique, & particuliere, & on peut le nommer, le Concile de Trente viuant & animé.

Piel'auoit pourueu de l'Archeuesché de Milan à l'âge de vingt-deux ans, & d'abord chacun considera cette promotion comme
vn

vn effet de l'amour déreglé du Pape pour son Neveu ; mais il fit bien-tost reconnoître que c'estoit vne conduite amoureuse de Dieu sur ce Diocèse, sur la Prouince, & sur toutel'Eglise. Il rompit toutes les chaisnes qui le pouuoient attacher à Rome auprès de son Oncle, & il le pressa si instamment de luy donner congé d'aller visiter son Espouse, qu'il ne pût le luy refuser. Il vint à Milan où il celebra le premier Concile Prouincial, qui fut comme l'Aurore de la lumiere qui deuoit estre répandue dans son Diocèse. On croyoit voir vn Neveu de Pape somptueux en sa suite, magnifique en ses meubles, delicat en sa table, inaccessible aux pauvres, & esloigné du trauail. Mais on vid vn Archeuesque modeste, mortifié, facile, benin, & infatigable. Il y auoit cent ans que Milan n'auoit veu son Prelat, & elle eut sujet de se consoler en celuy-cy de ce long veufuage. Apres la mort de son Oncle, il se donna tout entier à son Eglise. Les grands reuenus dont il iouïssoit l'embarassèrent, & il quitta en vne matinée, soixante mille escus de rente. S'il eust voulu consulter beaucoup de Casuistes, il eust trouué que non seulement il les pouuoit retenir, mais qu'il pouuoit les augmenter. Il ne consulta que la lumiere de Dieu qui luy fit voir que la regle Ecclesiastique qui venoit d'estre establie dans le Concile, ne pouuant s'accorder avec la pluralité des Benefices, il estoit obligé de donner l'exemple de son obseruation. Il eust bien voulu imiter la

pauvreté des anciens Euesques qui vivoient des Oblations du Peuple. Mais la malignité du Siecle ne pouuant luy permettre qu'il en vîst de la sorte, il se contenta d'estre vn fidele Dispensateur des biens de son Archeuesché. Il les considéra comme le patrimoine des pauvres, au nombre desquels il se mit le premier. Il ne regla pas sa dépense par les Loix du Siecle, ny par les mauuais exemples des personnes de sa condition. Mais il regarda sa pourpre comme teinte du Sang de I E S V S- C H R I S T, dont il tacherait l'éclat, s'il laissoit perir de faim, les membres pour lesquels il est mort. Il l'eut devant les yeux comme vne leçon continuelle de l'amour du Fils de Dieu pour les hommes, & comme vn engagement à répandre son Sang pour l'Eglise. Il n'y voyoit rien de seculier, rien de prophane; c'est pourquoy il n'en vouloit pas conseruer l'honneur par la pompe & par la vanité du Siecle. A la verité, il estoit ialoux de maintenir la dignité du rang où il estoit élevé. Son exactitude en cette rencontre estoit plustost vn effet de la necessité où l'engageoit sa cōdition, & de la coustume qu'il ne pouuoit changer, que d'estime, ou de recherche de ces deferen- ces exterieures. Au mesme temps qu'il prenoit la droite sur tout le monde, son cœur s'abaissoit aux pieds de ceux devant qui il passoit. Il ne s'entestoit point de la fumée de cet honneur qu'on luy rendoit; mais il songeoit serieusement aux obligations qu'il auoit d'estre autant élevé sur tous les

autres , par les Vertus Ecclesiastiques, qu'il l'estoit par sa qualité.

Tout autre courage que le sien n'eust pû résister aux tempestes qui s'éleuerent contre luy. Il vid le Gouverneur de Milan , les premiers Magistrats , les mauuais Prestres , les Moines déreglez , & les Laïques liguez contre luy , pour faire tomber le grand ouvrage de la reformation de son Diocèse , & de sa Prouince , qu'il auoit si fort auancé. On fit des desseins contre sa vie , & vn Moine Apostat , se mit en deuoir d'en executer vn qui eust reüssi indubitablement , si Dieu n'eust fait vn miracle pour l'en garentir. On essaya d'animer le Pape contre luy , & on porta le poison de la calomnie dans la source de la verité pour le perdre. On escriuit en Espagne pour surprendre le Roy , & faite passer auprès de luy , pour factieux & pour vsurpateur de son autorité , celuy qui brusloit de zele pour son seruice. Ses parens le coniurerent de se relascher pour ne pas perdre la maison. Ses amis le presserent d'accorder quelque chose à la corruption du Siecle , & de sauuer vne partie de ses Reglemens par l'abandonnement de l'autre. Mais Charles demeura tousiours inébranlable dans sa resolution. Il l'auoit prise avec Dieu dans la priere , & celuy qui ne change point , affermit si bien son cœur , qu'il ne pût iamais changer. Il se seruit vigoureusement des armes que l'Eglise luy mettoit entre les mains , & il ne craignit point de jeter le foudre de l'excommunication sur

des testes qui se croyoient inuiolables. Le Pape approuua sa conduite , & le Roy d'Espagne ayant reconnu la iustice de son procédé , se declara le Protecteur de celuy dont on le vouloit rendre l'ennemy. En des combats si longs & si perilleux , il n'eut pour ses armes, que les ieusnes , les veilles, les larmes , & les prieres. Mais ces armes furent victorieuses de toutes les attaques, & de toutes les ruses du Prince du Siecle , qui ne pouuoit souffrir qu'il détruisist son regne avec tant de force.

L'ingratitude des Milanois qui auoient député des Ambassadeurs pour se plaindre au Pape des Reglemens dont ils eussent deu le remercier , paroissoit d'autant plus grande , qu'elle venoit apres le secours qu'il leur auoit rendu durant la peste. Toute la vie de ce saint Cardinal est éclatante; mais cette portion est si lumineuse que l'on n'en peut presque soustenir l'éclat. La plus terrible des choses terribles ne luy fit point de peur. Il vid la mort qui rauageoit sa Ville capitale , & il en eut moins d'horreur pour luy , que de pitié pour ses brebis. Il pouuoit l'éuiter pour se conseruer à son Diocese , & auoir des raisons de Iustice & de Pieté pour excuser sa fuite en cette dangereuse rencontre. Dans vne assemblée de Theologiens , il ne trouua personne qui approuuast son zele , & qui mesme ne fist connoistre qu'il l'accusoit d'indiscretion. Ses domestiques tremblèrent d'abord quand ils le virent resolu de seruir les pestiferez , & firent vne ligue

de ne le point accompagner. Mais la Charité qui luy auoit inspiré le dessein de donner son ame pour son troupeau, luy mit dans la bouche des paroles si puissantes, qu'il changea le cœur de tous ceux auxquels il voulut parler. Son courage enhardit les plus timides, & personne ne crut que la mort osast approcher d'un homme qui triomphoit si saintement de toutes ses terreurs. Aussi s'en esloigna-t'elle tousiours avec respect, & son zele fut vn preseruatif admirable pour tous ses domestiques. Il ne se precipitoit pas dans le danger avec temerité, mais aussi ne le fuyoit-il pas avec foiblesse. Il communia des Curez qui s'en alloient mourir, & ayant le Dieu de la vie entre les mains, il ne craignit point d'entrer dans des chambres où la mort alloit prendre des victimes. Il receut l'esprit empesté de ces Prestres mourans, sans que sa corruption luy donnast seulement vn petit mal de teste. La Charité remplissoit son cœur d'un feu diuin qui chassoit tout le mauuais air. Il ne faut pas s'estonner que durant cette calamité, il fist vne si grande profusion de son bien, luy qui faisoit si bon marché de sa vie. Il se vid, par ses aumosnes, aussi pauvre que les pauvres qu'il assistoit. Ce ne luy fut pas assez d'auoir dépoüillé sa maison de tous ses meubles; il s'engagea en de grosses debtes, & il se fust volontiers vendu luy-mesme s'il eust trouué quelqu'un qui l'eust voulu acheter. Son trauail continuel ne luy fit rien rabattre de ses austeritez. Au con-

traire, voyant la colere de Dieu allumée contre son Peuple, il crut estre obligé de se presenter à elle comme vne victime publique. Il se chargea de tous les pechez de son troupeau, il en fit l'amende honorable dans des Processions solennelles, & il tacha de les expier en secret par des penitences extraordinaires. Enfin, il obtint la grace qu'il demandoit avec tant de larmes. L'Ange exterminateur remit l'épée qu'il auoit tirée, au fourreau, la peste cessa dans Milan, & on eut raison d'attribuer sa fin aux prieres de saint Charles.

Elle seruit à le dégouster de plus en plus de la vie presente. Le feu du zele qui l'auoit porté à mépriser si courageusement la mort, s'alluma de iour en iour dauantage en luy. Ce fut l'Esprit qui conduisit tous ses desseins, & qui anima toutes ses oeures. Il n'y eut rien de difficile qu'il ne surmontast. Le Prince du Siecle s'opposa en vain aux choses qu'il entreprit pour destruire son regne. Ses ruses furent confonduës, & ses efforts inutiles. Il remit par tout, en dépit de luy, la splendeur dans la celebration de l'Office diuin : la magnificence, ou la netteté dans les Temples ; le respect dans les lieux Saints ; la Doctrine, & le bon exemple parmy les Prestres ; la Discipline Reguliere dans les Monasteres ; l'ordre dans les deuotions publiques, la pieté dans les Confrairies, la Vertu Chrestienne dans les familles. On reconnut les Milanois entre tous les autres Peuples d'Italie, par le reglement de

leurs mœurs, à leur façon de parler, & à leur modestie. La Prouince changea de face, & fut aussi heureusement cultivée, qu'elle estoit negligée auparavant. Ses Suffragans eurent en la vie de leur Metropolitain, vn modele accompli de leur vie particuliere, & de toutes les Vertus qu'ils deuoient pratiquer. Ils puiserent dans son esprit les lumieres qu'ils répandirent dans les Prestres & dans les Laïques. Ils apprirent de ses Conciles l'art de conduire leurs Dioceses. Ils n'eurent qu'à marcher sur ses vestiges pour bien fournir la carrière Episcopale. Ils trouuerent dans ses aduis la resolution de leurs doutes, & dans ses consolations, le remede de toutes leurs peines. Ils le virent accourir en poste chez eux, pour les ayder à faire vne bonne mort. En ce passage terrible, il adoucit leurs maux, il diminua leurs craintes, & il raffermir leurs esperances par les paroles de vie qui sortoient de sa bouche, & qui entroient iusqu'au fond des cœurs.

Les Brebis le trouuoient aussi secourable que les Pasteurs. Il auoit encore plus de soin des pauvres que des riches, parce qu'il voyoit en eux l'image de son Sauueur, qui s'estoit dépouillé de toutes les richesses de sa gloire, pour enrichir nostre pauvereté. Les orphelins trouuoient en luy vn pere, les veufues, vn mary; les oppressez, vn azyle; les vices, vn fleau; les vertus, vn appuy; toutes les bonnes œuvres, vn executeur. Sa prudence estoit sans finesse, son courage sans orgueil, son zele sans emportement, sa constance sans dureté, sa magnificence

466 ELOGE DE S. CHARLES BORROME'E.
 sans profusion, la deuotion sans foiblesse,
 son austerité sans aigreur, & la charité sans
 bornes. Ce Soleil se coucha trop tost pour
 la Terre; mais en peu d'années il fournit
 vne grande carrière. Il fut tousiours lumi-
 neux. Nuls nuages de foiblesse, ou de pas-
 sions ne le purent iamais obscurcir. Nulle
 interposition de corps ne le fit tomber dans
 l'eclipse. Il fit produire des fleurs & des
 fruits à la terre de son Diocese, & il chan-
 gea les deserts les plus steriles en campa-
 gnes agreables & fecondes. En se retirant
 de la terre, il ne s'esteignit pas, mais il alla
 commencer vne course eternelle dans le
 Ciel, d'où il éclairera l'Eglise qu'il a tant
 aimée, iusqu'à la consommation des Sie-
 cles.

F I N.

CATALOGVE DES AVTRES OVURA-
ges de Messire Antoine Godeau Euesque de
Vence, qui se vendent dans la mesme Boutique.

- L'Histoire de l'Eglise avec l'Abregé des
 Annales de l'ancien Testament, 2. Vol.
 fol.
 — la suite ou Tome III. & IV. de ladite
 Histoire, 2. Vol. fol. 1663.
 Lest Tableaux de la Penitence, avec figures, 4.
 — les mesmes en petit avec figures, 12. 1663.
 Le Panegyrique de S. Augustin, 12.
 Eloge Historique du B. François de Sales,
 1663.
 La Vie de S. Charles Borromée, grosse lettre.
 8.

Österreichische Nationalbibliothek



